

**LIBRI QUINQUE
APOLOGETICI
PRO RELIGIONE,
VTRAQUE
THEOLOGIA, ...**

Vincent Baron, Josè Maria
Fonseca de Evora





IV 097 f r

Dato alla Sig.^{la} Maria Modica

scudi 3 B. 130

71 scudi 2. 50

73 al Marito 2. 00

49 al Lei 0 90

2. 49


2. 7

72

73

1. 55

2. 49



Ex Libris Huius Venerabilis Decretalis Romae

LIBRI QVINQUE

APOLOGETICI

PRO RELIGIONE,
VTRAQUE THEOLOGIA;
MORIBVS, AC IVRIBVS ORDINIS
PRÆDicatorVM.


ADVERSUS
THEOPHILI RAYNAUDI TRES,
totidem Petri de Alua libros, aliquot Epistolas
Ioa. Launoij, Expostulationes Carterij, aliosque :

IDEA
MANVDVCTIONIS
AD ANALYTICAM THEOLOGIAM,
CÆTERIS COPIOSIOR.

*Ad Reuerendissimum P. DOMINICVM OTTOMANVM
Ordinis Prædicatorum, cuius natalia vindicantur.*

A VTHORE.

R. P. VINCENTIO BARONIO Ordinis Prædicatorum,
Conuentus Tolosani S. Thoma Aquinatis.


Notæ ad  *S. Augustini ad*
Contro *Lipsæ 1723.*

PARISIIS,
Sumptibus SIMEONIS PIGET, viâ Iacobæâ;
sub signo Prudentiæ.

M. DC. LXVI.

Cum Privilegio Regis & Approbatione Doctorem

Ex Libris H. J. Van der Linde



Received of
H. J. Van der Linde
the sum of
Five pounds
for
the purchase of
the book
The History of the
County of Devon
by John Smith
1790



REVERENDISSIMO AC RELIGIOSISS. PATRI

DOMINICO OTTOMANO

IBRAHINI

TVRCARVM IMPERATORIS

PRIMOGENITO,

ORDINIS PRÆDICATORVM.



VAMVIS multa, magna-
que suppetant nomina, qui-
bus Te compellem, DOMI-
NICE OTTOMANE; nullum
tamen illustrius, aut quod
Te verius Tui officij, &
nos, quâ sis prosequendus,
obseruantia moneat; horum duorum quibus
Te conueni, vno ascititio, innato altero, mihi
occurrit, aut tibi continget vnquam: atque
horum primum lauacro aquæ, & verbo vitæ
in Christo regeneratus Tutemet elegisti; po-
stremum vero primorum natalium splendore
sortitus es. Sed cum adeo diuersa sit huiusmodi

EPISTOLA.

nominum , hinc à natura , inde à gratia origo repetita ; illis vt salua fit sua dignitas , & maior in dies accedat ; alio plane ad vtrumque , Te , & nos animo comparatos esse oportet. Equidem ad Tuum , nedum officium , sed etiam decus maximum pertinet , vt à Familia regnatrice & victrice Orientis , excepti cognominis prorsus obliuiscare ; alterius , quod secunda generatio indidit , memineris semper , & totus in illo implendo incumbas : nos vero remissâ tibi prioris nominis excolendi curâ , posterioris rationem habeamus. Nec dubito quin sapientes , & ab omni æmulatione ac partium studio alieni homines , hanc nostri iudicij æquitatem sint probaturi ; & quas illis partes assignamus reuerentiæ , Te ex Tuis natalibus suspiciendi , & rerum humanarum ex Tuo casu admirandi vices , libenti excipiant animo , & accurate exequantur : nec contenti id genus obsequiorum Tibi exhibuisse , causæ Tuæ vindicias suscipiant , cum aliqua in æmulos indignatione , quod futilibus suspicionibus , certa Tuæ originis argumenta eleuent , & per summam cæcitatem , aut nequitiam , duobus Ecclesiæ nobilibus Ordinibus Melitensem Equitum , & Dominicanorum , quæ à Te in illos defluxit , gloriam , totis viribus ereptum eant. Nec propria tantum & priuata est hæc duarum Familiarum , sed publica & communis Christiani nominis causa , quæ ex Tuo casu graue & longum à viginti , & ultra annis bellum accendit , adhuc multo diuturnius futurum : & post tot fragores armorum , tot urbium obsidiones , post tot pugnas terra mari-

EPISTOLA.

que cruentissimas, vnius libertatis Tibi ereptæ vindicandæ, & inde nominis OTTOMANICI iniuriæ vlciscendæ consilio, reperti sunt, qui contendant hos rerum motus nihil ad Te pertinere, & alias belli causas, præter omnem veri speciem, comminiscantur.

Sed has male moratorum hominum vociferationes, Tibi surda aure prætereundas consulere, nisi id iamdiu in animum induxisses, & propositi tenacem, nihil Te huiusmodi diuinationes malignas, & apertas calumnias morari agnouissem. Sed quo ipse Tui nominis vindicandi negligentior es, magisque æquo & forti animo fers hoc secundum infortunium, quo nihil Tibi fieri volunt inuidi reliquum ex gentilitia maiestate, eo conuenit nos ardentiori studio, quod vnum superest ex ingentibus bonis decus & ornamentum, contra malignas coniecturas, & insanos clamores propugnare: & dum Te indefensum esse non patimur, validius ipse æmulatorum depelles impetus, & audaciam contundes, si fortunæ ludibrio quod in Te miratur Orbis, ad quod etiam Posteritas obstupescet, mutatam sortem, non solum forti animo feras, quod ipsa immedicabilis & ineluctabilis malinecessitas, etiam inertibus indicit: sed etiam ardentiori sapientiæ & pietatis studio sic redimas & refarcias; vt qui te propius nouerint, non iam fortunæ vices, sed progressum virtutis in Te mirentur: nec dubitent quin illa Tibi ex animo verba vindices, *Sapientiam regnis & sedibus præposui*, & in quem Te casus impulit, locum, videaris ipsemet elegisse; & ita adama-

EPISTOLA.

re ; vt primum infortunium & captiuitas Tibi vera fœlicitas , & vna fit libertas potior & antiquior orbis Imperio , quod Te primogenitum Orientis Imperatorum manebat. Itaque certaminis pro tua aut verius Melitenfis & Dominicani Ordinis gloria laborem , sic partiendum censeo ; vt ipse natalium contemptu ex pietate Christiana , vno sapientiæ studio probes Te loco dignum vnde prodieris , quem nos inuictis argumentis Tibi sumus asserturi. Neque enim in gloriam , laudemque Tibi , nobisque cederet quamlibet indubitata origo regia , nisi ipsa Tibi præ sorte Christiani & Religiosi vilescat ; eamque commendes & augeas eximia pietate cum eruditione coniuncta ; atque ita institutus verissime , certaue persuasione dicas, Perieram , nisi periissem : auitum thronum , estitutum pateret iter & decliuus esset ascensus , nunquam adirem , nisi cui nomen dedi , & quam professus sum religionis promouendæ causa. Vbi id à Te obtinueris , & animo altè defixum hoc votum persuaseris omnibus , inflexo vitæ Christianæ & religiosæ tenore , qui nobis de Tuis natalibus litem mouent , nec nostris hunc errorem sibi ereptum patiuntur argumentis ; omnino eiurabunt , teque agnoscent , nedum Imperatoria profapia natum , sed diuina digniorem.

Verum de his fufius ad calcem Apologiæ : & cum in Te definat , quasi in præcipuum nostrarum controuersiarum caput , & maximum Dominicanæ Familiæ decus ; vt finis respondeat exordio , id à Te sumendum , & totam lucubra-

EPISTOLA.

tionem tuo nomini dicendam censui. Cum enim ad Tui defensionem, commendationemque me imparem sentiam, ipse in id certaminis vocandus fuisti, cum plus momenti ad victoriam, & ad cumulatam gloriam Tua virtus & sapientia, quam cuiuslibet Scriptoris eloquentia & eruditio sit habitura, & a peruicacibus aduersariis magis pronum tibi sit ardenti Christianæ ac religiosæ sapientiæ studio, quam nobis certis argumentis consensum extorquere. Ad hoc susceptæ causæ commodum, & disputationis ineundæ felicem exitum, ex coniunctione nostrarum virium, accedunt momenta duæ, quæ me grauius vrgent, & impellunt maxime, singularis ad Te colendum, & ad omnem pietatis & sapientiæ progressum & exercitationem pro virili adiuuandum affectus. Quamuis ita studio & natura comparatus sim, vt viros summo loco natos, quos Deus supra communem hominum sortem prouexit, reuereri, & omni obsequiorum genere prosequi, non minus gratum sentiam, quam æquum ac necessarium existimem: fateor tamen, me nescio quadam fortis humanæ commiseratione, in eorum obseruantiam cultumque longe propensiores esse, quos fors loco deiecit: nam præterquod ipse lapsus qui forte aliis contemptum ingerit, apud me venerationem auget, eamque aduersa fortuna vexatis, quam secunda florentibus libentius impendo, quod solari malim afflictos, quam fœlicibus adulari, illisque ad leuamen, & ad conferenda magis, quàm istis ad recipienda beneficia manum porrigere, atque hoc inde ma-

EPISTOLA.

ximi apud me compendij bonum capto; vt quæ à me prodit veneratio & obseruantia gratuita sit, & se contenta, vnus æquitatis & humanitatis respectu, seposita omni spe vtilitatis exhibeatur.

Ex quo Te primum nosse datum est, opportunus huiusmodi obsequiis sincerioribus visus es; & inde me Tibi longe arctius deuinctum sensi, quam soleant aut possint mortalium plures magnatibus & principibus spe, & pollicitationibus ingentium præmiorum obnoxii esse & implicari. Et quamuis vna sortis mutatio, comperta indoles, inuicta tot malis animi constantia, hanc meam Tibi reuerentiam conciliasset, ab inuito etiam extorqueres, quod videram à plerisque, nedum inique recusari, sed etiam per summam crudelitatem in Te sæuiri. Sic enim interpretor illorum consilia, factaque, qui adeo à stupore aut commiseratione ereptæ nedum Tibi libertatis, sed etiam summæ potentiae aberant; vt in illam ius omne & nomen etiam ipsum abrogent: quod mihi immanius visum est illorum crudelitate, qui in mortuorum manes & sepulchra desequiunt, & grassantur. Quare cum plures populi Orientem quam Occidentem solem coluerint, cum Principes secunda fortuna florentes, mancipiorum & adulatorum turbæ obsideant, circa deiectos horrida sit solitudo, & eadem prorsus quæ mortuos sequitur & sepulchro illatos; singulari Dei beneficio summeque gloriæ imputo, quod Tibi nedum infœlicium Principum sortem experto, sed inde etiam à multis vexato, sicuti solent quassatâ naue naufragi, qui post maris sæuitiam grauio-

EPISTOLA.

rem terræ patiuntur , quaecunque humanitatis officium præstare , aut saltem testari concessum sit meum in te animum propensissimum. Ex iis ad quæ priuata vel communi hominum conditione natus videbare , vna superest, quæ Te superstitie perire & deleri nequit origo. Præterea duo Tibi aduenere bona , quibus amissa reparentur , & quod saluum est, cumuletur , Christiani ex baptismo , & Dominicani ex voto religionis professio : itaque cum eo ipse loco sim , vt bonis quæ seruaſti, aut quibus nouo Dei munere donatus es , nihil possim addere ; id vnum quod in me est, diligenter præstabo : Primum bonorum ex origine aduersus æmulos pro virili defendam & vindicabo ; reliqua duo Tibi gratulabor impensè, & quam grato in Deum animo ea æstimare, quam diligenti cura excolere & augere debeas , quamdiu vixero etiam atque etiam monere non desinam. Si quid aliud Tua conditio , & mea facultas officii pateretur à me exhiberi , in id totum me impenderem : nam velim persuasum habeas , non aliunde in Te colendo quàm ex vna impotentia modum me facere aut finem. Verum dilata ad huius Apologiæ calcem primi boni vindicatione , alterius nempè Christianismi, eiurata superstitione auita, suscepti, nihil opus est longius sanctitatem fœlicitatemque prosequi , & vnus qua salui esse possimus, religionis dotes illi opere proluxa disputatione asserere ; cum spontaneo fidei , maturoque supra ætatem delectu, immotoque proposito testatum feceris , Te nihil eorum quæ in hanc rem scripta sunt, aut dici

EPISTOLA.

possunt latuisse : & iniuriæ locus esse videretur, si Te horum quasi ignarum commonefacerem, aut quasi incertum & dubium viderer velle confirmare. Sed quod ad Dominicani professionem pertinet, quod postremum in Te diuinæ liberalitatis beneficium recensui; ne eodem quo Christianismum loco reponam, nec Tibi illius quasi comperti & indubitati boni gratulationem tantum debeam; magnis vocibus, ingentibus scriptis intercedunt Petrus à Clausa-valle, & Petrus de Alua, qui illam tot tantisque accusationibus, tum antiquis, tum nuper cufis grauant; vt si vera aut verisimilia sint, quæ in nos pluribus voluminibus semel & iterum editis scripserunt; merito Te pœnitere possit vestem induisse, tot spurcitiis sordidam & maculatam: tot enim vitiis & sceleribus infames traducunt nos; vt si aliqua sit ipsis fides, sancti & infantes sint præ Dominicanis à quibus ad nos confugisti Turcæ & Mahometani. Sane quamuis ceteræ deessent causæ vindicandi à tot horrendis flagitiis nostri Ordinis homines, præter offendiculum quod Tibi ingerit huiusmodi calumniarum immanitas, quæ in nostram Familiam ingressum longè captiuitate, & casu à summo Imperio intolerabiliorem deformant Tibique subiiciunt, possem-ne tacere, aut dissimulare tam grande scandalum, nec verbum contra hiscere, quod silentio verum agnoscere viderer? Quâ ratione Dominicanum nomen, quo nihil mihi post Christianismum antiquius est, non proderem, si impunè æmulorum libidini lacerandum permetterem? Sed quod in Te colendo,

EPISTOLA.

& ad bonam mentem promouendo, præ me fero propensissimum & ardentissimum studium, prorsus abiicerem, nisi quam isti ingerere Tibi possent cogitationem, Dominicanæ Religionis delectu, nouissima peiora prioribus facta esse, diligenter & validè semouerem, vt si quid scandalum Religionem Christianam amplexus patiaris, non à Familiæ, cui nomen dedisti, sed ab illius æmulum vitio ipse sentias contigisse. Non abnuo, si vera essent, quæ impropèrantur Dominicanis, quin meritò Te pœnitere posset, & pudere tuæ professionis. At si ea sit illius sanctitas & gloria, vt ab acerrimis Aduersariis nugis solum, & apertis calumniis potuerit laceffiri, quamuis dissimulare nequeam hinc grauissimum scandalum nasci, & exclamare etiam cogar, *va illis, per quos scandalum venit*: Tuum tamen, & æqui Christiani Lectoris iudicium esto, vnde id genus offendiculorum sit, cuiue imputandum; an iis qui gratis & atrocissimè laceffunt, an iis, qui se necessariò tutantur. Illi quidem monstrosos nos accusationibus appetunt, & perdendos putant; libris editis hæc portenta euulgant, nec vnâ editione contenti, quamuis non sit multitudo, sed summa sterilitas in commutationibus illorum, nullis tamen laboribus, nullis expensis parcunt, homines etiam altissimæ paupertatis, nouis editionibus moliendis, & suis longè lateque spargendis calumniis. Et quamuis Romæ, in Hispaniâ, & vbique terrarum damnentur eorum libri, nedum Ecclesiasticis, sed etiam senatoriis decretis, nihil ista morantur, & quibus deterreri oportebat pœnis,

EPISTOLA.

fiunt audaciores. Quid non pastorali sollicitudine, aut paternâ charitate tentauit Summus Pont. Alexander VII. vt discordias compesceret & extingueret? Petri Aluæ nodos, aliosque libellos, id est calumniarum in D. Thomam, eiusque Scholam colluuiem grauiſſimo iudicio Romano damnari voluit. Quid ad hæc Petrus? Resipuit-ne? Retractauit-ne dicta? Aut à nouis scriptis & editionibus abstinuit? Imò ipsâ censurâ Pontificiâ, quasi torrens aggeribus cohibitus intumuit, quasi angustiis locorum coarctatus, aut pice oleoque accensus ignis efferbuit magis, & exarsit. Nec sua contentus euulgasse, Hyppoliti Marracij ex Italiâ ad se Bruxellas missum eiusdem argumenti & fursuris librum, id est calumniarum in Dominicanos suis expensis edi curauit. Quid inde tandem contigit? Fraudem Marracij non suspicatus Summus Pontifex, sed penè manibus contrectans, & cum Alua consensum; hominem carceris pœnâ mulctauit, eadem sine dubio, imò maiore Aluam castigaturus, ob D. Thomam laceratum, & Dominicanos traductos, si Romæ degeret, non Bruxellis, vbi suus illum in tuto statuit amarus & præposterus zelus, qui Romæ non imponit, sed in eius caput commeritas pœnas aduocaret, à quibus par zelus non exemit Marracium, sed carceris reum fecit apud humanissimum & clementissimum Principem. Si huius ritium-viratus, Petri à clausa valle, ab Alua, & Marracij libido lacerandi Dominicanos, iudiciij Pontificij æquitate sedari, aut pœnis cohiberi potuisset, defensionem nostram eodem, quo illo-

EPISTOLA.

rum accusationes reponerem ; id est pari feueritate iudicij Pontificij coercendam, & castigandam censerem. Si aduersus illos Pontificiæ auctoritatis reuerentiâ , post plures accusationes, tandem tacitos & mutos, ipse quidquam mutire auderem, dignus planè essem nedum vtriusque Petri censuris , sed etiam carcere Marracij. Verum nullum faciunt modum , aut finem Dominicanos vexandi: & quas in D. Thomam Guillelmus Author corruptorij , quod Ægidius Romanus correctorio castigauit , primus inuexit , sequentibus sæculis prioribus alij adiunxerunt, auctas exaggeratasque Potza, scriptor Canuæ Turturis , interpolarunt : sed in hac conuictiandi & calumniandi palæstrâ, eos omnes facile vicit Teophylus Raynaudus : hunc sin superauit , certè æquauit Petrus Alua : & eum inexhausta sit detrahendi libido , & similes futuris temporibus prodituri sint Scriptores, qui eadem, & forte iniquiora in nos congerant, & euomant; non dubito , quin æqui Lectores , boni consulant hoc meum in defendendâ Religione studium. Iamdiu Christus certo vaticinio indixit *neceſſe eſſe ut veniant ſcandala*; & cū ad antiquas in nos calumnias perpētuo instaurandas, nouasque cudentas accensi, nullâ Pontificiorum decretorum reuerentiâ , qui ista scribunt, tangi aut pœnis cohiberi posse videantur ; quis nostram sollicitudinem improbet , aut non laudet , si illatis malis remedia , & futuris antidota efficacia paremus. Et ne quis credat me in scandala scandalis agere, id inprimis denuntio , me ita ab Aduersariorum calumniandi , & detrahendi licentiâ abhorrere,

EPISTOLA:

nedum falsa & enormia obiicientibus, similia non
sim mihi permissurus, imò nec etiam vera, etiam
leuia ingerere. Deinde moneo me cum utroque
Petro quasi cum priuatis hominibus, & à suo
Ordine penè segregibus disputare, nec susceptas
ab illis contentiones, aut simultates ad vllam
communem eorum Instituti conspirationem ad-
uocare; vti facit Carterius, qui libros Mariales
omnium Dominicanorum manibus scriptos,
consilio editos, & curâ sparsos temerè crimina-
tur. Contrà apud me reputo, adeo atroces ca-
lumnias, nedum à charitate Christiana & Re-
ligiosâ, sed etiam ab omni humanitatis sensu sic
alienas, vt eas eiusdem cum utroque Petro Or-
dinis Religiosi, præ cæteris hominibus execren-
tur magis; quod nisi ita oderint, aliqua inde in
illos infamia apud homines, & apud Deum
damnatio sit deriuatura, & in beneficium sibi
imputabunt à me refelli; cum hac responsione
modestâ omnium Religiosorum honori, & Chri-
stiano nomini consulatur. Ne quis verò vtrum-
que, aut alterutrum à me læsum iri credat his
libris, qui aliquid contentionis respiciant, qui-
nam nostrum videantur esse maiores eruditione,
pietate in Ecclesiam, meritis, &c. quod à Chri-
sto in Apostolis damnatum nemo pius probare,
aut citra certam salutis noxam imitari possit:
sed longissimè absum ab huiusmodi disceptatio-
nibus. Vtrique Petro, eorumque hominibus
tum meo, tum omnium nostrum nomine sponte
cedo, nosque à se, suisque vinci nedum patior, sed
etiam gaudeo; atque ità illorum bonis, perinde
ac nostris, vt toti Ecclesiæ communibus fruor.

EPISTOLA.

Quid igitur post has concordiae conditiones superesse poterit discordiae, & contentionis? Nihil profecto affectis ea charitate, quae communia propriis, non propria communibus anteponit; nec sua unquam quaerit, maxime cum aliorum vituperio, & damno coniuncta sunt. Hanc si legem sibi praescripsisset uterque Petrus in suis scribendis libris, longè abesset iniecta nobis huius aequitatis grauius violatae, reparandae necessitas. Aduersarios credere velim, & eorum instituti homines nihil dubito corruptae fidei esse, summæ in Deum & in Sanctos pietatis, exactæ in sedem Apostolicam obseruantiae, sanæ doctrinae, morum integerrimorum, id est veraces, ab omni inuidiâ, vel aliis detrahendi cupiditate remotissimos, denique quidquid boni Dominicanis uterque Petrus abrogat, illis voueo, & dono, à malis absoluo, quae in nos uterque congerunt. Quis post ista ad disceptationem supererit locus? Vnus, vel alter, aut ad summum tertius. Primum contendo, aliquam, nec contemnendam bonorum, quae sibi arrogant, nobisque in totum detrahunt, portionem apud Dominicanos seruari, & obtinere; nec iis, quibus grauant vitiis, quasi hereditariis malis laborare: deinde non ita deiectos, aut à Deo derelictos esse, ut aliis inuidendi vni supplicio addicantur; neque ita antiquis, aut recentibus bonis destitui, quin ab inuidiae peccato, sicut à causis remoti, alios, (nolim dicere ad inuidiam,) sed honestiori vocabulo, ad æmulationem provocare possint. Denique licet multis partibus

EPISTOLA.

longè cæteris Ordinibus decedamus ; suppeterè
tamen nonnulla, quibus fortè paria facere pos-
simus ; qualis est imprimis fidei integritas , ne-
dum ab omni contagio , sed etiam a periculo
errorum immunis , sincerissimus , & ardentissi-
mus in Deiparam , ac diuos omnes cultus , re-
uerentia aduersus Sedem Apostolicam, & in eâ
colendâ tutandâque turbulentissimis tempori-
bus probata animi fortitudo inuicta , incredi-
bile de omnibus bene merendi , nullis detra-
hendi studium , solida fidei , ac scientiarum
principiis validè astructa placita ; & alia id ge-
nus bona , quæ latè sumus totâ Apologiâ pro-
secuturi. Si vlla vtrique Petro fides , longè de-
teriori loco , magisque miserandi sumus Iobo
in sterquilinum Dei manu, & dæmonum sævi-
tiâ perculso. Verum si vir Sanctus ne animum
tot calamitatibus desponderet , potuit se tutari
cum aliquâ etiam suarum virtutum commenda-
tione , amicorum asperioribus verbis grauius,
quàm dæmonum sæuitiâ , suoque calu vexa-
tus , quid simile à nobis extorquet vterque
Petrus. Sed quò spectabit huiusmodi laudatio
vno verbo dicam , eoque Epistolam claudō ; vt
Dominicanæ Familiæ , quem illi totis viribus
ingerunt, Tibi DOMINICE OTTOMANE pудо-
rem redimam , ne nostræ susceptæ vestis Te ,
vllum-ve nostrum pœniteat. Tot enim tantos-
que illa tulit viros , vt nostram inscitiam , &
ignauiam suis laudibus inumbrare , suis vir-
tutibus sustentare possint. Si obijciant , longe
aliud , istud scribendi genus videri respicere ,
aut me respexisse ; cum leui brachio quod
obtendō

EPISTOLA.

obtendo bonum defensæ nostræ Familiæ, & minùs acri atque accuratâ differendi ratione consequi potuerim : vt sum totus naturâ ingenuus, non diffitebor, me id tentasse, vt defensio nobis necessaria, Tibique utilis, vtrique Petro, & illis, si qui ex eorum instituto sint, quod vix credo, similibus prodesset; eosque doceret non adeo demissè & indigna de nobis, de se suisque moderatiùs & modestiùs sentire. Absit, vt ex Alua & Theophilo de illorum Familiæ hominibus statuam : singularissimos & ab aliorum sensu & moribus longissimè abire certus sum, paucosque, ac ferè nullos habere, qui ipsis suffragentur. Verum cum duo nobis, & totidem suis diuersa his scriptis, quæ refello, propinent venena; si vera narrent, nos quidem ad desperationem præ nostris vitiis & malis, & ad suorum bonorum inuidiam compellant, sibi verò, suisque Philaphtiani nimiam, nullam aliorum æstimationem ingerant; occurrendum his malis censui, quibus nocere possent, tribus singulorum scriptis confutandis. Id me afsecuturum spero, si euicero, & persuafero bona malis vbique permixta; nec vlli suorum, aut nostrum despondendum animum, nimisque efferendum, nec de aliis abiectiùs, de nobis altiùs sentiendum; paris esse periculi aliorum contemptum & odium, ac nimiam sui fiduciam & complacentiam. Quamuis his malis communibus omnes laboremus, & his, quæ paro remediis, velim etiam omnibus consultum; Tibi tamen, DOMINICE OTTOMANE, potissimum ista scribo, & sub tuo nomine edo,

EPISTOLA.

vt præteritæ conditionis oblitus , gaudeas præfenti : & si nam , quo conuenit loco habeas , certissimè noueris , Tibi saluti , & gloriæ fore immortalī. Isto opusculo proludo nostris in totam D. Thomæ Theologiam commentationibus tuo nomini inscribendis , tuique causâ edendis , ne quid obmittam eorum , quæ adiumento esse possunt , vt altiozem , quàm unde excidisti , sapientiæ & pietatis gradibus conscendas locum. Neque enim dubium est , si iis augeri , & locupletari cures Familiæ nostræ bonis , quin maximo sis illi ornamēto futurus , & omnibus exemplo , atque toti Orbi Christiano & Turcico admirationi.





PARENÆTICA

AD R. P. THEOPHILVM

RAYNAVDVM.

CVM nuper, Theophile Raynaude, legerem tuorum operum Catalogum, scriptum nouæ editionis causâ, quam Lugduni moliris, & iam fortè absoluissti; mirari subiit inexhaustam ingenij tui fœcunditatem; & nostro sæculo gratulor de tot librorum, quos fruendos dedisti, vsurâ, & gloriâ, quibus superiorum temporum Polistores prouocet, & faciliè vincat. Gloriabatur Tiraquellus se triginta liberorum parentem, libros totidem scripsisse: effœtum plane, & sterilem, præ te Tiraquellum dixerò scriptorem, etsi liberis mutatis in libros, horum numerum duplo auxisset. Propertius Poeta ortus Mevaniâ oppido Vmbriæ olim amplissimo, nunc mediocri, scriptis quatuor libris elegiarum, quæ vix operum tuorum tomos superant numero, hunc versum cecinit, ipso vento tumidiorem & inaniorem.

Et nostris, tumefacta superbiat Vmbria libris.

At tu, Theophile, longe vberiore Sabaudia, quæ te genuit, superbiendi, aut potius, in Domino gloriandi materiam præbes; adeo Poeta illo maior mole voluminum, *ut minimus digitus eius grossior sit dorso illius*; & non solùm ipse

PARÆNETICA

versiculi, sed utrumque Poetarum Latinorum & Græcorum corpus, vix sextam decimam partem tuorum operum conficiant. Sed cum Dei singulari beneficio Augustinum annis, & forte lucubrationibus æques; diligentissime tuorum librorum Catalogum relegi, singulorum operum titulos excussisti, explorandi causâ, num aliquis retractationum liber extaret, quem scripsisses, exemplo Patrum omnium doctissimi, & iuxta modestissimi, cuius magis conveniebat humilitatem imitari, quam voluminum mole, & numero, eius doctrinæ similitudinem affectare.

A fide dignis accepi, in comitiis generalibus Dominicanorum, tribus verbis Doctrinam D. Thomæ contentam, *Nihil falsi habet*, & ab vno Patre Hispano defensam, è tuis doctissimum virum impugnasse, argumento à dispensatione Pontificiâ voti solemniter repetito, quod ineluctabile telum existimabat, (id tamen duplici solutione fractum, & duplici clypeo repulsum habes ad tuam secundam Diatribam:) his verbis disputationi prolulisse. *D. Thomas Angelicus est non Angelus, & si ad Augustini annos vixisset, scripsisset libros Retractationum.* Hoc interpretabantur multi dictum animo fugillandi & carpendi sancti Doctoris: at ego contra censebam, salvâ in illum reuerentiâ, quali hominem mortalem quamlibet doctum & sanctum prosequi convenit, hâc prolusione Sancti Doctoris modestiam, & humilitatem summè commendatam fuisse. Nec credo Thomam, totum ad Augustini exemplum compositum, nec minus illius sanctitatis, quâ doctrinæ tenacem,

AD P. RAYNAVDVM.

si longior vita contigisset, passurum vnquam,
 sibi deesse præcipuam imitationis magistri par-
 tem, & virtutum maximam, quâ prætermis-
 æmulatio reliquarum vitio non caruisset.
 Quem ergo certis argumentis à communi ho-
 minum lege, à singulari D. Thomæ modestiâ,
 librum Retractationum, si per longiorem vitam
 licuisset, ab illo scribendum vaticinabatur do-
 ctissimus ille Iesuita; hunc ego Theophile, &
 omnes probi mecum, à te sperabamus, postre-
 mæ tuarum lucubrationem editioni inferen-
 dum: nec suspicari poteram, ad hoc tibi defu-
 turum animum, quandoquidem facultas aliun-
 de suppeteret, & causæ ad id vrgerent, quæ
 retractationem à te, citra officij noxam, aut
 salutis grauissimum periculum, aut potius cer-
 tam damnationem, non paterentur prætermitti.
 Neque enim credo, mi Theophile, te adeo
 nunc tui oblitum esse, vel vnquam fuisse ita
 tuarum rerum nescium, quin fateare, eò plu-
 res, & vrgentiores, ad id officij, quod à te expe-
 ctamus implendum, quam Augustinum causas
 cogere, quò longius ab illius ingenio, prudentiâ,
 & sanctitate abes, & propius ab errore, odio,
 pertinaciâ, aliisque vitiis, quibus intactus, &
 major fuit vir Sanctus, quorum vtinam nun-
 quam te permisisses tyrannidi, qua vix superiora
 sæcula viderunt, nec forte futura visura sint,
 impotentiorẽ & nequiorẽ. Nescio quem
 duorum læsurus sim grauius, an te, an Augu-
 stinum, si vtriusque longius comparationem
 prosequar. Dederam nuper cuidam viro do-

PARÆNETICA

Etissimo, opus emendandum; sed parum abfuit
 quin in totum scriptum spongiam induceret;
 nempe indignatus, quòd scriptorem huius sæ-
 culi, contulisses Augustino, licet infinitis
 gradibus infra posuisses; ratus ipsammet com-
 parationem, adeo disparibus meritis & parti-
 bus initam, quoddam esse genus contumeliæ,
 in virum supra omnem comparationem posi-
 tum. Quid censes, Theophile, homines huius
 sæculi, aut futuri (si vlla tui nominis ad illos
 aura perlabatur;) de te constituturos, cum vi-
 derint tuorum operum Tomos, ex editione
 Lugdunensi, libros Augustini numero supera-
 re, nec vllum eius exemplo scripsisse Retra-
 ctationum librum, nec fortè verbum? An
 ignoras illud sapientiæ monitum, *in multilo-
 quio non deerit peccatum*: vel putas te tot locu-
 rum esse & scripsisse, neque vnquam linguâ, &
 calamo lapsum? Credisne tibi fore dedecori,
 imitationem modestissimi Augustini, sua errata
 retractantis? Nescis quam dispar sit tua, illius-
 que eruditio? Quam diuersa sit vtriusque scri-
 bendi & viuendi ratio? Sed timeo ne sis vitæ
 exitu dissimilior. Heu te miserum, si perinde
 à fine, atque ab instituto, & decursu eius vitæ
 recesseris. Augustinus nihil vnquam scripsit,
 aut meditatus est, nisi sanctum, & omnibus
 sæculis profuturum. Augustinus ita à detra-
 ctatione abhorruit, vt nullum pateretur mensæ
 suæ assidere, aut coràm se consistere detractato-
 rum, quos versiculis *Quisquis amat dictis, &c.*
 longè abigebat. Quid de te, tuisque libris cen-

fuiſſet, Theophile, qui linguam, & calamum
 ab infantia ad calumnias exacuiſti, & toto vitæ
 decurſu exercuiſti bonorum conuiſiis; nec
 Diuis, nec Summis Pontificibus, nec tuis par-
 cens, vt videaris hoc vitium deterrimum in mo-
 res induxiſſe? Et cum aliquam reſipiſcentiæ &
 malorum emendationis ſpem de te plerique, &
 omnes deſiderium haberent, cum ad id neceſſi-
 tas iam ſeni, & morti proximo incumbat; heu!
 omni ſalutis cura, omni damnationis metu ab-
 ſectis, videris bonorum de te expectationem, &
 vota ſefelliſſe, inſertis vltimæ editioni libris,
De communionẽ pro mortuis, &c. De Martyrio
per peſtem, quos Roma damnauit, & aliis id ge-
 nus nihilo melioribus, vnde tot ſcandala extite-
 runt, & plura ſunt naſcitura.

Quid ad hæc reſponſurus ſis, & quibus ar-
 gumentis aduerſus Dei, hominumque iudicia,
 ſis tuam cauſam deſenſurus, plane ignoro.
 Neque enim puto, cum rationem villicationis
 tuæ, & tot malorum, quæ ex tuis libris nata
 ſunt Deus pœnas exiget, te allaturum id quod
 Authore vno Patre Societatis,

Vt Radamantheũ ſtetit, ante tribunal Erasmus,

Anne joco ſcribens, ſeriò damnor ait?

Si enim ita exciperes, & iocos amarulentos
 excuſares, reponeret Iudex.

Libri dant ſeria damna, jocoſi.

Sit tibi culpa jocus, ſit mihi pœna, jocus.

An ludum & iocos reputas, Religioſos & ſa-
 cerdotes viros, & Ordines de totâ Eccleſiâ
 optime meritos, & Summos Pontifices iis

PARÆNETICA

conuitiis proscindere , à quibus professi Ecclesiæ Romanæ hostes , aliquo pudoris , & Religionis sensu abstinuissent ?

Verum seposita omni verborum , & affectuum , acerbitate , precor te , mi Theophile , pro ea quâ nos mutuo oportet prosequi charitate , pro illo cuiusque nostrum salutis amore , & damnationis metu anxie sollicito , disquiramus quid facto opus sit , Scriptori tot satyrarum , morte impendente. Etiam si velis hanc disputationem , ad regulas probabilitatis laxissimæ exigere , id assero , atque inuictis argumentis probandum suscipio , te citra damnationis certum periculum , aut potius iudicium , non posse ex hac vita migrare , prætermisâ retractatione eorum , quæ in Dominicanos , in Thomam Hurtado , in Clementem VIII. & Paulum V. occasione censuræ libri , *De communione pro mortuis* , & in gratiam Suaris , *De Epistolari confessione* , scripsisti. Non his metis , meam tecum , dum viuis , aut posthumam cum Deo disceptationem astringo ; quasi aliis rebus à te tractatis , nihil opus habeas retractationis remedio , & præsidio aduersus humana & diuina iudicia. Scio namque (& hoc etiam variis Apologiæ locis insinuat ;) te ad minus tres libellos scripsisse in tuam matrem vt multi existimarunt , quibus videris , vt Iob Absalomem , quasi tribus lanceis confodisse. Non ignoro horum librorum titulis oblique Prælatos obseruantia religiosæ disciplinæ præstantes , & hoc nomine tibi inensos , fuisse quasi indigitatos.

AD P. RAYNAVDVM.

Certus sum etiam, te in extraneos, in Camerarium, in Launoium, quam in domesticos fuisse iniquiorem.

Sed quidquid sit, de huiusmodi controuersis, mihi omnino non compertis, quarum Deo rationem redditurus es; quod ad nostras disceptationes pertinet, *De Communione pro mortuis*, contra Patres Sancti Andreae à Valle, & Hurtado, *De Martyrio per pestem*, contra eundem Hurtado, & de utroque libello, contra censuram Romanam, *de Epistolari confessione* asserta à Suare contra sensum duorum Summorum Pontificum, & duobus libellis stylo ferreo exaratis, *de immunitate Cyriacorum*, & *Religio Bestiarum*: repeto quod iam conficiendum proposui; nisi retractaueris, vel saltem boni consulas à me, & ab aliis profligari; quæ per summam iniquitatem, aut ignorantiam scripsisti, nullam tibi superesse spem salutis, etiamsi laxissimarum probabilitatum patronos consulas.

Atque ut ab ultimo argumento paucis me expediam, reliqua liberius prosecuturus; non ignoras Sanchem, validum præ cæteris columnen probabilitatis, nutare, & titubare, cum ventum est ad mortis articulum (in quo versaris senecta quolibet lethali morbo grauiore;) tutissima quæque esse sectanda, qualibet probabilitate reiecta, ut re periculis plenissima. Putasne post tot satyras in viuos, in Religiosos Ordines scriptas, & summa cura à te euulgas, tibi certius remittendam quamcumque tot

PARÆNETICA

conuictorum , tot mendaciorum retractationem , quam diuiti epuloni , alienis bonis , & spoliis opulento restitutionem , cui aliqua probabilis ratio , ius in illa bona asserit , sed validiores tollunt , & arguunt latrocinij ? Credisne , tuto tibi minus curandam tot calumniarum palinodiam , quam pœnitenti moribundo cum attritione peccatorum confesso , & absoluto , contritionem asciscendam ? At Sanchez probabilitatum fere primus author , deploratæ salutis istum pronuntiat , nisi relictâ opinione minus tutâ , erumpat in contritionem ; quia impendente morte , tutiora quæque eligenda sunt . Quid ad ista , Theophile , dices ? Nihil tibi cum Sanchez , vel quod tu eo sis doctior , vel quod ipse timidior sit , quam conueniat Theologum , adeo rerum moralium peritum ; & immeritò summum periculum intentat moribundo , qui attritionis conscius , contritionem neglexerit , cum sit in opinione , intra probabilitatis terminos summâ .

At mihi , inquires , certior infedit sententia , me ad nullam palinodiam teneri , quia conscius mihi sum , distrinxisse me calamum , in Ecclesiæ , vel Societatis apertos , vel occultos hostes . At si ita sit , non erat iteranda editio librorum in Societatem sub titulo , *Hyparchi . & de sobria conuersatione , &c. De Regimine Tyrannico* : Sed potius , erat horum & similium euulganda retractatio . Imò , inquires , seposito omni metu , & respectu , est illis in faciem resistendum , qui ab æquitate regiminis Religiosi

AD P. RAYNAVDVM.

recesserunt , & neglecta custodia castimoniarum ,
nimiam fiduciam , obiectant periculis , & manibus
latronum , quem habent in vasis fictilibus
thesaurum : Pontifices vero illi redarguendi
sunt , qui nimia in Dominicanos indulgentia ,
male æquitati in alios consuluerunt. Itaque
censes veritati vni litandum , etiam cum vitæ
dispendio .

Quid si demonstrarem , te nullius recti , & boni
communis respectum , sed privati odij , inimi-
citarum , & solius vindictæ rationem habuisse ?
Qui moralem Philosophiam ingentibus tomis
alios doces , non ignoras boni rationem vnâ
partium integritate , id est , sine constare , mediis ,
& circumstantiis ; quarum minima desiderari
nequeat , saluam rei bonitatem . Quæ ergo fieri po-
test tot satyris nihil peccasse , cum causam sine
pessimam , deterrimis mediis , id est , omni ge-
nere mendaciorum sis persecutus ? Negabis , te
vnquam à vero , & recto , vel minimùm reces-
sisse . Eo tandem devenimus , quo nostras con-
trouersias deductas volebam , & demonstro , te
à vero abreptum , & à bono fine , ex ipso con-
trouersiarum legitimo statu , quem tu per sum-
mam fraudem inuertis . Damnata est , inquis ,
dissertatio , *De communione pro mortuis* , quod
dixerim ex opere operato , nihil eam mortuis
prodesse viuos , cum illorum causâ ad sanctam
Synaxim accedunt . Id falsissimum est . Nec ve-
rius obtendis Martyrium per pestem , à te con-
stitutum damnari , quod Martyrij sanguinis
aliquas illi dotes dederis , Nec sincerius agis ,

PARÆNETICA

cum ais , malè Suarem audiissè , apud duos Summos Pontifices, quod dixerit, nihil eorum decretis obessè, absolutionem moribundo impertitam à præsente Confessario, si certior fiat ab astantibus, eum suorum peccatorum pœnituisse. Pro his tribus controuersiis, sic à te falso constitutis, putas tibi vsque ad mortem digladiandum, & honesta esse, quæcumque media, quibus te, & Suarem tutaris.

Scis (Theophile) à Philosopho dictum, cuiusque principii modicum errorem, vt sic loquar initialem, progressu fieri maximum, & immedicabilem. Id nunquam verius, quam in te conuenit : nam harum trium disputationum initio, toto cœlo aberrasti, & vnus vculæ abusu *ex opere operato*, controuersie statum immutasti, dum priori disputatione, *de communionem pro mortuis* tò *opus operatum*, intempestiuè vrges, eo subdolè tacito, & suppresso ad controuersiam de Martyrio per pestem. Vox illa tibi cothurnus est, qua fraudem & fucum facis, qua tenebras offundis. Tolle tuum *opus operatum* à communionem pro mortuis, transfer illud ad Martyrium per pestem, & tùm disputatione vtrâque optime constitutâ, vel tumet ipse errorem tuum agnosces, iustissime damnatum, vel tuam vtrouique fraudem, & pertinaciam omnibus aperies.

Audi Theophile. Si id solum asseruisses, communionem viuorum pro mortuis, nihil istis prodesse *ex opere operato* ad augmentum gratiæ, & culpæ veniam, vel Martyrium per pestem

AD P. RAYNAVDVM.

non esse paris cum Martyrio sanguinis efficaciam; ac proinde non conferre gratiam *ex opere operato*, nec omnem culpam, aut pœnam eluere, nec loco esse baptismi pueris, quorum matres illis grauidæ immoriuntur obsequio peste laborantium: si ita exertè, & distincte vtramque sententiam tuis libris explicuisses, nunquam eos damnasset Roma, nec in te Hurtado, vel tu in ipsum, & subinde in Dominicanos scripsissetis. Quid ergo in te damnatum est? Abusus huius vocis *ex opere operato*, & venenum, quod sub hoc verbo latebat, vel fortè dolo occultabas. Hanc enim vocem quasi gladium ancipitem instar ambidextri Aiot in vtramque partem verfas. Hinc vrges, inde submoues, & subtices. Atque vt paucis tuas omnes artes, & fraudes aperiarn, & Censuræ Romanæ summam æquitatem demonstrarem; in te maxime displicuit primâ controuersia Opus operatum in præmissam assumptum, vnde falsas, ac penè impias consecutiones deduxisti: nec minus altera controuersia illud Opus operatum suppressum displicuit, vnde conclusio ex falso, aut dubio principio, male illata est. Sic enim superiore controuersia differebas. Communio sacramentalis ex opere operato solum confert augmentum gratiæ communicanti, cuius nequeat mortuos participes facere; Ergo communio frequentata mortuorum causâ, est illis prorsus inutilis, vel si quis in illos fructus inde deriuari potest, minor est, quam qui ex aliis operibus, & sacramentis, (& vt ipse loqueris,) quam qui ex

PARÆNETICA

consensu, aut complexu maritali, in gratiam mortuorum inito, perciperetur. Hinc concludis: Ergo communio, in gratiam mortuorum frequentata Romæ ad Sancti Andreæ Ecclesiam, locupletata Indulgentiis Pontificiis, omnium piorum celebrata concursu, erroribus popularibus debet annumerari. Has consecutiones tuas, saluo Antecedente, damnauit, ac penè execrata est Sacra Congregatio.

Controuersia vero *de Martyrio per pestem*, fraudem videris immutasse. Sic enim disseris. Mors obita in obsequium peste laborantium, accedit ad Martyrium sanguinis, quod vim habet baptismi: Ergo mors illa est eiusdem efficaciam, cum baptismo fluminis, & sanguinis, ac subinde omnem pœnam, & culpam tollit, nedum à defunctis hoc mortis genere, sed etiam à fœtu, quem matres vtero gerunt, idque *ex opere operato*. Huius argumenti saluo principio, & antecedenti, ferit tuas consecutiones censura Romana. Tertiæ controuersiæ status paulo obscurior est: eâ tamen certum est tibi antiquiorem esse causam vnius priuati Doctoris, quam totius Ecclesiæ; ac penè infallibilitatem duobus Summis Pontificibus negatam, vni Suari asserere; & vt hic Doctor sit omni exceptione maior, & immunis vel à minimâ specie erroris, traducis Clementem VIII. & illi Caiphæ personam imponis.

Quid ad ista, Theophile vociferaberis, hæc omnia à me conficta, & tibi falsò imposita? Sed præter quod tribus dissertationibus, hanc tuam

AD P. RAYNAVDVM.

esse mentem demonstro; hoc ipsum tui libri singulis paginis, ac penè syllabis, vt cum Lucretio loquar, latrant. Ex quibus omnibus concludo, te nullam harum disputationum, pro veritate suscepisse, sed errorem erroribus cumulasse, ac proinde summam retractandi necessitatem urgere, quam nequeas prætermittere citra damnationem. Quamuis concederem, tuam de his tribus controuersis opinionem, non abesse ab omni similitudine veri; licuit-ne tibi tot malis artibus, tot mendaciis, & calumniis, in Iudices æquissimos, tanto, summæ, & legitimæ potestatis, contemptu & ludibrio, causam per se pessimam, aut si velis, ad summum probabilem, tutari nullo prætermisso conuitiorum genere, nullo saluo vitæ Christianæ officio?

Statueram tibi tuorum errorum tabellam subijcere, vt vno conspectu quorum reus es, mala intuereris. Verum sensi me frustra laborare, neque iniri posse calumniarum tuarum numerum, nisi libri tui exscriberentur. Institutionem Caluini obseruarunt quidam hoc verbo *omnis* incipere, & in istud *impietas* desinere, idque præter mentem Authoris, ita diuino consilio contigisse censent, vt Argumento sit librum totius impietatis esse quasi Encyclopædiam, eaque solâ constare. Non est impietatum feracior illa institutio Caluini, quam tua Satyra calumniarum, conuitiorum & mendaciorum. Venerat mihi in mentem Erasmi librum de lingua tibi consulere in spe-

PARÆNETICA

culum confessionis : nam vbi decurreris peccata linguæ , quæ fusissime enumerat ille Author , potes iurare te his omnibus grauari , & plura admisisse , prætermisſa ab Eraſmo , aut illi incognita. Quodnam enim genus mendaciorum , aut contumeliarum in Dominicanos prætermiſiſti ? Si quid ab Alphonſo à Caſtro , à Budæo , à Politiano , & aliis , inuidioſum de Monachis , tacito nomine , & Ordine referatur , ius tibi aſſumis , illud de Dominicanis interpretandi , quaſi Monachorum nomine ſoli cenſerentur. Si quæ illis contentio intercedat , cum Reuclino , cum Petrarcha , cum Luthero , aut ſi velis cum Dæmone , ſemper te iudice , rei ſunt Dominicani , inſontes aduerſarij , ſemper cauſâ vincunt. Nullum vnquam ius in ſubditos , aut captiuos uſurparunt ſæuiſſimi , & iniuſtiſſimi Tyranni , quod tibi non aſſumas in Dominicanos. Si vel minima coniectura , aut ſuſpicio ſit , te aut quemquam iniuria etiam leui offenſum , omnes ad ad mortem depoſcis , & vis nomen eorum funditus deleri. Cum de rebus ac moribus hominum noſtrorum ſcribis , (quod paſſim opportunè importune obtrudis ;) parum eſt ſi dixerò , te grauiffimè læsâ charitate , occulta quæque mala in publicum efferre , & in maius augere ; facta etiam atque infecta , omni non ſolum veracitatis , ſed etiam ſimilitudinis veri cura abiecta , & quæcumque abſurda , impia , immania legiſti olim in hitoriis , vel audiſti , aut ipſe excogitaſti , per ſummam audaciam

daciam Dominicanis affingis.

Quo styli genere videris delectatus ad imitationem Machiaueli, qui eâ licentiâ scripsit Historiam Castreani, vt quæ illi viderentur accommodata ex antiquis, suo Heroi aptaret, magis ex Poëtæ, quam Historici fide. Sed Machiaueli in te fidem, & moderationem desideramus, Theophile. Ille acerrimo Florentinæ Reipublicæ, cui erat Machiauellus à secretis, & suæ patriæ hosti, non sibi permisit quicquam adscribere, quod Heroëm non deceret. At tu hominibus Deo sacris, nefanda quæque, & falsissima licentiam vsurpas affingendi, atque eâ fide narras propemodum infinita. Prouincialem in Hispaniâ, qui Iudaïsum totâ vita occultatum, mortis articulo professus est, (quem compertissimum est alterius fuisse Ordinis;) nomine, & veste Dominicani donas. Eâdem licentia, inducis Patrem Turcum Generalem timentem sibi à cicuta filiorum amantissimorum, qui millies pro Patre mortem oppetiissent. Sed vix ad defensionem illatis à te malis nostris commoueremur, nisi ex tuis libris grauissima, in totam Ecclesiam, & in tuammet Societatem, damna redundarent. Non ignoras tuis libris hæreticos triumphare, eosque ad infamiam nominis Catholici Geneuæ, Lugduni Batauorum, Hildebergæ, aliisque locis, heterodoxorum manibus rerî. Addam aliud, eos quæcumque de Societatis moribus falsissima euulgant Hæretici, aut inter Catholicos æmuli, confirmare validissi-

PARÆNÆTICA

me. Væ societati, si de illa ex te esset iudican-
dum, nec plures, idest, fere omnes, tui dis-
similes haberet, qui à mendaciis, & à calum-
niis non minus abhorreant, quam iis soleas
viri, & videaris delectari. Actum esset, non
solum de Societate, sed de omnibus Religio-
forum Ordinibus, & vincerent Hæretici, cum
ab illis ex te iudicaremur, quasi Pharisaicæ
superstitionis, & superbiæ rei.

Et ne videar nimium coniecturis indulgere;
rem confirmo, iis quæ hodie dum hæc scribi-
mus, geruntur. Patres Societatis, dum laceffi-
tam Sedis Apostolicæ authoritatem, quâ pos-
sunt prudentia, ac fortitudine fulciunt, qui-
dam aduersæ sententiæ Theologus, testimonio
à te repetito, veluti ariete validissimo impetit.
Ex Theophilo, inquit, *libro de immunitate*
Cyriacorum, discere licet, à quibus prodeant
Decreta, quæ ad nos deferuntur Congrega-
tionum Romanarum, quas si fides sit illi Au-
thori, regit vnus *Secretarius Dominicanus*,
omnium litterarum rudis, vere opilio Arcadicus,
qui illas ad libidinem circumagit. Hi sunt
Theophile tuorum librorum fructus: Hæc sunt
testimonia de tuis aliisque, quorum nescio
qua ratione reatum, & pœnas possis effugere,
nisi vel ipse retractes, quæ in Ecclesiæ, & So-
cietatis dedecus scripsisti, vel summi beneficij
loco reponas, ab aliis refelli.

Dubitaui an è re tua esset, tibi ista consule-
re, vnde plus mali timebam, quam spera-
rem profectus. Sic enim apud me reputabam:

AD P. RAYNAVD VM.

vel quæ suggero vera agnoscat, & se illis grauari; aut vt falsa reiiciat, & ridebit. Res in alteram partem recidat oportet: sed neutra caret periculo. Si sentiat vti res est, se tot malorum reum, desperatio impendet; si nulla credat se harum culparum teneri; in cæcitate, & pertinaciam delabatur. Sed conuenit nos de illo sperare *meliora, & viciniora salutis*. Forte exemplum Augustini, & de D. Thoma vaticinium à me relatum, & tot malorum conscientia aliquem retractationis librum eliciet: vel si id nequeat præ pudore, & contumacia à se obtinere, ad minus tacebit, & se factis digna pati agnoscat, & gaudebit, atque ita continget illi fors felicissima illius, de quo S. Augustinus serm. 120. de tempore, *si pœna caperat in latrone, nouo genere consummatur in Martyre*.

Nec credo, Theophile, te offensum iri, & collatione socij crucis Christi: nam si præterita recolās, te diutius, & longe grauius illo peccasse præ te feres. Neque dubitare potes (etiamsi ad tuum patrociniū aduoces quas-cumque laxioris probabilitatis opiniones;) quin multò atrocius sit crimen, probis omnibus, qui tibi minus placent maledicere, (quod tibi præcipuum longissima, quam vixisti vita studium fuit;) quàm latrocinari per decennium, quod vix in eo scelere transegit ille, qui in crucem actus est. Existimas-ne, vitam, & viaticum viginti, aut si velis centum hominum, quos ille viarum grassator spoliauit, & obtrun-

PARENÆTICA.

cavit, posse æqua lance appendi famæ;
(quæ vita, & opibus etiam regis longè pretiosior est,) tot Summorum Pontificum, tot Cardinalium, tot virorum, & Ordinum Religiosorum, quos summa crudelitate, & iniquitate discerpisti? Neque enim priuatum aliquem, sed Congregationes Sacras, & Ordinem Dominicanum, adeo atroci persecutus es odio, vt ob leuissimam, aut potius nullam iniuriam, id est, ob tuorum librorum iustam, & necessariam censuram, funditus perire velles. Quid per centum annos latrocinia multarum Regionum, præ istis sceleribus? Non est ergo dubium, te ista collatione magis honestatum, quam læsum. Quid si latronis sorte & gratia Deus te dignaretur, vt saltem aliquo momento ante Dominicanos odisse desineres, quam viuere? Tum vere exclaremurus: *Hæc mutatio dextera Excelsi.*

E duobus Apologistis, qui aduersus tuam Satyram scripserunt, ille qui in te laruatum agit, nec tuum nomen atque institutum videtur velle agnoscere, nimis anxie odij, quo in Dominicanos flagras, causam non ab illatis censuris, sed ab ipsa tui, & Ordinis Dominici origine repetit, hoc argumento, quod apud me plus conuitij quam virium habet: D. Dominicum eiusque filios ad Albigensum, & Valdensem, sicut Societatem ad Lutheranorum hæresim profligandam, singulari Dei beneficio Ecclesiæ datos, omnes vno sensu, & vno ore prædicant: Sed minus operosa & an-

ceps, ac longe breuior, & fœlicior fuit cum antiqua hæresi, quamcum recenti dimicatio. Eam namque Simon à Monte-forti, & D. Dominicus diuerso armorum genere expulerunt è Gallia, ac pene extinxerunt, saluis aliquot reliquijs, quæ in Sabaudia montes se receperunt: eoque confugiunt Calvinistæ, dum Ecclesiæ inuisibilis præsidio pelluntur inuictis Catholicorum armis: aliquam enim obtinent Ecclesiæ aspectabilis formam, & seriem à Valdensibus & Albigenfibus, intra Sabaudia montes. Ex quo vero fonte suam Synagogam Calvinistæ deriuant, inde tuam, tuique in Dominicanos odij originem repetit, non mihi probata coniectura, subtilissimus ille Apologista. Nihil mirum, inquit, te in Dominicanos ita sœuire. Habes à natalibus ingenitum in illos odium, è Vallibus Sabaudia, id est, è Valdensem, & Albigenfium sæce natus. Inimicitias in nos hausisti à tuis maioribus, quorum non minus iniurias, quam tuas videris vlcisci. Minus improbabili alter Apologista notat augurio, Te Petri à Valle-clausa nomen sumpfisse, quasi pertinaci in nos odio viam gratiæ occludas, & euoces Dauidis imprecationes in Montes Gelboë, conscios Saülis & Ionathæ interfectionis, vt nec ros, nec pluuia inde diffluat, nisi prius odij pestem euoueris.

Addit idem, tibi longe diuersas voces excidere, ab iis quas Ioannes Euangelista senio confectus identidem repetebat. Ultima vice

PARÆNETICA

pars, est veluti Echo præteritarum, & cum Ioanni tota vita vna vox, vnum studium fuerit, fraterna charitas, hanc morti proximus continuo prædicabat. Quid de te Petre dicam? Timeo sane, ne vltima vitæ pars similior sit superioribus, quàm vellem, aut quàm tuæ famæ, & saluti conueniat; & odii, quod continuis conuitiis non potuisti saturare, nequeas nunc ad minimam vsque scintillam, totum extinguere. Quare ad bonam hanc mentem, omnis in nos odii vacuum, cenſeo non minus gratiæ vi opus eſſe, quàm ad pij Latronis conuerſionem. Faxit Deus, vt hoc miraculum noſtris diebus inſtauret, & ne per te ſtet, quin adeo ſperato bono fruaris, & nos tecum. Superiori exemplo adiungam aliud, quod propius ad te pertineat: in ſimili, ac pene eadem cauſa ingenii ſœcundiſſimi, & qui tecum poſſit numero librorum contendere, verſatus eſt Epiſcopus Bellæus. Ille poſt longiſſimas cum aliquot Religioſorum Ordinibus contentiones, multis annis antequam viuere deſuiſſet, redierat in gratiam cum Religioſis. Ad tuam ſalutem pertinet Epiſcopum religioſiſſimum imitari, nec per nos ſtabit, quin æternam tecum amicitiam inſtauremus.

Neque ad detrectandam concordiam, aut illius repulſam excuſandam, cauſeris te acerbius habitum, Apologia Cracouiæ edita. Nam præter quod poſſem tibi reponere, ſi quid inſit mali, quod damnes in alieno vitio, te poſſe tuum inſpicere longe grauius, quod

AD P.^o RAYNAVDM.

nihil læsus infantes , & tacitos prouocaueris ;
atque ab inuitis extorseris verba tuis multo
minus atrocia. Sed ne Dei opus morer , illius
Apologiæ errata agnosco , & emendationem
polliceor. Quid præterea à nobis exigere pos-
sis ? Sed nescio an plura libro irrepserint errata
ex Typographi negligentia , aut culpa : sed
ne hinc vlla possit obtendi causa recusandæ
concordiæ , quam vrgeo , atque ambio , de-
liniemus asperiora loca , submouebimus con-
uitia , solâ vi argumentorum tua refellemus ,
quod non dubito te boni consulturum.





MONITVM

AD LECTOREM.

HÆc commonitoria, & emendatio totius Apologiæ ad quartum vsque librum, vt ibi in Præfatione adnotauimus, deducta & scripta erat superstite Theophilo. Sed non est visa, eo mortuo, inutilis ad rem, neque indigna quæ huic Apologiæ adiungeretur: Nam præter quod omnium contentionum originem, & seriem ita apertè narrat, vt sola causæ nedum cognoscendæ, sed etiam dirimendæ sufficiat; inde agnosceret prudens Lector, nostrum pro concordia votum, quibusque nominibus à Theophilo exigeremus calumniarum in nos, & Censores Romanos, retractationem, quam par est credere, de homine Christiano, si per mortem licuit, non fuisse obmissam cum aperto damnationis periculo. Utinam extaret aliquo Tomorum eius loco, leuasset nos graui hanc Apologiam cudendi labore.

Quid si dixerò, non tam eluendis quas nobis inussit calumniarum notis, quam luendis, quas forte adhuc dat pœnis, efficacior fore & magis necessariam? Relatum mihi est Theophilum pridie mortis, quæ repentina infirmo seni, non ægro contigit, testatum se multos calamo lassis, & Palinodiam meditari. Credibile est hoc proposito, culpæ veniam promeruisse; sed plu-

MONITVM AD LECTOREM.

rimum superesse pœnarum, quæ vix vllò leuari possint opportuniori remedio, quam læsi nostri honoris restitutione. Eam ipsi cum per subitam mortem implere non licuerit, ego vicem eius & votum ubi impleuero, arbitror sane (nec vana est fides) hoc qualecumque scriptum pœnarum ipsius maximum leuamen futurum, atque hâc cogitatione sensi me non mediocriter animatum, vt Apologiam, semotis conuitiis infinitis (quæ præter Authoris mentem inserta erant, & quæ vna fuerat censuræ causa;) purgatam ederem, quò ipse Purgatoriis pœnis exoluatur. Infinitis enim exemplis (quorum aliquot litterarum monumentis extant;) comprobatum est, animas defunctorum corpore solutas, Dei beneficio se viuus conspicuas præbuisse, & ad opem sibi ferendam sollicitasse, & monuisse grauissimas se pœnas pati iusto Dei iudicio constitutas, nec finiendas donec vltimus quadrans solueretur, cuiuscumque generis bonorum, quæ fraude, furto, detractone rapuerant. Quare videor mihi audire Theophilum enixè rogantem, quam primum nullâ dilatione Librum hunc edi, qui refarcire vnus possit honorem nobis eius famosis libellis detractum. Nec dubito quin reprehensiones quæ interdum adhibentur, quo acriores, & calumniis refellendis fuerint validiores, eo futuras illi maiori solatio & adiumento. Atque eo potissimum consilio, vt ipsi mitius & melius sit, Apologiam edimus, idque hoc potissimum nomine boni consulent æqui Lectores.




Extrait du Priuilege du Roy.

IL est permis au R. P. VINCENT BARON Professeur en Theologie, de l'Ordre des Freres Prescheurs, d'imprimer ou faire imprimer par qui bon luy semblera vn Liure qu'il a composé, intitulé *Manuductio ad nouum Theologia Scholastica Controuersia & Ethica studium & usum*, en vn ou plusieurs volumes pendant le temps & espace de dix ans, durant lequel temps nous faisons tres-expresses deffences à tous Libraires, Imprimeurs & autres, de vendre & debiter ledit Liure, sans la permission dudit Pere, ou de ceux qui auront ordre de luy, à la charge qu'il sera executé suiuant sa forme & teneur contenuë en l'original. Donné à Paris le Mars 1650. Par le Roy FALLENTIN.

Registré sur le Liure de la Communauté des Marchands Libraires, suiuant l'Arrest du Parlement, en date du 8. Avril 1658. Fait à Paris le 15. Sept. 1658.

Ledit R. P. BARON a cedé, quitté & transporté ledit Priuilege cy-dessus à SIMEON PIGET, Marchand Libraire de Paris, pour en jouir en son lieu & place, suiuant l'acte passé entreux le 19. Aoust 1664.

Acheué d'imprimer pour la premiere fois, le quatriéme volume de la Theologie le 30. Iuin 1666.



Approbatio Doctorum.

EG'o infrà scriptus Doctor Theologus, vindicationem Familix Dominicanæ & Scholæ Thomisticæ ab vtriusque alumno *Patre Vincentio Baronio* susceptam & scriptam legi: visa est nedum orthodoxa, inculcata, & iusta; sed etiam necessaria ad sanctum institutum, & Doctorem Angelicum à falsis criminationibus purgandum, & lectori utilis & grata; quod priuatis contentionibus breui perstrictis, multa admisceat ex Theologicis quæstionibus dogmatum, & morum, ac rebus facti, iurisque singularia & selecta. Quare opus quod Stromarum nomine merito appellauerim dignum censeo typis luce publica & frequenti lectione, futura non sine eruditionis, & pietatis fructu.

F. IACOBVS LOVRET.

EG'o infrà scriptus Doctor Theologus, Sacræ Facultatis Parisiensis, legi vindicationem Familix Dominicanæ & Scholæ Thomisticæ, ab vtriusque alumno *Patre Vincentio Baronio*. Familiam Cyriacorum Doctrina pietate & religione claram semper ac florentem, eo quod decet virum probum, moderamine, tueri ac deffendit, eosque qui illam maculauerunt, mendaces & nugaces euidenter ostendit. Datum Parisiis, die 12. Iunij ann. Dom. 1666.

LVDOV. FREMONT;

Graviora ex praebo errata.

Pagina 14, lin. 40 *lege* opilionem. p. 90. l. 20 *leg.* it-
tum. p. 92. l. 21. *leg.* contentione. p. 96. l. 19 *leg.* de-
cerpsi. p. 111. l. 16. *leg.* intentantis false. ip. 126. l. 25.
leg. duodecim. p. 118. l. 14. *leg.* ipso vi. p. 171. l. 9. *leg.*
ordiris. p. 214. l. 18. *leg.* quos. *ibid* l. 24. *leg.* re. p. 229.
l. 13. *leg.* tencaris. p. 239. l. 14. *leg.* emendatum. p. 240.
l. 17. *leg.* abi liber. p. 293. l. 36. *leg.* & exxquet. p. 309. l.
6. *leg.* hunc. p. 309. l. 2. *dele* cum. p. 353. l. 20. *leg.* vir.
p. 354. l. 24. *leg.* quatuor. p. 380. l. 9. *leg.* defit. p. 462.
l. 16. *leg.* non tollat. p. 570. l. 29. *leg.* partibus.



INDEX

PRÆFATIO.

- P**ARTICVLVS. I. *Causa ſcriptionis.* 1
ART. II. *Theophilum dictis ſuis omnem fidem abro-*
gare, perpetuâ calumniandi licentiâ, & vindicta-
cupiditate. 4
ART. III. *Refellitur Epiftola libelli ad Lectorem.* 9
ART. IV. *Connitia Theophili in Magiſtros totius*
Ordinis Dominicani, & Sacri Palatii. 13
ART. V. *Totius operis Partitio, & Noua forma.*
17

LIBER PRIMVS.

Vindiciæ Dominicanorum fidei in Deum recte, pi-
tatis in Summos Pontifices, & in Diuos: Aduer-
sus tres Diatribas Theophili, & quindecim Nodos
Indiſſolubiles Petri de Alua. 21

SECTIO PRIMA.

Fides in Deum recte Dominicanorum aſſeritur con-
tra primæ Diatribæ calumnias. ibid.

ART. I. *Summa Diatribæ, eiſque brevis, ac*
valida confutatio. 22

§. I. *Parerga Diatribæ, & nulla argumenta.* 25

§. II. *Reſponſio ad 3. obiectiões qua aliquam ha-*
bent ſpeciem Argumenti. 35

ART. II. *Doctrinæ Dini Thomæ doſ ſingularis,*
unde illi & eiſ Diſcipulis immunitas hætenus
fuit ab errore, & cenſura. 41

§. II. *Eadem immunitas probatur ab ipſiusmet*

INDEX.

<i>Theophili scripto.</i>	48
§. III. Tertium immunitatis argumentum à doctrina D. Thoma partium contextu & usu.	51
§. IV. Argumentum immunitatis doctrina D. Thoma abeuentu.	56
§. V. Argumentum quintum immunitatis à diuersa sorte discipulorum Dini Thoma.	60
§. VI. Sextum Argumentum a Petro Alua qui prætermisâ Scripturâ & Traditione, conuenientia sectatur.	67

SECTIO SECUNDA.

<i>Soluuntur Nodi indissolubiles Petri de Alua.</i>	71
ART. I. De statu & progressu piæ opinionis.	73
§. I. Quæ sit notio peccati generatim, & quis reatus originalis culpæ.	ibid.
§. II. Duplex questionis pars, & responsio ad primam, quid fieri potuerit?	76
§. III. Responsio ad alteram questionis partem, quid re ipsâ factum sit? Catharini opinio, Scoti sententia antefertur.	79
ART. II. Petrum de Alua nocere plurimum piæ opinioni cuius causâ scripsit.	84
§. I. Præiudicia causæ ab Authoris stylo, & consilio.	85.
§. II. Solutio Nodorum Petri.	88
ART. III. Breue examen totius Operis Nodorum indissolubilium.	97
§. I. Vindicantur D. Thome sui libri.	99
§. II. Responsio ad singulas partes libri Petri Alua.	101
ART. IV. Aliquot exerrationes P. Alua annotantur.	110
§. I. Tria exerrationum genera P. Alua.	110

INDEX.

- §. II. *Incredibilia in Diuum Thomam conuitia Peri Alue, & paria de se encomia.* 114
- §. III. *Vindicatur Diuus Thomas à calumniâ erroris contra Aluam, & falsi contra Ioannem Lau-noium.* 119
- §. IV. *Refelluntur Alue & Lannoij accusationes, ex ipso Opusculi contra Gracos instituto.* 122
- §. V. *Confutatio prima Epistola ad Antonium Fau-rum.* 125
- §. VI. *Confutatio Epist. 2. & aliquot obiectionum, quæ ex priore supersunt.* 134
- §. VII. *In tertiam Epistolam breues obseruationes.* 140
- §. VIII. *Ex superiori obseruatione breuis Responso ad septimam, & octauam Epistolam.* 143
- §. IX. *Obseruationes in 6. Epistolam ad Raymundum Formentinum.* 149
- §. X. *Ex obseruatione in superiorem Epistolam bre-uus responsio ad Nonam.* 154
- §. XI. *Obseruationes in Epistolam quartam Paulo Ratuyno scriptam, & in duas postremas.* 162
- ART. V. *Quæ supersunt ex Aluâ vitilitigationes in D. Thomam, eiusque discipulos depelluntur.* 173
- §. I. *Defenduntur encomia Alexandri VII. de Sancto Doctore.* *ibid.*
- §. II. *Defenditur elogium Pij quinti.* 177
- §. III. *Defenduntur encomia Clementis VIII. Pauli quinti, & D. Francisci, & Concilij Tri-dentini.* 181
- §. IV. *Alia sex Elogia D. Thomæ defenduntur generatim.* 190
- §. V. *Refelluntur obiectiones præcipuæ cõtra antiquiora*

INDEX.

<i>elogia Diui Thomae.</i>	195
§. VLT. <i>Alij lapsus Alua, & in omnibus pertinacia.</i>	200
ART. VLT. <i>Plagij librorum D. Thomae tria genera refelluntur.</i>	210
§. I. <i>Summa Theologica, & singula eius partes vindicantur D. Thomae aduersus Aluam.</i>	211
§. II. <i>Catena aurea, aliaque opera minutiora D. Thomae vindicantur.</i>	222
§. III. <i>Vindicantur Thomista à secundo Plagij genere, seu à falsatione librorum Diui Thomae.</i>	231
§. VLT. <i>Tertia criminatio Alua depulsa, & totius Sectionis conclusio.</i>	237

SECTIO III.

<i>Fides, obseruantia, & Pietas Dominicanorum in sedem Apostolicam vindicantur à calumniis secunda Diatriba.</i>	241
ART. I. <i>Summa Diatribae, consilium Authoris, & brevis refutatio ipsius.</i>	242
§. I. <i>Aperitur consilium Petri & euertitur.</i>	243
§. II. <i>Summa calumniarum quibus generatim respondetur.</i>	246
ART. II. <i>Cultus Dominicanorum in Sedem Apostolicam sincerus & perpetuus.</i>	249
§. I. <i>Exempla obsequij Dominicanorum.</i>	250
§. II. <i>Alia huius cultus exempla.</i>	254
§. VLT. <i>Concluditur argumentum.</i>	261
ART. II. <i>Respondetur ad tria accusationum capita.</i>	263
§. I. <i>Distinctio questionum facti & iuris.</i>	264
§. II. <i>Triplex genus questionum & definitionum iuris, unde respondetur ad primum caput ex Rituali, & ex Monte Pietatis.</i>	268

ART.

INDEX.

ART. III. *Responsio ad reliquas quatuor accessationes.* 279

§. I. *Responsio ad quartam obiectionem de voto solemni, & simplici.* 279

§. II. *Responsio ad quintam, & sextam obiectionem, ubi vindiciae Cani, Bzouij, & Combefisij.* 287

§. VLT. *Responsio ad septimam obiectionem & ad postremam Diatribae partem.* 303

SECTIO IV.

Dominicanorum in sanctas Pietas vindicata à calumniis tertia Diatribae. 314

ART. II. *Responsio ad singulas Diatribae calumniae.* 316

§. I. *Saluâ Decretorum Pontificiorum Reuerentiâ, satisfit obiectioni primæ.* ibid.

§. II. *Vindiciae Combefisij, & Nicolai Iansenij.* 328

§. III. *De Stephano, Hieronymo, Gregorio, Beda per Canum, de Chrysostomo, & Martino Papa per Combefisium reprehensis, & de D. Thoma impensius laudato.* 333

§. IV. *Satisfit obiectionibus reliquis diatribae de Beati Xaverij Apostolatu, instituto Carthusianorum, de Revelationibus Sanctæ Brigittæ, & nimis laudibus D. Thomæ.* 347

ART. VLT. *Dictorum ad Diatribam, & toto hoc libro Epilogus, & Confirmatio.* 355

§. I. *Distinguuntur varia Sanctitatis genera quæ non deesse demonstratur Dominicanis.* 357

§. II. *Reuerentia in SS. Patres.* 364

§. VLT. *Cura, & felix successus Dominicanorum in promouendâ pietate populari.* 370

LIBER SECVNDVS.

Defensio Theologiæ Dogmaticæ Dominicanorum &

I N D E X.

Thomistarum contradiatribam quartam aliosque libellos ejusdem Auctoris, & expostulationes Carterij. 374

S E C T I O I.

Doctrina D. Thomæ dotes & illius ac Discipulorum eius vindicia aduersus quartæ diatribæ calumnias, 375

ART. I. Expenduntur 44. propositiones D. Thomæ à Theophilo ascriptæ. 377

§. I. Sexdecim propositiones falsò D. Thomæ ascriptæ, aut alio sensu, quàm doceat. ibid.

§. II. Decem propositiones à D. Thomæ & Sanctis Patribus exceptæ, à Theophilo reprobata. 383

§. III. Octodecim Propositiones Peripatetica, vindicata in Fidei obsequium, à Petri objectionibus. 390

ART. II. Dominicanorum, & Discipulorum D. Thomæ vindiciæ, aduersus alteram quartæ Diatribæ partem. 390

§. I. Defensio D. Catharinæ Senensis, Capreoli, & Ioannis à Neapoli, ubi aliqua de Durando, Catharino, Campanella, & Caietano. 397

§. II. Excusatur opinio Ferrariensis de Transsubstantiatione collata cum opinione de Lugo. 403

§. III. Defensio Cani, Dominici, & Petri à Soto. 407

§. IV. Defensio Bannezj, Pontij Legionensis, & Carmelitarum discalceatorum. 413

§. VLT. Defensio sex Dominicanorum, quos Theophilus extrema parte Diatribæ diuersorum errorum accusat. 421

ART. VLT. Laudes, & Dotes doctrinæ D. Thomæ. 432

§. I. E superioribus concluditur immunitas Dominicanorum ab omni censurâ. 433

INDEX.

- §. II. *Elogia D. Thomae recentia è Cardinali Palau-*
cino. & Alexandri VII. Decreto. 435
 §. III. *Variae dotes doctrinae D. Thomae.* 440
 §. IV. *Duae reliquae dotes doctrinae D. Thomae.* 446

SECTIO II.

- Summa expostulationum Carterij.* 450
 ART. I. *Responsio ad Prolegomena.* 451
 §. I. *Examen Epistolae ad Lectorem.* *ibid.*
 §. II. *Quibus artibus tentata sit Censura in totum*
Mariales. 453
 §. III. *Leuiore querimonia Carterij depelluntur.* 455
 ART. II. *Solutio trium Argumentorum quae Carte-*
rius indissolubilia putat. 458
 ART. III. *Aliae accusationes depelluntur.* 462
 §. I. *Censura Historia Pennae à Dominicanis recepta.*
 464
 §. II. *Duplex querimonia depellitur.* 466
 §. III. *Depulsa calumnia grauior de sigillo confessio-*
nis. 468
 ART. IV. *Vindicantur Cano, & Bannes à calumnia*
laesa Patrum reuerentia. 469
 §. I. *Vindicata sex loca ex Cano.* 470
 §. II. *Vindicatus Bannes, & detorta in Aduersarium*
accusatio. 472
 ART. V. *Responsio ad reliquas expostulationes Carte-*
rij. 474
 §. I. *Controuersia cum Recentioribus de scientiâ mediâ*
Synopsis. *ibid.*
 I. *Defensio Sybillae.* 478

LIBER TERTIVS.

- Defensio Theologiae Moralis Dominicanorum.* 481

SECTIO PRIMA.

- Refellitur Liber Theophili, qui inscribitur error*

INDEX.

popularis de communione pro mortuis , à Congregatione Indicis damnatus.

ART. I. *Occasio huius Libri, & nostra Apologia.* 482

ART. II. *Tria subsidia , quæ adueniunt mortuis , ex communicatione vinorum.* 484

ART. III. *Defenduntur tria hæc præsidia contra Sophismata Theophili.* 488

SECTIO II.

Compendium & iudicium controuersie inter Theophilum Raynaudum , & Thomam Hurtado, quod demonstratur illa omnia peccasse Theophilum quæ nobis toto libro falsa imponit. 495

ART. I. *Iudicium & Compendium controuersie de communione pro mortuis.* 496

ART. II. *Theophilus iniurius in Sanctos.* 503

ART. III. *Paradoxa Theophili.* 505

ART. IV. *Mendacia , Calumnie, & Maledicentie in Hurtadum.* 507

SECTIO III.

Compendium & iudicium controuersie , de martyrio per pestem. 510

ART. I. *Status controuersie proponitur ex Hurtado. ib.*

ART. II. *Duo errores damnati in libro Theophili : æqualitas martyrij per pestem cum martyrio Sanguinis refellitur à nouitate opinionis.* 513

ART. III. *Secundus locus Argumentorum contra Martyrium per pestem.* 516

ART. IV. *Secundus error ex præstantiâ Martyrij per pestem supra Martyrium sanguinis.* 519

ART. V. *Frustra Doctorum & Academiæ dolo captata suffragia à Theophilo.* 520

ART. VLT. *Retractantur de Patre Nidard temere credita & dicta.* 524

PRÆFATIO



PRÆFATIO.

ARTICVLVS I.

Causa ſcriptionis.



DEO ingenita eſt plerisque mortalium maledicendi libido, aded inueterata mentiendi, & obloquendi licentia, vt omni veracitatis, conſcientiæ, & ſalutis abiectâ curâ, ingenio ſuo indulgeant; & cum Chriſtiani nominis notâ, cum perniciæ Eccleſiæ, Sycophantas agant; ac prius illos vita deficiat, quam a calumniis abſtinere velint aut poſſint. Licet is morbus deterrimus nullo ſæculo defuerit (nam vt ſcitè Tacitus, *Obtreſcatio & liuor pronis auribus accipiuntur: quippè adulationi ſædum crimen ſeruitutis, Malignitatis falſa ſpecies libertatis ineſt:*) tamen hoc genus vitij, frequentius & atrocius graſſatum eſt ſuperiori, & hâc noſtrâ ætate, quâ non ſolum impunitatem, ſed etiam præmia, & gloriam obtinuit. Verum, exempla calumniarum præterita æquat, & fortè vincit, vltimum quod præbet libellus famoſus, in ſacram Congregationem Indicis oblique, & in Reuerendiſſimum Patrem Martinum olim Congregationis Symmiſtam, nunc Magiſtrum Generalem Ordinis Prædicatorum, & ſubinde in totum Ordinem euulgatus, tacito non incerto Auctore, à ſtylo & à ſcriptionis cauſâ, quam præ ſe fert & quæ in ipſum ſolum cadit omnibus noto. Ita enim magni nominis, quam boni cupidior, huiusmodi libellis aſſuevit & innotuit, vt etiamſi occaſionem ſcribendi occultaret, ſicuti nomen, ipſi ſoli opus illud

ascriberetur, & illius auctor omnium consensu haberetur; quia vix alius est ab illo, qui hæc scribere auderet aut posset. Hoc laudo quod nomen fictitium apposuerit, quia licet toto opere appareat, quod vltimum superest, etiam nequissimis, bonum pudorem exuisse; puduit tamen adeo deploratam causam nempe suorum librorum prohibitorum errores aperte tutari, & ita rabie agi, vt Iudices æquissimos, Eminentissimos Cardinales, omnesque Congregationis administratos traducat conuiciis, & velit ipsam Congregationem indicis funditus tolli.

Vbi ad meas manus peruenit opus illud, & licuit legere, fateor, *Dolore contabui, & obrui timore* (vt Augustini verbis utar) eodem stupore percussus; quo ipse dum Ruffini in Hieronymum, & Hieronymi in Ruffinum scripta legit. Nec mihi visa causa dissimilis, nisi quod nostra sit atrocior, & Ecclesiæ perniciosior, quia ex priuata, ac fictæ iniuriæ sensu videtur Classicum canere, vt Ordines quietos, & concordēs prouocet ad bellum apertum, cum bonorum gemitu, & ludibrio impiorum.

Diu multumque dubius hæsi, præstaret ne tot mendacia, tot calumnias refellere, aut omnino contemnere, & silentio præterire. Vtrinque plurima rationum momenta vrgebant; Occurrebat primum illud ab vno ex ipsius Authoris sodalibus dictum; *Sycophantæ* (quam ipse personam strenuè & gnauiter gerit) *Genus esse demoniorum quod cum superbissimum sit, solo contemptu abigitur & domatur.* Adde, libellum nihil aliud esse, quam colluiem mendaciorum, & sordium, quas mouere nequeas, quin inficiare, & alios foetore quem afflant, grauissimo eneces: nec possis cum aduersario adeo lutulento congredi, quin vitiorum suorum aliquid tibi affricet, & illa dum reffellis, videaris in speciem imitari. Nam sepositis mendaciis, & calumniis quibus numquam licet aduersus quamlibet mendaces & impostores vri; ipsa vis veritatis exerte prolata, reputabitur habere aliquid audaciæ, & petulantiæ, quibus opponitur calumniarum, quæ aded atroces sunt, vt penè piaculum sit retulisse.

Hæc aliaque plura silentium suadebant: sed cum

pluribus annis, Author libellum ipso titulo horribilem, qui ingenium parentis recipiat, *Religionem bestiarum* nuncupatum ediderit, & illi frustra animi constantiam & modestiam religiosam, quam ignauiz & inscitiz adscripsit, obiecerimus: si iisdem armis pugnemus, triumphabit; & nos quasi victos, & deiectos conculcabit. Vt ergo agnoscat nec animum, nec vires Dominicanis defuisse, denunciamus, nos hactenus silentium seruasse, vt paci & modestiz consuleremus; si nunc per illum non licet nec quiescere nec tacere, sibi imputer quæcumque in nos congesta gratuito, & falso conuicia, in ipsum iustissime, & verissime regeantur.

Filium Croci à natiuitate mutum studio defensionis paternæ, factum vocalem ferunt. Cùm enim vidisset dicarios in Regem patrem impetum fecisse, tanto conatu adiutum iuit, vt vocis impedimentum abruperit. Parricidij genus esset, si è vocali mutus fierem, si Patri, & meo Ordini deessem, cum videam nescio quem, iniuriæ nescio cuius, certè confictæ, aut nullius causâ, iniquius & crudelius in Patrem Generalem, quam soleant filiarum grassatores in viatores sæuire. Religionis Dominicanæ matris, quæ à tot annis me sinu suo fouit, quæ me doctrinæ & pietatis lacte aluit, degenerem & ingratißimum filium me proderem, si vllum ipsius causâ periculum, detrectarem: Si tela in ipsam mendaciorum, & calumniarum amento contorta obiectu proprij corporis, exipere, vel inuictæ veritatis Clypeo repellere, recusarem. Verum hæ tres, à me enumeratæ causæ, repetitæ vel ab aduersarij in laceßendis Dominicanis importunitate, & audaciâ, vel Patris & Matris, iustâ defensione, vix ad illam suscipiendam, virgerent, nisi me quarta, id est, totius Ecclesiæ bonum commune, silentium abrumperet cogeret. Sic enim iandiu Dominicani modestiam & patientiam in mores induxerunt, ut ab æmulatorum calumniis, vno silentij & humilitatis clypeo, se se tutati sint: quod ignorantiz imperitiæ, atque ignauiz ascribit Theophilus, sed quæ veri speciei, satis demonstrat hæc Apologia à Dominicanorum infimo, vix vno mense & dimidio festinata, potius quam maturata: neque seruati religiosissimi silentij nos pœniteret, nisi inde Theophilus animos

sumpſiſſet, & incredibili audaciâ in Eminentiffimos Cardinales, in ſummos Pontifices inuectus, eos quaſi cæcos, ſtolidos, & omnis æquitatis atque officiij oblitos accuſatet; quod Authores, de re literariâ, & de totâ Eccleſiâ bene meritos, quod libros reconditæ, & ſinceræ doctri-næ, damnent *ad libidinem vnius*, vt loquitur, *Fraterculi*; Libros vero Dominicanorum licet erroribus ſca-teant, non ſolum a cenſuris eximant, ſed eos etiam pa-tiantur ſauire in innoxios, illoſque perpetuo inſectari. Certè aut nullâ fuit vnquam atrocior iniquitas, non ſolum Dominicanorum, ſed etiam totius Eccleſiæ, ſi vera narret Theophilus; aut nulla, execrabilior contumelia, ſi hæc comminiſcatur. Ne igitur tantam infamiam creet Summis Pontificibus, & toti Eccleſiæ, necelle omnino fuit, vindicare Dominicanos, à calumnijs Theophili, quod ita apertè factum eſt, toto hoc libello, citra cuiuſquam offenſionem, & cum inculpatæ tutelæ modera-mine, vt ſi Petrus ipſâ veritate, vel modetiâ noſtra, non reſipiſcat, ſed ſuo more noua mendacia, nouas ca-lumnias cudat; conſtituerim Proto-martyris Stephani exemplum imitari, qui ſpe ſalutis Iudæorum animatus, primum in illos acriùs inuectus eſt; at vbi vidit remedij impatientes, immedicabiles eſſe, zelo in commiſera-tionem mutato, ex cenſore factus eſt aduocatus, & quæ apud reos exaggerabat crimina, & vrgebat his verbis: *Incircumciſi corde, vos Spiritui Sancto ſemper reſiſtiſtis*; Apud Deum alijs verbis excuſabat, *ignofce illis, quia nesciunt quid faciunt*. Sic ego cum Petro agam in poſterum Stephanum imitaturus.

ARTICVLVS SECVNDVS.

*Theophilum dictis ſuis omnem fidem abrogare,
perpetuâ calumniandi licentiâ, &
vindieta cupiditate.*

SENECA prouidentiam deſenſurus aduerſus Impiorum Scalumnias ita paucis præfatur. *Rem faciam non diffi-cilom, cauſam Deorum agam*; & cum eodem loci, inte viros bonos, & Deum, ſtatuat conciliante virtute, adeo

arctam amicitiam, vt necessitudinem ac similitudinem vocet, & bonum velit æmulum Dei esse, veramque progeniem; Nihil mirum fuerit, si fide edoctus, quæ hic Philosophus ratione naturali assecutus est, aut subodoratus, iustos Dei filios nominari, & reipsâ esse, Iudices vero sacros, propter bonitatis characterem, potestatis consortio, Deos à Prophetâ pleno ore appellari; vtrosque defensurus, rem facillimam me facturum putem, cum bonorum & iudicum causâ, Diuinæ simillima sit, aut potius omnium vna.

Nihil opus conatu, vel apparatu magno, ad propugnandam quam suscipimus causam, aduersus accusationem Theophili; Cùm ipsemet, quæ vnâ manu astruit, alterâ euertat, & continuâ obloquendi licentiâ, calumnias suas refellat.

Sicut plerisque in bello, plus ad victoriam confert ignauia, aut socordia hostium, quam propria virtus; ita in hac quàm inituri sumus pugnâ, nihil periculi imminet ab Aduersario; Imo ab ipsius imprudentiâ plus adiumenti speramus, quam à nostrâ industriâ. Ita enim aperte, mentitur, sic omnem eiurat veritatem, ita se iniuriæ propriæ sensu transuersum agi demonstrat, vt dum aliis calumniam frustra instruit, sibi paret damnationem: ac proinde quæcumque in nos congerit calumniarum plaustra, in ipsius caput, & dedecus resiliant. Nec vllus sapiens est, aut probus, quin lecto eius libello, iudicet nil nocuisse ijs, quos tanto furore impetir, sed sibi tantum calumniatoris nomen, probis omnibus dolores & gemitus, infirmis scandala, infidelibus summum gaudium peperisse. Hoc vnum me vrit, & vrget ad defensionem communis matris Ecclesiæ, quam sine dubio crudelius, filiorum quam hostium manus cruentæ, dilacerant: Illius portionem non contemnendam (vt modeste loquar) Dominicanam Religionem, quæ illi semper præsidij, & clypei, nec non etiam ornamenti loco fuit, vnius hominis furor, vindictæ, non boni communis studio, omni telorum genere euertere nititur: Quo successu antequam partibus ostendatur, in vniuersum, Expendo his tribus præiudicijs, quæ omnem illi fidem abrogant; & quæ paucis repeto à scriptoris Authore, causâ, & stylo.

In hominis natalia non inquiero, quia renatis in Christo nec de claritate generis minium gloriari licet, nec alijs stirpis ignobilitatem impropere. Multominus mihi permitto eius mores ad examen vocare, & si scirem minus probos, vellem ab aliorum oculis subducere, quia parò calumniam repellere, non reponere: satis est ad rem nostram demonstrare hominem istum, ita indole, natalibus, studio, ad rixas, ad conuicia, comparatum, ut nec ipsis pepercerit, quos maxime reuereri, & quorum si quæ essent vitia, occultare debuerat. Inter Phocensium & Allogobrum saxa montesque nato, contigit ingenium solo natali simile, indomitum, contumax, & vindictæ appetentius, iniques, cuirixæ, contentiones, ludus & delicix: cui conuicia eloquentiæ flores, quibus gloriatur se *Theologia sentes amantasse*. Id certe mirandum; quod sanctissimæ Religioni, cui nomen adolescens dedit, disciplinâ, tot exercitationibus pijs, tot Sacramentorum frequentia, tot exemplis effici non potuerit, quin totam vitam in discepcionibus transegerit, quæ non aliud operæ pretium, aut fructum, quam iurgia & scandala, proborum dedecus, & hostium Ecclesiæ risus, & cachinnos pepererunt. Cæteris, quæ huius rei fidem faciunt, prætermisissis Argumentis, duo attingam satis nota, quibus constabit, nil sacrum, eius ingenio & calamo: quorum intemperantia illum reum peregit læsæ-Majestatis Principis sub quo natus est, & violatæ reuerentiæ, in societatem, quæ illum ab infanzia ad omnem pietatem, & scientiam sinxerat, & Instruxerat armis, quæ in Ecclesiæ hostes distringeret, non in Domesticos fidei, nec in caput Principis, vel in viscera materna intorqueret. Vtriusque criminis leuissimam, præ culpæ magnitudine poenam luit, iniectus bis in carcerem. Genus offensæ in principem omitto: Multo certius & atrocius est piaculum in matrem, quod iure paricidium appellaueris, non dissimile facinori, quod in nos admittit, longe tamen gradu dispar, licet genere conueniant; & ideo a me referendum, ut vnum comparatione alterius elucescat, aut potius Authorem obscurer.

Societatis Authori Sanctissimo nil carius, nil pretiosius fuit Euangelicâ paupertate, quâ socij supra ipsos

Religiosos Minores videntur eminere, quia illis Di-
 Ignatius nullum ius ad stipendia, ad redditus annuos;
 saltem in domo professâ perimit, vnâ facultate reci-
 piendi, quæ sponte erogarentur contentus, ius omne ab-
 dicauit repetendi etiam quæ legato darentur; & si quod
 prædium habere illis licet, ad rusticandum concessum est,
 non ad serendas, aut metendas segetes, & si quæ ibi
 nascuntur, non vsui ad panem, sed tantum iumentis ad
 pabulum dari possint: atque ita est cordi, Religiosissimo
 ac sapientissimo Theologo Suarezio hæc arcta pauper-
 tas, vt illi Religioni sit, prædij gallinas adeo sobolescere,
 vt carnes, vel oua, vel obsonium aliquot dierum, Pa-
 tribus sufficiant; quamuis hunc scrupulum ab eisdem
 suis socijs, longe amoueatur Cardinalis de Lugo IV.
 Consiliorum dub. 10.

Thesaurum istum paupertatis pretiosissimum, à
 partibus accusationes grauabant, filios dilapidasse,
 Patre testamento relictum, multæ à varijs orbis
 & altissimam paupertatem, qua volebat abundarent, in
 diuitias simplicitatis Christi, labefactasse, ac penè euer-
 tisse. Indiarum mercatores conquirebantur, intepuisse
 ac penè extinctum esse, nostri temporis & noui orbis
 Apostoli Xauerij zelum, qui egerimè ferebat, prius
 auri conquirendi, & auaritiæ, quam Euangelij, aut sa-
 lutis animarum causâ apertum nouum orbem: Nunc
 autem ordine præpostero, Euangelicos magis vniones
 querere, quam animas, lucro inhiare, & mercatori-
 bus occasionem captandarum opum præcipere. Has
 vociferationes Societatis æmuli arripiebant, imò &
 hæretici, ac suis artibus ita augebant, vt viderentur fi-
 dem facere, & conflare inuidiam, mutatæ in Mercatu-
 ram prædicationis Euangelicæ, aut saltem eius conta-
 gio ita corruptæ vt cum solam esse conueniret, vix po-
 ssetremas partes obtineret. Inter has litteratorum & Mer-
 catorum confusas voces, tacere non potuit Author
 noster, & cum accusationes falsas, suscipere debuisset
 refellendas, & totis viribus, infontem matrem propu-
 gnare, visus est potius accinere accusationibus, & ad il-
 lorum partes accedere. Maluit alienis inuidorum testi-
 monijs, quam proprijs oculis id est Innocentiæ do-
 mæsticæ experimentis fidem habere. Itaque furtiuo

prælo suum Hipparcum seu de Religioso negotiatore disceptationem edidit, quasi vellet *negotium* aliquod *in tenebris perambulans* in lucem proferre. Certum est plus hoc libello, quam toties iteratis hominum vociferationibus, sinistram & falsam vulgi de minus sancte servatâ paupertate opinionem esse confirmatam, & plus filium intemperantis linguæ & calami intulisse damni, quam omnes aduersariorum & hæreticorum conatus.

Si in viridi, quid in sicco? Si Theophilus suis ita fuit noxius & exitialis, quæ mala vel importabit vel molietur ijs, quibus apertum bellum indixit, quos totâ quâ valet eloquentiâ, quasi Pontificum, Ecclesiæ, bonorum omnium, ac penè generis humani hostes traduxit? Tanti fuit libellos de Martyrio per pestem, ac de Communionem promouit suffragio Congregationis Indicis esse damnatos, ut viginti aut pluribus exactis annis, tantam pestem, aut perniciem necesse fuerit in totum Ordinem Dominicannum inferre, ut nescias an odium, quo in illum flagrat, & quod singulis verbis emicat, exsaturare posset, etiamsi terra detrisceret, ut illum absorberet.

Quis credidisset sub animo illius qui in sortem vnum Deum abdicato sæculo elegerat, quasi sub cinere dolofo, tot annis potuisse latere consilium vindictæ adeo atrox, & non solum a Christianismi, sed etiam ab omni humanitatis sensu alienum, ut omnium hominum admirationem superet, senem, sacerdotem, religiosum, se ad mortem cui proximus est, & ad Dei Iudicium, quod imminet, parasse hoc libello famosissimo, quo religionem, & subinde totam Ecclesiam ridendam Impiis propinat. Ille est tandem cantus cygni quo voluit extremam vitæ partem concludit. Quid ad istam amarulentiam & perpetuam iniuriarum memoriam, quarum sensum Euangelium prohibet vsque ad solis occasum seruare, & quâ viginti, & amplius annis flagrauit, dicent non Angeli, non homines probi, sed ipsimet Infideles, quorum sine dubio moderatior est & minus diuturna minusque flagrans ira, & vindictæ cupiditas.

His præiudicijs ab Authore, à causâ, à stylo descriptionis repetitis, videor rem confecisse: quia hoc habet saltem boni libellus iste famosus, quod scor-

pionis more vulnere a se inflicto remedium præbeat. Quæ namque fides habenda illi qui tam apertè præfert iniuriæ sensum, & vindictæ cupiditatem; qui mortis & iudicij Diuini omnino immemor, falsa quæque comminiscitur, vt damnationem iustam libellorum iniquè vlciscatur.

Quod a me, his alijsque locis insinuatum est, de tribus a Petro in suos exaratis libellis, sumptum est ex vulgari, quæ apud multos inualuerat opinione; sed eam eleuauit, aut in totum sustulit, vel certè in summam Societatis laudem vertit postrema operum Theophili Lugdunensis Editio, in quâ nullus horum librorum, qui credebantur in illam scripti desideratur; quod Argumento est, aut falsam esse eam opinionem, aut huiusmodi libros non nisi calumnias habere in Societatem, adeo suæ innocentiae securam, vt exemplo illius cuius nomen præfert, & verbis *Quis ex vobis arguet me de peccato*, nihil dubitet exteros vel domesticos prouocare: nec minus forti animo illorum falsas ferat accusationes, aut conscientiae testimonio etiam tacita aspernetur, quam validis possit cum libuerit argumentis confutare.

ARTICVLVS TERTIVS.

Refellitur Epistola libelli ad Lectorem.

LICET mali perinde ac boni nusquam à modicis principijs repentinus sit progressus ad summum, eo tamen euasit Theophilus, aut potius in profundum delapsus est ipso libri limine ac præludio vbi vindictæ cuius diximus cupiditate flagrare, abreptus, ita sæuit in homines Deo sacros, ita ludit de rebus sacris, & immunitatis Christianæ & Ecclesiasticæ nomen venerandum, in adeo profanas, ac turpes acceptiones vsurpat, ad dedecus Dominicanorum, vt videatur humanitatis, & Religionis sensum fere exuisse. Placet illi Hæreticos imitari, qui de ritibus ac nominibus Ecclesiasticis, per summam impietatem ridet, ac iocantur. Certè cum Spiritus nequam, & Dei atque humani ge-

neris hostis, *Cui nomina mille, mille nocendi artes*, omnium machinarum, & armorum genere Ecclesiam euersum & perditum eat; Nullum viderur in illam telum potentius & feralius intorhisse, ijs impiorum libris quibus rebus & viris sacris illuditur, & grauissima quæque Mytheria quasi ridicula traducuntur. Huius generis scriptorum Auctor & facillè princeps est Lucianus a fide Christianâ Apostata, & Religionis contemptor, quam eo periculochius aggressus est, quod ludibrijs, quibus illam dehonestauit, ingenij acumen, & eloquentiam meliori argumetro dignam adiunxit. Huius impietatis multos imitatores; ingenij, eloquentiæ & styli paucos habuit.

Ab illo propius absuit Erasmus cui nil sanctum fuit, a cuius contemptu & irrisione abstineret, vt demonstrat, præter colloquia, infamis libellus, cui *Moria* titulum dedit: atque toto illo opere in Christum, in Apostolos, & Diuos omnes, Iudæis, & Tyrannis eò crudelibus sequitur, quod non tormentis Martyrij gloriam illis pareret, sed eorum contemptum ludibrijs inducat in animos, & omnibus ridendos subijciat. Hos superioris & nostri sæculi, quo ingeniorum cultus in lasciuiam, & impietatem degenerauit, Auctores, hos Dei, Diuorumque sacrilegos contemptores, & veros Atheos, non est indignatus imitari, Religiosus professione, sacerdos gradu, qui se Theologum profiteretur etiam senio confectus: ca scribit, quæ in Iuene lasciuiente, quæ in Ethnico, senerrimè castigares. His gloriatur & triumphat homo Christianus, qui quotidie ad Altare Deo sacrificium offert, & gloriam constituit, in ijs infamia notandis, quos reuereri debuerat. Duos Gallia habuit hoc sæculo Theophilos, Poetam & aulicum vnum, Theologum, & Religiosum alterum, re quam nomine similiores, nisi quod ille liberioris vitæ, hic linguæ petulantioris fuit, quod ille ingeniosior, iste calumniator apertior. Hoc etiam ab illis Auctoribus, quos supra nominavi distat, quod illi fabulas fingant, rideant, non sine impietate, sed ad minus sine amarulentia; at iste subfannationes habet, sarcasmos, sales nullos; & ludibrijs quibus proscindit optimos quosque amarulentiam adiungit, & vinctur rabiem.

Suâ ad lectorem Epistolâ non solum argumentum aperit, sed etiam animum & ingenium; de Immunitate ludit; dicit pluribus gaudere Dominicanos, quas pudet referre, adeo ipse inuerecundè agit. Erasmus præfatione in suas ad Senecam notas, de Authore Indicat exactissime; & hoc maxime reprehendit, quod licet seuerissimus sit vitiorum Censor in his tamen describendis, ita videtur suo ingenio indulgere, vt illa potius subijciat docenda, aut prosequenda, quam odio habenda, ea narret, quæ saluo honore aurium referri nequeant. Si Erasmus etiam ipse liberior nolit Philosophum contingere turpia, vt illorum horrorem Ingenieret, quid censuisset de Sacerdote, de Theologo, de Religioso, de Sene, qui lapsus aliorum fingit, & eâ verborum licentiâ euulgat vt videatur non solum de casu proximi voluptatem capere (quod charitatem exstinguit) sed ipsâ met narratione delectari? quod quâ ratione Religioso & seni conueniat, ipse viderit. Ludit etiam verbo Immunitatis, & quasdam Infames nobis affingit. Quam dissimilis est Becano societatis Theologo, qui de priuilegijs & immunitatibus Calvinistarum agit! sed quod Becano sunt Calvinistæ, hoc sunt Theophilo Dominicani, nisi quod modestius & minus hostiliter agat ille in Hæreticos, quam iste in Religiosos.

Placuit alias mihi maximè Becanus suâ de tredecim Immunitatibus Calvinistarum dissertatione, quas ego postmodum meo quodam opere ad numerum Senarium reuocatas, per ludibrium, *Mare magnum Calvinistarum* vocabam: hoc ordine, quod illi solâ a parentibus Christianis origine, primo Conceptionis momento, ita sancti & puri, & a Deo edocti sint, vt nunquam in posterum vel à gratiâ excidere, vel aliquo errore à fide deficere possint, & maternus vterus etiam incestus, etiam adulter, modo Christianissimum mater aut pater profiteatur, est illis primum Baptisterium, quo iure communi se habere aiunt Calvinistæ omnes, vt à peccato originali sint immunes. Secundo idem vterus est illis cænaculum Hierosolymitanum, quod delabitur Spiritus Sanctus, & eos sicut die Pentecostes Apostolos, ita in gratiâ firmat, vt ab eâ numquam imposterum excidere queant. Tertio est illis sacrarium vbi omnes vnguntur

in Sacerdotes, vt spirituales hostias Deo offerant. Quarto est illis tribunal Confessionis, vbi in antecessum ita ab omnibus peccatis futuris absoluuntur, vt nullus illis imputetur unquam ad damnationem. Quinto est illis Academia, vbi à Deo ita imbuuntur de rebus fidei necessarijs ad salutem, vt nullam possint ignorare vel etiam si velient errare. Ultimo maternus vterus est illis veluti Cancellaria, vnde literas habent, quibus immunes fiunt ab omni voto, a legibus omnium principum, & etiam à lege Diuinâ, hoc saltem sensu, vt licet in illam peccent, nullum ex eo peccato salutis periculum aut damnum creetur, quia Calvinistis peccata non imputantur. Hæc cum tuo Beccano contra Hæreticos de immunitatibus ageremus, Theophile tanquam in Ecclesiæ hostes, nisi tu Catholicis bellum moueres argumento, aut saltem titulo immunitatis non dissimili. Quid putas, dicturos probos, quid ipsos Hæreticos, cum viderint quæ Beccanus & nos in se expeditus arma, verti à te in Catholicos? An dum hæc scriberes, non timuisti, præter illud quod modo suggessi, horribile scandalum, ne tibi sicuti possem, & quidem verè ac iustè reponerem pares immunitates etiam a lege Diuinâ, à quâ ipsimet Hæretici immunitatem obtendunt, non culpæ, sed pœnæ, at vero tu videris vtramque inducere & alijs polliceris.

Nos, mi Petre, ita institutione Sanctissimi Patris nostri Dominici, & Diui Thomæ documentis sumus è primis Religionis elementis instituti, vt leges diuinas non ad probabilitatum Lesbiam regulam, sed ad tenorem inflexibilem SS. Patrum interpretemur; atque eodem quo intelligimus, sensu totis viribus implere nitamur, & alios doceamus inaplenda. Si quid humani nobis aut nostris accidat, ingemiscimus, dolore, & zelo tabescimus; nec de immunitate nobis applaudimus, vel alijs blandimur, sed legem nostris & aliorum obtutibus obijcimus tamquam Iudicem nos prædamnantem; hic est omnium nostrum sensus de legis Diuinæ vi. Quis vero tuus sit satis demonstraſti libello adeo licenter scripto, vt de te dicam nullo iudicij temerarij periculo, quod de nonnullis dictum circumfertur; puto te habere alium Decalogum ab illo quem a Dei manibus suscepit Moyses;

puto te magis sequi illum Anti-decalogum, quam non mihi ignotus vir doctissimus scripserat cum hoc titulo, *Tempus faciendi Domine dissipauerunt legem tuam*: & tandem credo, te ad minus assentiri pluribus ex centum triginta articulis quos ex variis vestris Authoribus collectos contra Decalogum militare censent plurimi. Hæc ne credas ad communem inuidiam vllius ordinis dicta, quia nullum commune bellum suscipio, sed ad deffensionem contra tuas immunitates, & calumnias. Sed antequam respondeam singulis partibus tuæ primæ Diatribæ, necesse est aliquid præfari de his quorum conuicijs totum tuum opus resperxisti,

ARTICVLVS QVARTVS,

*Conuicia Theophili in Magistros totius Ordinis
Dominicani, & Sacri Palatii.*

NEc dubito sane quin Theophilus illam sibi a lege Diuinâ immunitatem asserat: alias qui fieri posset, vt homo Christianus tot & tanta peccaret, confingeret atrocita in dedecus aliorum, nec quicquam pensi haberet, nisi certus esset se hæc omnia impunè & innoxie facere? Sed quo argumento id sibi persuadet? Nempe probabili illa opinione, quam pater Di-castillus acerrimè defendit aduersus P. Valerij è Germaniâ ex Capucinatorum Ordine Concionatoris celeberrimi accusationes, cui plures alij subscripserunt, scilicet calumniam quamlibet & falsam quâ virum integræ famæ & vitæ Atheismi, veneficij, principis & patriæ prodicionis accusas, dummodo aliqua deffensionis tui causa non desit, ad summum venialia esse peccata, ratione mendacij quod admisces; sed nullum inde creati damnationis periculum, & aliunde maximum existere posse instituti emolumentum.

Iurarem Theophilum in eâdem cum Di-Castillo esse sententiâ: & inde profectam illam mentiendi & calumniandi licentiam, semoto omnis lethalis peccati vel damnationis metu. Quid enim illo præsidio tutus, his armis instructus, non moliatur in Dominicanos? sed

omnia possumus vno verbo infringere, & delere cum prænominato Valerio, mentiris impudentissimè præsumptâ opinione, quaslibet enormes calumnias leuiter tibi esse peccata, & loco esse mendaciorum quæ officiosa vocant. Verum paucos habebis qui tibi assentiantur, & licet conscientiam semoueas, & æternum Dei Iudicium; potuisti ne saluâ humanitate, tantâ conuiciorum illuuiæ probos omnes fœdare? Certe cum multis nominibus tuam scriptionem inuisam, ac pænè execrecabilem feceris bonis omnibus, tum illud maximum stuporem & horrorem incutit legentibus, quod passim toto libello irrideas, traducas, laceres, sarcasmis, conuicijs è triuio, Illustrissimos & religiosos viros, quorum (nisi omnem humanitatis sensum deposuisses) natalium splendor, maiorum gloria, propria virtus, locus quem in Ecclesia occupant, a te exigebant, vt sin reuereri nolles aut præ inuidiâ non posses, esses animo in illos minus hostili, & infenso. Præcipuam tui operis partem imple improperijs in Reuerendissimos patres Ioannem Baptistam à Marinis, & Raymundum Capisucchium, quæ nescio an plus habeant amarulentix, an contemptus, an atrociora sint, an magis ridicula. Certasti cum Hæreticis impietate, cum sycophantis calumnijs, nec laudem quam scio te maxime ambire, tibi præripiam, præterita malitiæ exempla facile superasti.

Sed antequam vitra progrediar, id velim scire, quis te docuerit Theophile, præstantissimos & clarissimos Patres Richardium, Rodolphium, aliosque illustribus in Ecclesiâ defunctos officijs, solo *Fratris* titulo compellare. An ignoras viros istos grauissimos, & Sacerdotij dignitate, & præfecturâ & sacris muneribus Patres esse? Mirum est, tibi quamuis plurimis annis in ea Religione instituto, in quâ vrbalitas regnat, nil tamen vrbalitatis potuisse ad hærescere. Adeo insuperabilis est rusticitas, vt quem *dedit natiuitas, rigor non potuerit lenescere*. Sed vt ad Reuerendissimum Patrem Generalem redeamus; scis quem laceffas & carpas, dum totius Ordinis Dominici Generalem Magistrum laceras, & quod horret animus referre, præ alijs titulis *Opinionem Arcadia*, vocas? Is est Diui Dominici Successor, caput Ordinis toto orbe latè diffusi, quem

Summi Pontifices, quem Reges & Principes honore prosequuntur.

Nihil attinet Reuerendissimi Patris Marini præclarum genus referre, quod multi certis indicijs ab Imperatoribus repetunt; sed vt viciniora attingam maiorum ex paternâ & maternâ stirpe decora, ab illa habet Leonardum Marinum ordinis nostri Archi-Episcopum Lancianensem, quem Concilium Tridentinum inter Patres eximium, & sapientissimum, Aula Regis Catholici, trium Summorum Pontificum Nuncium habuit, & mirata est: & causam Societatis, dum in Hispaniâ degeret, validissimè defendit; & quod his omnibus maius reputo, Catechismum Romanum cum Forerio, & Foscarario Dominicanis composuit, opus plane diuinum, quod possit suos Authores immortalitate donare. Habuit ex maternâ stirpe Vincentium Iustinianum auunculum, qui non dissimilis virtute Marino, superauit Magisterio Generali Ordinis nostri, & additâ dignitate Cardinalitiâ, à quâ iam debita & parata mors Leonardum subduxit.

Horum duorum nepos est Pater Marinus, quem Theophile tibi laceffendum & lacerandum suscepisti. An quo cares, Natalium eius splendorem spernis, & totis viribus is maculatum? Et qui inter tuos maiores, non nisi baiulos & fossores numeras, placuit tibi conuicijs prosequi eum qui citra iactantiam posset de Imperatorum prosapiâ gloriari: & quem virtus & merita, & vita innocenter acta, ad Magisterium Ordinis per electorum vota ipso Summo Pontifice Innocentio X. approbante euexerunt, malignè & falsò immeritum & intrusum calumniaris Generalem, qui his gradibus ad Ordinis Magisterium conscendit. Quâ fronte etiam obtrudis ignorantiam Grammatices, & Theologiæ, illi qui Salmanticæ per octo annos decurrit Philosophiæ, & Theologiæ Spatia, & supra viginti defunctus cum summâ laude munere Congregationis Indicis Secretarij, Summos Pontifices Cardinales habuit suæ virtutis & scientiæ testes & præcones. Sed vt video Infausti ominis tibi est Marini nomen, & ad illud toto corpore cohorrescis, quod subscriptum videas Decretis, quibus libri tui configuntur. Sed quid

propterea commeruit, qui nequidem suffragio tibi nocere potuit, & prolata ab alijs sententiæ Secretarij nomine subscripserit.

Sed frustra tanti odij in illum causam inquirō, certè non alia horum malorum origo est, quam quod tu moribus Reuerendissimo Marino dissimillimus sis: nam ipse totus ad humanitatem, ad bene de omnibus merendum natus; tu vero ad vindictam totus sis compositus. Quod etsi alia exempla decssent, demonstraret causa quam præ manibus habemus. Verè enim dicere potes cum Luthero in Lipsicâ Disputatione ab Ecchio fortissimo Athleta victo, *hac causa non est propter Deum capta*. Sed si huius disceptationis principio Luthero accedis, Deum precor, sis sine dissimilis, nec ex animo aut verè cum hoc Apostata reprobo adiungas, *Nec propter Deum finietur*. Te vero gratuito malum innocentissimos viros lacessuisse, tota vrbs & Aula Romana imo totus Orbis Christianus agnoscit, & fert ægerrimè.

Quidquid ergò obtendas, & vocifereris in Dominicanos, odiorum causa est, quod Officia occupant, & exercent, quæ tibi tuisque velles; hinc dolor, hinc lacrymæ. Hanc demonstrationem de intimo animi tui sensu confirmat collatio ipsa scriptionis, & causæ quæte ad scribendum impulit. A duodecim annis assumptus ad Magisterium Ordinis, a negotijs Congregationis Indicis omninò abstindit Pater Generalis: examen ac damnatio librorum tuorum pluribus annis eius electionem præcellerat: Iniuriæ, quæ non fuit illata, sensus apud Religiosum & Christianum nullus esse debebat, aut si omnino cuitari non poterat præ infirmitate, ante solis occasum ex præcepto Evangelico extinguì oportebat. Antiqui Saturno olei urnam sacrificabant; quo significarent, temporì, cui præest Saturnus, maximam inesse vim ad Leniendos quoscumque affectus, & dolores. Hinc Cicero illud protulit, nullus est dolor, quem longinquitas temporis non minuat, atque molliat.

At tu inter montes & vrsos natus, adeo es rudis & indocilis, vt contra naturam viuaciores apud te emicent & flagrent iræ, & vindictæ affectus: & quem eadem die, quâ non data, sed a te accepta est occasio, excusare potuisses, ac debuisses iniuriæ sensum, post
duodecimum

duodecimum, aut vigesimum annum vehementiorem effundis, Si quid tibi à viro humanissimo acciderat, quod displiceret; multa repetere poteras, quæ in tuâ Ethicâ collegisti ex Philosophis, ad comprimendos iniuriæ sensus, & vindictæ motus. Sed illa videris scripsisse ad aliorum salutem, & ad tuam perniciem: vt quotquot aduocasti Philosophos; sint vltimo Iudicio contra te testes futuri, qui damnent illud odium implacabile, omnis rationis & gratiæ remedio immedicarum. Quod verò P. Marino simile quid in Societatem affingis, ipse depellit, eo quo post tot illatas iniurias Decreto, D. Ignatij Officium toti Ordini recitandum celebrandumque indicit, & vltimo Generali Capitulo præcipit omni officiorum genere prosequi Societatem.

ARTICVLVS QVINTVS.

Totius operis Partitio, & Noua forma.

HVIVS Præfationis exordio diù dubitatum esse dixi, an è re nostrâ, & totius Ecclesiæ esset, Theophili Satyras silentio prætermittere, & contemptu resellere, vel scripto; sed cum vtrique rationum momenta occurrerent, visum est diuersas Sententias sic posse conciliari, vt nec operosa defensio adhiberetur, nec omnino nulla: nec iusto prælio, sed velitatione, aut potius castigatione quâdam ageretur cum huiusmodi Authore: neque enim tanti est, neque eo honore dignus, vt viri sapientes longi temporis, & laboris impendio, illum suscipiant impugnandum. Sed placuit alicui in scribendo Tyroni, qui in illo genere sui nullum vniquam specimen dederit, aut fecerit operæpretium, resurandum relinquere, atque huic scriptioni paucissimos dies impendere, eosque qui caniculæ aestus intolerabilis causâ, ad nullam rem seriam opportuni sunt, & quibus vix interspirare liceat. Atque ita contrariæ Sententiæ quæ responderi volebant, aut negabant oportere, in vnâ conuenire videbantur: quia hæc responsio extemporanea, cum parum absit à silentio, multum habet iusti contemptus Authoris: quo vno genere poena

nec iustius illius libelli Author, nec acerbius castigari potuit. Sicut enim Christus, ad abigendos ab obsessis corporibus Dæmones, nec Apostolorum potentiâ & miraculis, nec Doctorum sapientiâ, nec auctoritate Præsulum aut sacro Sacerdorum charactere, & ore quod Christi Corpus conficit, vitur, sed Exorcistas adhibet, idest, infirmos Ecclesiæ Ministros, quibus Dæmones subiecit ad conculcandam Spirituum rebellium superbiam: ita conueniebat Christi exemplum imitari, neque ad hunc Authorem refellendum opus fuit Godoi Salmanticensis Academiæ lumen, aut Nicolai Parisiensis par ornamentum, aut Combefisium a suis studijs auocare; satius fuit eo opere deicere hominem, quod plus haberet contemptus quam apparatus, aut virium, quod fieret ab inexercitato, & tempore anni incommodissimo, vno ferè mense perficeretur.

Sed cum præter vitia quæ responsioni huic adhæserunt, ex huiusmodi causis à me relatis plura accesserint ex editione Cracouiensi, vnde prodijt libellus adeo deformatus, vt iurare possis editum, Cracouiâ à Suecis obfessa & occupata: adeo bellum & arma respicit atque Barbariem Gothorum. Neque satis mirari possum humanitatem aliquot virorum eruditorum, quos audio libellum tot modis fœdatum, non fuisse dedignatos legere, neque omnino illis displicuisse. Sed ne quâ immeritum opus viri eruditi sunt persecuti gratiâ excidat; visum est præter emendationem erratorum, quæ possent fatigare Lectores etiam benignissimos, nouâ formâ, elegantiori fortè cultu donare, vt gratior & vtilior sit ijs qui etiam deformatum non abiecerunt.

Quamuis Theophilus magis cæco impetu quam iudicio illud scriptum effuderit; in eo tamen licet obseruare aliquam vmbra & speciem ordinis, qualem turbidissimi affectus pati possunt. Quidquid Familiæ Dominicanæ, cuius excidium iuravit, boni inest; his omnino quatuor partibus continetur: primo rectâ in Deum fide, & illi adiunctâ pietate in Summos Pontifices, & in Diuos potestatis & sanctitatis diuinæ participes: deinde doctrinâ dogmatum, & morum, quæ de Diuinis, quid sentiendum, & de vitâ probè regendâ statuit: tertio grauitate & probitate morum, quæ longe

absit ab Invidiâ, à contentionibus, à scurrilitate alijsque id genus vitiis, Charitati Christianæ & conuietui humano infensis: Vltimò denique iuribus, & officijs, quæ in præmium rectæ fidei, pietatis, scientiæ, aliarumque virtutum, collata sunt liberalitate summorum Pontificum.

His ni fallor, lineamentis potest ut cunq̃ue Ordinis Prædicatorum imago adumbrari. Neque enim negari potest, illi contigisse viros his omnibus dotibus præstantissimos, quos sanè non excludas ab illis encomijs, quæ Paulus plenis manibus, & eloquentiâ Tullianâ maiori, congerit in sanctos illos præteritorum temporum Heroes, quos ait *per fidem viciſſe regna, adeptos repromiſſiones*. Et quamvis hæc imago quatuor sæculorum possit forte accedere ad illam Societatis vnus sæculi, visa tamen est Theophilo, habere speciem statuarum Babylonicæ, & tot dotes & ornamenta debili fundamento, & argillâ niti: quam proinde suo libello veluti lapidis sponte delapsi impetu esset contriturus.

Hoc verò distat eius consiliũ ab insomnio Regis Babylonici, quodd statuarum infimâ sui percussâ parte reliquæ omnes dissilierunt, & funditùs euersæ sunt. At Theophilus nullam partium quibus coagmentata est imago Dominicanæ Familiæ, intactam reliquit: tribus Prioribus Diatribis fidem nostram multarum hæresum, pietatem sacrilegij accusat: Quartâ Diatribâ doctrinam nostram impetit, Scholæ nostræ dogmata falsa, absurda, paradoxis accenset. Quintâ, sextâ, & duabus sequentibus, in mores nostrorum hominum inuehitur, & quasi nugaces, ridiculos, mendaces traducit. Hac triplici impressione factâ putat statuam euersam, & quæ per quadringentos annos iura & officia seruauimus, à nobis ad alios statuit esse transferenda. Nihil fingo erudite Lector, hoc est Theophili consiliũ, hi sunt eius conatus, hæc libellorum eius summa est. Cum itaque quadripartito in nos agmine feratur, eodem Ordine nostram aciem instruemus.

Primo quidem libro fidem & pietatem Dominicanorum, à trium Priorum Diatribarum calumnijs vindicabimus. Adiungemus etiam aliqua, quibus faciliè soluemus quindecim nodos Petri de Alua, quos insolu-

10 **! TOTIVS OPERIS. ARGVMENT. ET PARTITIO.**

biles vocat; Secundo libro doctrinam nostram, quæ ad dogmata; Tertio quæ ad mores pertinent non solum aduersus quartæ Diatribæ imposturas, sed etiam contra plures ipsiusmet Authoris aliorumque libros propugnabimus, quales sunt etiam, Expostulationes Carterij, &c. Quarto libro purgabimus Dominicanos à mentiendi, nugandi, calumniandi licentiâ, à liuore, alijsque vitiorum sordibus, quibus nos maculat Author, quo nescio an vllus vnquam mortalium sorduerit magis, aut laborarit periculosius. Vltimo tandem asseremus nobis Iura & Officia, quæ nihil dubitat iniustè à nobis posse, ingentibus in Ecclesiam meritis sibi deberi. Ex ipsius operis & nostri consilio ac partitione iudicent æqui Lectores, an iniquior fuerit, vlla vnquam accusatio, eâ quam in nos suscepit Theophilus, vel iustior nostrâ, ac magis necessaria defensio.





LIBER PRIMVS.

*Vindiciæ Dominicanorum fidei in Deum
rectæ, pietatis in summos Pontifices, &
in Diuos: Aduersus tres Diatribas Theo-
phili, & quindecim Nodos Indissolu-
biles Petri de Alua.*



Hæc tria vno libro iungimus cognitione
Argumenti, & accusationum Theo-
phili. Nam licet recta in Deum fides
omnium Diuini Ordinis virtutum pri-
ma sit, & reliquarum rectrix ac parens,
præ ceteris tamen congenitam sibi ha-
bet pietatem; quâ Deum vbique reueretur, & eos ma-
ximè colit, quos suæ Diuinitatis consortio dignatur. Ec-
cum in Summis Pontificibus suam voluerit potestatem,
suam in Diuis sanctitatem eminere; iubet nos illis reue-
rentiam exhibere. Hæc tria in nobis desiderari conten-
dit Theophilus, eadem fere obijcit Alua, vtrique hoc
Libello respondebimus.

SECTIO PRIMA.

*Fides in Deum recta Dominicanorum asseritæ
contra primæ Diatribæ calumnias.*

EA est hominum, qui ratione ducuntur institutio, seu
laudent, seu vituperent quemquam; vt rerum ab illo
de quo agunt, præclare, aut secus gestarum exordia.

modicis principiis repetant, & subinde ad maiora progrediuntur, vix aliàs dictis suis fidem facturi, si primum maxima, id est, incredibilia aperiant. Verum placuit Theophilo agere ordine omnino præpostero: & Dominicanos omni malorum ac conuictiorum genere grauaturus, incipit ab omnium atrocissimo, nempe ab hæresis crimine: quasi vellet eâ accusandi ratione omnem sibi fidem abrogare, vel præ impotentia calumniandi non posset sibi temperare, quin maximum omnium conuictiorum primum effunderet.

Adeo atrox est hæreseos accusatio, vt cum ad cæteras quamlibet immanes silentium & patientia summæ laudis & infinito prope merito ducatur, ad istam piaculum sit obmutescere: nec intercedere, summæ impietati vertatur. Ita nos docuit ex historiâ asceticâ vnus Eremita celeberrimus, cui cogitationem sanctam cum immisisset Deus, durandi aduersus calumnias animi, & aliquem ex Eremiticis incolis rogasset, vt sui periculum faceret exercitatione conuictiorum; nec ab vilo quamlibet aspero in se abstineret. Obtemperauit votis sanctis Anachoreta, & quæ in mentem venire potuerunt vitiorum & scelerum genera, in illum impegit, nedum illas patientiâ, sed etiam læto ista ferentem animo: verum ad hæresis criminationem sese cohibere non potuit, quin excandesceret in suæ patientiæ exploratorem; ratus quoddam sacrilegij genus esse, æquis auribus audire sibi obiectum crimen hæreseos: quod cum vitæ Christianæ fundamenta conuelleret, & extinguat semina, hoc pessimum præ cæteris habet, vt excludat à venia omnium, & à curatione, futurâ in promptu, si fides supersit: eâ vero per hæresim sublatâ, de salute actum est, nec spes veniæ, aut boni reliqua est.

ARTICVLVS PRIMVS.

Summa Diatribe, eiusque brevis, ac valida confutatio.

QUID hâc primâ tuâ Diatribâ assumpseris probandum, esset Theophile difficillimum conijcere, adeo

extra chorum saltas, & à proposito aberras, nisi tu semel & iterum indicasses, quia totâ eâ dissertatione, nihil minus, quam quod proposuisti, virges & conficis. Cachinnis agis non probationibus, conuictis non argumentis, mendacia mendaciis congeminas. Non potes negare, quin ea prima dissertatione proposueris tibi probandum, libros Dominicanorum damnandos, quod scateant erroribus & hæresibus. Hoc est primum tuæ Præfationis caput; vbi ex variis immunitatum speciebus, quas minutatim partiris, deterrimâ Dominicanos, magna liberalitate, donas; nempe immunitate librorum à censuris, quas multis nominibus commuerunt, maxime hæresibus; quibus asseris, & totâ primâ Diatribâ probas, fordescere. Atque vt finis respondeat principio, Diatribam his verbis absoluis; *Concluditur apodictice ex antedictis, libros Cyriacorum non posse statui immunes à censurâ, propter immunitatem doctrinæ reprobâ.*

Itaque vt paucis totam tuam dissertationem perstringam, quidquid virium habet hoc Argumento continetur. Libri hæresibus infecti omnino damnandi sunt: atqui Dominicanorum libri hæresibus scatent: ergo omnino damnandi, & qui illis parcunt, & ab eorum censurâ abstinere iudices, damnatis aliis minus malis, grauissime peccant. Nihil vtraque consecutione verius, si præmissis sua veritas constet. Primam propositionem, nempe damnandos libros qui hæreses doceant, Theologiæ Christianæ dogmatibus accensemus: secunda tibi tantum probanda incumbit propositio, nempe *libros Dominicanorum, etiam Diui Thomæ sequacium, hæresibus scaterere.* Quæstio facti est potius, quam iuris: sensu, oculis, experimentis confirmanda, non argumentis, neque historiis à remotis regionibus repetitis: afferendi sunt in medium libri Dominicanorum: magnam tibi illorum copiam suppeditabunt Bibliothecæ, & officinæ Bibliopolarum. Cedo libros illos discipulorum Diui Thomæ, qui adhæreant communi magistro, & hæresum conuince. Ad tuam famam pertinet rem propositam euidentibus demonstrationibus conficere. Da illam errorem quam promittis copiosissimam messem, & vindemiam exundantem.

Sed vbi amplissimâ promissione anxios & suspensos

legentium animos habuisti, prætermisissis nugis, quisquiliis (quas mox expendemus) hoc spicilegium, hanc racemationem profers. *Inquisitor*, inquis *Parmensis* *assertionem de contritione perfectâ ante susceptum reipsa Sacramentum sanctificante reiecit*, & ut vulgari pateretur, adduci non potuit. Addit: *Fratrem Vincentium Candidum Magistrum Sacri Palatii primum fuisse inter eos, qui scriptione sua firmauerunt hæresim, quâ nuper quidam bardus assererat species sacramentales non esse accidentia realia, sed præstigias, & inanes species, quales sunt colores Iridis*. Huius hæresis primum Authorem facis Holcot Ordinis nostri Theologum, Bannem præterea hæresis acculas, quod existentia substantiæ panis, & vini, post consecrationem Eucharistiæ seruata, velit accidentia subsistere. His tribus erroribus quantum adiungis proprium Combefisio, quod cum Arnaldo biceps Caput Ecclesiæ Romanæ Petrum & Paulum constituat, & ab utroque Apostolo, sedis Romanæ repetat successiorem. Præter hos quatuor errores singulares suis auctoribus, quintum numeras communem multis, qui negent hanc propositionem modalem, à summis Pontificibus definitam, piam & probabilem esse de Conceptione Immaculatâ Deiparæ opinionem.

Ecce quo tandem reciderit tua illa grauissima accusatio hæreseos, tanto apparatu suscepta in Dominicanos: & cum conscientia debiliū, ac penè ridicularum huiusmodi quinque probationum (quibus omnes tuæ demonstrationes continentur;) timeres, ne risum & indignationem Lectoris moueres, & incurreres; conatus es causam profligatam, & flagitiosam utcumque sustinere, promissâ efficaciori & ampliori probatione quamprimum danda in indice vniuersali, quem paras ad singulos Authores Dominicanos. Sed hoc artificio non effugies cachinnos, & odium bonorum. Vnum te volo, Petre: vel subiecisti quæcumque habebas argumenta; vel meliora tibi suppetunt? si tibi præsto erant, quare reticuiisti? an ignoras *nihil magis esse aduersum scribentibus, expectatione*? Excitasti de te maximam, dum indixisti bellum apertum Cyriacis, & suscepisti conuincendos hæresum. Hanc vero rem tanti momēti aggressus, non videris serio

agere sed nugari: causæ præuaricatore, & iuxta innocentium calumniatore te probas, multo acerbius castigandus, quam Orator ille, in quem inuectus est Cicero, quod beneficii reum accusaret ita frigide, ut iurares illum fingere, & auditores ad eius accusationem indormirent. Ita ne causam grauissimam vrges ineptissimis argumentis, ut omnem tibi abstuleris, non solum probitatis & prudentiæ, sed etiam sensus communis opinionem? si Morionem statuisses agere, potuisses ne magis gnauiter has partes implere, quam huiusmodi futilissimis & falsissimis accusationibus, inquisitori Parmensi, Vincentio Candido, Bannesio, Combefisio obiectis? In quibus tamen positum est totum robur tuæ dissertationis: nam cætera, quibus paginas ferè octodecim imple, sunt nugæ, quilibet, & mera conuicia, nulla argumenta.

PARAGRAPHVS PRIMVS.

Parerga Diatribæ, & nulla argumenta.

Refers initio Diatribæ ex Alphonso à Castro, eum audiuisse Dominicanum de sacro suggestu gloriantem, eorum qui vestem Dominicanam induerint, posse in hæresim labi neminem. Huic testimonio aliud adiungis simile ex Cosma Philiarcho, referente se audiuisse concionatorem Dominicanum, intrepide de sacro pulpito contestantem, se mortem non detrectaturum pro minimo sancti Thomæ dicto: atque ut *in ore trisum testimonium stet omne verbum*, confirmas autoritate Dermittij Thadei, qui Dominicanos inducit ita magnificè & superbè de Diuo Thomâ sentientes, ut glorientur, *nihil hactenus contra eius doctrinam decisum esse, aut decidi posse: omnesque libros esse ad eam normam exigendos, & castigandos.* Atque ut probes has Dominicanorum à tribus Authoribus relatas, iactationes vanas esse, & hominum in quibus sobrietatem desideres; longo ordine recensentes apostatas è Dominicanâ Familiâ, Martinum Bucerum, Paleologum, Romæ, quem sub Greg. 11. falso dicis combustum: his accensens Prouincialem Hispanum, qui Iudaismum tota vita occultatum, ad finem profectus est, Mathæum Grabona à Martino V. damna-

tum, eiusque librum combustum nullo narras Authore, ne forte malæ fidei conuincaris.

Sed charitatis videris actus spiritu triumphare, *Euge Euge*, inquis, *ad id quod subiicio*. Et quid es tandem nobis relaturus cum tanti gaudij significatione? Apostasiam inquis Dominicanorum, qui Smolenchocapra à Moscho, omnes ad vnum abdicatâ fide Romanâ, in Anabaptismum consenserunt, ut fidem faciunt literæ eo tempore Varsoviâ datæ. Bene est, quod te probes illius spiritu agi, qui piorum ruinam omne gaudium reputat. Falsissimæ rei nuntium, tui corruptissimi affectus enidens est Argumentum; quandoquidem Fratrum tuorum lapsu, (ut tuis verbis utar) omnibus lætitiis diffuis.

Sed antequàm ad singula partibus respondeam, id vniuersim assero: quæcumque ex te paucis retuli, & verbosissimè prosequeris, falsa esse omnia, vel certè à te falsata: & si vera admittamus, non minus tuis, quam Dominicanis obijci posse. Deinde esto concedamus quæcumque hætenus nullo iudicio, nullo delectu, tibi exciderunt; nihil ad tuam Thesim & ad rem nostram faciunt. Nulla nobis tecum est controuersia de Apostatis Dominicanis, sed de Theologis, & Scriptoribus: nec de quibuscumque illorum rebus gestis, aut etiam verbo prolatis; sed de his tantum quæ reliquerunt scriptorum monumentis. His tertium adiungo, quæ ex illorum libris retulisti; nempe ex Bannesio de existentia accidentium Eucharistiæ, ex Combessio de Festo Conceptionis, & de Summorum Pontificum serie ex Petro & Paulo repetitâ, nihilo magis ad rem, quam superiora tua parerga pertinere; quia à fidei controuersis, ac subinde ab omni hæresum periculo & metu longissimè absunt.

Vbi hanc tuam dissertationem decurri, visus es mihi Causidicum imitatus, de quo extat elegans Martialis Epigramma. Illi cum de tribus capellis perorandum esset, ut humillimæ & ridiculæ causæ aliquid splendoris suâ eloquentiâ afferret, totius Monarchiæ & Reipublicæ Romanæ; Annales vna oratione cõplexus est: sed illum ad suam causam reuocat Poëta: *dic nobis tandem de tribus capellis*. Nolim causam causæ, sed Causidicum accusatori nostro

conferre. Scio, Theophile, te grauissimam causam suscepisse, cui succumbas necesse est. Litem mouisti toti Ordini Prædicatorum, & subinde Congregationibus Romanis, quod cum libri nostri infecti sint hæresibus, has dissimulent Iudices, & censuræ parcant. Tibi igitur de libris agendum, & ex illis probandæ sunt hæreses. Tu multa quidem refers ex Castro, ex Dermatio, id est, ex apertis Dominicanorum aduersariis, & ex literis Varsouiaë datis, multa addis nullo teste, vel Auctore: de libris vero nostrorum hominum, vnde tibi omnia erant depromenda argumenta, ne verbum quidem ad paginam vsque decimam; reliqua vero parte Diatribæ, tu qui ad ostentationem eruditionis innumeras habes authorum citationes, hic parcissimus es, & vix vnum locum ex Banne, duo ex Combesio notas: cum ne mille quidem nedum loca, sed nec etiam libri sufficerent, ad ea quibus Diatribam absoluis: *Concluditur apodictice*, &c. Videris velle Diuum Thomam ad mensam Diui Ludouici abreptum imitari; cum illo inclamare *conclusum est contra Dominicanos*.

Quis credat dum hæc scriberes, te vigilasse, aut sanum, vel sobrium fuisse (quod in Dominicanis dixisti te desiderare) cum quæ hætenus scripsisti falso, conficta à te sint? & licet vera admitramus, nihil ad rem faciant, & quæ ex libris nostris affers, nihil ad fidem pertineant, nec inde impendeat aliquod fidei periculum. Neque satis fuit toto genere, & cælo aberrare; placuit tibi Theophile, ordiri tuum opus à mendacio luculento, vt moneres Lectorem, quid ex his initiis toto libri decursu expectare à te oporteret, & quo animo esses legendus. Alphonsus à Castro refert quidem à se auditum cœnobitam, qui ex suggestu assereret immunitatem ab hæresi veste sui Ordinis indutis. Sed addit Author *se consulto nomen & Familiam illius concionatoris subticere*. Verum Theophilus ius sibi assumit, loco illi vacuo Dominicanum sufficiens; vt probet aliquid se habere ultra nomenclatores sæculi Senecæ, quibus audacia erat pro memoria, id est, vt ego interpretor verba Philosophi, si cuiusquam nominis obliti fuissent, reponebant arbitrium. Illud genus audaciæ vsurpat Theophilus, etiam in aliorum mentem, & libros.

Fortè eâdem licentiâ refert Philarchum, vt quod ille dixerit de aliquo religioso indiscriminatim, dictum velit & asserat de Dominicanis: sed quidquid sit de his testimoniis, quæ nihil ad causam conferunt, in te aequitatem desidero, quod in tertium testem ad voces Dermitium Thadeum: perinde enim te habes, ac si virum quem grauium criminum peracturus reum ex propriâ syngraphâ, sufficeres illi, alienâ manu inimicorum confectam. Sed quid de Dermitio dicam? ita se naturâ & studio comparatum probauit, duplici opere in Diuum Thomam, & Bzonium, vt videatur excusare atrox, & iniquum conuicium in Hibernos, (vndè ille natus) illius Poëtæ, qui de totâ natione inique scripsit, *gens ratione furens, Et mentem pasta chymeris*. Nolim dictum in gentem religioni addictissimam, nec forte fuisset, nisi Dermitius, & aliquot pauci illi similes, (in quos hic versus cecidit,) prodiissent ex Hiberniâ. Id mirare, Lector, quod cum Dermitius Patriam sciuerit à centum quinquaginta ferè annis conslagrasse hæresum incendio, quod nondum extinctum est, nihil vnquam in hæreticos quod sciam, scripserit, sed in Diuum Thomam eâ acerbitate quam vix excusares, etiam aduersus Lutherum, & Caluinum, eius patriæ, & totius Ecclesiæ pestes. Hunc Theophilus habet in deliciis, eius sensa ac dicta tantum non adorat. *Suas inuenerunt labra lactucas.*

An non aduertis, Theophile, dum ex Aduersariorum testimoniis Dominicanos in suo instituto laudando nimios carpis, te tuæ Societatis Authores, qui illam impensius prædicant, castigare. Imprimis nimias illas in institutum à Dominicanis effusas laudes probas vno æmulatorum testimonio: neque vllum ex nostris libris locum refers, quo demonstres nos illo philaphiæ genere peccare; at nobis sexcenta ex Imagine primi sæculi Societatis, ex Baeza suppetunt encomia in commendationem tuorum, quæ neque pudor, neque modestia ferre possunt.

An ignoras quod maximi criminis, ac penè sacrilegij loco tibi est, dum de nobis statuis, vsurpatum à tuis scriptoribus, qui nihil dubitarunt asserere, omnes primi sæculi è Societate Religiosos, Beatis accensendos, nec vllum illorum *de manu Dei rapiendum*, & huius priuilegij

gij) exacto primo sæculo, sequenti vsuram esse conferendam? nonne legisti apud Ludouicum Ianninum ex eadem Societate, in vitâ Alphonsi Rodriguez, Deum ei reuelasse nullum è Societate sibi coætaneum morte æternâ periturum? si hæc vllus Dominicanorum de suis scripssisset, blasphemum, & impium, vel insanum pronuntiaret.

Quandoquidem bonæ fidei, ac fere pudoris videbantur effracta repagula, nostris hinc Iudaismi impietate, inde apostasiâ in Anabaptismum, ab alienis exemplis aut commentitiis Varsoviæ litteris affectâ: miror in materiâ copiosissimâ, & inexhaustâ, Petrum adedò parcum fuisse, vt vnus tantum Prouincialis, aut aliquot vnus gentis apostatarum impietatem nobis impeggerit. Quid enim prohibebat, post donatum nomine & veste Dominicani Iudaisantem Prouincialem iisdem insignibus vestiret Doctorem nescio quem, à gente hæbræâ ortum, cui inopinato fato è viuus sublato, & quos legebat libris immortuo, hæc inscripta sunt verba, *mortuus est sine cruce, sine luce, sine credo in Deum, sicuti Pater qui genuit eum?* non minus verè poterat Petrus hoc Epitaphium alicui Dominicano, quam Prouincialis inter moriendum Iudaisantem personam & voces affingere.

Sed quas in nos tragœdias excitasset, si litteras non Varsoviæ in Poloniâ, sed in Iaponum imperio à tribus vel quatuor annis datas legisset? iis narrabatur crudelissimam in Christianos persecutionem, duorum Apostatarum nequissimis consiliis accensam, eorum morte resedisse: addebantque hos impios suggessisse Iaponum Imperatori nefandas artes, tum inquirendis, tum aduersus tormenta debilitandis Christianis, nempe vt effigiem hominis in crucem acti omnibus subditis conculcandam subijceret, nec dubitaret qui hoc imperium detrectarent, Christianos esse, Dei ad crucem damnati adoratores. Monuerunt etiam, ne pateretur frumentum in suas ditiores importari, quod inde conficerent Christiani quoddam Sacramenti, aut incantamenti genus, quo muniti tormenta facile vincerent, aut vix sentirent. Si hæc quæ Apostata reterrimi suggessere Tyranno Iaponum sciuisset Petrus, habuisset nouum Dominicanis insectandis commentum, nihilo minus verisimile relatis,

Sed vide quam diuerso simus à te animo : tu de nobis falsa euulgas & fingis, nos de tuis si sciremus vera taceremus : tu præ te fers velle maximè nos odio & execrationi esse toti generi humano ; nos, si liceret, optaremus ex hominum memoriâ & corde deleri, quidquid sinistri de vobis audiuerè, aut conceperunt odij.

Neque vobis solum, sed nobis etiam, & toti Ecclesiæ consulimus, dum iis quæ scribuntur è remotis regionibus infausta, fidem negamus, eaque obruimus silentio. Si ipsismet rebus, quæ apud nos geruntur nobis consciis, tot falsa experimur admisceri, stultus planè & insanus fuerit, qui comperta habeat, aut quasi vera audeat euulgare, quæ ab extremis orbis partibus deferuntur. Ea igitur tacenda censeo (etiam à te prouocatus falsis) non solum ex charitate, quæ aliorum bono consulit cum proprio incommodo, sed etiam ex prudentiæ lege, & famæ curâ : neque enim dubito, quin æquus Lector sit perinde probaturus hoc meum silentium, sicut est execraturus tuas calumnias, quibus paucis Respondeo.

Imprimis quod de Prouinciali trans Pyrenæos sub horam mortis astantibus Fratribus Iudaismum quem tota vita occultauerat aperiente, narras, mera est fabula, & calumnia. Dum in Hispaniâ versarer, comperi historiam conuenire viro alterius Ordinis cuius nomini parco. Sed tu in nos sic ageris, vt mirer te non dixisse Neronem, Iudam, Caium fuisse Dominicanos.

Quod subdis de Dominicanis Smolenchii vrbe Lituaniæ, turpissimum figmentum est, & in illa narratione plus mendaciorum, quam verborum conguessisti. Totius historię sunt Romæ testes multi & incorrupti, qui iurant falsissima esse, quæcumque ex literis datis Varsoviæ 14. Decembris anno 1654. in laudem tuorum, & vituperium nostrorum narras. Falsum est in primis, vrbe captâ Moschum ablegasse vestros, quasi præcipuos, aut solos Fidei Romanæ defensores, nam aliæ fuerunt causæ, quas nil interest referre. Magis ab omni vero alienum quod subiungis, nostros omnes nullo excepto in Conuentu Smolenchensi fidem Catholicam eiurasse, & in Anabaptismum consensisse, & vestrum Collegium in Apostasiæ mercedem recepisse. Meras calumnias fingis : Cœnobium illud Dominicanorum decem tantum Religiosos

alebat, ex quibus in illâ Mefcorum inuafione, tres in odium fidei trucidati funt, feptem vero reliqui tempeftiuè fugerunt, nec veftrum Collegium nobis in præmium Anabaptifmi datum, vt fingis. Erat autem ibi Societatis domus exigua, *non magnificentia vifenda*, vt tu afferis. Horum autem omnium testes oculati qui viuunt, interrogari poffunt.

Quod carpis de Diuo Thoma dictum (de quo fufius articulo fequenti) & grauis hærefis accufas, errore non carer. Nam id â te fcire velim, cur adeo anxius & follicitus in vitiis noftris inquirendis; modo patiaris te negligentia damnari; quod dicta noftra quæ grauiffimorum errorum accufas, ex aliorum potius libris, quam ex noftris, aut nullo citato teste aut Authore referas? Quid hoc rei eft? an putas te apud omnes eodem loco efle, quo Pythagoram apud fuos auditores, vt credas de tuis dictis vel minimum dubitare neminem, vt inftar omnium argumentorum fit ad fidem faciendam, te dixiffe? an fortè nullum habuifti ex Dominicanis Scriptorem, qui haberet quæ illis impropetas? quidquid fit de reliquis accufationum capitibus, certè de hoc quod præ manibus habemus, nec potes concoquere, (nempe Diuum Thomam efle regulam fidei:) venit mihi in mentem, te quem nihil latet, qui omnes excufferis Bibliothecas, & deuoraueris libros, verè librorum helluo, non potuiſſe ignorare Bullam à Pio V. in gratiam Diui Thomæ editam conceptis verbis habere, *Diui Thomæ opera certiffimam efle Chriftiana Regulam Doctrina, qua Sanctus Doctor Apoftolicam Eccleſiam infinitis confutatis hærefibus illustrauit.* Si illud dictum tibi fit hæreticum, idque totis viribus Paralogiſmo infra ſoluendo probes; non dubito quin fit tibi hæreticus illâ Bullâ Pius quintus: ſed non auſus illum nominare, hærefis damnaſti, ſciens aut imprudens nescio, & nomen ſubtriciſti. Quò non progreditur tua audacia? ſed de hoc pluribus Articulo proximo, vbi me expediuerò à duabus quæ ſuperſunt obiectionibus de Inquiſitore Parmenſi, & Vincentio Candido, quas Parergis tuis annuero: quia nullius Authoris, vel libri teſtimonio munis.

Quod ad primam attinet, vel mera eſt fabula quod narras, vel forte inquiſitor voluit contritionem perfe-

Etiam dispositionem esse ultimam, necessario connexam iustificationi, nullo vero modo formam iustificantem, & sanctificantem: quo nihil verius ut Thomistæ omnes quibus assentit Suares, docent & validè probant contra Vasquem, cuius vix opinionem defendas contra expressa Concilij Tridentini verba. Hanc fortè sententiam Vasquez non est passus inquisitor typis dari, & prudentissimè egit. Sed quidquid sit, huic fabulæ.

Alteram assuis longe crassiolem, & mendacij magis compertam, de literis à Patre Generali scriptis in gratiam Iansenistarum ad nostros Theologos Parisienses. Quis enim nesciat causam Iansenistarum victam operâ Patris Nicolai, Theologi Parisiensis Dominicani, qui magnâ quâ valuit nominis autoritate, reliquos ex Ordine Doctores, & plures alios diversarum Familiarum adiunxit parti, quæ illius aucta copiis & suffragiis, Iansenianis viribus & numero superior evasit: & huius rei totam habeo Galliam ac ferè Europam consciam & testem. Quid ergo comminisceris Patris Marini Epistolas in gratiam Iansenistarum, quos factò agmine omnes eius filij impugnaverunt? sed id à te quæro; cur sine teste loquaris? scis enim huius controuersie facti, de censurâ nostrorum librorum, eam esse legem, ut nulla alia argumenta admittat, quam quæ repetuntur ex ipsâmet lectione nostrorum librorum. Quid ergo confugis ad literas commentitias à nullo vnquam visas? aut cur vrges damnationem nostrorum librorum, & iniustissimè illis condonatam, & in tuos latam conquereris hoc versu?

Dans veniam coruïs, vexans censura columbas.

Nos coruïs accenses, te vero non solum columbis annumeras, sed etiam putas te compellandum verbis Cantici, *veni columba mea vnicè amanda & colenda*, & ideo de te dixerim, quod de vexillis Assyriorum ex Reginâ Semiramide, *in desolationem à facie ira columba* depellendam quam importas toti Ordini Dominicano.

Sed ignauiores essemus columbis, si timeremus tua argumenta, vel impares essemus illis refellendis. Neque enim solum futilia sunt & nullius roboris, sed etiam appertissimè mendacij conuincuntur: quale est illud de P. Candido, quem primum ais eorum esse; qui librum aut Thesum (neque enim explicas) probarunt de speciebus
Eucharistiæ

Eucharistiæ euanidis, quales sunt colores iridis. Obstupescas, Christiane Lector, de incredibili licentia Theophili, qua Vincentium Candidum, virum sanctitatis & eruditionis opinione atque illustri dignitate notissimum traducit, de re gestâ cum celebritate maximâ: paucis historiam retexo.

Illius opinionis de speciebus Eucharistiæ, cuius inuidiam in Candidum totam deriuat, verus & primus Author (quem ipse vocat Bardum per conuictum) fuit reuera vnus è Societate, Siculus *Franciscus Bardus* nomine, qui hanc opinionem docuit opusculo scripto; sed cum illius edendi licentiam non posset à Prælati obtinere; illud publici iuris fecit nomine cuiusdam idiotæ Ioannis Baptistæ Chiauetæ, & ex Authore, sui libri factus censor, illum probauit, & tredecim aliorum diuersi Ordinis Theologorum curauit suffragiis muniri: horum præter Bardum, erant è Societate tres, duo magistri ordinis Prædicatorum, quorum primus erat Iosephus Caruso, alter Ioannes Vincentius Candia.

Mirare Lector Theophilus in historiâ inuertendâ audaciam, vt viro sancto calumniam instruat. Parum est quod inter libri censors qui approbarunt, primum apponat Vincentium Candidum, cum eo loco fuerit Iosephus Caruso: Non vrgeo quod omiserit quatuor è Societate, qui librum probarunt. Illud tantum obseruo, supremum Dei ius sibi arrogasse, quiduis in quodlibet mutandi, & rerum status & nomina, ad arbitrium inuertendi: atque ita Ioannem Vincentium Candia ex Prouinciâ Siciliæ Theologum, mutauit in Vincentium Candidum Sacri Palatij Magistrum, vt istum erroris accusaret, cuius Author erat vnus è Societate Theologus, & tres ex eâdem Societate probauerant. O commutationem! ita more suo agit Theophilus: vellet omnium hominum crimina in Dominicanos, quasi in antiquæ legis hædum transferri, eosque omnium diris & execrationi deuoueri. Vides hanc tuam accusationem Petre, similem his accidentibus quæ in fumum & auras facescunt. Cerrè non poteras apertius tuum animum & argumentorum inopiam fateri, quam cum ad has nugas & artes confugis, non vt probes nos hæreticos, sed ne omnino taceas. Vt enim Seneca de quibusdam impatientis

animi, qui instar saxi è monte præcipites feruntur, dicebat, *Nolle eos ire, sed non posse stare*: Ita tu nec vis, nec scis loqui, sed non potes tacere.

Sed antequam ad hæc tua parerga responcionem claudam, moneo te rejquam fortè non ignoras, eam de accidentibus Eucharistiæ & de toto accidentium genere, nihil esse, nisi specie tenus, opinionem, cuius causâ vis Candidum & libros nostros damnari, quamvis ab illâ abhorreamus, ex Epicuro, aliisque Philosophis, contra Aristotelem interpolatam esse à Gassendo, Carthesio, & à Patre Magnano defendi. Si adeo periculosam censes, ut de vnius Patris Candidi suffragio quo illam dicis esse passum edi, concludas demonstratiuè libros Dominicanorum esse prohibendos; Cur dissimulas adeò graue malum? Cur non distringis calamum in Gassendum, & Carthesium, qui innouato illo errore alijsque pluribus longè peioribus, Religionem euertunt, & viam parant ad Atheismum? quare hætenus mutus fuisti in illos nouatores, & Classicum in Dominicanos canis, quasi maius periculum fidei immineat à Candido (qui hunc errorem expugnauit Tractatu de Eucharistiâ) quam ab istis nuperis Philosophis, qui apertè docent quæ calumniaris nos tradidisse, aut probasse?

Huius rei per se stupendæ causas aperiam. Tu enim ita comparatus es, ut priuatis iniuriis commouere magis, quam publico Ecclesiæ periculo: & ut cætera prætermittam, id semper obseruasti; quod sapientissimè Bellarminus de sectis hæreticorum annotauit: Earum nullam (quamvis infinitas infernus tulerit) Christi nomen & Euangelium Ethnicis prædicasse, vel vllam gentem Ecclesiæ Christianæ aggregasse, in id vnum incubuisse, omnes, ut mores & fidem Christianorum corruperent. *Nec mirum* inquit Bellarminus *quia hæretici, verbi Diuini vaginam non gladium, scriptura corticem habent non sensum*, quo vno-vis Diuini verbi conuertens animas continetur. Ità tu Theophile: infinita in Catholicos scripsisti, in Atheos, in hæreticos pauca: ego certè ex te nulla legi

PARAGRAPHVS SECVNDVS.

*Responsio ad 3. obiectiones quæ aliquam
habent speciem Argumenti.*

TRIA argumenta seposui à reliquis, contra Bannesium, Combesium, & Spinam. Quamuis enim omnino futilia sint, nec ad controuersiam nostram, id est, ad res fidei pertineant; habent tamen aliquam speciem argumenti, quia ex libris nostris petuntur quasi ad hominem.

Primum Argumentum instruis contra Bannesium à suorum operum editione, correctâ posteriori, quâ docebat accidentia Eucharistiæ seruata panis & vini existentia, post consecrationem subsistere: quod vis damnatum esse ab Innocentio VI. Futilis planè est hæc tua argumentatio, vt conuincas erroris Bannesium. Non dicam, si quid inesset periculi, submotum secunda editione, quâ locum correxit, ac proinde nullam superesse censuræ, vel reprehensionis causam. Præterea: Respondeo sensum Bannesij esse omnino hypotheticum, suppositâ opinione probabili ex Auicenna, ex Diuo Thoma, aliisque Theologis, Patribus & Philosophis, solius Dei naturam sibi necessario existentiam vindicare, quæ subinde cuilibet substantiæ creatæ accidentario competat, ab eâque distinguatur, quâ iuxta aliquorum sensum, non modo ipsa, sed eius accidentia subsistant. Ex hoc ultimo principio, quod Bannes nec probat, nec improbat, consequitur existentiam substantiæ panis & vini his destructis superesse. Quid horum ergo ad fidem pertinet? An non mera Philosophica quæstio est? Nec Patres, aut Concilia his Philosophiæ tritis mysteria admiscunt, nec curant quâ ratione accidentia existant, propriâ vel alienâ existentia, dummodo seruentur, destructâ panis & vini totâ substantiâ: & ad hunc sensum Concilia & Patres interpretatur Bannesius. Quid ergo hæreseos potest huic sententiæ subesse, aut subodorari Petrus, cum Bannes Conciliis & Patribus reuerentiâ adhiberâ, eam sensu omnino Catholico explicet?

Secundâ tñâ argumentatione Patrem Combesium quasi reluctantem conaris trahere in sententiam Arnaldi de Bicipiti capite Romanæ Ecclesiæ ab Innocentio X. damnatam. Miræ charitatis es Theophile! cum deberes benignè interpretari, quæ speciem mali habent, tu contra apertissimis verbis sensu Catholicis errores affingis: ut in re à proposito non alienâ, dicebat nuper vir gravissimus, mallet, nescio quo morbo, tuos aduersarios, (quales hos duos reputas) errare ut hæreticos, quam vel sapere, ut Catholicos, vel resipiscere ut conuersos. Si susceperem à te tantum dicta refellere, oleum & operam perderem, ita fortiter ubique ineptis, ut tuo vitio tecum agentem inficias, nisi longius se à te abducatur.

Tuis ergo nugis semotis, quæstio hæc de duplici capite difficillima est; & qui de eâ scripserunt, bono fortè animo aggressi sunt, sed periculoso euentu, cui summus Pontifex voluit consultum esse. Hæc rei summa est: Theologi omnes conveniunt, concessam Apostolis duodecim in totum orbem facultatem, & ubique gentium prædicandæ Evangelij, & Ecclesiarum instituendarum: sed duplici discrimine communis hæc Apostolorum potestas à propriâ & eximiâ Petro distinguitur: quod huic, ipsimet Apostoli subiicerentur, & quod data esset Petro tamquam Pastori, quam esset ad successores transmissurus. His ergo duobus distat Petrus à reliquis Apostolorum: neque enim vnus infra alterum erat, omnes inter se æquo iure vivebant: sed ut acutè Bernardus, omnes Petro subdebantur, quia erant ex Oribus Christi, quas nullâ exceptione Christus Petro commisit pascendas, & ipsum constituit Pastorem, ut hoc capite constituto, schismatis tolleretur occasio.

Præter hoc primum discrimen, accedit alterum, quod serè priori continetur; nempe Apostolos reliquos hanc in totum orbem diffusam potestatem sortitos quasi extra ordinariam, & cum ipsis desituram; & ideo data est potestas ligandi, atque soluendi, quasi, ut sic loquar desitura, & morte extinguenda: sed Petrus claves recepit, ut Monarcha successoribus traditurus.

Cum ergo hoc duplex Petri & Pauli, sicut cæterorum Apostolorum discrimen constet, apud Theologos & Dominicanos maximè, inter quos nobilissimus est

Combesius; atque hoc statuunt fundamentum totius successionis, & authoritatis Romanorum Pontificū; non debuit in Pontificatu Petro adiungi Paulus, qui successorem non erat suæ potestatis œcumenicæ habiturus; quamuis bono animo adiungi potuerit, non vt fundamentum, sed vt ornamentum; solo enim Petro successio nititur. At quid affers ex Combesio, quo probes consciū erroris exprobrati: sicut nemo Catholicus potest successionem authoritatis à Paulo repetere; ita nemo sanus negabit, Pauli martyrium Romæ plurimum addidisse gloriæ, & splendoris. Hoc secundum vult Combesius, negât primū.

His duabus obiectiunculis expeditis, ad tertiam accedo, de opinione & Festo Conceptionis, quam vbique verbosissimè obtrulis, & versas. hoc ni fallor consilio, quod scias nobis ad singula non esse datum respondere; unde nobis insidias parare vis, non apertè pugnare, dissilū causæ & virium. Sic enim apud te reputas: vel singulis, quæ proponam satisfacient, vel plura, aut omnia omittent: si vero accuratè & sigillatim respondeant ad partes, in censuram incurrisse vociferabimur; si omnia taceant, conuictos prædicabimus: itaque cum videas hâc in dissertatione disparem viriusque nostrum conditionem, perinde agis, ac ignauissimus miles, qui viribus & animo inferior aduersario, non audet æquo Marte pugnare, sed dolo, & arte: atque ita tuā ignauiam, prodis, furari vis victorias, non virtute reportare.

Verum saluâ decretis Pontificiis reuerentiâ, dico te ita ineptè causam Conceptionis vbique hic, & toto libello agere, vt cum illustrissima sit, tu magis præuaricator illius videri debeas, quam defensor. Alexander Magnus à solo Apelle pingi, & fingi à Lysippo volebat, reliquis pictoribus, & statuariis sui sæculi prohibuit, ne quis effigiem suam moliretur, quod crederet præter illos duos, à nemine pro dignitate confici posse. Consulitissimum esset Summum Pontificem tibi prohibere, ne suam auctoritatem susciperes propugnandam, ita enim defendis, & probas, vt videaris prodere: si tuis solis argumentis, & viribus niteretur, breui certè corrueret. Nam præter illud nouum loquendi ex Cathedrâ & definiendi credenda iudicium, quod fingis; vis etiam summos Pontifices definire his ipsis decretis, quibus declarant se non defini-

re: vis determinare dubia, cum statuunt nil determinandum, & conceptis verbis ita explicant. Affer mihi si potes aliquod ex Conciliis & ex summis Pontificibus decretum, conceptum cum illa verborum formulâ quam tu aduersus nos vrges.

Dico igitur nunquam vsurpatum, & omnibus sæculis inauditum illud definitionum genus de modalibus, quod veluti machinam contra nos admoues, vt hæreticos esse conuincas. Sed opus fuit te fingere in Pontificibus nouum modum definiendi, ad prosequendam quam suscepisti accusationem: Non potes negare constitutionem Sixti I V. à successoribus Pontificibus, & à Concilio Tridentino confirmatam, nec hætenus ab vlllo reuocatam, pari iure iisdem verbis, ac pœnis vtriusque opinionis censuram prohibuisse: si ergo contra nos vrges Constitutionis partem, quæ probabilem & piam immaculatam Conceptionem dicit haberi velle; in te tuosque parem censuram, & damnationem vrgeri possumus. Nam eadem Pontificiæ constitutiones vtrique opinioni suam probabilitatem relinquunt; & si ex hoc capite, quod nolint detrahi opinioni Beatam Virginem fuisse conceptam in peccato originali, vis colligi eisdem constitutionibus ex Cathedrâ definiri eiusdem opinionis probabilitatem; cogeris ex eodem capite fateri, eisdem Pontificiis constitutionibus ex Cathedrâ definiri probabilitatem sine errore etiam sententiæ asserentis, Beatam Virginem fuisse conceptam in peccato originali; nam pari passu sub eisdem pœnis, & verbis, eadem constitutiones prohibent, ne opinioni affirmatiuæ detrahatur: & sic de fide esset vtramque opinionem esse probabilem, quod causæ nostræ fauet; & nos in tuto ponit.

At quot ex tecum sentientibus, post Bullas Sixti I V. & successorum Pontificum, inficiati sunt eam propositionem modalem, probabile est Beatam Virginem fuisse conceptâ in peccato originali? Igitur omnes isti ex regulâ à te traditâ sunt hæretici; nam omnes contradicunt Bullis Summorum Pontificum in hac re, vt tu dicis, ex Cathedrâ præcipientium cuique fidelium ita sentire, & abstinere ab omni censurâ vtriusque opinionis. An non incidis infoueam, quam aliis parasti? Sed vt distinctius agamus; Omisiss, quæ iam præmonui de modalibus decre-

ris à te confictis ; Respondeo puram calumniam esse, quod obicis, Dominicanos videlicet, asserere opinionem Conceptionis immaculatæ esse falsam, aut improbabilem. Numquid cordium nostrorum inspector es ? An potes de nostris intimis sensibus testari, qui de tuis, & quibuscumque rebus apertissimis falleris aut mentiris semper ? Vnde nouisti nos illius opinionis probabilitatem negare, vt inde conuincas nos hæreticos ? Quia inquis, Bartholomæus Spina Dominicanus fuit huius sententiæ. At quid vnus ad reliquos ? An omnes in illius verba iurauimus ? An non præceptis Pontificum paremus ? Sed, vt iam attigi, ex principio inter nos constituto, tuum te magis quam nos Argumentum vrget. Si decretum Pontificis vtriusque partis probabilitatem iisdem verbis constituit, eandem incurrit hæresis notam, qui alterius partis probabilitatem negauerit. Vide quam cæco impetu in nos feraris, vt vnum Spinam hæresis damnes, & nos suspectos facias ? Vide, mi Petre ! vel hanc damnationem remittas nobis oportet, quam intulisti, vel ipse proprio iudicio damnaberis.

Ad alia, quæ de festo subdit Petrus contra P. Combesium, multa responderi possent, à quibus, vt Pontificiis decretis pareamus, abstinemus. Vnum tantum addo, quoad mentem D. Bernardi, quem dicit Petrus à Combesio non benè intellectam : hoc Petri dictum ad satietatem, & efficacissimè refellit ipsemet Gabriel Vasques tom 2. in 3. p. 27. art. 2. cap. 19. quod incipit *iam idem ad testimonia Patrum sigillatim dicamus, & imprimis ingenue fateamur Bernardum, & Rupertum oppositum sententiam planè tradidisse ; &c.*

Is est rerum laudandus delectus, vt certa dubiis ac probabilibus anteponas. Quam assert Combesius ex Græcis vnicam, & ex antiquâ Ecclesiâ certè præcipuam Conceptionis festi instituendi causam, summè probat Bellarminus libro 1. de cultu Sanctorum capite 16. eâque se tutatur aduersus hæreticorum insultus. Idem prorsus habet Cardinalis Oregius capite 12. Cur ergo his duobus prætermisissis, solum Combesium hæreseos damnas ? Quas vero tu vrges, causæ huius festi, à reuelationibus Herluini Abbatris, hominibus emunctæ natis, & vacuatum aurium, aliquid olent, & sonant non omnino solè.

dum & sincerum. Quid mirum si magis certis ducamur, quibus impiorum ora contundere possis, quam quæ la-
cessendi nullum finem faciunt hæretici. Hic est sensus
Combesij.

Non addam plura, ne dum videor officium amico ex-
hibere, mihi negotium faceßam, ac de illo iniquius iudi-
cem, quasi opus habeat alieno præsidio ad sui defensio-
nem, aut nequeat Ecclesiam recentem cum antiquâ con-
ciliare. Sed quid opus pluribus? Vltima Alexandri VII.
qui nunc sedet, constitutio argurationem Theophili fun-
ditus evertit. Contendit Combesium hæresis comper-
tum, aut suspectum, quod institutionem festi Conceptionis,
alio quam statuerint ex Cathedrâ summi Pontifices,
sensu, aut sine explicuerit. At stat contrâ pro Combesio
ipse sanctissimus suâ constitutione, quâ superiorum
Pontificum omnes confirmat, aliqua etiam addit, & ex-
pressissimis verbis habet, *se nihil ex Cathedra definire*. Hâc
vnâ voce dissoluitur rota omnium calumniarum.

Ad huius responsionis coronidem visum est superiori-
bus istud adiungere; quod cum ex Aristotele vna sit ad
verum colligendi, illudque attingendi, & assequendi ra-
tio certa, à vero autem aberrandi & mentendi infinitæ
sint species, omnium mendaciorum genera videtur
Theophilus in numerato habere, & illorum hâc diatribâ
specimen dedisse. Si quædam mendacia constent addi-
tione supra verum & fidem, habes illius speciei luculen-
tum ad limen libri; vbi dicto Alphonsi à Castro, Domini-
cani nomen apponis, cum auctor consulto abstinuisset,
ab eo nominando, de quo agebat. Si contra mendacium
non minus reticendæ rei, aut minuendæ infrâ, quam au-
gendæ suprâ verum admittatur, singulis paginis habes ex
illo genere: quia nihil vmquam refers bonâ fide, sed
omnia das corrupta, & falsata: si mendacia fiant rerum
ac personarum mutatione: illius speciei habes in Pro-
vinciali hebræo, quem ex alio ordine in Dominicanum
transfers, plusquam Pontificiâ autoritate. Si denique
quædam mendacia nullâ mutatione, sed merâ creatione
fiant, & quasi è nihilo educantur: habes insigne exem-
plum in Apostasiâ Dominicanorum in expugnatione
Smolenchensi, vbi cum nullus à fide defecisset, vis om-
nes in Apostasiam lapsos.

Si tandem quæramus mendacia nullius certæ speciei, sed omnium, quæ additione, reticentiâ, & quolibet genere mutationis fiant, suppeditas nobis exemplū ex historia Patris Bardi de accidentibus Eucharistiæ euanidis, de quibus cum hæc scriberemus, narrauit nobis vir fide dignus, quod cum Michaël Mazarinus (quæ festinatis honoribus aliquot annis Cardinalem factum, sed paucioribus in eâ dignitate superstitem vidimus:) huic purpuræ pro- luderet Magisterio Sacri Palatii, parum abfuisse, quin deciperetur ab vno eiusdem opinionis, & sodalitiij cum Patre Bardo, qui vrgebat vt sibi daretur licentia edendi Romę opus de accidentibus Eucharistiæ, causatus iam ty- pis datum Panormi quatuordecim doctorum suffragiis munitum. Sed deprehenso dolo illius viri, & veneno li- belli, editionem prohibuit Mazarinus. Et adhuc si superis placet, Dominicani debent omnium suorum librorum censurâ, dare pœnas illius erroris, iudice Theophilo, quod supposititijs Candidus illum approbarit; licet verus Candidus suis libris impugnarit, eius editionem Maza- rinus inhibuerit, & denique schola Thomistarum ab illâ opinione abhorreat. O mira æquitatis & sinceritatis iu- dicem Theophilum! Hæc in antecessum volui te moni- tum erudite Lector, vsq; ad singulas Diatribas leuem me & te intolerabili labore enumerandi infinitas mendacio- rum myriades: Nam si tot & tanta licuit deprehendere ipso opetis initio, quo maximè conueniebat ab huius- modi fraudibus longissimè abesse, vt beneuolentiam au- ditorum, & fidem sibi conciliaret; quid facturum putas reliquis nouem Diatribis?

ARTICVLVS SECVNDVS.

Doctrina Diui Thomæ dos singularis, vnde illi & eius Discipulis immunitas hactenus fuit ab errore, & censurâ.

NON dubito, erudite Lector, quin te maximè tædeat tot nugarum, & pudeat plurium mendaciorum, quæ singulis paginis, aut potius lineis & verbis obtrudit Theophilus: & si totus essem in illis refellendis, nec ali- quid magis serium agerem, non possem ipsamet euitare,

quin nostra scriptio te grauissimo fastidio afficeret. Sed ut te tanto malo leuem, atque aliquam nostræ Apologiæ aspergam voluptatem, vilitatēque admisceam; oportet me cum Virgilio de stercore margaritas legere. Totā suā satirā, & maximè initio primæ Diatribæ, ridet Theophilus reuerentiam & affectum (quem fatuum amorem vocat) quibus Sanctum Doctorem prosequimur: testimonia quibus à Christo, à Summis Pontificibus probata est eius doctrina, eleuat, contemnit, ac poenè à nobis conficta, aut certè falsata vult esse cum Petro de Alua: hæresis accusat illud à Pio V. dictum *Diui Thoma doctrinam esse regulam fidei*: eodem loco reponit, quod refert ex Dermatio & Thomistis assertum: *nihil hactenus contra nostram doctrinam decisum, neque decidi posse.*

Ad has similēsque reprehensiones Sancti Doctoris Scholæ, ab eius æmulis millies repetitas, validissimè ab antiquis & recentibus Thomistis profligatas, frustra responderemus nisi ad id nouæ vtriusque Petri à clausâ valle & de Alua cogerent expostulationes: fortè etiam aliquid noui de antiquâ controuersiâ, & antiquata accusatione occurreret, quod spero lectoribus non displiciturum.

Cum duplex ad veritatem demonstrandam via pateat, ab effectis, & à causis; vtramque inibimus. Et primum quidem ipsius doctrinæ Angelicæ characterem seu dotem singularem, quā à reliquis distinguitur, inquiremus: ea semel apertâ, neque impiorum neque æmulo- rum de controuersiâ nostrâ iudicium detrectabimus. Id certissimè constabit, quidquid, ipsi carpunt, vel à nobis confictum calumniantur, infra Sancti Doctoris meritum esse.

PARAGRAPHVS PRIMVS.

*Tota Diui Thoma doctrina à fide hausta, vel ad eius defensionem referri demonstratur:
primo ab eius caractere.*

VT doctrinæ D. Thomæ veritas constet, & discipulo- rum illius tenacium innocentia; aperienda est causa, quæ nos in tuto ponit. Eam vero repeto à singulari

discrimine , quod obseruatum est à me mille experimen-
tis intercedere D. Thom. inter & Theologorum reliquos;
quod sanctissimo Præceptorum prima , ac pendè vna cura
fuit inquirere , ac certo nòsse, quid Scriptura , quid con-
sensus omnium Patrum de quâque re doceret; vt eo con-
stituto tanquam immoto fundamento , totam illi Theo-
logiam astrueret. Hinc *Doctoris communis* nomen affecu-
tus est; quia viam tritam Patrum calcavit semper, & fu-
git diuerticula. Singularissimus quidem est Doctor , &
multa recondita , & superioribus sæculis , ac Doctoribus
occulta inuenit : sed hoc *Doctoris communis* titulo nul-
lâ ratione aduersatur. Duo enim in quolibet Doctore di-
stinguenda sunt , nempe sententia , & argumenta , qui-
bus propugnatur. Communissimus est Thomas senten-
tiis, quia via Regia incedit, dace verbo Dei , vestigia Pa-
trum sequutus. Singularissimus est inuentione argumen-
torum , à quibus nihil est periculi si deficeret; plurimum
est laudis si efficacia sint. Totum imminet malum; si sen-
tentiis si à communi viâ aberrant : & cum suas sanctissi-
mus Doctor communes Patribus , & Ecclesiæ delegerit,
hoc delectu, sibi suisque discipulis , quam oblatrat Petrus
à valle clausa, ab erroribus , à periculo , aut metu censu-
rarum immunitatem comparauit; & proprium fecit ve-
luti suæ scholæ characterem.

Antequam bos ille mutus loqueretur , adiuit , &
consuluit oracula Scripturæ , quibus exceptis , mugire
cœpit, habenas ingenio suo laxauit, sine lapsus , aut er-
roris periculo , quia securus erat viæ , qua incedebat , tri-
tæ Patrum , à quâ ne latum quidem vnguem permisit sibi
recedere. Si vellem ad huius rei fidem faciendam , quæ
suppetunt , experimenta proferre ; decurrendæ mihi es-
sent omnes Theologiæ partes , quia vbique eandem me-
thodum seruauit. Præuium semper anteceffit verbum
Dei, & traditio, deinde secutæ sunt rationes à Theolo-
giâ , à Philosophiâ petitæ. Plures diuersam ab illa viam
inierunt, & alium omnino ordinem sequuti sunt; Phi-
losophos in Theologia egerunt. Cum enim Deus inno-
tescat verbo, & creaturis; & Theologi sit à verbo ad crea-
turas progredi, Philosophi vero ab operibus ad Deum
conscendere; nonnulli inductâ in Theologiam Philoso-
phicâ methodo, prius opera, quam Dei verbum scrutati

sunt, ordine certè præpostero. Cum enim supra rationem sint quæcumque docet fides, & à Dei arbitrio pendent; nihil eorum potest esse compertum, nisi verbo Dei interprete eius voluntatis; & rerum quæ in diuinitate lateant. Si turpe sit Iuriconsulto sine lege loqui, turpius fuerit Theologo sine Dei verbo quicquam statuere.

Ex his regulis deducit Sanctus Doctor, verbum non fore incarnandum, si Adam non peccasset; quia, inquit, in omnibus his, quæ à voluntate Dei pendent, nil certi habere possumus, nec in Conciliis, aut à Summis Pontificibus, definiri potest, nisi quod docet verbum voluntatis diuinæ interpret, & quod tenet Ecclesiæ consensus perpetuus interpret verbi Dei. Verum diuersa methodus, sed nescio an perinde tuta placuit aliis Theologis: Inspectere ante Dei opera, quam verbum; & ingenio indulgentes probarunt quæ illis videbantur naturæ, aut excellentiæ operum conuenientiora; atque his cogitationibus apud se constitutis, tanquam veris, consuluerunt Scripturam, non tam ut explorarent, quid ipsa vellet, quam ut ad sensus suos traherent, etiam obtorto collo, & ex illâ præiudicatam opinionem confirmarent.

Ordine planè diuerso à Diuo Thoma processere: ille à Scripturâ ad rationes progreditur; isti è contra à ratione ad Scripturas: ille Scripturæ rationem subiicit, isti Scripturam quidem non subdunt rationi; sed aduocant in subsidium rationis: D. Thomas non sibi permisit opinionum inuentionem, sed argumentorum: alij vtrumque debent suæ industriæ: vnde nihil mirum; si tutiorem ac magis diuinam esse dicamus doctrinam D. Thomæ, quia nimirum dimidiâ parte minus habet sui, & minus sibi fidit; nec adlaborauit, ut sua inuenta probaret, sed diuina dogmata, & sensus Patrum. Atque hæc est securitatis doctrinæ Magistri, & nostræ fiduciæ causa, quam summi Pontifices, quam Christus ipse, confirmarunt: nec velti Dominicanæ, ut somniat Petrus nos dicere, hanc ab hæresi immunitatem asserimus, sed affectui, & studio in Diuum Thomam, à quo cum recesserint aliqui ex nostris, non est mirum ab istâ immunitate excidisse. Nec debuit Petrus lapsus aliquot nostrorum impropere, & falsos adiungere.

Ut Architecti quod extruunt ædificium ad perpendicu-

tum merentur, neque quicquam semotâ regulâ moriuntur; sic plane Diuus Thomás quicquid docuit & scripsit vnquam, ad vnius traditionis regulam exegit; nec satis illi fuit, vbique verbi diuini Oraculum consulere, & vt par est ouem Christi Pastoris vocem audire, eiusque sequi vestigia; visum est aliquid magis arduum moliri. Quid enim hoc esset Scholæ principi Angelo, ab Ecclesiæ & Patrum consensu recessisse nunquam? Hoc pij quique, hoc Theologi vulgares ambiunt & assequuntur. Quid ergo habet Diuus Thomas præ cæteris singulare? Quod omnes scientias fidei obsequio subiecerit, quod ex Philosophiâ eas sententias delegerit, quæ ad fidei mysteria explicanda & propugnanda necessariae essent & conuenientiores: vno verbo sicut vitæ origo & finis est à corde, quod primum omnium incipit, & vltimum desinit viuere; ita Diuo Thomæ scribenti & docenti fides cordis instar fuit, ab vnâ fide & traditione cœpit, & in fidem desinit. Theologica à traditione & principiis fidei hausit: in opinionibus vero philosophicis deligendis, inter hinc inde probabilia, vnius fidei defendendæ rationem habuit: vt merito Diui Thomæ scripta voces Religionis Christianæ armamentarium: & quæcunque tradit sint vel consecraria à fide deducta, vel præsidia fidei & ad illam apparatus. Quid ergo mirum si à fide prædicemus nunquam posse deficere eius doctrinam, neque vllius erroris accusari, neque quicquam contra illam decusum, vel decidi posse? Quid mirum, si pleno ore vocemus regulam fidei? Quis post ista superest dubitandi locus, à Christo semel & iterum dictum, *Bene scripsisti de me Thomæ*, & ab Innocentio VI. *Qui eam doctrinam tenuerit, nunquam à veritatis tramite deniasse: Et qui eam impugnauerit, semper de falsitate suspectum fuisse?* Cætera Pontificum testimonia omitto.

In primis quæro ab utroque Petro, quibus falsa videntur hæc encomia; an vtramque Diui Thomæ quam statui doctrinæ dotem, nempe eam à fidei traditione haustam, ad fidei defensionem totam referri, velint à me confictam, aut stare & veram esse? Primum mox falsi conuincam; alterum si semel concesserint, fateantur necesse est dignissimum esse Diuum Thomam elogiis à nobis relatis, aliisque quibus illum profecuti sunt Summi

Pontifices Ioannes XXII. qui non absque Dei infusione, innumera & famosa opera perfecisse, & tot miracula edidisse asseruit, quot scripserit articulos : & Clemens VIII. vt ceteros omittam, *ingentem librorum numerum breuissimo tempore in omni fere disciplinarum genere, singulari ordine ac mirâ perspicuitate, sine ullo prorsus errore conscripsisse affirmat.*

Sed quo sensu interpretabimur hæc encomia, & suffragia ? Eo nempe, quem efflagitat dos à nobis explicata doctrinæ, quæ à fide profecta, ad fidei defensionem recurrit: illud enim vnum est quod curant Summi Pontifices, de quo habent iudicandum. Medicus quidquid ex Philosophiâ naturali decerpit, totum refert ad remedia, quibus morbi curantur, & sanitati consulitur : neque quidquam illi qui medicus est, placet, aut sapit, nisi quod conferat ad incolumitatem, idque vnice respicit. Parum curat an corpora atomis constent, vt placet Epicuro, an materiâ primâ, & formâ substantiali, generatione inductâ, an substantia distinguatur à quantitate, & mediis accidentibus à se distinctis agat, vt visum est Peripateticis. Quid hæc ad curandos morbos : vt cùmque ista se habeant, certè nihil perit, nihil accrescit efficaciæ remedium, quod vnum curat medicus. Ideo eas deligit sententias, quæ magis conferunt ad salutem.

Cum summi Pontifices doctrinam Diui Thomæ laudant impense, & ab omni errore immunem prædicant, quo sensu conuenit nos ista excipere ? Non quasi dicta ab Oratoribus ad eloquentiæ lenocinia, neque à Philosophis aut Theologis, quasi velint omnia ex D. Thomæ certa & comperta esse. Non ea est mens Pontificum, & faciliè innotescit, si inspiciamus quam ipsi personam gererent, dum ista pronuntiabant. Agebant Pastores, & iudices rerum fidei : idque statuebant, sepositis omnibus quæstionibus metaphysicis, doctrinam Diui Thomæ tutam esse, vbique traditioni consentaneam, delectum opinionum eius esse conuenientissimū ad mysteria explicanda. Referebant hæc ad officij, quoungebantur regulas, & ad rerum fidei defensionem : sicut quisque Professorum omnia ad suæ disciplinæ & artis finem refert quæcunque tractat. Horum itaque decretorum verus & certus est sensus ; D. Thomam merito Theologorum prin-

cipem censerī, quod ubique Theologum agat pro dignitate, Ecclesiæ consensui, & traditioni semper adhæreat, & quas ex Philosophiâ habet opiniones, fidei principiis esse conuenientissimas.

Eâ interpretatione euitamus vitia eorum, qui nihil singulare, vel quid nimium volunt à summis Pontificibus assertum. Neque enim assentior Theophilo, & aliis, qui ut huiusmodi suffragia declinent, interpretantur lata, ut testentur summi Pontifices nihil habere D. Thomam fidei apertè aduersum: neque etiam cum illis conuenio, qui huiusmodi Pontificum decretis putant rata, indubitata quæ D. Thomas scripserit. Quid ergo ab his extremis interpretationibus asserimus diuersum, & quasi medium? Nempe summos Pontifices eo sensu locutos, quo conueniebat supremos arbitros, ut nihil dixerit Sanctus Doctor, quod à fidei principiis necessaria, aut probabili consecutione non esset deductum, atque eo etiam referretur, & conduceret ad fidei mysteria pios docenda, & propugnanda aduersus impios. Quæ cum ita se habeant, ut præter iam allata inuictis argumentis conficiam; quid mali inest, aut falsi subodoratur Petrus uterque, si quod statuimus inter reliquos Theologos, & D. Thomam intercedat discrimen. Illis probandum est iunmerito à me positum esse: eo autem semel constituto, quid mirum nihil esse decusum, aut decidi posse contra eum, qui vocem publicam traditionis secutus est, & acerrime tutatus?

Sed inquires hæresis est fidei regulam priuatum Doctorem vocare, qualem esse D. Thomam non negamus. Verum si quæ subest illi voci hæresis, eius reum diximus esse Pium V. qui hoc elogio D. Thomam ornauit, idque decreto Pontificio, ne causetur Theophilus priuati Doctoris sensum esse. Sed instat cuius ordinis velimus D. Thomam, vel viuam, quæ voce, vel mortuam regulam, quæ scripto de scitis fidei statuatur: neutram possumus asserere Diuo Thomæ citra errorem: non primi generis quæ summis Pontificibus, & Conciliis œcumenicis singularis est, neque alterius generis quæ vni Scripturæ Canonice eximia est: Ergo D. Thomæ vindicari nequit hoc nomen citra iniuriam summorum Pontificum, & Scripturæ. Pudet me his nugis immorari; ipsum etiam Theophilum videtur pudere, dum infert suspectum esse de fide

quâ D. Thoma recederet : nam compertus esset non suspectus hæresis , si D. Thomam statueret fidei regulam ad eum sensum quem impugnât , & quo summi Pontifices , & Scriptura hoc regulæ nomen sibi vendicant singulare.

Sed cum ita argumentatur Theophilus , videtur mihi Bezam imitari , qui vocem Anti-Christianam vocat hoc nomen *Ecclesia fundamentum* concessum D. Petro , quod soli Christo contendit Beza conuenire : eodem prorsus abutitur argumento quod in nos Theophilus intorquet ; sed facile est ex ipso met refellere. Hæc nomina *fundamentum*, *regula fides* (& ut ab ipso exemplum sumamus) *Apostoli* vocabulum , neque prorsus quid idem seu synonymum , & vniuocum , neque omnino diuersum , sed analogiâ quâdam commune est multis : ita tamen ut Scripturæ ; & concilio altiori ratione conueniat notio *Regula* quam D. Thomæ asseramus , sicut de *fundamenti* vocabulo ad Christum , & ad Apostolos , vel de ipso *Apostoli* titulo , quem ad Sanctum Franciscum Xauerium vult pertinere ; necesse est ipsum ad Bezæ argumentum respondere , vel ad nostrum de Apostoli nomine quod conqueritur alibi ægre collatum D. Francisco Xauerio à Patre Monstro. Quare illum virgemus suo argumento. D. Thomæ non asserimus titulum infallibilis regulæ , quasi nulli rei nequeas regulæ nomen conferre , nisi asseras infallibilitatem ; quid enim fiet clepsidris & horologiis quibus metimur horarum moras ut regulis primæ , id est motui cœlorum inferioribus ; hoc damnabis erroris contra Philosophiam ; sicut hæresis contra fidem , si quis dixerit virum sanctum esse regulam vitæ Christianæ , quo nihil in Scriptis Patrum , & in ore omnium frequentius.

PARAGRAPHVS SECVNDVS.

Eadem immunitas probatur ab ipsiusmet Theophili scripto.

VOx hæc quam ex Thomistis referunt Theophilus & Dermittius in laudem & commendationem D. Th. dictam,

dictam, nihil hætenus ab Ecclesiâ contra eius doctrinam decisum esse, neque decidi posse, summæ apud ipsos audaciæ atque impietatis notam subit. Quamvis nihil opus esset forte illam propugnare, quod apud nullum discipulorum legerim, neque ipsi, à quo hauserint, significant, eam tamen D. Thomæ commendationem verissimam censeo: & quantum patitur Apologiæ breuitas, confirmandam suscipio; præter iam allatum, quatuor argumentis, quorum à te ipso, Theophile, secundum sumo.

Non est dubium, quin si aliquid extaret, quo scires Diuum Thomam & eius discipulos posse haberi reos alicuius erroris, illud protulisses: neque enim credibile est, illud à te omissum iri, aut ex ignorantia quasi tibi ignotum, aut ex affectu charitatis & humanitatis, ut nobis parceres. Primum ipse facile concedis, & nos etiam alterum: Ipse enim negabis te quidquam ignorare eorum quæ ad controuersias Theologicas, vel Authorum peritiam pertinet. Nos etiam negabimus te bono in nos affectu voluisse tuo silentio, nostro pudori consulere. Nam qui nulli calumniæ, nulli mendaciæ parcat, ut nos traducat, certè à veris non abstinuisset, si præsto fuissent, quo reos accusaret: Ergo immunis est D. Thomæ eiusque doctrina; immunes sunt tanti Magistri discipuli ab hæresibus: nullâ imposterum possumus vel minima erroris suspitione laborare. Quare gratias tibi ago Theophile meo omniumque Dominicanorum nomine; & sanè tibi debemus maximas, quod tuo beneficio, aut certè tuâ operâ, fides nostra putius splendeat, quam *aurum igne probatum, & argensum purgatum septuplum*. Quæsiuisti errores nostros, nec hætenus inuenisti.

Si dicas nos de hoc triumpho à te extracto frustra gloriari, quod hæc diatribâ & quartâ multorum errorum nos conuiceris. Sed non sunt occupanda, neque ad hanc de quâ agimus hæreseos accusationem, aduocanda sunt argumenta, quibus illâ quartâ diatribâ contendendis probare nostra dogmata non hæretica esse, & erronea: (hæc enim est primæ non quartæ diatribæ thesis à te proposita:) sed absurda esse, falsâ, & paradoxa. Si quid habebas quo nos hæresis conuinceret, proferendum fuit priore diatribâ: in eâ vero certum est, præter nugas & conuicia nihil prorsus habuisse, quo vel in speciem argueremur, nisi

tria ex Banne, Spina & Combesio deprompta. Arque hæc accusatione nostram innocentiam asseruisti: cum testatus sis, te nihil habere quod obliiceres, nisi opiniones à tuis inuentas, & à nostris reiectas, vel quæ ad fidem nihil pertinerent, vel quæ iam essent à nostris retractatæ.

Apostolorum innocentiz maximum contrulerunt splendorem Phariseorum accusationes; quas cum maximo rerum & verborum apparatu adornassent, eò tandem reciderunt; quod grana frumenti à segetibus excussa panis & cuiuslibet obsonij loco, præ inopiâ & fame, illotis manibus comedissent. Neque enim aliud quod mali speciem haberet obseruauerant perspicacissimi & infensissimi aduersarij. Ea itaque accusatio incredibili odio concepta, vim habuit summi encomij. Ita Dominicanos à Theophilo habitos gloriari oportet, quod excussis per longissimam vitam nostris libris nihil reperit calumniæ opportunum, nisi ea quæ nullius erroris suspecta esse poterant: quæ ipsemet Alexander VII. suâ ultimâ constitutione ab omni notâ exemerat, dum nihil se ex Cathedrâ de Conceptione definire pronunciauit.

Communis est vox Sanctorum Patrum, inuictam & ineluctabilem impiis omnibus, veteris Scripturæ libris authoritatem conciliasse Iudæorum pertinaciam, & implacabile odium in Ecclesiam: nam cum Deum rerum futurarum præscium authorem esse huiusmodi librorum contendamus, & hebdomadibus, quibus certo numero designatis & exactis Daniel vaticinatur Messiam venturum, & ex aliis his similibus, quæ à Prophetis prænunciata, & nobis consciis, ac testibus completa sunt, nec potuerunt ab alio scribi aut dictari, quam à Deo, aut quem Deus docuerit, in promptu fuisset responsio huic argumento elidendo aut eludendo, eas Scripturas à nobis post rei euentum cufas, & conficta huiusmodi vaticinia. Sed hoc Atheorum & impiorum effugium euerit non dissimilis impietas Iudæorum, à quibus hos libros habuimus; quorum perpetuum in nos odium indubitatum facit authoritatem. Ideò illos Augustinus vocat *Ecclesia Casparios*, & *librorum fidei ac salutis Baines*, ac testes omni exceptione maiores: quia nobis suppedi-

tant, ex quibus se ipsos damnent, & omnem sibi adimant infidelitatis excusationem. Quod si eodem in nos, quo Iudæi in Ecclesiam animo non sis affectus Theophile, certe eodem euentu aduersus nos egisti. Purgasti ab omni erroris suspitione authores & libros, quibus, cum esses infensissimus, nihil nisi falsum & futile, omnium iudicio obiecisti. Quam alienos ab omni hæresi esse oportuit, eos quibus ne quidem huius criminis umbram aut Ipeciem potuerit affingere, is cui certum est facultatem nocendi defuisse, non voluntatem!

PARAGRAPHVS TERTIVS.

Tertium immunitatis argumentum à doctrina D. Thomæ partium contextu & vsu.

ID à vobis quæro Dermitti, & vterque Petre, cur blasphemum & impium reputatis, quod vultis dictum à Dominicanis, *nihil hactenus decisum ab Ecclesia contra D. Thomam, nec decidi posse?* Quid in illo, censuræ obnoxium censetis? An Theologica dogmata? An Moralia? An Philosophica? An commentaria in Sacram Scripturam? An denique omnia quæ extant eius nomine scripta? Sed prius demonstrandum vobis est, de hoc ingenti librorum numero falso dixisse Clementem VII I. *Sine ullo prorsus errore fuisse conscriptos.* Quis temeritatis atquet eos qui malint cum Summo Pontifice, quam cum Theophilo, cum Alua, sentire & loqui? Et vt sigillatim omnia expendamus, quid decidi contra potest? An de Philosophicis? Sed præter quod illa non sunt subfelliij Ecclesiæ; neque ius, vt sic loquar, directum & plenum de his statuendis vsurparunt Concilia & Summi Pontifices; quæcumque habet Philosophica D. Thomas, demonstrabimus modo ad defensionem fidei selecta & comparata esse.

Fortè censuræ obnoxia dicetis, quæ ad ciendam populorum pietatem, nempe hymnos, preces, officia quæ de Sanctissimo Sacramento, de D. Augustino summâ sapientiâ, felicitate, ac pietate scripsit, & cum impio Erasmo in suo Ciceroniano, infantie sugillabitis? Ve-

rum si hanc notam huiusmodi piis scriptis inferretis, *exacerarentur* vos omnes Ecclesie filij, qui iis decanandis videntur imitari cælitum vitam, choris Angelorum interesse, eorūque sclicitatem degustare. Fortè carper Petrus moralia D. Thomæ? Non dubito quin illi summe displiceant Regulæ, ad quas vult vitam humanam, & Christianam exigi; quæ longè absunt ab illius sensu. Nam Theophilus vbique probabilia seſtatur, D. Thomas certis & tutis inhæret.

Attingo solum quod ipse aſtruit: toti Theologiæ moralis fundamentum duplex ex illo est vitæ & morum regula, lex scilicet & conscientia; à quâ aberrare possis triplici genere culpæ: nempe si pecces in vtramque iunctam, id est, in conscientiam, & legem; vel in alterutram scorsim; aut in conscientiam, quæ ex errore nobis persuadet prohibitum, quod licet; aut in ipsam legem, quæ re vera prohibet, quod nobis ex errore, ex ignorantia, sin inuincibili, certè vincibili, & ex opinione probabili licitum & permissum nobis persuademus. Duo priora peccati genera omnes vtrò agnoscunt, tertium negat Theophilus, & omnes probabilitatum patroni: illud vero agnoscit, & statuit Sanctus Doctor, acerrimus legis, aduersus libertatem, propugnator. An dices hoc D. Thomas principium censuræ obnoxium esse? Quid vero de Theologicis aut Philosophicis apud te statutus? Monstra locum, qui in tuto non sit à fulminibus quæ minaris & intentas: Vt hoc breuiculus validè eo demonstratum.

Non possum auspicius inchoare hanc defensionem dogmaticæ partis, quam ab ipsâmet Theologiâ. Id obseruaui cum aliquo stupore, multos qui Theologorum nomine censentur, & inter primos suo, aliorūque iudicio, reponuntur, ita abiectè de Theologiâ sentire, vt velint esse quandam disceptandi de rebus diuinis, communem Catholico, & hæretico artem, Sophisticè non dissimilem, quæ Academiæ more, in vtramque partem disputet, vix vlli assentiat. Honestius illi Theologiam deseruissent, quam profiteantur. Certè si illos Diuo Thomæ conferas, dixeris Theologiam neglexisse vt alienam, & Diuo Thomæ reliquisse colendam, vt suam. Ideo ipse penè solus Theologiæ honori consuluit: alij non eam dignantur scientiæ nomine, & opinionibus annumerant,

à fide seiunctam volunt superflitam, & eiudem speciei in Apollata Theologo. At D. Thomas Theologiæ, non modò scientiæ, sed etiam sapientiæ locum & nomen asserit; quod causam altissimam, sin euidenti, ad minus certâ cognitione contempletur legibus scientiarum, quas subalternas vocant: quia superiorum conclusiones in principia sibi assumunt. Profundissimâ meditatione, idem sanctus Doctor, Theologiæ ius scientiæ vindicat; quod à visione beatâ, cui mediâ fide iungitur, arctissimo fœdere, principia assumat, in euidentia quidem, sed certa: unde suas eruat conclusiones, quibus nihil officit obscuritas, quin eâ certitudine polleat Theologia nostra, quâ facillè superet scientias lumine naturali comparatas: atque hoc iure à scientiâ superiori beatificâ, cui subiicitur, eius imperio subduntur, & obsequio se deuouent scientiæ omnes: vt verum sit quod de charitate Deo subditâ dicitur, seruire fidei & beatorum scientiæ, regnare est supra scientiarum reliquas.

Hanc Theologiæ cognationem, hoc imperium, Diuus Thomas constituit, & inuiolatum seruat omnibus suis scriptis: contra quæ si uelit Theophilus posse aliquid decideri, demonstret necesse est alicubi Diuum Thomam peccasse, vel in fœdus Theologiæ cum scientiâ superiori, quasi aliquid contra fidei principia docuerit; vel contra ius & auctoritatem scientiis inferioribus imperandi. Ac quis vnquam Philosophiam Theologiæ obsequio felicius addixit & vindicauit? Antequam D. Thomas scripsisset, audiebantur passim hæ voces, *Philosophos hæreticorum Patriarchas esse*: & nunc mirâ conuersione, Philosophia Theologiæ militat, & est illi clypei & teli loco, aduersus impiorum impetus, idque debet Ecclesia, sapientiæ Sanctissimi Doctoris.

Improbant Philosophorum & Theologorum plurimi, Sancti Doctoris opiniones, quod ignorent, vel non satis attendant, quibus de causis illis adhæserit. Displicet illis imprimis quod distinctionibus rerum nimis indulgeat, earumque prodigus velit essentiam ab existentia, & à suis potentiis, quantitatem à materiâ, aliâque Accidentia à substantia, Relationem à subiecto quod afficit, Verbum ab intellectu realiter distingui: quod asserat Animam rationalem dum degit in corpore, obli-

que tantum singularia nosse, beneficio speciei naturæ vniuersalis, & Angelos in peccatum semel lapsos nunquam posse sui errati pœnitere, neque retractare iudicium.

Ex multis quæ extranei aut æmuli apud Diuum Thomam improbant, hæc pauca selegimus; quibus de reliquis, quid sentiendum sit faciliè prudens Lector agnosceret. Id primum statuo, nihil eorum quæ à nobis insinuatæ sunt, & quæ quartâ diatribâ obiicit Theophilus, non fuisse à Diuo Thoma, absque summo delectu ex Philosophiâ assumpta, ad res fidei illustrandas & confirmandas. Creaturas vbique S. Doctor opponit Deo, vt propemodum nihil entium supremo; atque ex illarum compositione, ad Dei simplicitatem assurgit, omnis omnino distinctionis realis expertem. Denique vbique astruit quæ sint conuenientiora Deo, fidei & rationis lumine noto. Ideoque non solâ existentia à se, aut naturæ viuientis principio ad intelligendum proximo, sed ipsâmet intellectione diuinitatem constituit; tum ad commendandam infinitam Dei & simplicissimam perfectionem, tum vt ineffabilem Verbi generationem enarret: & à Spiritu Sancti processione distinguat, hoc iam constituta discrimine, quod generatione Verbum intellectionem, vt diuinitatis naturam, Spiritus vero Sanctus Amorem vt attributum sua emanatione recipiat.

Quâ vero ratione concipias, aut deffendas, constitui relationibus diuina supposita, si vniuersam pronuncies relationes nullâ ratione distingui à subiecto, & nihil esse præter absoluta, nisi fortè denominationes extrinsecas. Si vero cum nuperis Philosophis accidentia corporibus auferas, vel quantitatem à materiâ, cum Nominalibus indistinctam velis; haud scio an stare possit mysterium Eucharistiæ, iis saluis quæ docet fides de substantiâ panis & vini mutatâ in Christi corpus, quod accidentibus operum lateat miris, sed veris modis. Neque etiam à verbo mentali intellectionem, vt à termino & obiecto intrinseco, quod exterius exhibet quasi præsens menti, parum confert distingui ad fidei mysteria, & ad verbi generationem reuelatione notam & exemplis explicandam. Quod vero de potentiis ab essentiâ animæ profluentibus, & operationum administris docet D. Thomas; mirum

est quanti referat ad constituendum ex Scriptura & Patri-
bus consortium illud, quo diuinæ per gratiam naturæ
participes facti, deinde per lumen gloriæ posterius gra-
tiâ, maius charitate, altius quam affectu, & amore in
similitudinem & sortem diuinitatis euehimur. Ad quid
illa singularium indirecta notitia, dum sumus in corpo-
re, ex Aristotele assumitur à D. Thomâ, nisi ad animorum
immortalitatis fidem, pluribus aliis inducendam argumen-
tis confirmandam? Et ut ratio sit in promptu, cur dor-
mientes in somniis decipiamur; nempe quod nequeat
certum ab intellectu iudicium statui, nisi expedita sit ea
facultas sensitiua, ad quam pertinet singularium notitia,
quæ intellectui inferuit. Et cum ab hoc obsequio somnus
præpediat, & nullas finat species, aut valde turbidas
emergere; Hinc existunt præstigiæ in somniorum, aut
insanientium deliria. Ex hac etiam sententiâ euidentis est
animam vniuersalia attingere; imò est illud præcipuum
immortalitatis eius argumentum: & etiam facile est sol-
uere illud quod Athei obiiciunt de dormientium, & insa-
nientium deliriis, & in ipsos retorquere. Qua vero ra-
tione defendas præcipuum religionis mysterium, com-
munem scilicet homini, & angelo lapsum, Redemptio-
nis gratiam soli homini, nihil angelo profuisse, nempe
quod casus angelo mors fuerit. Et cum medius inter ho-
minem, & Deum constituatur eo ordine, ut Deus sit ex-
pers omnis mutationis, homo illi sit semper obnoxius,
Angelus veriusque particeps, ante electionem mutabilis
est in bonum, malumque arbitrij; sed ubi se alteri parti
addixerit, neque à malo resipiscere potest, neque à bono
auerti.

Decurrimus breuissime omnes Doctrinæ Angelicæ par-
tes, earumque nexu, & vsu demonstratam satis puto im-
munitatem ab omni censurâ, & hæresi. Quid enim mali,
& erroris inesse potest Doctrinæ diuinissimi Theologi,
quæ duplici quasi vinculo, aut foedere fidem rationi, su-
periora inferioribus iungit, obsequio nempe in scientiam
Beatorum, cui subditur, à quâ sua principia haurit, &
imperio in scientias inferiores, quas ad arcem vocat, &
illarum operâ fidem tutatur.

*Argumentum immunitatis doctrine
D. Thomæ ab euentu.*

FREQVENTES sunt apud Theologos ab actu & potentia reciproca consecutiones. Hactenus progressus sumus à potentia ad actum, quasi hac forma argueremus. Nihil habet doctrina D. Thomæ non sanum, & sanctum, ergo immunis semper fuit ab omni censurâ, notâ, & suspitione erroris. Nunc ordine inuerso progredi placet ab actu ad posse: Nihil hactenus per 400. annos, neque in Sancto Doctore, neque in eius doctrinæ tenacibus, ac fidis discipulis animaduertum est, quod ullam censuram commeruerit; nihil ergo contra illum decidi potest. Nunc ex Magistro virgemus argumentum, statim de discipulis dicturi, quos carpit Theophilus.

Multi consequuntur immunitatem à censurâ, eamque debent sui nominis obscuritati; ij sunt, qui vitam silentio transigunt; quorum vitam mortemque iuxta æstimat Salustius; quia de vtraque siletur, nihilque scripserunt aut gesserunt laude dignum, quod inuidiam & æmulationem prouocaret. Non potest eo referri immunitas Sancti Doctoris; ad eius gloriam summam pertinet, non pauciores habuisse aduersarios, quam discipulos, & fere pates esse, qui insectantur, iis qui illum admirantur. Vix credi potest, quas ille dum viueret, & post mortem, omnibus ferè sæculis, quæ ab eius obitu fluxere, & ab omnium Ordinum hominibus passus sit, & etiamnum patiatur insectationes. Sed quemcumque tandem res sit exitum habitura, non potest non cedere in maximam D. Thomæ commendationem.

Mirum est eâ authoritate valuisse doctorem vnum, ut per trecentos, & ultra annos, Populi, Principes, Reges, Academiae, Vrbes, Regna, vrgeant rem vnâ præter eius sensum decidi, & dirimi, & nihil hactenus sit de fide constitutum ex Cathedrâ. Vel enim euincunt tandem quod lōgissimis, & continuis precibus tot miliones hominum, & legationibus Principes efflagitant, vel frustra id obtine-

dent, & rogabunt: Si hoc postremum contingat, quid excogitari potest illustrius ad gloriam, quam vnum contra tot milliones inualuisse? Si res tandem cedat contra illius mentem, certè non cadet inglorius, quandoquidem per tot annos pugnandum fuerit infinitis, vt vnus semel vinceretur. Neque victum dicam: si quod enim ex Cathedrâ decretum prodeat contra illius opinionem; vel iuxta perpetuum Conciliorum, & Summorum Pontificum morem ex scripturâ & traditione repetetur quasi expresse contentum, aut necessariâ consecutione deductum: vel præter antiquas leges, ex alicuius Scripturæ loci interpretatione etiam mystica eruetur, aut nouâ reuelatione sancietur. Nolo enim disputare; an alia sit concessa, & vsquam vsurpata, post Scripturas Canonicas, res fidei ratio definiendi; inconsultâ aut mutâ traditione; vel Scripturâ ad sensum litteralem, cumque necessariò textui connexum, non expensâ. Esto, (quod vnus Theologus scripsit) nouas reuelationes, multis improbatas; demus valere ad eiusmodi decreta fidei conficienda: satis sint ad hoc loca Scripturæ Sacræ sensu mystico explicata: à quâcunque tandem reuelatione, aut interpretatione decretum hoc proficiatur, in nullum potest cedere dedecus D. Thomæ. Si noua fuerit reuelatio, quid mirum fuisse D. Thomæ ignorari 400. annis defuncto antequam vulgaretur, & illi fides diuina esset habenda: Idem iudicium esto, si iuxta regulam, D. Ludo. à Crespi & Borgia prodeat ex interpretatione locorum, & Scripturæ ad sensum mysticum; neque enim poterant apud antiquos magis fidem facere, quam reuelatio nulli propalata. Si vero in Scripturâ, & traditione à Christo per Apostolos receptâ hac veritas latebat, & inde oportuit elici quasi ignem ex lapide; certè non vertetur vitio Doctori Sancto id ignorasse, quod ita obscurâ traditione delitescerebat vt; 100. annorum studio, & indagine vix erui poterit.

Tria hic mirari, & summe laudare subit: primo inuitam tot hominum, omnium Ordinum, in hac definitione efflagitandâ, & prosequenda constantiam; vt nullâ dilatione & morâ frangantur, aut fatigentur; & ipsâmet repulsâ videantur accendi, ac ferè Summi Pontificis partes, & decreta occupare. Sed huius rei admiratio ce-

dit maiori apud me miraculo, nempe consilio Sedis Apostolicæ, à definitione abstinendi; quod saltem hæcenus neque infringi, neque mutari potuit tot populorum precibus, & legationibus Principum. Sed quis ad tertium, quod ex duobus superioribus existit, prodigium non obstupescat? Quod vnius hominis, qui nunquam sibi permisit ultra quod scriptum aut traditum est, sapere modestia & reuerentia adeo optatæ definitionis sit obex, & mora?

Hinc discant Hæretici, se Ecclesiam & Romanos Pontifices, per summam cæcitatem & malitiam fuisse calumniatos, quasi nihil pensi habeant Scripturam & Traditionem diuinam, quasi ex tempore, ad arbitrium, nullo delictu & examine, prætextu nouarum reuelationum, res ex Cathedrâ definiant. Sciant, & præ pudore suarum calumniarum impostorum obmutescant, à trecentis annis sub iudice summo Pontifice litem esse: & quamvis longissimè dispar sit contendentium partium conditio: tantæ tamen æquitatis esse summos Pontifices, vt semotus personarum respectu, causæ tantum momenta inspexerint, nihil gratiæ dantes, nihil odio: diuinæ sapientiæ oracula consuluerint & continuis precibus ac lachrynis responsa sollicitarint: neque hæc perfuncti curâ, dubitauerint scribere, & præ se tulerint, nondum sibi lucem affulsisse, neque tanti mysterij se ita conscios & comperitos, vt illius fidem possint Ecclesiæ indicere. Hinc discant Sedis Apostolicæ hostes, cui insidere blasphemant Anti-Christum, se supra Dei verbum, & id omne quod dicitur Deus, efferentem: & vt cætera omittam, his refellendis imposturis, quibus populos dementant: obseruare velim omnes, vtrum quam obiciunt, arrogantia, conueniat his quæ à nobis modo relata sunt.

Sanè cum multa sint, quæ nos in Ecclesiâ Romanâ detinent, & quæ ipse Augustinus enumerat argumenta, quibus sin vera euidenter Religio Christiana, certè euidenter credi & persuaderi debere, demonstratur: tamen illud præ cæteris vrget, quod repetitur à perenni fide, & autoritate Ecclesiæ, & Sedis Romanæ, cæteris omnibus, aut euersis Barbarorum manibus & armis, aut Hæreticorum impietate, in Apostasiam delapsis: id admirationem & reuerentiam inuictæ potestatis & fidei Ro-

manorum Pontificum auget; quod totidem à dæmone machinarum & tentationum genera, quot Christus, perpeſſi, numquam à fide defece- rint. Nihil illis primum nocuit, non minus diuturna, quam atrox Imperatorum ſæuitia, quæ triginta ſex priores, qui Sedem Romanam, occuparunt Pontifices abſumpſit, & ſupremam authoritatem primæ ſedis, tot Martyrum gloriâ illustrauit & confirmauit. Sed multo grauius videbatur periculum fidei & Authoritati Pontificiæ, à vitiis multorum, qui longè diſpares meritis, & ſede indigni, eo conſcenderant, quam ab Imperatorum crudelitate. Verum non fruſtra conſeſſum fuit diuinâ liberalitate Petro, præ cæteris Apoſtolis & Diuiſ omnibus, vt non ſolum contactu & verbo, ſed ſolâ umbrâ ægros curarit, & ſalia id genus miracula ediderit; vt eſſet vaticinio & argumento; quamuis à moribus & ſanctitate Petri longiſſime abeſſent ſucceſſores, & vix eius umbram referrent; facturos tamen miracula, nec vnquam ab eius fide & authoritate caſuros.

Vltimum ſuper eſt tentationum genus, quo potuiſſet fides labefactari multo grauius, quam duabus machinis à nobis enumeratis, niſi Chriſtus oraſſet, ne vnquam deficeret, & promiſiſſet perpetuam & incorruptam fore. Quid vero illud eſt? Doctorum adulatoriæ voces, Optimatum preces importuniſſimæ; quibus hætenus non magis ceſſit Romana & Pontificia fides, quam priuatis vitiis, aut Imperatorum minis & ſæuitia.

Nullâ re ſibi Principes timere magis conuenit, quam iis vocibus, quæ poteſtatem in maius augent, & licere quidquid libuerit, mentiantur. Non deſuere huiusmodi voces Theologorum, quas referre nolim, ne hæretici ſciant vnquam, ab vſlo Catholicorum prolatas. Sed no- uerint ſummorum Pontificum fidem illis intactam & maiorem fuiſſe, & Theologis Eccleſiæ Romanæ hoc ſer- uaiſſe arinorum genus, quo ſemper vincentur; nihil vn- quam à ſummis Pontificibus decretum ex Cathedrâ, & ſubinde credendum, quod Scripturæ testimoniis ad li- teram explicatæ, quod ſucceſſione perpetuâ, Diuinâ non Eccleſiaſticâ, vt nonnullus malè diuiſit & peius hic ex- plicuit, per Apoſtolos ad nos deriuata, non demonſtre- mus ex ipſiſmet Magdeburgenſium Centuriis, & Calui-

ni Institutionibus munitum & confirmatum esse.

Hic etiam ad augendam Sedis Apostolicæ reuerentiam, & ora hæreticorum contundenda, non censeo omittendum, quod cum Basileense Concilium definitionem ediderit de piâ opinione, (fortè in Turrecrematam aliòsque Dominicanos indignatum, quod à se defecissent, & Eugenij causam propugnarent) nondum accesserit huic definitioni vllum Summi Pontificis decretum, quo confirmaretur. Quid vero causæ fuerit, non ausim dicere; nisi forte, quod cum iuxta scholæ nostræ sensum, altior sit Pontificum, quam Concilij autoritas, putauerint ad suam dignitatem & curam pertinere, decreta maturare, magis quam festinare; & illis quam maximè fieri potest, pondus addere, non solum ab Autoritate quæ summa est, sed etiam à Scripturâ & Traditione, ad quam veluti ad Regulam, semper suas definitiones exegerunt, contundendæ hæreticorum audaciæ, & piorum fidei promouendæ causâ.

PARAGRAPHVS QVINTVS.

Argumentum quintum immunitatis à diuersâ sorte discipulorum Dni Thomæ.

Hanc ab errore immunitatem Familiæ & Scholæ nostræ lacescit & rider potius, quam impugnet Theophilus, pluribus exemplis Dominicanorum, & discipulorum D. Thomæ, qui in Apostasiam prolapsi sunt: quales fuere Bucerus, Palæologus, &c. vel falsa scripserunt & errores; vt Caietanus, Catharinus: vel ad inquisitionem vocati iudicium subiecerunt vt Carranza, Mathæus Grabont. Ad hæc omnia vniuersim, deinde partibus responsurus, moneo nos adeo deliros aut cæcos minimè esse, vt velimus, scholâ & familiâ Christi, nostram à casu & ab errore longius abesse: æquo igitur & forti animo ferimus ea mala, quibus ipse Christus discipulorum carissimos exemptos noluit: Atque vt istius familiam, ita nostram tripartitam constituo. Multi è Christi discipulis à fide & charitate receptâ nunquam defecere, alij exciderunt penitus, nonnullis aliquid humanum

contigit, sed veniâ dignum, & pœnitentiâ emendatum. Non dissimilis est nostrorum hominum conditio: plures fuerunt semper doctrinæ D. Thomæ tenaces, nec ab illâ recesserunt, quales sunt Capreolus reliquorum princeps, Ferrariensis, Conradus ex antiquis: ex modernis Ioannes à Sancto Thoma, Salmanticenses, &c. Secundâ classe reponimus à fide & religione Apostatas, qui ludæ respondent. Tertijs & quasi medijs generis sunt, qui saluâ religione Diuum Thomam, parum, aut nihil curarunt, vt Durandus, Campanella: vel sibi parumper ab illo recedere permiserunt, qualis sunt Heruzus, Paludanus, Soto, Cano, Victoria, Caietanus ad purpuram assumptus, & Scripturas magis suo ingenio, quam ad D. Thomæ mentem interpretatus. Sic instructâ Dominicanorum acie, non detrectamus cum Theophilo pugnare, & ex variâ discipulorum D. Thomæ sorte eius doctrinæ immunitatem demonstrare. Id certissimum est nullam erroris notam, aut suspicionem passos, quandiu Magistro adhæserunt: Quos vero huius obsequij pœnituit, subinde lapsos: qui vero à fide omnino defecerunt, aliquam in Magistrum reuerentiam seruasse, eiusque causâ minus hostili in Ecclesiam animo fuisse.

Hoc differt à D. Thoma Scotus, quod plures ab ipso ex suâ Familia, quam ex Dominicanâ à D. Thoma defecerint. Id vero inde profectum censeo, quod cum nulli ex nostris pares essent ingenio & eruditione D. Thomæ, putarunt sibi honori fore eum Magistrum agnoscere: sed non est assecutus Scotus hanc reuerentiam à suis, neque à Riccardo, neque ab Ocham, Aureolo, multisque alijs, qui fortè non sibi videbantur illi subtilitate inferiores.

Sed quidquid sit, vt ad rem nostram accedamus, sciunt omnes, quotquot se D. Thomæ addixerunt, vel sibi ab illo recedere permiserunt Dominicani, vel ab erroribus omnino immunes, vel illis obnoxios fuisse: quod vtrorûmque exemplis manifestius est, quam vt nostra egeat opera. Quis ignorat Durandum, ex nostris, doctissimum & profundissimum Theologum pluries præcipitem, & lapsum in diuersos errores, quibus libros suos maculauit? Vnde hoc illi mali contigit? Quia à suo Magistro recessit, vbi primum Episcopus factus cœpit sui iuris esse, vnde illi suus Nepos impropere, *Sedens aduer-*

sum fratrem tuum loquebaris, &c. Et Caietanus ipse quandiu D. Thomæ adhæsit, ab omni prorsus errore abfuit. Quis tutius, & firm ut fixit gradum, quandiu vestigia D. Thomæ secutus est? At cum suo voluit regi iudicio, in multis excessit, & Catharino suppeditauit materiam amplam animaduersionum, quibus sex libros confecit. Quis ipsomet Catharino frequentius, & grauius impegit? Quis Thoma Campanella turpius hallucinatus est? Nempe quia suo quam D. Thomæ sensui maluerit adhærescere.

Hæc exempla mihi videntur eo accommodatiora, quod alios Ordines minimè lædant, ideo ne dem vili causam contra me expostulandi, abstineo ab alienis exemplis, cum domestica sufficiant, ad id quod proposui, in quancunque partem assumpseris siue eorum: qui inuenerunt viam quam munivit S. Doctor, siue eorum qui aliò discesserunt, & quibus diuerticula placuere; & sicut eorum ex Dominicanis plura dedimus luculenta exempla, multo plura suppetunt in contrariam partem. Quem mihi dabis discipulorum, qui in verba D. Thomæ iurarunt, ac iuramento steterunt, alicuius erroris conuictum, & damnatum? Hæc est vis primæ demonstrationis, quam apertè confirmas tota tua prima Diatriba.

Nec est quod nobis opponas Martinum Bucerum hæreticum, aliosque, Dominicanam vestem induisse: vltro enim fatemur Martinum Bucerum hæreticum è nostro Ordine transfugam fuisse. Iam diximus Dominicanos, qui à D. Thomæ doctrinâ excesserunt, in errores fuisse lapsos, hoc vltro fatemur. Nec enim sumus ex illis, qui sua phylacteria dilatant, omnia sua laudant, omnia sua extollunt, nihil inter sua non sanctum, non rectum, in re nullâ suos deficere aiunt, nullum errare, nullum male sanæ doctrinæ adhærere, suos omnes, sanctos dicunt, Doctores, Martyres, Athletas, heroes: & quod singulariter de Sancto Thoma Aquinate Angelico Ecclesiæ Doctore scripsit Clemens VIII. in suo ad Neapolitanos Ciuēs Diplomate, quod ingentem librorum numerum, absque vilo prorsus errore cōscripserit, hi attribuunt cui libet ex suis vulgari doctore quamuis gregario, quamuis infimo. De huiusmodi hominibus sic de seipsis sentientibus, inquit S. Augustinus. *Sunt quidam inflati veres,*

spiritu elationis pleni, non magnitudine ingentes, sed superbia morbo tumentes, ut dicere audeant, inueniri homines absque peccato. Sed forte Apostoli arietes gregis, & Pastoris membra non habebant peccatum? Vere habebant; ego non auderem; ipsum audi Dominum dicentem Apostolis. Sicorate, dimitte nobis debita nostra Homil. 43. ex. 50.

Bucero, Palæologo annumeras, Mathæum Grabon à Martino V. agentibus Doctoribus Parisiensibus in Concilio Constantiensi damnatum, eiusque librum igni addictum, (qualis pœna tuo inflicta est,) sed à Mathæi longissime æquitate abes: ille hoc saltem nomine se non indignum D. Thoma Magistro probauit, summâ in iudices reuerentiâ quorum sententiæ ultro se subiecit, tu inuictâ pertinaciâ iudicibus conuitia reponis. Sed quid de Bartholomæo Carranza (quem tu fere inter hæreticos reponis) non solum libris, dignitate post Romanam summâ, studio in Rempublicam Christianam Patribus Tridentinis comperto (& quod pluris facio) inuictâ in aduersis constantiâ celeberrimo dicam, cuius pios manes importunissimè sollicitas? Habuit superiori sæculo Familia Dominicana infinita propemodum eruditionis, & sanctitatis ornamenta sanè præstantissima. Nam præter sex Archiepiscopos, 17. Episcopos, & octo supra viginti Theologos, qui velut sydera in Concilio Tridentino effulsere, floruerunt in Lusitania Oleaster, & Granatensis, in Italiâ Pius V. Sed reuera aliquid ad plenam & cumulatam laudem Ordinis, desiderarem, si defuisset Carranza, primas Hispaniæ, cuius eruditio & dignitas fuerunt infra vitæ & fidei integritatem, atque in aduersis constantiam. Priuati hominis virtutem & gloriam mancâ & vix dimidiatam reputat Seneca, si illæ sâ felicitate nullis probatus aduersis vitam transfegerit: Certe illi sæculo tot heroibus Dominicanis gloriobissimo multum deperiret, nisi accessisset Carranza nihilo inferior malorum patientiâ & vitæ innocentia sanctissimo Iobo. Inquisitio Hispana & Romana sub Pontificibus Pio V. & Gregorio XIII. nullum prætermisit rigorem in viro examinando, nihilque habuit quod damnet: neque ipse multis annis exagitatus vnquam sibi permisit, vel minimum verbum hinc aduersus iudices: imo testa-

tus nihil contra se actum præter iura legum & fotti.

Antiqui loca fulminibus percussa venerabantur. Si ibi inesset Theophile, aliquis religionis aut humanitatis sensus; abstinuisset à Carranza carpendo, vel illius Christianæ patientiæ exemplum imitaretis. Sed frustra à re sperem aliquod humanitatis in viuos aut mortuos officium.

Si aliquis grati in bene meritos animi sensus superesset Theophilo, aut quo flagrat; ardor insectandi Dominicanos, pateretur attendere quam grauem vni Societatis Præposito, id est Francisco Borgia notam inurat, dum Carranzam suspectum hæreseos facit, & apertis hæreticis annumerat eo iniquius, quod oblique petat reticentiæ figuram, abstinuisset à vexandis piis manibus summi viri, tot dura, tot aspera dum viueret perpassi. Memississe debuerat Carranzæ beneficium in Societatem immortale. Nam ubi Filicæo Archiepiscopo Toletano Societati Cane infensiore suffectus est, quam decessor pertinacissimè negauerat facultatem, Toleri sedis constituendæ liberalissimè concessit, & ut inquit Lib. 2. 119. Sachinus Cartæz gratior ex sacro Dominicanorum Ordine scilicet successit animo erga nos planè diuerso. Prima ei curarum fuit Societatem Toletum inducere. En Dominicanum Vatiniano odio in Societatem accensum.

Certè si innocentiz sapientissimi Præsulis aut in suos beneuolentiæ & liberalitatis aliquam noluit rationem habere, debebat ad minus consulere tum fidei, tum auctoritati Borgia. Nam ut refert idem Scriptor l. 4. 189. Borgia fidei aliquid creatum fuit incommodi ex familiaritate cum Carranza: non modo, quia re verâ amabat, atque aded mirabarur hominem Borgia, & prædica-
bat insignes virtutes, quarum in Archiepiscopatu pulcherrimam speciem dabat: sed multo maximè quia ille, ubi datus est in custodiam, innocentiam constanter defendens, Quæstorum in Hispaniâ reiecto principe Valdesio Archiepiscopo Hispalensi, ne suæ causæ iudex esset, ad iustæ repulsæ probandum ius præ cæteris testibus omni exceptione maioribus ipsum nominauit Franciscum Borgia; vnde Hispalensis Antistes grauitè offensus est: & inde in Carranzam inualuit accusatio.

Debuerat

Debuerat sanè Petrus abstinere à Carranza sugillando, cuius fides & innocentia non modo Borgiæ testimonio comprobata, sed etiam cum ipsius Borgiæ fide sit coniuncta: ut vix tuto & saluo Præposito Societatis, in discrimen aut suspicionem Carranza venire possit. Sed Dominicanorum lacerandorum avidus nullam patitur etiam cum sui & suorum noxâ occasionem elabi, quæ eius affectui indulgeat.

Sermo de Carranza habitus ad tertiam classẽ nos deducit Apostatarum: horum facile princeps est Bucerus, qui è Germaniâ in Angliam ascitus Cantabrigiæ professorem egit, ibique defunctum & sepultum iussit effodi & igne posthumo (quod supplicium viuis promeruerat) eius cadaver comburi Bartholomæus Carranza, sub regno Mariæ (eheu nimium breui!) in Angliam vocatus, Religionis instaurandæ causâ, quo munere egregie defunctus, nec ipsi Bucero olim ex Ordine & defuncto pepercit.

Sed ut de Apostatis aliquid attingamus: tres à nobis distinctæ classes Dominicanorum, aliquam præferunt similitudinem trium locorum, in quibus fides docet post mortem animas degere: vel enim cœlo receptæ Deo fruuntur, vel in Purgatorio, quæ adhæserunt leuium peccatorum sordes eluunt, & soluunt pœnas: vel tandem in inferno æterna supplicia patiuntur. Beatis mentibus respondent fidi Sancti Doctoris discipuli, qui nihil peccarunt, quod reprehensionem meruerit: Minus foeliciter actum est cum iis, qui interdum à sancto Doctore dissenserunt, non impunè, Purgatorio librorum indici inscripti. Vltimus locus debetur Apostatis. Sed quinam ordinum illis caruit, seu dedecus voces, seu remedium? Est enim dubitandi locus quo nomine sit utendum. Sed quidquid sit, siue illorum casus sit ordini, vnde exeunt, leuamen aliquod, seu vituperium, certè pauciores numerabimus ex Dominicanis, quam ex aliis Ordinibus, & ex ipsâmet Societate, quamuis eius Institutum sapientissimum nihil omisisse visus sit, quo graue malum auerteret, & occuparet. Nam cum cuiusque corporis, seu naturalis, seu politici, & sacri incolumitas sit à duplici virtute, vnâ rerum salutarium retentrice, noxiorum alterâ expultrice; utrâque voluit suam Societa-

suo nomine typis dedisse. Sed absit ut ad tuam imitationem accedam: tu non solum dubia, sed cerro falsa de nobis scribis, nollem ego de te, & tuis aliisque cuiuscunque sint Ordinis, ne dicam dubia, sed ne certa quidem scribere, quæ possint illorum famam minuere.

PARAGRAPHVS VLTIMVS.

*Sextum Argumentum à Petro Alua qui
prætermisâ Scripturâ & Traditione,
conuenientia sectatur.*

EA est rerum sibi aduersantium lex non iniusta, & summè utilis, ut in mediâ pugna sibi lucem affundant: & si quid boni aut veri insit partium vni, alterius collatione innotescat. Exordium huius de Immunitate disputationis sumpsimus à discrimine quod à me obseruatatum dixi, & iam pluribus confirmâui, Diuum Thomam inter & Theologorum reliquos, maximè Scotum; quod sanctus Doctor Scripturam & Traditionem ut diuinæ Voluntatis fidos & certos Interpretes consulat; Scotus vero Dei opera inspiciat, & quæ illis conuenientiora videntur, sibi aliisque persuadeat, vnde sanctus Doctor nunquam sibi permittit sapere ultra quod scriptum & traditum est: Doctor vero subtilis conuenientiis ducatur, & illis maximè indulgeat. Discipuli Magistrorum regulas & vestigia secuti sunt; & si velis Scholas certis nominibus distingui, non abettrabis, si vni verbum Dei, alteri Dei opera ascribas, & illi des in regulam testimonia, alteri conuenientias. Quas absit ut damnem, si illis sobrietatis: sed cum sint proprii partus ingenij humani; timendum est ne indulgentiâ quasi paterna illas prosequamur; earumque affectu nimio, longissimè à vero in multa falsâ & absurda abripiamur.

Cum plura extent, & proferte possem exempla eiusmodi conuenientiarum absurdissimarum; vnum attingam ex Petro Alua, qui pluribus libris, sed maximè vno edito 1651. hac inscriptione *Natura prodigium & gratiæ portentum*, & Thesibus Toleri in Comitibus Generalibus Minorum ab eodem Petro propugnatis, & à Thomæ

Hurtado relatis, ita ingenij sui habenas laxauit, & per illam latissimam cōuenientiarum viam excurrit; in tot denique absurda abreptus est, semper ductus cōuenientiis; vt eius libri ab Inquisitione Hispanâ, & à Sacrà Congregatione damnati sint. Hinc Theophilum imitatus, quasi iniustam censuram passus, & Dominicani essent illius Authores, hanc iniuriam vlturus, duos in nos scripsit libros; vnum hoc titulo *Sol veritatis* alterum *Nodi indissolubiles*: quibus licet maiorem modestiam, & veri curam præferat, quam Theophilus; vix tamen credi potest, quæ absurda, quæ paradoxal scripserit; vt penè religioni sit ea referre; ne videar Ecclesiam impiis ridendam subiicere.

Certè ea scripsit Theologus ex regulis cōuenientiarum, quæ in Poëta non posses pati. Ex infinitis aliqua delibabo; vt omnes agnoscant, quibus armis, & à quibus Aduersariis Dominicani impetantur. Suo illo libello, quem inscripsit *Natura portentum*, & Thesibus Toleti defensis, Diuum Franciscum exhibet, sicut ipse loquitur, *vt Deum paruum, Vice-Deum, Christum minorem, Crucifixum nouum, alterum Reparatorem Ecclesia, Redemptorem secundum, per omnia primo similem*; primò quidem Conceptione & Natiuitate ex Matre Picâ sterili, cui ab Angelo fuerit prænuntiata: iterum in utero materno gratiâ præuentum, quæ eum ab originali peccato immunem fecit, & per totam vitam etiam à venialibus ex affectu admissis: & confesso Papæ exhomologesi totius vitæ iniunctam orationem Dominicam semel recitandam, vt iustam & parem omnium culparum pœnam.

Sed ad quid ista minuta? multo sublimiora prædicare & Franciscum Christo comparisonem ab ipsâ æternitate reperit suis Thesibus Toleti disputatis: libri vitæ quatuor folia distinguit, quorum primo scriptus sit litteris aureis, Iesus Crucifixus, altero litteris argenteis, Virgo mater, tertio rubeo caractere D. Franciscus, vltimo electorum reliqui. Vult etiam altero libro D. Franciscum in Adamo ad Dei similitudinem creato, aliisque Prophetis præfiguratum. Et cùm eius in mundum aduentus instaret horâ, Angelum à Deo missum in Ciuitatem Assisiam ad scēminam desponsatam nomine Picam, quam certiore faceret filij ex se nascituri per omnia Christo

similis, tum Conceptionis modo & tempore; (nam contendit Petrus iuxta rationem temporum à Rabinis de Christi aduentu initam, Franciscum die vigesimâ quintâ Martij, quo Incarnatio celebratur, eius corpus sicut Christi, vnico instanti formatum, & eodem, illi animam infusam:) tum omni priuilegiorum & gratiarum copîâ & splendore, quo turbatum asserit Luciferum, omnesque cælginosi inferni potestates, quæ coacto Concilio Luciferi imperio miserunt, qui explorarent, quissnam eo momento natus esset, aut conceptus.

Compertâque Francisci natiuitate, expeditam fuisse legionem dæmonum, illius suffocâdi causâ in vtero materno, vel extinguendi, si iam in lucem prodiiisset: sed illorum conatus & consilia impediuisse legione Angelorum à Deo missam in custodiam Francisci: quem ait pium nimiumque probabile esse, in vtero materno sanctificatum, vidisse humanitatem Christi, & diuinam essentiam, dum vitam mortalem ageret: verius & illustrius martyrium fuisse assecutum, quam qui sanguinem fidei causâ profuderint, quod diuturniora & asperiora tormenta per biennium passus sit, non solum Christi causâ; sed etiam manu, dum stigmata illi impressa sunt: delapsum in eum Spiritum Sanctum sicut olim in Apostolos sub formâ aspectabili, extinctum eius fomitem, & in gratiâ confirmatum: Cum vero è vitâ excessit, eius animam veluti sagittam purgatorium penetrasse, omnesque animas illic detentas secum in cœlum adduxisse: ibique locatum supra Luciferi sedem; eamque dicunt alij commeruisse humilitate singulari, quæ superbiam Luciferi superauit: additque Alua D. Franciscum intra vulnus Christi in cœlo habitare, & inde descensurum pugnandi causâ aduersus Anti-Christum, quem sit sua manu interfecturus, & ultimo iudicio vexillum Crucis delaturus. Nec ipse solus tantâ gratiâ & gloriâ potiturus est, quin suos sit facturus participes. Vnde asserit Patris merito omnes eius filios ad finem mundi stigmatibus insigniendos. Omiseram etiam in eâ gratiarum enumeratione, Diuum Franciscum singulis annis die suo natali in purgatorium descendere, & filiorum vel etiam extraneorum, qui in se affecti sunt, animas inde ad gloriam deducere.

Sed quid de Regulâ Apostolicâ Francisci scribit? A

Christo verbatim dictatam, deinde iuxta sententiam peritissimorum Doctorum habere auctoritatem legis iure diuino sancitæ. Sed his omnibus videtur quid altius suis Thesisibus Toletanis insonare, quibus asserit D. Franciscum commouere totam auiam cœlestem, vbi solus audiat; deinde Angelos nunquam ad nos descendere, vel redire ad Deum, nisi prius viso & salutato corpore Francisci. Tertio, cum Deipara filium lactaret, illi infudisse 8540. guttas lactis, totidem à Christo passo fluxisse guttas sanguinis, & pari numero horarum vulnera Christi Franciscum fuisse perpeſsum, vt horarum numero Franciscus æquaret guttas sanguinis Christi, sicut ipse guttas materni lactis. Quarto, Christum pro hominum peccatis satisfecisse superabundanti pretio, licet non ex toto rigore iustitiæ, idque non esse suprâ merita Deiparæ & D. Francisci. Quinto, sed posse satisfacere ad æqualitatem pro toto genere humano, imo & superabundanter. Denique in hac Trinitate Francisci, Iehouæ & Mariæ nihil esse prius, & posterius, nihil maius, aut minus: nisi dicas paupertatem Francisci esse quid maius, quando quidem vult fuisse regulam paupertatis Christi:

Nec satis est illi quæ Christi diuina sunt in D. Franciscum transferre: Vult Christum participem esse defectuum Francisci: quem cum historiæ referant staturæ paræ, & formæ non admodum spectabilis fuisse, ne Christus hæc re sit dissimilis Francisco, assentitur illis qui negant fuisse, *Speciosum formâ præ filiis hominum*, & corpus illi assentiret à profectione Francisci ad, Sultanum Ægypti; & solo differret comitatu, quod vndecim filios sibi adiunxisset, ne hæc re recederet Imago à Prototypo, Christo in Ægyptum fugienti præter Mariam, & Ioseph, magnâ liberalitate duos dedit seruos, tres Ancillas, tres Asinas & Bouem vnum, vt his additamentis æquaret vndecim socios Diui Francisci. Tandem addit eâ in Ægyptum fugâ Christum syluæ densissimæ feras mansuefecisse, & hanc dotem non negasse Francisco per totam vitam.

Causaberis fortè Lector Christiane, hæc intempestiue à me referri, quæ grauiter lædant necessitudinem Dominicanorum cum Franciscanis, olim initam, instauratam à P. Turco, & hodie religiosissimè vbiq; seruata,

Non excusabo hæc à me dici prouocato atroci libro Petris Aluæ, in Dominicanos exarato: neque enim defensionis necessitatem obtendo, sed quæ scripsit P. Alua adeo absurda sunt, vt non dubitem ipsis P. Franciscanis displicere: & beneficij loco reputare, si ipsis assentiam, & huiusmodi paradoxa quæ Ordinem Seraphicum, & totam Ecclesiã dehonestant, improbem. Quid dicis ad ista Theophile? Quas in nos tragœdias excitasses, si vllus nostrum his similibus scripsisset de D. Dominico, & Thomã quæ ille est ausus edere de D. Francisco, esse tantæ sublimitatis vt extra communem lineam Sanctorum positus sit, & supra intellectus creati lumen, & captum. Gratiâs immortales ago diuinæ sapientiæ quod ex omnibus Authoribus Dominicanis non potuerit millesimam partem colligere absurditatum quas Alua in vnâ sui libri paginam coniecit.

SECTIO SECVNDA.

Soluntur Nodi indissolubiles Petri de Alua.

AGERRIME fert & acriter reprehendit Diuus Thomas scriptorum modestissimus, præposteram nonnullorum pietatem, qui res fidei supra mentis humanæ & Angelicæ captum positas, quæ solâ reuelatione diuinâ innotescere possint, & nitantur; nescio quo zelo suscipiunt demonstrandas argumentis à naturâ repetitis. Nam præter irritum de re nobis inconcessâ conatum & laborem, fidei contemptum, potius quam reuerentiam inducunt apud Ethnicos; quasi ratione humanâ ducti, non autoritate diuinâ, huiusmodi mysteriis adhæreamus: quare diuersis suorum operum locis refellit accuratè S. Doctor huiusmodi Argumenta fictitia, vt Christianis consulat, & à Religione extraneis; & vtriq; persuadeat, vera quidem esse quæ credimus, sed demonstrari non posse: eorûmq; fidem testimonijs & miraculis confirmari, non Argumentis oportere.

Exemplo Angelici Præceptoris, eodémque consilio, aggredior solutionem quindecim Nodorum, quibus

Petrus de Alua ita implicitos Dominicanos censet, vt nullus superfit illis euadendi locus; & hâc fiduciâ insolubiles vocat. Sed reuera de illis verissimè dixeris, quod Seneca de sophismatis epistolâ 45. *Nec ignorantis nocent, nec inuant scientem, sine noxâ decipiunt, quomodo prestigiatorem acetabula, & calculi, in quibus fallacia ipsa delectat* Hæc de Nodis, si per se Auctoris industriam spectes: at si mentem eius & scopum inspicias, cum has nugas maximo laborum impendio, & longissimâ per totam Europam peregrinatione Conceptionem immaculatam defensurus parauerit; plurimum detrahit æquitati & maiestati tantæ causæ, quam potius huiusmodi Nodis implicuit quam expediuit, vt eandem causam melioribus & validioribus vindicaretur Argumentis hac Sectione demonstrabo.

Vnde iam occupauit illorum iudicium & reprehensionem, qui fortè suspicabuntur, me responsione ad libros Petri incurrere in censuras, quibus cauent Summi Pontifices ne hanc de Conceptione controuersiam attingamus. Sed longissimè aberrare, qui ita censent, etiamsi ipse taceam, argumento erit ipsa responsio, quâ saluâ semper in decreta reuerentiâ, refellam calumnias & sophismata Aduersarij, quibus probabilitatem & pietatem opinionis, dum vult videri confirmare, penitus euertit. Certè qui norunt meos mores, quibus ab infantiâ imbutus sum (quorum, prudens Lector plura ex scriptione poterit argumenta excerpere) nihil dubitabunt de me testari; quod apud antiquos de homine veraci in prouerbum abierat. *Is est, qui cum in tenebris mites.* Sane quamuis Deum & homines celare possem, culpam aliquam nunquam admitterem, idque ex officio id est odio culpe, non metu pœnæ; quam libentissimè subibo apud homines, vt diuini Iudicis longè grauissimam effugiam, si cuiusquam delicti hâc Apologîâ aliâue re incurrissem reatum. Neque putarem me excusari læsæ Pontificiæ Authoritatis, si vel minimum mei, aut totius Ordinis quamlibet iuste & necessariæ defensionis causâ, de re prohibita scriberem. Sed longissimè absum ab illo consilio: quin potius piam & probabilem opinionem vindicandam suscipio à Petri libris: quibus, cum videatur in Speciem, & ex animo conetur confirmare probabilitatem.

rem, & augere reuerentiam, reipsâ labefactat: & quod peius est, ridendam præberet hæreticis, nisi præsentî remedio vindicaremus.

ARTICVLVS PRIMVS.

De statu & progressu pia opinionis.

DE Conceptione immaculatâ Deiparæ acturo aduersus Petri Nodos, aliquid delibandum est de peccato originali quo Augustinus ait *Nihil esse aperius ad dicendum, nec nobis ad intelligendum secretius, nihil ad veritatem aut salutem conducibilius*: Nam vt idem Augustinus, *in causâ duorum hominum, quorum per unum venditi sumus, per alterum redimimur, propria fides Christiana consistit.*

PARAGRAPHVS PRIMVS.

Quæ sit notio peccati generatim, & quis reatus originalis culpa.

Peccati nomen ex Scripturæ vsu multiplex est variâ significatione, tum propriâ, tum metaphoricâ, & nisi diligenter distinguas, ambiguum maximè & periculosum: & sub huius vocabuli latebris suas sæpè insidias hæresis instruxit, quibus frequenter incautos peremit. Metaphoricas acceptiones omitto, quibus quandoque ad peccati causas & effectus, interdum ab obiectum, nonnunquam etiam extenditur ad sacrificia quibus expiatur: quo sensu Sacerdotes dicuntur *peccata populi comedere*, & Apostolus Christum innocentissimum asserit peccatum pro nobis fieri dignatum esse. Si vim nominis citrà Metaphoram expendas, duo præcipuè quæ ad rem nostram faciunt, ex Scripturæ ac Theologorum vsu, peccatum significat, nempe liberum voluntatis actum, quo lex infringitur, atque illum inimicitia cum Deo statum deterrimum, in quem actus peccati auctorem suum præcipitem agit: nec inde emergere potest,

donec reatus eluatur condonatione gratuita, vel condignâ satisfactione resarciatur. Nec dubium apud peritos, & verè Catholicos, quin vterque peccati nominis vsus ad proprietatem pertineat: de actu quidem apertum est ex definitione Augustini ab omnibus receptâ, nempe *Peccatum nihil est aliud, præter dictum, factum, & concupiscitum contra legem Dei æternam.*

Nec minus de statu res est comperta: omnes enim consentiunt actu transacto aliquid eius auctori inhærere, quod verè peccatum sit. Vndè reus & peccator verissimè constituitur, donec resipuerit; & veniâ dicitur peccatum deleri. Nec verò actum, statumque peccati iunctum communi nomine sic diuellas velim, vt res disiunctas, vel omninò diuersas putes. Eandem potius intellige, quæ alio atque alio modo & diuerso ordine sese habeat. A re familiari exemplum capiamus: calefactio & calor qui ab igne prodeunt, eandem diuersis vocabulis qualitate expriment, quæ in ipso transcurso dum sit & paratur, calefactio est; dum hæret corpori, caloris nomen habet. Sic planè peccatum accipe, actio est dum patrat, status aut peccatum habituale est, dum animo reatus veluti labes aut vlcus inhæret.

Iam satis probatum existimo, quod omnes vtrò agnoscunt, hunc statum & reatum peccati huiusmodi nomen propriissimè sortiti ab actu libero, vnde prima origo omnium quæ hoc vocabulo censerì possunt, vt eleganter expressit Augustinus de verâ Religione capite 14. *Vsq; adeo, inquit, peccatum voluntarium est, vt nullo modo sit peccatum, nisi sit voluntarium.* Quod adeo manifestum est, vt nulla Doctorum turba dissentiat. Aue ergo negandum est peccatum committi, aut fatendum est voluntate committi. Is ergo peccati status, si velis citra metaphoram loqui, non ita ab actu libero diuellendus est, quin ipsum vt originem & causam sui habeat, vel potius ipsius vices gerat. Id vero, qui fieri potest, nisi aliquâ ratione liber sit, & voluntarius.

Quamuis autem omnes hanc status actusque cognitionem peccatis, quæ vocant personalia, vtrò ascribant; videntur tamen nonnulli eam negare peccato originali, quasi à priuatis hoc differat, quod nullâ ratione voluntarium sit, nec ab actu libero illius cui imputatur,

& inhæret, manare oporteat. Sed qui hoc discrimen statuunt, originale labem peccati numero eximunt, solumque illi nomen seruant, quod maximè Pelagianis ardebat, atque hoc potissimum argumento urgebant Augustinum, *in paruulis non est delictum, quia sine voluntate, quæ in eis nulla est, esse non potest.* Quid ad hæc Augustinus, & cæteri Patres ac Theologi, post tantum ducem, Catholicæ veritatis assertores? An communem peccati notionem, quæ libero ac voluntario constat, contra publicum generis humani sensum negant, vel in paruulis istâ tabe originali infectis, voluntatem quæ nulla videtur, contra proprium sensum agnoscunt?

Licet vtrunque difficultates & præcipitia urgeant, maluerunt tamen viri Sancti proprio sensui, quam communi obistere. Arque in paruulis tacitam, & occultissimam introspexere voluntatem; ne vnquam peccati actum, & statum à consensu voluntatis diuellerent, vel originale labem è peccatorum numero eximerent. Sed quæ in paruulo & homine mente capto, rationis experte, vel tot sæculis post præuarcationem Adami nato, esse potest ad illud primi hominis crimen vnde manauit, consensus? Vnus quidem peccauit, sed omnium nomine quorum iste parens & caput, præuarcatus est, suo & omnium consensu, quorum voluntates sua illigatas, & in eam veluti transfusas habebat, vi conuentionis, & pacti, quo Deus omnium posteriorum voluntates primi parentis voluntati eâ lege adiunxit, vt eius electio communis futura esset omnibus cum in seruandâ, & transmittendâ iustitiâ, tum in eâ amittendâ peccato, quod vnus admitteret suo, aliorumque nomine, ac subinde illis imputaretur. Peccatum itaque originale si actum requiras, penès Adamum fuit, cum præuarcatus est in præceptum Diuinum suo & filiorum nomine, quorum personam, & causam agebat. Si statû peccati quæras, ad omnes posteros pertinet ex Adami progenie natos & sâctitate quasi hæreditariâ, merito & in poenâ communis inobedientiæ spoliatos.

Satis de originali labe ad rem nostram dictum sit, cuius sanior & sincerior apud peritos recepta notio obscurissimam difficultatem illustrabit. Hinc enim constat, duo ad huiusmodi peccati labem contrahendam omnino necessaria: primo quidem tacitam propriâ cuiusque vo-

luntaris, cum istâ capitis seu Adami voluntate consensu-
nem, ut illi possit prævaricatio imputari; deinde priua-
tionem ad tempus, vel vno saltem instanti ex illâ con-
spiratione tacitâ deriuatam iustitiæ originalis transfun-
dendæ, nisi peccato fuisset intercepta. Hinc euidentissi-
mum est Angelos huius peccati immunes esse: quia nec
Adamo ut capiti adhæserunt, nec ab illo nati, vel iusti-
tiæ iacturam aut priuationem vllò instanti passi sunt.
Hinc etiam apertius patet Christum minus peccato ob-
noxium: quia nec voluntate nec origine Adamo adhæ-
sit, & primo instanti sanctitatem innatam habuit, iuxta
illud: *Quod ex se nascetur sanctum, vocabitur filium Dei.*

PARAGRAPHVS SECVNDVS.

*Duplex questionis pars, & responsio ad primam,
quid fieri potuerit?*

AD rem nostram propius accedamus. Quid de Dei-
parâ censendum? Disputationem per se obscurissi-
mam hac distinctionis luce illustrabo; quid fieri potue-
rit? Quid re ipsâ factum sit? Si de iure Omnipotentia
quæras, nullam existimo apud cordatos difficultatem es-
se ad quæstionem propositam. Quis dubitet Deo, quod
libuerit, licuisse? Potuit sanè matrem communi malo
eximere, potuit obnoxiam facere. Neque illi in vtram-
que partem, vel ius omnipotentia, vel consilium sapien-
tiæ defuit. Nonne potuit matris voluntatem ab illâ com-
muni conspiratione, vel eius originem ab Adamo paren-
te seiungere, & suis ipse manibus illi corpus efformare,
& mentem implere cælestibus donis? Illi vero sic institu-
tæ, quid commune fuisset cum peccato originali, in eos
tantum deriuando, qui voluntate & origine corrupto ge-
neris humani principio adhæserint?

Fortè immunem peccato dices fieri potuisse, & ne-
gabis obnoxiam. Immeritò sanè: & dum de Matre bene-
mereri te putas, malè consulis Filij omnipotentia. Au-
dio illum iisdem tecum agentem verbis, quibus paterfa-
miliæ querulos vineæ operarios castigabat: *An non mihi
liet, quod volo facere? An tuis ratiunculis, veluti No-*

dis adamantinis aut fato Stoico me vincendum putas, & argumentis à congruo, & conuenienti reperitis, legem & inenitabilem necessitatem mihi iniunctum iri existimas? Scilicet ad tua commenta, rationes meas, & vim meæ potentiaë exigam, & componam. Quid tandem Deum ad eximendam originali debito & à lege communi parentem adigere potuit? Scio maximam esse Virgini cum Filio à maternitate cognationem, quæ Diuinitatis (vt verbis Diui Thomæ utar) fines attingit: sed quis neget ex vnione hypostaticâ longè maximam esse necessitudinem cum Deo, naturæ illius, quæ in vnum cum Verbo æterno, aut quâlibet aliâ personâ diuinâ suppositum coalesceret? Etsi verò sanioris & communis sententiæ Theologi, naturam, dum ad eam dignitatem euehitur, vel in eo gradu seruatur, à peccato vindicent; nullustamen quod sciam, hætenus negauit, non repugnare, illam naturam, in se constitutam, vel antè huiusmodi Deificationem peccasse, vel solutâ vnione, permitti vt in peccatum labatur. Minor sanè est, vt dicebam, ex maternitate, quam ex vnione hypostaticâ cum Verbo æterno cognatio, ac proindè impar à peccato distantia. Igitur si naturam ad tantam dignitatem assumptam nihil vetat, ante aut post assumptionem sibi relictam, alicuius noxæ consciam esse, aut permitti, cur idem ius in Matrem, omnipotentiaë Dei neget?

Sed fortè dices cum Granado & Ruis (quibus diuersam à communi Theologorum viam inire placuit) Deum non solum quicquam præter æquitatem non posse admittere: sed etiam conuenientioribus astringi, quod vrgent exemplo hominis, & Angeli; quibus ea lex à Deo præscripta est (quæ citra culpam aliquam, aut certè defectum nequeat prætermitti:) *amulanda esse charismata meliora*: & vbi locus sit maioris boni, vitio verti electionem minoris. Quid ni ea lex, apud Deum valeat? ac proinde conuenientiora, nihilo minus eum, quam nos oportere sectari? Sed Dei iura plane ignorat, qui eum conuenientioribus, perinde ac nos astringit: Nisi fortè conuenientius velis quidquid ad libitum elegerit.

Aliam verò Dei & nostri rationem esse, triplex quod Deum inter & nos discriminè intercedit, apertè demonstrat. Eligenda sunt nobis conuenientiora vt Deo ita

PARAGRAPHVS TERTIVS.

Responsio ad alteram questionis partem , quid re ipsâ factum sit ? Catharini opinio , Scoti sententia antefertur.

Soluta priore quæstionis parte , ad alteram accedamus. Posse Deum quod libuerit , conuenimus omnes nullo quod sciam excepto : quid vero contigerit saluâ decretorum reuerentiâ inquiramus. Huius controuersie sensus & status , est veluti quædam appendix celeberrimæ illius difficultatis , quid futurum fuisset , eodem qui est rerum , & decretorum ordine constituto , hoc solum excepto , quod Adam non peccasset ; venissetne ad homines filius Dei factus homo ? Negat Diuus Thomas : assertit Scotus : dissensus causa est ex principiis , quæ sibi quisque illorum assumpsit , quibus suam adstruxere Theologiam. Diuus Thomas Verbum Dei scriptum & traditum sibi in regulam totius doctrinæ constituit : indeque sibi visus est colligere certissime , Incarnationis Verbi & redemptionis hominum , ad eam arctam cognationem esse sancendam , vt si peccatum & redemptionis remedium auferas , nulla sit futura Incarnatio. Et hoc habet immobilius cælo terræque principium , eorum quæ à merâ Dei voluntate pendent , & illas suæ sapientiæ regulâ quod libuerit licet , nihil comperti posse , nos habere ex solis conuenientiis , quæ apud Deum , minus quam apud nos coniecturæ vim habent : Atqui Deo liberum est hominis naturam induere : item Scriptura ubique indiuiduam Incarnationis & redemptionis societatem facit , eandem etiam apud Patres obseruauit rerum cognationem Sanctus Thomas : quare illi religioni fuit eam seiungere , & quæ Dei Verbum coniunxit , arcana , separare.

At contra Scotus ex Patribus antiquis nullum nisi forte ambigüe loquentem , nec ex Recentioribus suo sæculo ullum sequutus , vult quidem Verbum passibile corpus induisse peccati & redemptionis causâ ; sed Incarnationem decretam , nullâ habitâ ratione culpæ permittendæ ,

aut eluenda: Imò ante vllum peccatum prauisum aut permissum etiam originale, incarnandum Verbum, etiamsi homo ab innocentia non excessisset, illi restituentus. Neque Scoto defunt argumenta verisimilia à conuenientiis: non videri speciem veri habere Dei præstantissimum, totius vniuersi summum decus, mysteriorum profundissimum, à quo totius naturæ & gratiæ penderet æconomia, à peccato vnius hominis, id est, à casu pendere, ordine omnino præpostero, vt summa imis inserviant, vt finis ad media referatur, & vt homo Deus pufilli gregis, id est, paucorum hominum causâ sit, viuât, & moriatur.

Non negat quidem illorum gratiâ mortuum: sed non potest conquiere, illorum causâ solum naturam humanam induisse. Et ne videatur destitui Scripturæ testimoniis, aduocat ad suæ opinionis patrociniū loca ex Proverbiis quibus prædicatur sapientiæ increatæ generatio æterna, & eius in res omnes summum Imperium: eaque omnia interpretatur de increatâ sapientiâ, quam vult prædestinatam ante prauisum peccatum, ad vniuersi ornamentum, ad Dei creantis, non miserantis gloriam, ad sanctificationem Angelorum. Atque his decretis, quæ omnem casum hominis longe antecesserunt, adiunxit redemptionis opus, veluti quamdam accessiōnem.

Licet hæc omnia non essent ignota Sancto Thomæ, & viderentur etiam magnifica, & summè placerent humanæ menti, non tamen iis ita capi potuit S. Doctor, vt à suâ tritâ viâ, & à constitutâ semel regulâ recederet. Non putauit ad se pertinere Dei decreta suo sensu ordinare, sed venerari, vt in Scripturâ & libris Patrum extabant, ibi est legere benignissimum Pastorem relictis nonaginta nouem ouibus, secessisse causâ centesimæ, quæ aberrauerat, & suis humeris in ouile deportasse. Et licet videretur fraudare Verbum incarnatum gloriâ vitæ æternæ tot Angelis comparatæ, & vniuersum summo ornamento, si hominis peccatoris redemptio vnus fuit tantæ molitionis fructus, & finis; nunquam tamen potuit his rationum momentis de sententia Scripturæ vt Patribus magis consentanea deduci: neque putauit quicquam Diuinæ Maiestati & gloriæ hinc deperire: tum enim
maximè

maximè splendet cum licet agnoscere, & verbis Prophe-
tæ exclamare: *Dixi domino Deus meus es tu quoniam bono-
rum meorum non eges* cum de rebus quibuscumque crea-
tis liberrime statuit, vt constet nulli bono creato addi-
ctum, vel obnoxium. Hanc verò summam laudem nun-
quam plenius consecutus est, quàm cum opus omnium
maximum, nempe Incarnationem, visus est vni homi-
num redemptioni addicere. Quasi neque sui, quia nihil
opus habet: neque ipsius Mysterij præstantiæ, quia nihil
ad eius felicitatem confert: Sed solius hominis redimen-
di causâ, quia sic placitum est & liberum, decreuerit per-
agendam.]

Huius grauissimæ Disputationis veluti appendix &
corollarium est altera de Conceptione. Ex principiis
etenim constitutis de Incarnationis decreto, vel Re-
demptioni alligato, vel ab illâ absoluto & libero, quasi
necessariâ consecutione profluunt diuersæ sententiæ.
Idèd Suares inter recentes Theologos perspicacissimus,
cum præ cæteris è Societate promior sit in sententias
D. Thomæ, in hac de decreto Incarnationis, Redem-
ptioni adæquato, vt sic loquar, vel superiori, Scoro as-
sentitur: Ratus eam sententiam, quæ Verbo incarnato
præter redemptionis opus adscribit gratiam Angelorum,
augere Filii gloriam, & Matris Conceptioni immacula-
tæ fauere. Et reuera ita est: Nam si Verbi incarnati meri-
ta ad vnâ Redemptionem nolis arctare cum D. Augu-
stino, & D. Thoma, sed velis latissime parere, ad Ange-
lorum omnium, ad status innocentia gratiam com-
parandam, tum maxime conuenit vberrimam illam
gratiam in matrem deriuare: Non quæ peccatum eluar,
vel illius contrahendi debitum occupet, sed quæ inno-
centiam primi hominis retineat, aut potius superet:
hoc enim Mysterio Incarnationis semel constituto vt
principio totius gratiæ cuiuscumque sit generis vniuer-
salissimo, tunc valent illa Argumenta à Matris dignitate
suprà primorum parentum, supra Angelorum sortem
repetita: nihil Matri negandum, eorum quæ vili crea-
turarum concessa sint.

Hinc subit laudare consilium Catharini, qui non Mi-
nus Scoti quam Diui Thomæ sepositâ sententiâ, nouam
tentauit, quam modo insinuauimus, sine dubio magis

consentaneam ad Scoti principia, cum de Deiparæ agitur Conceptione, nullam prorsus mentionem esse faciendam, non solum peccati iam contracti, sed nec etiam debiti illud contrahendi. Nam cum ex Scoto & ex Suare omnis Angelorum, & hominum quocumque statu sint, ab humanitate Verbi, gratia profluat duplici veluti aquæductu, quorum primus gratiam innocentiae à peccato, aut saltem debito peccati largissime effundat, à quoniam eorum canali vis Deiparam suam haurire: an ab innocentiae, vel à redemptionis aquæductu? dices forte à neutro sed quasi à medio inter extremos meatu, Sed ad quid tot canales, cum vnus, aut ad summum duo sufficiant? Et cum aliunde Deiparam velis non minus gratiâ & innocentia, quam dignitate supremas Angelorum mentes superare; cur illi canalem occludis innocentiae, nec pateris redemptionis aquæductum illi influere, sed tertium singularem aperis: Quod, si nolis reatu originalis peccati imputari, iam astringi, saltem credas imputandum occupari? Sed præterquamquod tres aquæductus immeritò constituis, cum facilius duo possint probari; certè non ita consulis sicuti Catharinus, Deiparæ honori & innocentiae, quod evidentissimè demonstro constitutâ peccati originalis notione, quâ distinximus actum statumque. Tu à statu peccati vindicas Deiparam, sed actum imputas illi, qui maximè probro esse possit.

Peccatum originale duo habet, nempe primi hominis, & totius generis humani in parentibus, tum origine tum assensu collecti, conspirationem in præuaricationem legis. Hæc est prima peccati, & magis pudenda portio; unde altera nempe labes peccati, seu iustitiæ priuatio originem suam & totam infamiam haurit. Nam cur, hæc gratiæ iactura dedecori est, & vitio nobis vertitur? Nempe quia ex præuaricatione primi hominis, & ex proprio in illam cuiusque consensu prouenit. Hæc itaque vel sola, vel certè præcipua infamia est, quam primi immaculatæ Conceptionis patroni, alique plures, qui debito subiiciunt Deiparam, & iniustam volunt, & secutam inde labem tollunt. Sed quid tandem hac sua opinione promouere? Nescio an satius fuisset hanc causam deferere, quam adeo infelicitè propugnare. Coniura-

tionis participem faciunt, in Adam peccasse, seu peccatum Adæ illi omnino imputandum censent, reatum incurrendum præuagationis admittunt, statu tantum & priuatione iustitiæ eximunt: hoc est, vt iam diximus, quod magis dedecori est impingunt. An non poterat Dæmon obiicere, *Tu quoque ex illis eras*, qui præuagationi assenserunt, vnde hæc nata labes, & meum in genus humanum ius & imperium. Quare cum Catharino à debito exoluenda est, si velimus ita Innocentiæ consultum, vt Angelorum etiam superet puritatem.

Cum huius sententiæ Scoti progressum attendo, videtur mihi habere quid simile cum arte pingendi. Qui tabellas primi tentarunt, adeo rudi manu & pingui artificio deformabant, vt prototypum non liceret ex lineamentis agnoscere, sed ex ascripto nomine, *Hic lepus, hic canis est*. Sed ex huiusmodi inchoamentis, in eam solertiam, & peritiam euasit pingendi scientia, vt penè naturam assecuta sit. Sic planè Scotistarum opinionis de Conceptione, rudi manu posita lineamenta, propemodum nihil ab antiqua opinione aberant, in Adamo mortuam Virginem, eiusque factionis participem fatebantur, & solam ab illa coniurationis notam tollebant. Ac vbi hæc initia summo applausu excepta sunt, tum Scoti discipulis excussus est magistri timor: animus cum felicitate creuit, & vltima manus & perfectio addita est opinioni, Authore Catharino, qui non solum à statu, sed ab actu peccati originalis omnino semouet, nec patitur dici etiam in Adamo mortuam, nec peccasse. Opinio eousque est deducenda, alias vix operæ præmium esset illam attigisse. Scoti tamen prudentia magis quam sententia ipsa laudanda est. Hominum sensus prius tentandus fuit, & huic opinioni assuefaciendus; atque vbi à statu peccati immunem probassent, tum ab aliis ab actu vindicandam relinquere.

Mira est sanè eius modestia 3. sent. dist. 3. q. 1. vbi præmissa triplici distinctione concludit, *Quid autem horum trium, qua ostensa sunt esse possibilis, factum sit, Deus nouit, si auctoritati Ecclesiæ, aut scriptura non repugnet, videatur probabile, quod est excellentissus Maria attribueret*. Dum hæc verba legis, iurares modestiam ista dictasse ita suspensa vt dubium relinquat, an respondeat ad quæ

stionem, quid fieri potuerit, & quid re ipsa factum sit. Sed præter has animaduersiones, ex his verbis paucissimis, nec tribus lineis integris, quasi in modico fonte videor mihi videre latum flumen largissimè exundans. Certè dum hæc scriberet, si Prophetiæ gratiâ fuisset donatus, vidisset se multorum voluminum paucis verbis materiam suppeditasse. Sed hanc opinionem quasi catulum vrsi informem perfecere eius discipuli, & vnus potest dici absoluisse Catharinus; quamuis non bene audiat apud Bellarminum, Suarem & Vasquem, qui progressum putant ultra limites à Patribus præscriptos. Sed reuera, quæ ipse contulit ad hanc sententiam exornandam, apertè consequuntur ex principiis receptis apud omnes immaculatæ Conceptionis patronos; Deiparæ scilicet puritatem primi hominis, & Angelorum innocentiam superare: Ergo non solùm à peccato, sed etiam à debito eximenda est.

ARTICVLVS SECVNDVS.

*Petrus de Alua nocere plurimum pie
opinionem cuius causâ scripsit.*

E Libris quos breui tempore edidisti multos, Petre magnificis titulis, Nodos licuit tantum videre, & transcursum hinc, inde, aliquid delibare; ex quibus facillè est coniicere, te eo animo & consilio scripsisse, vt Deiparam inter, & Angelicum Præceptorem inimicitias concitares, quas mundi exordio post lapsum primi hominis, Deus monuit serpentem, se inter ipsum & mulierem posuisse. Adeo enim cæcus, & iniquus es, vt non putes saluo Deiparæ honore, stare posse D. Thomæ doctrinam: Ideo libris ipsius atrocissimum bellum indixisti: supposititios contendis esse, & eorum qui nomine D. Thomæ circumferuntur, ne decimâ quidem parte legitimos esse eius foetus. Testimonia vero quibus à Christo Deiparâ, à Summis Pontificibus probata sunt, prodidisse vis omnia à Dominicanis, ab ipsis conficta, falsata, eo tantum nomine, vt probabilitati pie opinionis de Conceptione totis viribus intercederent, & obsisterent.

• Mira sanè sunt quæ scribis, maiora, quæ moliris obtentu pietatis: Nam si exemplo Diui Apostoli velimus vno verbo complecti quæ nosti, poteris gloriari te nihil scire, nisi Virginem, & hanc Conceptionis immaculatæ. Laudandus sanè zelus si prudentiâ, & charitate condiretur. Sed quis credat ea sola controuersia, aut definitione, cuius causâ tot, & tanta scribis, summam religionis contineri? Et si concederemus rem ita se habere, alio sanè scriptio- nis, alio argumentorum genere tibi erat prosequenda, quam quod hætenus vsurpasti; adeo inuidiosum, & ab omni veracitate, & ab eo quod profiteris nomine alienum; vt causam sanè optimam videaris euertere, sicut paucis euincam; primò præiudiciis, deinde tuorum No- dorum solutione.

PARAGRAPHVS. PRIMVS.

Præiudicia causa ab Authoris stylo, & consilio.

EXPECTABAMVS Petre, te ex nouo orbe depor- taturum ad nos aurum obrizum, non aurichalcum: & ex Limesi Prouinciâ cuius te, filium gloriaris, & in ea D. Francisco nomen dedisse; ex nouâ, & recenti in his regionibus instituta Ecclesia, te Christi & Francisci spiri- tum te pescentem apud nos, & senescentem instauratu- rum. Sed expectationem omnium de te conceptam fe- cellisti: nihil dicam de titulis quos assumis, qui nihil mi- nus respiciunt quam Francisci discipulum. Quid enim conuenientius nomine, & professione Minoris, quam ubique humilitatis significatio, & sensus intimus? Ob- stupui aliquando apud me reputans quod de se referebat encenariato (vt Augustini verbo utar) D. Franciscus homi- num humillimus: Namque fatebatur se veste noua & ele- gâti (qualis potest confici ex panno interpolato, qui apud vos in vsu est;) non posse indutum videre, quin aliquo vanæ gloriæ sensu sollicitaretur, & ideo abiiciebat, & de- ritissimas ambiebat. Videreris sanè Petre, oblitus aut tuæ infirmitatis, aut exempli tui parentis. Ille vix vestem, si quid haberet nitidi, defererebat à vanitate intentatus: & tu tot titulis te ornas à Paterna, & à Materna, ni fallor no-
F ii.

bili stirpe *Petrus de Alua*, & *de Astorga*; ab officiis quibus defunctus es; neque times iactantiam & vanam gloriam. Istum morem diuersa assumendi nomina in seculari Hispano excusarem; sed in Cœnobitâ, in Minoritâ, in Conceptionis immaculatæ vindice vix ferre possum. Forte imitari voluisti D. Ludouicum à Crespi & Borgia, cui librum tuum consecrasti, ne videreris illi magis nobilitate, quam zelo causæ communis decedere.

Sed leuis & fere nulla est culpa hæc, præ altera quam subiticio. Non est dubium (& hoc etiam à nonnullis fide dignis accepi) te infinitas propemodum expensas fecisse in peragrandâ Europæ maximâ parte, in excutiendis Bibliothecis, & manuscriptis opera Amanuensium exscribendis, quibus probas veluti actis in foro iuridice prolatis, quæ D. Thomæ nomine edita sunt volumina, vel quæ euulgata sunt de eius doctrina à Christo, & cætera testimonia, esse commentitia; vel in edendis tuis libris optimo caractere, chartâ nitidâ, & eleganti, opus fuisse in his, aliisque expensis gaza Regia, quæ non aliunde, quam ex nouo orbe expectari poterat. Quæ vero ratione hæc opulentia conueniat cum regulâ quam profiteris ex S. Francisco, cui vim legis diuinæ asseris, quæ paupertatem altissimam sancit, nec vnus oboli contactum, vel minimum ius sibi permittit in res etiam vsu consumptibiles. Sed hæc omnia loco sacrificij sunt, dummodo seruiant traducendis cum suo Præceptore Dominicanis.

Hæc minutiora sunt, aut nimium priuata. His duobus præiudiciis tertium addam paulo grauius, aut quod certe magis ad controuersiam faciat, & liberius sit iudicium, quam de prioribus præiudiciis, quæ nolim quidquam mea sententia Petri famæ nocere. Eum qui de rebus diuinis tractat, conuenit maximam suæ famæ, grauitatis, & veritatis curam habere; ne mysteriis quæ alios docet fidem abroget, si contingat illum nugacem, mendacem esse, & absurda proferre. Ea tibi Petre de Conceptione immaculatâ scripturo fuerat profecto cautio adhibenda; sed longè abfuiisti à tam sanâ cogitatione, & adeo absurda (quorum aliquot iam attigimus) scripsisti, vt nullus sit, qui velit aut possit tibi fidem habere: adeo tibi ipsi abrogasti libro illo quem inscribis *Natura prodigium gratia porrentum*, sed verius dixisses mendaciorum & nuga-

rum. Videris nomine noui orbis, nostro vicem voluisse reponere: quia sicut hinc, eo deportata est Sanctissima Trinitatis, & Diuinæ prædestinationis fides, & prædicatio; ita inde nouam ad nos Triadem adduxisti, eamque Francisco, Iesu, & Maria, componis, in quâ sicut neque in æternâ, nihil est prius aut posterius. Quam fidem à te dictorum es facturus apud eos, qui meminerunt te Sancti Francisci Regulæ asseruisse vim legis diuinæ, & ad perfectam eiusdem Diui cum Christo similitudinem, numerasse horas, quibus stigmata passus est, vt illas guttis sanguinis à Christo in mundi prætium fuis, has vero lacris guttis, quas ex matre suxerat prorsus æquares: & ne Franciscus in Ægyptum proficiscens, stipatus vndecim fratribus superasset comitarum Christi in Ægyptum fugientem cum Matre & Iosepho, adiunxisti seruos, & ancillas, bouem & asinos. Licet vero eo libro beneuolentiam Dominicanorum videaris, captare, ascito in parzem meritorum D. Francisci Dominico, dum pagina 118. asseris quotquot ab anno 1216. nati sunt, vel ad finem mundi vsquam nascituri sunt electi debere acceptam referre suam vitam temporariam & salutem æternam Deiparæ, Francisco, & Dominico: hanc tamen gloriam nomine Patris nostri abdicamus, & soli Christo eximiam seruamus.

Præter hoc tertium à scriptis superioribus, isti præiudiciū quartum addidisti, quod propius ad hanc controuersiam pertinet, & reperitum à causâ, quæ te in D. Thomam accendit, & illi simillima quæ Theophilum nobis implacabilem efficit. Vterque à Sacra Congregatione damnati, putastis vlciscendam censuram conuictis Dominicanorum: quod ita strenuè vterque fecistis, vt dubium sit, vter vtrum vincat. Hoc solum videmini differre, quod Theophilus vel præ senio, vel præ inopiâ, vel quia sui iuris non erat, vel non licuit per Prælatos tot Regionibus, tot Bibliothecas lustrare, tot curare, aut eruere transcripta, quæ in nos citat, & iurat apud se habere Alua; nihilque pensi habet Theophilus probare quæ in nos scribit, sed fidem exigit, quamuis astruat nullam. Alua vero nec labori pepercit, nec pecuniis, quas oportuit habere copiosissimas, vt innumera acta compararet, quibus veluti tabulis nos omnes plagia-

rios, interpolatores, & Diuorum mastigas esse totis viribus probare molitur.

Sed dum nimium his armis fidit, quibus vult Ecclesiam, & Deiparam de suis aduersariis victoriam debere, videtur causam omnino prodidisse, atque hoc est quintum, quo vno magis quam reliquis grauatur præiudiciis. A trecentis annis munita est, & quotidie roboratur causa Conceptionis immaculatæ variis argumentorum generibus, quæ primum è Scriptura, deinde à testimoniis Patrum, tertio à ratione, vitimo ab vsu Ecclesiæ antiquo petuntur: sed illa Petrus non purat rem conficere, nec satis habere momenti ad definitionem controuersię, quam prosequitur & vrget: ideo censet aliud quærendum esse præsidium validius, & fundamentum cui hæc definitio astruatur. Sed reuerâ, Petre! de te nemo dixerit, etsi maximè id ambias, *si Pergama dextrâ defendi possent, dextrâ hæc defensa fuissent.* Duplex causæ vulnus infligis, subtrahis illi validiora argumenta, & eorum loco reponis futilissima. Prorsus dissentis ab eo quo cum fœdus percussisti, Dominus Ludouicus à Crespi, rem definiri à Summo Pontifice contendit, non nouâ reuelatione (de quâ nihil apud ipsum legi:) sed Sacræ Scripturæ locis solo sensu mystico explicatis, qui non desunt in hac controuersia: vel si id definitionis genus nuter, aliud apponit fundamentum, nempe consuetudinem, & traditionem Ecclesiasticam, etiam vt distinguitur à Diuina. Tu vero hæc probationum genera parum aut nihil ad rem facere censes, & definitionem vis perendam esse à tuis Nodis. Expendamus an sint definitioni propiores, quam argumenta quæ deseruisti.

PARAGRAPHVS SECVNDVS.

Solutio Nodorum Petri.

TOTVM causæ præsidium locat Petrus in vnico argumento, quod per quindecim Nodos perpetuè versat, cui me responsurum dixi eodem consilio quo D. Thomas soluit argumenta quibus interdum Theologi veritatem sola reuelatione notam suscipiunt demon-

strandam, cum Religionis contemptu, quem vt amoueant S. Doctor, monstrat hæc argumenta esse infirma probandæ veritati cui assentimur sola diuina autoritate, non humanâ ratione inducti. Ita Nodos Petri dissoluendos iudicamus; Ne quis credat huiusmodi nugas esse fundamenta opinionis piæ, quasi meliora desint quibus muniatur. Totus eius liber hoc vno syllogismo continetur. Non potest negari immunitas conceptui ventris, seu Deiparæ in utero D. Annæ Matris conceptæ, quæ asseritur conceptui mentis, seu doctrinæ à D. Thomâ traditæ: sed hanc æstimant Dominicani ab omni errore immunem, quam puritatem negant conceptui ventris; Ergo potius est huic quam illi conceptui immunitas vindicanda.

Vix dici potest quot vitiiis laborer hæc argumentatio, quam tamen per summam cæcitatem, & incredibilem in suas affectum cogitationes, censet ineluctabilem, & nos, ac Summum Pontificem ita astringere, vt credat ab illo nos expedire & extricare non posse, nec Summum Pontificem vltimam rei definitionem negare, aut differre. Vnde non solum nostri, sed etiam ipsius causâ repellenda est hominis audacia & temeritas. Possumus imprimis omnes hos Nodos vnâ responsione scindere, quod solâ comparatione nitantur: eam vero probe institui ad legitimas consecutiones negat Aristoteles, nisi inter res eiusdem generis proximi, & subordinatas sub vnâ communi ratione & regulâ. Hinc fit vitiosas esse has consecutiones, qui plus habet, & potest, necesse est eum habere & posse quod minus sit: Atqui iustus potest vitare omne mortale peccatum quod maius est quam venialia: Ergo poterit immunis esse ab omnibus venialibus. Eadem forma: Atqui est quid maius ratiocinari, quam volare, & primum competit homini: Ergo & alterum. Et ad rem nostram propius sic posset infinita concludere: Deiparæ non est negandum, quod vlli creaturæ vnquam concessum est, si ad perfectionem pertineat. Atqui Eux collatum est corpus manu Dei formatum, quod quidem purius est, quam fieri ex masculo & fæminâ: Atqui Angelis primo instanti collata est rerum omnium cumulata scientia, & secundo, aut tertio felicitas consummata: Ergo nihil horum, aut his simile negandum est Deiparæ.

Certus sum te has omnes consecutiones negaturum, quod sint à rebus diuersissimi generis & ordinis : quæ vero conuentio, inter corporeum ventris, & spiritualementis conceptum? Fortè dices ab illis præscindi communem conceptus rationem vniuocam, nihilo minus quam entis à Deo & à Creaturâ: At si hoc exemplo nos vrgeas deseres vnicum tuæ causæ præsidium, nempe Argumentum ad hominem, quo nos opprimi putas. Volumus esse similem rationem ab utroque Conceptu mentis & ventris præcisam, qualis est entis ad Deum, & ad creaturam communis: sed scis nos negare præcisam: & minus concedemus genus esse proximum, quod Aristoteles requirit ad comparisonem probam, & legitimas consecutiones: diuersos esse hos conceptus & infinitis propemodum parasangis distare non negabis.

Vnum, aut alterum discrimen attingam. In primis immane distat conceptus, qui fit in nobis sine nobis, idque vitæ primo instanti, ab eo qui fit in nobis & à nobis, idque adultæ, & prouectâ ætate. Nihil è primo imputatur nobis, fit lege communi, ad illud passiuè nos habemus: iste vero à nostrâ industriâ est, nobisque agentibus. Frustra comparares res adeo disparatas: Et si ex huiusmodi comparisonem contendas aliquid elicere, assentias oportet his qui quodlibet ex quolibet fieri asserebant. Si vellemus contra te vrgerè hanc conceptuum comparisonem, bonè Deus, in quæ te absurda compelleremus! Conceptus mentis D. Thomæ seu eius scientia (quam vis à Dominicanis asseri, ab errore immunem, ut inuidiam illis confles, quasi D. Thomæ concedant quod Deiparæ negant:) ex illorum sententiâ non est hanc immunitatem ab errore consecuta, nisi post longas lucubrationes, & multas ad Deum preces, nisi adultæ ætate, & postremis vitæ annis, nisi longam ignorantiam passus, & post plures retractationes: neque enim illum eximimus ab illâ regulâ quam statuit Seneca: *Nemo ad innocentiam peruenit nisi peccando, neque ad euidentiâ rerum nisi per caliginem.* Visne his similia, aut putas, nos de Conceptu ventris sentire? Absit ut illa cogitemus: Ergo infinito interuallo vnum ab altero sejungimus. Cur ergo inuidiose & nos illos æquare, vel conceptum mentis conceptui ventris nos anteponere calumniaris.

Hâc vñâ responsione solutis aut rescissis omnibus tuis Nodis, frustra laborarem illis iterum enodandis, aut secandis: sed vt demonstrum te aranearum telas texuisse, potius quam Nodos indissolubiles, primam responsionem hâc Argumentatione instauro. Vel tuis Nodis putas implicare omnes, vel solos Dominicanos? si hoc secundum mediteris tantum, aut effeceris, non promouisti causam, sed corrupisti: alia argumenta submouisti, quibus fulciebatur vt tuo vnico niteretur. At illud, si valeat tantum in Thomistas, quos ad hominem premis, dum nos vis lucrari & piæ causæ adiungere, Christianos reliquos perdidisti. Quâ enim ratione illos ad bonam mentem reuocabis, quos ab eâ retraxisti, aliis Argumentis (quibus persuaderi poterant) reiectis aut debilitatis. Quid enim morantur, aut curant tuam illam comparisonem conceptuum, quam perpetuo versas, vel illam corruptelam D. Thomæ operum, quam vrget multo labore, & maiore pecuniarum vi, tot manuscriptis, tot transumptis, tot editionibus, quibus examinandis vix decem Parlamenta sufficerent per plures annos. Sed ne his tricis implicer, & tui Nodi potius abrumpantur, quam sigillatim soluantur: iterum & tertio conueniam te.

Putasne conceptui ventris etiam primo vitæ instanti nos negare, quod mentis conceptui asserimus maturâ & vltimâ ætate? Malè certè de nobis æstimas, & sensus nostros penitus ignoras, si ita senseris. Sed quæcumque nobis de vtroque conceptu totis quindecim Nodis obiicis, & millies repetis, duabus dissertationibus proximè superioribus occupauimus. Si credas nos ita desipere, vt certam fide teneamus immunitatem ab errore D. Thomæ, & ex eâdem fide falsam conceptus ventris immunitatem à peccato, toto cælo plane aberras. Nos contra asserimus, nihil eorum hætenus ad fidem, sed ad piam probabilitatem pertinere: & adeo alieni sumus ab illâ cogitatione quâ nos putas imbutos, quasi nobis sit persuasum, & id aliis velimus, certa esse ex fide quæcumque Doctrina D. Thomæ probata à Christo, & à Summis Pontificibus continet; vt si vellet in gratiam D. Thomæ id Pontifex ex Cathedrâ statuere, primi omnium nos eius consilio intercederemus. Vt tuam accusa-

tionem validè depellamus cogimur fingere quæ nunquam accidere, nec possunt. Iterum dico si meditaretur Summus Pontifex definitionem de Conceptione immaculatâ sancientiâ, taceremus, nisi iuberet nos quæ sentimus loqui: si proferret sententiam, primi omnium pareremus. At si veniret illi in mentem (quod nefas est putare) idem de D. Thomæ doctrinâ statuere, quæcumque statuit fide credenda esse, nos ipsi reclamaremus: quia nostra non quærimus, sed quæ Iesu Christi, neque priuatum honorem Familiæ ambimus cum dedecore Ecclesiæ.

Scimus quæ sit penes Summos Pontifices, & Concilia Oecumenica definiendi potestas: nec credimus pertinere & porrigi ad Philosophica, aut etiam Theologica, ex reuelatis principiis probabiliter deducta, ut ea quasi fide certa, facere possint. Suis cohibetur finibus à Deo constitutis hæc potestas, quos nunquam prætergressuri sunt ij quibus credita est. Hic pene eadem est diuinitas, quæ de potestate Ecclesiasticâ in res temporarias, in Imperia, inter Politicos, Theologos, & juris Canonici consultos summa animorum consensione etiamnum, agitata ac pene desperata, Iuris Canonici Doctores plurimi, plenam in totum orbem Summis Pontificibus dant potestatem, Theologi aliquot concedunt indirectam ad fidem propagandam, & propugnandam, alii vero nullam. Totidem de rebus Physicis & Theologicis etiam quæ principis reuelatis probabiliter tantum cōnectuntur, statuendi facultate Ecclesiasticâ & Pontificiâ possunt esse sententiæ, perinde duæ extremæ, quæ vel nullum ius, vel plenum in hæc Physica, aut Theologica probabiliter deducta admittant. Sed tertia & media summè mihi placet: eamque sum secutus dissertatione superiori. Illi etiamnum adhæreo, & inde assumo solutionem ad omnia Petri Argumenta, quæ eodem vitio laborant.

Perinde agit in nos quasi vellemus, quæ ait, aut negat D. Thomas certa esse ex fide. Hæc est Petri calumnia, non nostra sententia. Id vnum contendimus Diui Thomæ scripta à Christo, & à Summis Pontificibus confirmata, non solum quod nihil habeant dissentiens à Fidei Mysteriis, sed etiam quod sit summè consensanea.

illis explicandis, & defendendis.

Sed dicēs, si ita de conceptu mentis & de scientiâ D. Thomæ sentis, cur de conceptu ventris, seu de Deiparæ Conceptione negas? Vnde habes nos negare? Certe vltimâ dissertatione statuimus pium & probabile esse, Deiparæ Conceptionem non solum à peccato, sed etiam à debito immunem: quâ ergo te dissentimus? Nullâ quod sciam, nisi tu velis contentiosum funem ducere, & de verbis disceptare: vel obtendas rem esse de fide certam, sicut videris velle euincere tuâ illâ comparatione, quam ita confirmare potes. Major & certior est immunitas Conceptus ventris à peccato, quam conceptus mentis ab errore, sed hanc statuis & asseris D. Thomæ probabiliter: Ergo illa debet nobis esse certa ex fide. Non dubito quin hoc Argumentum credas indissolubile, quod controuersiam deducat proximè ad certam definitionem: quasi inter probabilia non dentur distincti gradus, quorum vnus maior sit altero intra idem probabilitatis genus: quasi comparatio rerum diuersi generis quæ vix idonea est ad consecutionem probabilem, demonstrationem pariat: quasi ratio ex conuenientia sit Dei testimonium, aut illi æquiparanda, vt indubitatam fidem diuinam faciat.

Nec minus fidis Decreto Concilij Tridentini, quo Patres, sancitâ peccati originalis in omnes Adæ filios propagatione, addunt non esse suæ intentionis, Deiparam eo Decreto includere: ergo illam positiuè eximunt, ac proinde non minus certa est ista exceptio Deiparæ à peccato, quam ipsius in omnes propagatio, cum eodem tenore verborum vtrumque sanciat. Addis his cultum Religiosum in Conceptionem immaculatam institutum, & à summis Pontificibus commendatum infinitis indulgentiis, priuilegiis, quorum tantam copiam in tuum librum coniecisti, vt videatur esse quoddam Bullarium, aut indulgentiarum promptuarium. Confirmas tandem hæc omnia nube testium quos ad sex millia numeras Scriptorum, qui piam opinionem docuere.

Merito me læsi Pontifi ij Decreti argueres, si his tuis Argumentis negarem euinci piam probabilitatem huius opinionis. Sed in te recidet hæc censura, si iisdem Argumentis putares te rem certam ex fide conficere. Quare

consecrationem attollit manibus, & astantium oculis subiicit Sacerdos hostiam; licet non sit omnino certum validè consecratam fuisse, seu sacerdoti ad hoc facultas & character defuerit, seu voluntas? Nec tamen hoc dubio (quod vocant speculatiuum) suspendenda est, aut conditionate adhibenda adoratio: multo minus anxie est in Sacerdotem inquirendum, an rite fuerit initiatus sacris, vel in consecrationem consenserit, vana enim esset, & improbanda hæc nimia sollicitudo. Nonne etiam sacellis plures addicuntur indulgentiæ ad commendandam, & augendam venerationem in Diuorum reliquias, eo loci ex piâ tantum & probabili coniecturâ repositas?

Quis neget quotquot Martyrologio inscribuntur, posse coli & votis inuocari? Nec tamen puto Petrus contendet, omnium qui Martyrologio accensentur, fide diuinâ certam esse sanctitatem & gloriam. Hinc grauissimi Theologi censent Decretum, quo in Diuorum album Sancti referuntur, ad fidem diuinam non pertinere, seu ad certam speculatiuam veritatem, sed ad practicam, tantum & ad affectum pietatis, ad quem satis est probabilis, & prudens ratio, licet euidencia, & omnimoda certitudo desit: maximè si dubium versetur circa rei, & temporum circumstantias, & aliquid compertum habeas quo pietas nitatur. Hoc fundamento posito, tantum abest vt in re scrutandâ sollicitum esse oporteat, quin potius ipsa inquisitio vitio vertatur. Damnandus enim esset, qui nulli vellet eleemosynam erogare, nisi prius excussâ arcâ, & domo, an fingeret se pauperem. Præstat enim vni immerito hoc subsidium, vel quodlibet aliud officium per ignorantiam impendere, quam plures debito obsequio, & ope necessariâ fraudare.

Nec minus vera est & æqua hæc lex ad Religionis, quam ad vitæ humanæ officia implenda: imò interdum cum de rebus diuinis agitur, & de pietatis exercitationibus, ignoratio & caligo præstat cuilibet scientiæ, & luci. Hinc illæ Sanctorum voces, quas Cardinalis Sirletus, non minus propriâ, quam discipuli Cardinalis Borromæi Sanctitate notus, dum animam ageret identidem repetebat. *Miserere mei Domine, sicut vis & scis.* Hinc illud Asceticorum Patrum documentum, contritionem

eliciendam , & metiendam iuxta peccati malitiam Deo , non nobis notam. Nec solum affectus , & charitas , sed interdum etiam fides obiecti alicuius secura, Dei scientiæ, rerum, & temporum circumstantias permittit, nihil illarum sollicita. Quid enim cum exactis Danielis hebdomadibus , & impletis Prophetarum vaticiniis aduentus Christi instaret, dubio tamen die , mense, & forte anno ? An tum fides nutabat , incerta momenti quo venisset Christus ? Parum id referebat. Si fides, quæ rei in se veritatem assequi debet, nihil est sollicita de circumstantiis, quid de Religione, quid de charitate dixeris ? Visne à momentis pendere , à quibus longè quàm fides abstractiores sunt ? Vel de circumstantiis , aut singularibus motuibus sollicitas, quibus cum plura suppetant ad cultum , si vnum , aut alterum desit : alia vim suam seruant. Nec periculum est pietatem aliquando cassam fore , tot motuibus suffultam.

Hæc sunt quæ summâ quâ potui diligentia, ex toto longissimo libro decerpere Argumenta , vel quæ Argumenti speciem habent. Quod vero ex Concilij Tridentini verbis contra eius apertam mentem repetit, iisque gloriatur rem definitam , est omnium futilissimum. Nam cum Tridentini Patres peccati originalis ex Adamo sancitâ in omnes propagatione , addunt non esse suæ intentionis Deiparam suo decreto , aut communi malo inuoltere ; Quæro à te, Petre , an apertiora censeas huiusmodi verba , iis quæ Christus in simili causâ protulit , cum virum adulterij damnat , si relicta priori coniuge superstite, aliam ducit, *exceptâ fornicationis causâ* ? Putasne fornicatione vxoris matrimonium dissolui , & aliam ducendi ius viro comparari ? Id tamen videtur statuisse Christus his verbis *exceptâ fornicationis causâ*. Solue hunc Nodum , & tua responsione me expedies ab illo , quo ex Tridentini verbis putas me ineluctabiliter & indissolubiliter implicatum. An ignoras exceptionis Christi , & Patrum eundem sensum esse : sicut à quæstione subiecta dinortij semouet Christus fornicationem , de quâ alias esset sanciturus : Ita Patres Tridentini hoc decreto peccati originalis nihil de Deipara statuerunt , quasi de fide affirmant certum alterutrum. Hanc interpretationem extra omnem controuersiam ponunt sequentia

SOLVTIO NODORVM P. DE ALVA. 97
quentia verba, quibus confirmantur Constitutiones Six-
ti I V. aliorumque Pontificum, iisque cauetur ne alter-
utra partium erroris accusetur.

ARTICVLVS TERTIVS.

*Breue examen totius Operis Nodorum
indissolubilem.*

FERVNT Socratem, lecto Heracliti, nomine Scotini,
seu obscuri Philosophi libro dixisse, eorum quæ lege-
rat, nonnulla se intellexisse, quibus nihil verius, & san-
ctius; & ex istis se colligere verissima, & mirabiliora,
quæ capere non poterat: De Petri Nodis quid simile
mihi dicendum occurrit: eorum, quæ in nos scripsit pro-
pe infinita, licuit ex Authoribus quos citat, expendere
nonnulla, & comperi falsissima esse. Ex quibus evidenti
argumento conicio his similia esse reliqua, quæ nolui
ad examen vocare; nec si vellem, potuissem vnquam; ad
hoc enim opus esset homine Petro simili, id est otioso, &
pecunioso, qui vellet totam vitam nugis transigere, aut
carpendis aliorum dictis ac factis; vel cui infinitæ pecu-
niæ suppetere. Narrant Aristotelem opus habuisse
toto sui discipuli imperio ad consiciendos libros de parti-
bus, & historia animalium, quæ iusserat Alexander, è to-
to orbe sibi subdito aut subacto, ad Magistrum deferri,
explorandi causâ quidquid ad naturam animalium per-
tineret.

Diuersus longè, minùsque honestus, quam Philoso-
phum ardor incessit Aluam, læsum censura portenti na-
turæ, quod ex nouo orbe in istum deportauerat; nam
suspiciatus, quas commeruerat pœnas, se Authoribus
Dominicanis dedisse; id statuit vindictæ genus sumere,
cui opus fuit magna noui orbis Gaza. Nam quæ potuit
pecuniæ vis sufficere, conquirendis sex mille testibus,
quos è puluere & situ omnium Europæ Bibliothecarum
in nos instaurauit, vt nos D. Thomæ plagarios, & cæ-
litum mastigas conuincat. Et ne quis rem à me in maius
ad inuidiam augeri causetur, consulat primum Nodum
pag. 120 vbi de Conceptione, cuius ante tria, vel quatuor

sacula altum credebatur silentium, allerit *Plusquam centum septuaginta millia ingenia Sanctorum Patrum, Summorum Pontificum, Expositorum, atque Concionatorum* desudasse, & scripsisse eâ de re solâ plures libros, tractatus, opuscula, quam litteras & apices habeat S. Thomas in suis septemdecim aut viginti tribus tomis. Atque ex hoc librorum numero, quorum magnam partem collegit, & penes se habet, quasi ex præmissâ hanc conclusionem deducit, *incredibile videri, rem tot testibus confirmatam, reperiri hodie tantum sub quadam præ credulitate.* Post ista quæ ex ipso retuli, quid opus est reliqua expendere? Cum facile quisque coniciat, quid ab eo scribi possit, de rebus quas apud se seruat solus, quorum fidem vult penes se esse, cum adeo incredibilia proferat, ut non tam videatur quasi Theologus disputare, quam ut miles Plautinus, aut Hispanus loqui, & horum omnium facilè verba ventosa vincat. Certè plurimum refert ad totius Ecclesiæ causam, ista non prætermitti sine aliquâ reprehensione, ne hæretici de nobis pessimè sentiant, quasi Catholici piam, probabilem opinionem non aliis rationum momentis librent, & metiantur, quam quibus Petrus reiecit aliis, quasi solis, aut certè præcipuis fundamentis fult, & sustentat. Acum esset de Ecclesiâ, nisi melior in hac, aliisve causis, vindex & defensor contingeret.

Nam ut de toto opere loquar modeltissimè, liber diuisus per quindecim Nodos, sub cortice infinita falsa; sub virga, vera quidem sed parerga; sub singulis vero Nodis nonnisi paralogysmos habet, quos iam dixi similes esse acetabulis præstigiatorum. Si ludere statueras huiusmodi scripto, certè non erat tibi deligenda causa gravissima, cui dum videris velle (& credo te ex animo optare) venerationem & assensum apud Catholicos conciliare; risum, subsannationem hæreticorum in te & in piam ipsammet causam concitas: Quid enim de nobis statuent mordacissimi homines, qui solida quæque ex Antiquitate deprompta carpunt; ubi audiuerint promitti plures, quam extent apices in septemdecim ingentibus tomis, libros de quæstione superioribus sæculis non admodum agitatâ.

Sed ad rem nostram prætermisâ præfatione, de quâ nobis iam dictum est; quæro à te Petre, cur hæc disse-

rendi, & stabiliendæ piæ opinionis ratio præ aliis placuerit, quæ nihil ad rem confert? Putâsne legitima consecutione concludi: Dominicani supposuerunt infinitos libros D. Thomæ, vt vix decimâ parte legitimi sint eius partus, progressu temporis ita excreuere, vt cum Ægidius Romanus numeret septem tantum ex illo libros, D. Antoninus augeat ad octo supra quinquaginta, modo ad ducentos accedant: multæ etiam confictæ, aut falsatæ sunt probationes, nec fuit Religioni confingere reuelationes, & miracula, quibus Doctrina D. Thomæ confirmaretur: Ergo Conceptio immaculata est iam fide definita, aut definienda necessario. Putâsne res adeo dissitas in vnam posse vlla arte logicâ demonstrationem Theologicam coire? Si fateare non posse ex huiusmodi præmissis eâ deduci definitionem quam vrges ad bonum totius Ecclesiæ: cur plusquam dimidiam libri tui partem (id est quidquid cuiuslibet Nodi primo, & tercio Paragrapho habes) his duabus accusationibus confirmandis impendis; quas etsi vltro concederemus, parum, aut nihil causam promouisti? Putâsne, vel vulgaris quæ silentio charitas iuberet obrui, si vera essent; vel nullis aut leuibus, si quæ fuerint, culpis in maius ad odium auctis, vel interdum puris putisque mendaciis, te Summorum Pontificum, Deiparæ, & piorum gratiam initurum, & quandæ flagitas definitionem huiusmodi malis artibus obtenturum?

PARAGRAPHVS PRIMVS.

Vindicantur D. Thomæ sui libri.

POSSEM parergis quibus librum referisti, annuere quam moues de numero librorum D. Thomæ quæstionem. Quid enim ad rem tuam (nisi velis tantum scribere vt mordeas viros illustres:) siue cum Ægidio 7. tantum libros D. Thomæ legitimos agnoscas, siue 20. cum Petro Rogero in Summum Pontificem titulo Clementis VI. electo, siue 38. cum Sancto Antonino? siue 118. iuxta calculum eorum quos editioni Romanæ Theologorum præfecit Pius V. vel 170. iuxta aliorum sententi-

triam? Quidquid de re ipsâ sit, optassem hanc controuersiam quæ nihil ad causam tuam fecit, aut omisisses omnino, aut sincerius attigisses. Quis enim in te fidem non desideret, cum ex Ægidio vis certum constituere numerum librorum D. Thomæ, neque alios recipiendos præter 7. quos citat? Cum Ægidius non suscepit scribendum Catalogum librorum sui Magistri, sed eos tantum recensuerit, quos æmuli carpebant, & quos ille erat defensusus? Visne etiam Rogerium suâ illâ oratione in laudem D. Thomæ, exactum scripsisse librorum eius Catalogum? Sed ad minus inquires D. Antoninus Titulo 10. accurate inquisiuit, & iniuit librorum D. Thomæ numerum: neque recenset plures quam 58. & reliquos vult gratis fuisse confictos. Addis quasi ab ipso dictum, Commentaria in Ioannem nomine D. Thomæ edita esse Reginaldi, sicut in tres nocturnos Psalterij: Commentaria vero in Mathæum esse Petri de Andria.

Sed sic contra te expostulo, Antoninum à capite ad calcem à te fuisse corruptum pluribus mendaciis, quàm ex ipso verba retuleris. Inprimis vbinam legisti, ab Antonino dictum, quæcumque opera præter 58. à se enumerata D. Thomæ ascribuntur, gratis conficta esse? Ego sanè legi & relegi caput illud; neque potui inuenire, quæ illi gratis, aut potius per summam fraudem verba affingis. Deinde Antoninus enumerat 75. volumina, præter 12. quodlibeta; ac proinde non fuit tibi religioni qui vnus oboli furto te æternæ damnationis reum reputares, 37. volumina suo legitimo authori subducere; Atque huius furti conuinceris ex Antonino, quem in testem aduocaueras. Sed hæc duo mendacia leuia sunt præ alijs quibus summâ fraude Commentaria in Ioannem, & in Psalmos D. Thomæ eripis, & vindicas Raynaudo quasi authori. Cur D. Antonini locum & verba subticuisti? Ipse enim sic habet, *Scriptis quoque (Sanctus Doctor) per istam super Euangelium, maxime super quinque capita stylo proprio: residuum dicitur reportasse F. Reginaldus socius eius ipso legente: quod postmodum idem Doctor correxit & approbavit* Idem refert Sanctus Antoninus de Commentariis in Epistolam ad Romanos, ad Corinthios, ad Hebræos, ad caput vsque vndecimum absolutis: reliqua vero super alias Epistolas dicit excepta ab eodem Raynaudo.

do, legente Sancto Doctore, & ab ipso correcta. Idem asserit de tribus Psalterij Nocturnis legente S. Thoma à Reginaldo exceptis. Idem habet de Commentariis in Mathaum, quos vult à Petro Andria exceptos, & editos, non suo, sed Sancti Doctoris veri Authoris nomine, cum ipse tantum à dictante excepisset.

Atque vt erudito lectori magis satisfaciam, quam calumniis Petri refellendis tempus teram, tria sunt distinguenda D. Thomæ sicut cæterorum Illustrium Virorum opera. Primæ classis ea sunt, in quibus summam sibi posuerunt: qualia sunt apud S. Augustinum polemica, de Ciuitate Dei aduersus gentiles; & de rebus fidei aduersus hæreticos. Ad hoc genus pertinent quotquot ex Ægidio indubitata censet opera D. Thomæ ipsemet Petrus: quæ tamen non est passus intacta abire à suis moribus aut mendaciis. Duo habet luculenta, primum est Nazarium dubitasse de maiori parte summæ D. Thomæ, vult subindicare secundam secundæ; quasi aliorum dubitationem induci & refelli à Nazario, sit ipsummet dubitasse. Alterum est eandem Summam immaturâ D. Thomæ relicta, morte absolutam fuisse Alberti à Brixia opera, quasi aliud operæ-pretium fuerit ipsius Alberti, quam quæstiones D. Thomæ in quartum sententiarum, ad complementum Summæ Theologiæ adhibuisse. Quid nobis narraturus es, Petre, de libris quos solus penes te habes, cum adeo audacter mentiaris, de his qui omnium manibus teruntur? Sed prosequamur reliqua.

Secundæ classis sunt Commentaria in Scripturam, & in Authores omnis generis, tum sacros, tum profanos: in Dionysium, Boëtium, Aristotelem, librum de causis, quos omnes in Gallia, & Italiæ Academiis, maximâ auditorum frequentia est interpretatus: partitis per singulos dies, lectionibus quas dictabat, interdum memoriter, & vix apographum, vel vllum exemplar seruabat. Tertiæ generis Tractatus sunt breuiores, Sanctorum Patrum Epistolis similes, quibus rogatus ab amicis, aut à Maioribus iussus, de rebus diuersissimis disse-rebar.

Petrus adeo in D. Thomam æquus est, vt alia non agnoscat D. Thomæ opera, quam quæ primâ classe recensui: quasi nullum Scripturæ sacræ, librum, nullum Au-

thorem fuerit commentatus, quasi nullas aut raras in Academiis lectiones habuerit, quasi semper fuerit Bos mutus, nec ulli de rebus dubiis ipsum consuluerint, vel ipse nihil responderit, aut eius responsa, qui ambiuerant, lecta contemplerint.

Quod vero huiusmodi secundæ & tertiæ classis à diuersis excepta, ab ipso vix seruata, non vno anno aut sæculo prodierint, sed progressu temporis; nisi sit liuore cæcus, esset modestiæ S. Doctoris, & diligentæ Discipulorum eius, quam fraudi illorum aut præpostero in Magistrum affectui ascripturus. Tanta exuberabat S. Doctor rerum diuinarum copia & scientia, vt per omnes Europæ Vrbes & Academias largissimè exundaret: (& sicut de eius Magistro Alberto Magno fertur) adeo erat humilitatis & paupertatis tenax, vt quos scribebat aut dictabat libros, vix auderet secum deferre: quasi ad eorum, in quibus degebat conuentuum censum pertinerent, ipsis relinquebat, aut discipulis permittebat fruendos, aut si vellent edendos, eorumque neque gloriam vllam neque etiam vsuram querebat. Et hoc euidentius est de secundæ & tertiæ classis operibus, quorum nullum nisi apud auditores extabat exemplar: ideo incertior fuit & magis varia eorum editio & opinio Doctiorum,

Sed si inde vellet notha conuincere huiusmodi opera D. Thomæ; hæreticorum causam iuuaret Petrus I, quorum etiam armis in nos vritur; dum è librorum D. Thomæ Catalogo vix decimam partem legitimam dicit, quod de reliquis multi dubitarint. Quo argumento hæretici è Canone Scripturæ semouent plusquam dimidiam librorum sacrorum partem, vt Iudith, Esther, Tobix, Machabæorum historias, Ecclesiasticum, Sapientix librum, Baruch integrum, Danielis partem, ex veteri Testamento: ex nouo Apocalypsim, Epistolas Pauli ad Hebræos, Iacobi Canonicam abstulerunt: causati Antiquorum Patres plurimos vel reiecisse omnino vt Apocryphos, vel de illis dubitasse. Quid aliud obiicit Petrus aduersus legitima D. Thomæ opera? Sed eius præpostera iudicio liceat anteponeere Criterium tot Virorum Illustrissimorum; qui certius D. Thomæ opera ex eius stylo nouerunt, quam possit quis hominem ex suâ loquelâ. Sed si coniecturis indulgere placeret, haberemus sine dubio Pe-

tre tuis meliores: id debemus tuæ æquitati, vt præter Catenam auream (quam vis ereptam vni è tuis) reliquos omnes fatearis esse Dominicanorum libros, vt Alberti Magni, aut aliorum è nostris eiusdem nominis cum D. Thoma, quæ causâ erroris fuerit. Cur igitur Dominicani illos legitimis suis Authoribus eripuerit, vt D. Thomæ asfererent? Certè nihil antiquius, aut prius nobis esse debet Familiæ nostræ bono & honore, quem hâc commutatione, diminutum potius, quam auctum contendo: quis enim neget satius fore Ordini plures habere Thomas summæ & paræ eruditionis, quàm vnum? Hanc vero apud homines consequeremur gloriam, diuisione operum D. Thomæ in multos: ab eâ autem excidebamus, fraude, qua vis nos vsos fuisse

Quamuis D. Thomas agnosceretur Author tantum eorum librorum, quos illi ex Ægidio asseris, id est, vtriusque Summæ, Theologiæ, & contra gentes, &c. reliqua opera, aliorum nomine edita multos Thomas Ordini peperissent. Cur igitur gratuito mali fuissent Dominicani, & in suum damnum mentiti? Cur pro vno Thoma plures recusassent? Nempe vt nihil auctâ gloriâ Thomæ, totius Familiæ decus minuissent. Adeo-ne desipuissimus, vt nobis nocere putaremus plures habere Thomas, qui scholæ principatum dubium facerent, aut indiuidua obtinerent, tam tota omnium, quam singulorum?

PARAGRAPHVS SECVNDVS.

Responsio ad singulas partes libri Petri Alua.

QVISQVIS tuum naturæ, & gratiæ, Petre, legerit, & cum hoc postremo Nodorum libro contulerit, iurabit non potuisse vtrumque opus ab eâdem officinâ prodire; eiusdémque esse authoris, nisi ille sit quoddam portentum. Non dicam stylo adeo immane distare, & primum præ secundum, ita pingui Minerua scriptum, vt necesse fuerit istud ex opere operato, & alienâ manu atque industriâ confectum, vel toto tempore quod ab vno opere ad aliud effluxit, te grammaticæ studuisse; alias non potuisses non impingere frequenter in barbarismos, &

solæcos, quibus prior scriptio scatebat. Sed leuiores sunt, hæc quam ut Theologo obiciantur, vel portentum nomen tibi asciscant; est aliud dignum eo titulo, ad quod non dubito quin omnes obstupefiant, & portentum loco repellant. Quis enim fieri potuit ut in alios, & in teipsum, tuâque sis adeo dissimilis tui? Non ignoras, Petre! hanc primam nedum Christianæ charitatis, & religiosæ, sed etiam ipsiusmet humanitatis legem, ut communi cum aliis iure viuamus, eadêque illis officia exhibeamus, quæ nobis præstari velimus. Hæc est prima naturæ institutio; ab illa quisquis defecerit, iure nomen monstri sortietur. At quid sunt duo tui libri, si inter se conferantur, nisi enormis, & perpetua à iure naturæ exerratio? Diuersissimi sunt generis, & argumenti hi duo libri: vno tuos, tuumque parentem laudas, D. Franciscum fere Christo æquas, & ex utroque adiunctâ Deiparâ triadem efficis, in qua nihil sit prius, aut posterius; nihil maius, aut minus. Altero vero opere toto in D. Thomam, & in Dominicanos inueheris, eosque discerpis crudelius, quo per ludum honoris titulos *Reuerendissimi, Doctissimi* maledicentiæ, & sarcasmi admisceas.

Sed dices, licet toto genere libri differant, tamen utrumque ad artem oratoriam, qua vales, maximè pertinere: tum enim præstantissima est, cum in vituperando perinde ac in laudando præstat. Certè si ita sit, Oratoriæ artis abstulisti palmam, & ferè spem omnibus te imitandi: nullus hominum magis vnquam te, gratiæ aut odio dedit, neque suis impensius indulsit, eosque laudauit, vel aduersarios acerbius, & iniquius insectatus est? Videris tibi persuasisse tuos sensus, tuâque, aut tuorum ornamenta summum bonum esse, summum vero malum Thomam, eiusque discipulos. Hoc fine ita constituto, illis attollendis, istis deiiciendis opportuna, licita & sancta esse putas, mentiri, calumniari, &c. Vel si eo cecitatis non es delapsus, ad minus in animum induxisti, licet ex omnium sapientum consensu, eadem sit contrariorum lex, diuersis tamen legibus tuorum encomia, & nostrum vituperia esse metienda. Si laudes Franciscum, illud tibi identidem canis. *Quantum potes, tantum aude, quia maior omni laude*, &c. Parum est tibi D. Bonauenturam consuleri, & ab aliis tradita amplificare, transcendis sydera,

SOLVTIO NODORVM P. DE ALVA. 105
librum vitæ scrutaris : & inde quasi alter Paulus ad ter-
rium cœlum raptus , narras ineffabilia verba , prædesti-
nationem D. Francisci tertio post Christum & Deipa-
ram folio legis, Apostolis ad quartum relegaris : & quasi
nuper è cœlo aduenissēs , velut iuratus testis Thesibus
publicis doces quæcumque in aulâ cœlestis aguntur. Ibi
Franciscum summâ gratiâ valere apud Regem cœlestis
Hierusalem , ibi solum audiri , Angelos illi ministrare,
nec nisi salutato & adorato eius corpore , à Deo ad nos,
vel hinc ad Deum remeare : & quasi perpetuus , & indi-
uiduus comes Francisci , & Christi , singularissima quæ-
que soli Deo nota ita comperta habes , vt certo numera-
re possis, quot a Matre suxerit lactis guttas , quot sangui-
nis effuderit : vt inde in eas horarum numerum , quibus
Franciscus stigmata Iesu Christi in suo corpore portau-
erit.

Nonne conueniebat te ita indulgentem coniecturis ,
aut potius insomniis , cum de tuâ Familia statuis , mitius
nobis cum agere , neque exigere vt quæcumque scripta,
aut dicta legis de D. Thoma , tabulis publicis comproba-
remus ? Nonne , oportebat sic tecum reputare ; cur aliis
negabo , quod mihi volo indultum ? Quid si mecum aga-
tur iisdem legibus , quibus in alios censuram exerco ,
nempe commentitia esse omnia quæ à Dominicanis de
D. Thoma referuntur , nisi excepta sint traditione perpe-
tuâ , ab vltimo autore omni exceptione maiori ad pri-
mum vsque , qui rem à se narratam iuret se oculis hau-
sisse , & manibus contrectasse ? In quas angustias te conii-
ceremus , si tuum exemplum imitati , exigeremus eorum
argumenta , quæ scripsisti ? Est ne æquum quæcumque
in mentem , aut buccam , aut calamum veniunt , chartis , &
typis mandare , aliis nihil condonare , mendacij , & sacri-
legij arguere , si quæ proferant , quorum tabulæ publicæ
non extent ? Quam graue , quam atrox malum incurrit
Dominicana familia , quod non fuerit (vt Tullij verbis
vtar) *Litterarum conficientissima* , quod non retulerit in
tabulas publicas Stephani Episcopi Parisiensis , Urbani
V. Innocentij I V. Parisiensis Academiae litteras in com-
mendationem D. Thomæ datas , quod verba à Christo è
Cruce dicta *Bene scripsisti de me Thoma* , quod Pauli
Apostoli , quod Deiparæ , quod Sancti Francisci reue-

lationes, ad eiusdem Doctrinæ confirmationem incertis authoribus euulgatas, nequeant Codicibus rationariis, librariis, vel au horibus D. Thomæ cõxtaneis comprobare. Nam Petrus his præfidiis destitutos, pronuntiat *Falsarios, Temeratores*; *Sacrilegio* etiam grauat, quasi hæc à nobis conficta sint, eo animo, vt Deiparam inumbraremus. Quid potest hoc iudicio iniquius esse, seu ipsiusmet Petri morem inspicias, seu ipsiusmet causæ momenta expendas? Quid à nobis de D. Thoma dictum, quod accedat ad centesimam partem encomiorum de D. Francisco, vel ineptiarum quibus suos libros referit? Deinde quæ tyrannis, imponere aliis onera intolerabilia, quæ nolit digito mouere? Iubete sibi quidquid libuerit, nullo adhibito teste, aut argumento, dicenti credere; & alios vt sacrilegos traducere, nisi faciant fidem ex ipsiusmet autographis.

Mirum quantum sibi indulserit, aut placuerit in illo Augustino & Ambrosio, vt creditur Authoribus, cantico ad Franciscum transferendo, licentiâ plusquam Poeticâ, quod omitto, vt hominis pudori consulam. Is ipse tamen qui nullum modum habet, nec finem sui, suorumque laudationum, Nodo decimo quarto refert, quatuor officia in laudem D. Thomæ apud Dominicanos iam ita antiquata, vt præter vnum, quod apud nos celebre est & usurpatur, reliqua mihi prorsus ignota essent, antequam librum Petri attigissem: ea tamen, quasi apud nos in vfu essent, expendit, & ita interpretatur; vt videatur imitari non elegantiam quidem, sed licentiam Erasmi in suis colloquiis, aut in sua Moria cum de rebus Ecclesiæ sacris ludit more Luciani. Condonarem tibi Petre, hanc Erasmi imitationem, nisi tu plura scripsisses, quæ vberiore illi iocandi materiam suppeditassent: & reuera si Spiritu Dei, & Charitatis ageris, non debebas huiusmodi officia in tuos Nodos referre, quæ poteras scire ita à nostris breuiariis exulare, vt ne minimum quidem illorum apicem, nisi apud te legerim, & ex te nouerim. Meminisse te oportebat, illud Sapientis *Pondus & pondus, mensura & mensura vtrumque abominabile Deo.*

Sed te diuersis omnino lancibus propria & aliena ponderare, præter superius à me relata, argumento est quod subiungo ex Nodo decimo tertio. Mirum est quam sis

tui dissimilis, & quam diuersis ponderibus vtare, in reuelationibus aut miraculis probandis. Longè morosior es ipso Domino de Launo in iis expendendis, quæ minus tuis præiudicatis opinionibus fauent. Nemo mortaliū pronior aut promptior te est in iis confirmandis, quæ tuo affectui indulgent. Huius diuersi ponderis & ponderis, seu versatilis aut pertinacis pro tuo commodo, atque vt gratia vel odium suadent, iudicij, exempla plurima præbent omnes tui libri: vnum tantum in vtramque partem attingo. Alphonsus Fernandes suâ de Rosario historiâ retulerat ex grauissimo Patre Ioanne à Iesu Maria Carmelitarum Discalceatorum in Italiâ Præposito generali, Diuum Franciscum vni è suis filiis sub formâ aspectabili visum, suasisse vt Diuo Thoma Duce, dissolueret dubium quo torquebatur, additâ commendatione Doctoris Sancti. Sed Petrus suæ diffisus, Vadini eloquentiam ad subsidium vocat, atrocitati rei parem. *Novi quidam recentésque authores indignas fabulas secuti, quasdam sparserunt regulas per quas ita Sancti Thomæ Doctrinam magnificant, &c.* Deinde vterque contendunt nihil tale dictum à Præposito Carmelitarum, sed omnia à Dominicanis conficta. Verum eius rei apud Ioannem à Iesu monumenta extare, accuratè demonstrat vnus Scriptor suâ ad Theophili Diatribas responsione, & nos etiam fortè aliquid attingemus, cum eò loci ventum fuerit.

Verum morosissimus hominum, ad examen reuelationum avidissime arripit, & nullo fere examine comprobatur, quas videt à suis affectibus & opinionibus non dissentire: ideo non dubitavit grauissimæ rei, nempe celebritatis festi Conceptionis, à reuelatione admodum dubiâ & incertâ, factâ Helsingo Abbati originem repetere, à sæculo Anselmi, quam dicit quatuor opusculis confirmasse, & inde per Angliam, Germaniam, Daniam, Normaniam percrebuisse festum illud & mysterium.

Iam pluries tota hac dissertatione dixi, & iterum moneo vt paream Pontificum monitis, quicquid dixerint antiqui aut recentes Thomistæ contra probabilitatem piæ opinionis, me improbare: neque etiam negare, quin sit definibilis: id vero vnum totâ hâc responsione contendo, & iam credo me euicisse, Petrum fiduciâ suorum

Argumentorum , reiectis communibus & melioribus , nouisse potius , quam consuluisse piæ opinionioni , ex ea maximè capite ; quod præter morem & mentem grauissimorum Theologorum Scoti , Bellarmini , Suaris , Vasquesij & aliorum astruat reuelationi Helsingo factæ , quatuor opusculis Diui Anselmici de re , & vni Abaillardii contra Diuum Bernardum & institutioni eiusdem solemnitatis per quatuor aut quinque celebres Europæ Regiones . Ad hæc omnia non dicam etsi vera essent , tamen recentiora , fore quam vt fidei certitudinem huic piæ opinionioni concilient . Id enim verissimè possum asserere , nullum esse Religionis articulum controuersum Catholicos inter & hæreticos , cuius origo nusquam reperiatur , donec ad Christi & Apostolorum tempora deuentum sit : & hoc maximum esse ad victoriam Ecclesiæ Catholicæ momentum & argumentum , quod de nullâ cum hæreticis veritate contendat , quam non probet antiquissimam ; nec minus ratione temporum quam piorum consensu Catholicam . His omnibus prætermisissis assero mihi incomperta videri , quæ ex Petro retuli multis nominibus ; sed hoc maximè , quod quæcumque habet de quatuor Anselmi Opusculis , de quinque Regionibus , &c. ignota fuerint Bernardo qui tunc vivebat , Scoto , Bellarmino , & aliis Theologis , qui nullam harum rerum mentionem faciunt , facturi sine dubio si aliquid verisimile haberent .

Quid opus est ad singula respondere , quæ Petrus quindecim Nodis scripsit , cum tot præiudiciis & adeo præpostero , de rebus suis alienisue iudicio , sibi omnem fidem abrogarit ? Sanè non plus est periculi , persuasurum , quæ de nobis pessima ad inuidiam , quam quæ de suis magnifica commentus est . Trium , quibus totus liber constat partium , tertix , quæ cuiuslibet Nodi vltimum seu tertium Paragraphum implet , iam responsum est : habet pars illa centum sexaginta tres paralogismos ex comparatione rerum prorsus dissitarum , & diuersi generis , quas licet admittamus ad legitimam comparationem , euincunt quod omnes concedimus , quod Pontificia decreta exigunt piæ opinionis probabilitatem . Licet vi tuorum Argumentorum id minimè conficias , Petre , peccant enim formâ , materiâ , & vix vllam habent syllo-

SOLVITIO NODORVM P. DE ALVA. 109
pissimi speciem; quia vbique rides, aut irasceris, & quodlibet aliud agis, quam rem à te propositam confirmare: si tamen aliud obtendas, quam quod indicant Pontificia decreta, habes ad quodlibet tuorum 163. sophismatum tres solutiones, id est, fere quingentas ad omnes.

Duo tantum supersunt quibus hic respondeamus, libro sequenti si quis sit dignus vindice Nodus, illum soluturi. Carpis passim per totum librum Patrem Turcum, eiusque dissertationem, aut potius libellum supplicem Innocentio X. datum dilaceras, Viri etiam grauissimi pios manes sollicitas. Ad hæc duo tantum dicam, scriptum Innocentio X. nulli suorum decessorum prudentiâ inferiori, ita placuisse, vt illi persuaferit id de quo agebatur; quod vero huic negotio immortalis fuerit, ego iudicia Dei venerari soleo, nec mihi permitto scrutari: non puto tamen Summi Pontificis iudicium fuisse diuino improbatum, & fortè ad suspicionem quamcumque à Viro Religiosissimo amouendam, Deo visum est, vtrumque contententium, nempe Cardinalem à Ceuua & Turcum diem vltimum eodem tempore clausisse.

Postremum superest quod obiciis aliquâ responsione dignum. Vis quæcumque euulgata fuerint ad D. Thomæ commendationem testimonia, fuisse quasi indiuidua huic controuersie quam moues. Ad hæc duo dicam; primum me infinitis locis apud Capreolum, Caietanum aliòsque Thomistas antiquos & recentes legisse, Stephani Episcopi Parisiensis, Urbani V. litteras, &c. Sed apud nullum vllò loco obseruasse adhibitas ad hanc controuersiam: vt mirum sit, te velle hanc cognitionem colligere, ex quatuor aut quinque locis, nullâ ratione habitâ infinitorum, quibus huiusmodi testimonia ad alias controuersias vsurpantur. His addo de huius controuersie origine, aut saltem progressu nos posse magis comperta, & veriora referre: certum enim est, natam vel auctam ex Concilio Basileensi, vbi stabilita est hæc opinio, & Pontificia autoritas valide impugnata à Gersone, à Petro de Aliaco, & strenue propugnata à Card. Turre cremata, & Ioanne à Monte Nigro. Nec hæc fuit contentionis meta, exarsit etiam inter Almainum, & Caietanum, inter Cosmam Morelles in Comitibus Generalibus 1611. habitis Lutetie, & Richelium. Hinc causa Concilij

Basileensis adeo arcte connexa fuit cum controuersia de Conceptione, vt Almaynus, Clitovæus, acerrimi Concilij Basileensis defensores, & Pontificiæ authoritati infensissimi, fide certam velint, quasi sancitam à Concilio Basileensi aduersus Dominicanos, cum ab ipso ad Eugenium descuissent. Hinc Parisiensis Academia post Gersonem suum Cancellarium, Concilium Basileense munendum censuit piâ opinione, cuius sacramentum exegit ab his quos sibi aggregabat Doctoribus. Vide igitur Petre, aliam rerum quam censeas originem esse, & cognitionem. Sed de his satis.

ARTICVLVS QVARTVS.

Aliquot exerrationes P. Alua annotantur.

VTINAM Pater Alua, piam immaculatæ Conceptionis causam illotis manibus non attigisses: neque periinde rebus, ac sermone imperitus, & amaro sine scientiâ zelo, nedum solæcis, aliisque ex inscitiâ erroribus, sed iisdem sordidissimis sordibus ex originali culpâ natis, quas abstergere meditaberis. Conueniebat planè Deiparæ immunitatis à geniali culpâ vindicem magis intractum minùsque obnoxium huiusmodi contagio, cuius vestigia sic apud te, & in tuo libro voluisti extare; vt si quis adhuc Pelagianis de hac labe naturæ congenitæ, supererat dubitandi locus, sustulerit hic liber, quem merito dixerim inuictum huius mali argumentum, quo vno compactum videatur.

PARAGRAPHVS PRIMVS.

Tria exerrationum genera P. Alua.

TRIBVS hallucinationum generibus, hi quindecim Nodi, & omnes fere huius Scriptoris libri scatent, ex linguæ, ex solidæ Theologiæ inscitiâ, & ex præpostero zelo natis: primi ordinis errorum nullum hætenus mihi attingere permisit, quia aquila non captat muscas, ne-

que istas Grammaticæ minutias insectari passa est immunitas hallucinationum, contra principia solidiora scientiarum à Dialecticâ omnium infimâ, ad Theologiam usque, cæterarum fastigium & apicem: quamvis, ut verum fatear, conueniebat puritatem Virginis, castiori dictione defendi, nec adeo lutulento, & pingui sermone fœdari.

Quis enim ferat Lectorem iam iubilatum, qui in omnes virgam censoriam sumpsit, qui Aristarchum agit, in summa Theologorum capita, Grammatices rudimenta nescire, & neglectâ, aut forte ignorata syntaxi, qua *Docceo* accusatiuum regit, ita de Aduersariis scripsisse, *qui docet rudimenta Summularum Lectoribus iubilatis*? Basilii Magnus Demostheni Valentis culinæ Præfesto Imperatoris minas, sibi pari linguæ & animi barbarie intentantis falsè reposuit, Imperitum Demosthenem vidimus. Quid dicturum putas, si audiuisset emeritum scientiarum professorem, ipso Nabusarda, & coquorum principe pinguius, & crassius loquentem? Referebat plurimum ad huius argumenti dignitatem & gloriam, ab aliquo tractari scientiarum callentiore, qui in prima Logicæ elementa idem idem non impingeret; nec rogatus, qui sint tres syllogismi termini, responderet, esse positos in Maiore, Minore, Consequentia: cum tamen huius artis Tirones norint tribus syllogismi terminis, maius & minus extremum, & utriusque medium significari.

Fortè non tam nesciuit hanc trium Argumentationis terminorum interpretationem, quam dissimulauit; ne cogeretur agnoscere quæcunque his quindecim Nodis coniecit, quibusque ad certam fidei definitionem putar se quæstionem susceptam promouisse, sophismata, non Argumenta hâc, quam vocant, quatuor terminorum fallaciâ laborare: hoc enim vno omnia continentur; nulli Catholicorum negandum est partui ventris, seu Virgini ex Anna Matre, quod Thomistæ concedunt partui mentis, seu doctrinæ sui Magistri: Atqui huic post multas retractationes, longæque studia probabiliter asserunt immunitatem ab erroribus, maximè contra fidem: Ergo vindicanda est Deiparæ primo conceptus instanti, certâ fide omnimoda immunitas à geniali labe.

Mira est huius Argumenti apud Aluam vis & efficacia, apud artis peritos vix Argumentationis formam ullam habet; quia non quatuor, sed mille terminorum fallacia laborat. Referebat vero plurimum ad institutum Patris Aluæ, numerum terminorum Syllogismi, non vero sensu extremis duobus & medio, sed Maiori, & Minori Consequentiam metiri, ne frustra videretur, tot tantâque scripsisse. Quare lepide excepit quæstionem Patris Belgæ ex nostro Ordine Philosophiæ Professoris; *Lector ille Iubilatus, & à vobis sugillatus, scis quid sit Argumentum; & quod debeat constare tribus solum terminis, & non quatuor, scilicet Maiori, Minori & Consequentia: omnia ista à multis annis didicis, & docuis ille Lector Iubilatus Minor.*

Solutâ aduersarij quæstione, suam illi reponit, desiderat vicissim scire Lector ille Iubilatus Minor à Professore isto Philosophia maiore, qui docet argumenta Summularum Lectoribus Iubilatis, ut videlicet dicat, quot funiculos debeat habere nodus; nescio an hâc subiectâ quæstione grauius in Priscillianum Grammatices Magistrum, quam superiori solutione in Aristotelem Dialecticis regulas dictantem peccauerit. Sed omissis his nugis, paulo altiora canamus.

Condonari forte, aut excusari poterant ista, quod incredili in Deiparam affectu abreptus, non tam quid posset, quam quid vellet attenderit: facile enim incautus imponit zelus in speciem bonus, cui scientia, quâ regatur, defuerit; ut mirum non sit in Controuersiâ obscurissimâ pluries cespitasse, velut ebrium, non à vino, sed nimia sui fiducia, & aliorum contemptu: Quî enim fieri potest, ut Scriptor nullis instructus præsiidiis, rem omnium maximam effectam daret, cui etiam peritissimi, & eloquentissimi succumberent, aut inuiderent?

Quare indulgendum illi censeo, quidquid ex ignorantia, in his iuris quæstionibus difficillimis, à vero longe delapsus scripsit: cuius generis sunt fere errata, quæ hactenus collegi, & refutavi. Sed quæ duo è nostris Patribus Belgæ, Franciscus Iansens Elinga, Louanij Philosophiæ Professor, & Martinus Harney Sacræ Theologiæ in Academiâ Louaniensi licentiarus, ex primâ & alterâ eius Nodorum editione, suis eruditis Apologiis latè prosecuti

prosecuti sunt, & castigauerunt hallucinationes, vix ullam veniam merentur: tum quòd ad res facti, quæ sensibus etiam parent, & obuia sunt, pertineant; tum quòd monitus, nec defendere posset, eâ incredibili pertinaciâ, noluit emendare, nouisque ac grauioribus erroris cumulauit; quæ eius institutum, quo vno excusari poterat, aut se tutari, prorsus euerit.

Mirum est quam præposterè causam per se sanctam Immaculatæ Conceptionis suscepit, & prosecutus sit. Nam cum omnino conueniret hanc à geniali culpâ Deiparæ immunitatem iis attribuisseret, quæ longè abessent à vitiis ex eâ communi corruptelâ in genus humanum deriuatis, nihilque resiperent illud genus mali, à cuius contagio Deiparam semouere vnum erat consilium & votum: Ille contra alienissimam ab hoc pio instituto vindicationis rationem inuit, in quam, quidquid ex illo omnium malorum fonte in nos defluxit, passus est redundare, & totis viribus deriuauit.

Hoc vno fortè nesciens, & imprudens, quam vrget causam oppidò iuuat, quod suis quindecim Nodis, mali ex parentibus, aut veriùs peremptoriis, à filiis excepti magnitudinem, grauitatèmq; suo exemplo voluit demonstratam: vt piaculum videri possit, post ista experimenta, velle Deiparam, vel vno instanti tot vitiorum origini obnoxiam fuisse. Hoc saltem commodi ad suum institutum suis potius malis, quàm Argumentis retulit, & emeratus est. Quid enī illius contagij immanitatem apertius euincat, quam quæ inde in illius descriptionem ex eo fonte promanarunt labes; nempe sui laudatio, & aliorum vituperatio perpetua; illud *Pondus* & *pondus* ex Sapiente Deo execrabile, quo res nostras, & alienas metimur, discrimine adeo iniquo; vt quæcunque ad nos pertinent, etiam modica & nulla, amplissima sint, & omni laude maiora; quæ vero alios ornant, poenâ sint, quàm præmio digniora. Non poruit sanè aliunde quam ex eâ malorum communi origine, præposterum adeo iudicium proficisci quod vbique exercet Petrus, vt nullum in amicis vitium, vix ullam in Aduersariis virtutem agnoscat; vt ex vero nihil, & ex causæ meritis, omnia vero hæc suo affectu constituta velit. Quid mos ille perpetuus alios sarcasmi & amarum

lentis dictis lacerandi, dum videri vult laudare : Quid evidentissima quæque negandi licentia , & par incredibilia affirmandi fiducia ? Quid in alienis leuissimis , aut nullis erratis , supra modum augendis , suisque grauissimis eleuandis solertia , aut defendendis pertinacia ?

Dies me deficeret , si vellem singula huius scriptionis vitia per censere : cum ex modestâ monitione fere spem emendationis abstulerit, votis tantum cum illo agi posse vid eo: meliorem illi mentem optare nunquam desinam, sed vix ausum sperare : quandoquidem à duobus è Patri-tribus nostris correctus , præterita mala visus sic auxisse secundâ Editione suorum Nodorum , vix apice mutaro , eorum quo falsa inuictis Argumentis demonstraerant. Quare cum vnus nobis supersit locus ad vota , illis indulgemus. Utinam te , Petre , nosque Deus respiciat, & potentissimâ gratiæ vi, depulsâ ex animis nostris cæcitate & peruiaciâ, sui docibiles faciat, vnus veri amantes, & legitimæ in Deiparam pietatis sectatores , & vindices ? Utinam quam attingisti causam sanctius tractasses ? Atque ut voti mei tibi ratio constet , & omnibus probetur, paucis demonstrandum suscipio , quam iniuisti viam defendendæ causæ , parum adiumenti contrulisse, & tibi non bonum nomen peperisse.

PARAGRAPHVS SECVNDVS.

*Incredibilia in Diuum Thomam conuitia Petri
Alua , & paria de se encomia.*

FREQVENS est apud Theologos multis enodandis difficultatibus opportuna distinctio rerum , quæ instant agendæ , partim operantis , partim operis statum & finem spectare , nec rem posse absolui , si quid ex illâ paraturâ operantem deficiat , aut opus. Hactenus probatum est, Aluam malè consuluisse dignitati , & fini operis , quod moliebatur , cum prætermisissis , quæ pietatem Immaculatæ Conceptionis muniebant melioribus Argumentis, leuissima & futilissima suffecit. Sed multo grauius , ut iam significauimus , & probatum eo , in aliud ca-

put, quod operantis, ut vocant, animum, finemque spectat, peccauit.

Toto plane cœlo aberrasti Petre, ab eo, quem Deipara tuis clientibus affectum indicit: neque enim Virgo humillima potest non abhorreere ab encomiis, quamlibet eximiis in se collatis, quæ nimiam harum laudum prædicatione & maiori in viros grauissimos & sanctissimos maledicentiâ corrueris. At qui sunt hi Nodi, si ex affectu quem vbique prodis, illos meriamur, quam colligationes iniquitatis, quibus tuas laudes, cum aliorum conuitiis, & contumeliis sic neſtis, ut non minus propriæ auidus, quam alienæ gloriæ impatiens videre? At nescio, quam demereri vis, Sanctissima Virgo, quid horum peius auerſetur, cum humilitati, quâ de se sentit demissiſſimè, parem in alios charitatem habeat, & omnibus eorum bonis, ac præ cæteris famæ, vitâ etiam precioſiori, consultum velit. Verum has virtutes Virgini acceptiſſimas, quibus illius gratiam inire poteras, quam eius clientes conueniebat, negligentius habuisti, ne dicam te grauissiſſimè læſiſſe.

Quid enim apud illam inuidiosus cogitari potest, quam illud de te encomium, quod libello, cui Titulus Trutina Mariana, tuâ operâ, tuisque expensis edito Bruxellis, subiecisti legenda his verbis *P. F. Petrus de Alua & Astorga. in suo libro nouissiſſimè edito, sub Titulo: Nodus indissolubilis de conceptu mentis, & de conceptu ventris, de quo tot merebatur Elogia, quot litteras habet.* Tolerari utcunque poterat hæc in humilitatem culpa per se maxima, nisi illam cumulaſſes grauiore in charitatem, nec minus in Diuum Thomam conuitiorum, quam in teipsum encomiorum prodigiis fuiſſes.

Sepone, rogo, paululum, qui in te perſtrepunt, affectus, & te Sancto Doctori confer. Credisne saluâ modestiâ, paria cum illo te facturum, eruditione, & meritis in Eccleſiam, & si velis etiam in Deiparam? Si id tibi perſuaſeris, quod vix puto; nimium tibi fidis; si aliquod inter te, & ipsum discrimen agnoscas, quâ conſcientiâ edi curaſti, te tot Elogia meruiſſe, quot extant litteræ opere benè longo, exorſus illud ab horrendo in Diuum Thomam conuicio.

Quid enim ſignificat illa quam ludis fabula Sabæ no?

mine filij Bochri Abelam profugi , incentoris turbulentissimi rebellionis in Dauid , & nomine Ioab ciuitatem obsidentis , & vnum Abelam deposcentis ad mortem , promissâ Abelæ , quo confugerat , veniâ , si à ciuibus in manus sibi traderetur. Quid istis ambagibus & figuris significatum voluisti , nisi te Reginæ cœlorum , vti Ioab Regis Dauid nomine , Diuum Thomam ad mortem insequi , quasi Sebam in Deiparam rebellem & sacrilegum , vt quas commeruisse putas , tibi pœnas det læsæ-Majestatis Deiparæ : & si hunc rebellem dedamus tibi summo Virginis exercitus Imperatori in manus , te ciuitati Abelæ & toti familiæ Dominicanæ parcurum ?

Hæc in Diuum Thomam cœlo receptum , & Sanctorum albo relatum , scripsisse Aluam , & supplicia damnatis digna , à Beato sumenda , eò altius inclamare , quod fabulam legentibus interpretandam obuoluit alienis nominibus ; quis non miretur & obstupescat ? Excusarem hominis consilium , si Diuum Thomam suspicari posset criminis reum , quo illum grauat , quasi author esset dogmatis , cuius causâ adeo inuidiosam illi personam impo- nit , & sibi honorificentissimam assumit. Sed quid peccauit Diuus Thomas , quod communis Doctoris nomen sortitus , à receptâ suo sæculo opinione communi , præ modestiâ & humilitate , non sit ausus recedere , nec notam inducere ? Nondum enim illi contigerat legere Libros & Tractatus de hoc Argumento antiquorum Scriptorum , quos P. Alua eruit tot & tantos , vt si illi fides sit , numero faciliè vincant , quas supra viginti operum voluminibus habet ipse , etiam litteras & litterarum apices.

Si attendisset Petrus hæc omnia Diuo Thomæ incomperta , nec alios illi notos aut lectos Scriptores Ecclesiasticos , quàm qui aliud sentirent , fortè hanc culpam condonasset , aut certè minus graues exegisset , quam inter Beatos riri solemnè accensus , sibi pœnas sacrilegij daret , è cœlo in infernum derurbandus. Amari- or sanè hic zelus est , quam vt Deiparæ approbari possit , miriúsque putat cum illo agendum , quem , si quid peccauit , excusabat sui sæculi opinio communis , in quam nondum tot testes instaurauerat Petrus , vt posset respicere.

cere: & si hoc crimen nolis, aut non possis, Petre, condonare, cur aliis immeritum grauas?

Omissis pluribus, ita in Diuum exandescis, vt nihil dubites scribere primæ tuæ Nodorum editionis Fol. 238. & secundæ 236. *Multo duriore nos funiculo implicitos, non posse clamare, imo nec musitando dicere, doctrinam D. Thomæ quoad 222. Art. reprobata[m] & condemnata[m], & sub penâ Excommunicationis exclusam à Scholis*; Catalogi vero damnatarum ex Diuo Thomæ propositionum primam ais Deum non esse Trinum & Vnum, & huius damnationis nullam superesse ais dubitationem ex instrumentis authenticis, quæ penès te habes: Vis ergo Diuum Thomam Vnitatem naturæ diuinæ, Trinitatem personarum cum impiis, & atheis substulisse. Forte vt Sancti Doctoris similium consortio miseriam vtcunque leuares, Diuum Petrum illi adiunxisti, erroris & damnationis, socium: sic enim habes tuorum Nodorum secundæ editionis, fol. 16. *Capiendo doctrinam Diui Petri de omnibus ad fidem pertinentibus, constat aliquā sui parte erroneam, merito ab Vniuersitate Parisiensi, fuisse damnatam.* Fateor maximo fore solatio Diuo Thomæ, sibi communem damnationem cum Petro, cui vult cognomen Petrus Alua falso promissam à Christo fidem perennem, & incorruptam, *Oraui pro te Petre, &c.* & illi imprudenter Ecclesiam astruxisse super hanc Petram, &c.

Æquo & læto animo feret Diuus Thomas, se damnatum 222. erroribus, ab eodem Actore, qui in Apostolorum Principem, similem hæresis dicam inscripsit. Leuior etiam erit altera accusatio, ex eodem Petro p. 553. *Hic obiter nota, Opuscula Angelici Doctoris habere aliquos errores magni momenti, & grauissimis scatere Opusculum contra errores Græcorum.* Aliam accusationem nescit. *Istius, inquit, fol. 685. errata pauca & parua sunt, respectu illorum, quæ inueniuntur vitiosa in catenâ aureâ, in quâ nulla est authoritas Sancti, vel non Sancti, quæ non vnum, vel duos, sed plures habeat errores.*

Famelico nullus etiam lapidosus insipidus est panis, turbida aqua sitibundo ambrosia est: ita Petro calumniarum in Diuum Thomam auidissimo, in deliciis sunt calumniæ crassissimæ, de rebus quæ nullam speciem, vel leuissimæ

culpæ habeant, quæ summam laudem mereantur, quas veluti grauissimos errores traducit: atque hoc nomine duo nobilissima opera contra Græcos, & catenam auream infamat. Huius vero criminationis occasione, quasi in Diuum Thomam beneuolus, vult ab illâ accusatione leuare, crepto sibi vtroque opusculo. Videtur illorum parasitarum industriam imitari, qui inter conuiuandum, fercula delicatiora spuris conspurcabant, vt conuiuas ab illis contingendis deterrent, & soli helluant. Ita coniectis in catenam auream sordibus, quadam commiserationis specie suo Authori eripit, ne eius famæ noccat, nec tamen dubitat sic fœdatum vni è suis vindicare; nam Folio 45. secundæ Editionis, asserit transscriptam à catena magna F. Pontij Carbonnelli Magistri ac Præceptoris Sancti Ludouici Regis Francorum, & ex Seraphicâ Familia: idque duobus Libris, quorum vnum; *Certum quid*, alterum, *iudicium Salomonis* inscripsit, ait efficacissimè probatum.

An non liceat hic cum Ambrosio exclamare? *Quanta in vno facinore sunt crimina?* Charitatem in D. Thomam simulat, vt calumniâ tegat, & calumniæ legitimi ac nobilissimi operis furtū & plagium adiungat. Vel à Carbonello tuo vis prodiisse opus à D. Thoma transcriptum, quale summâ humanitate illi abrogas corruptum, vt eius confulas honori? Si ita sentias, ergo sordes à D. Thoma abstergis, vt iudicio Salomonis in Franciscanum regeras: vel ab isto vis integram doctrinæ, scelerisque putam emanasse catenam, & à Diuo Thoma vitiatam? Si id contendas, dum videris Diuum Thomam excusare ex fictâ charitate, tecum pugnas, & duplicis criminis, alieni operis corrupti, & suo Authori legitimo sublari peragis reum. Quid potuit flagitiosius moliri etiam sceleratus in Sanctum, quam quod specie charitatis Diuo impingis? Si iisdem corruptelis vitiatum & editum censeas à Carbonello, quas in Diuo Thoma vis excusare, tuo iudicio Salomonis, & libello *Certum quid*, Fratris accusatorem agis, non eius gloriæ vindicem. Quis ista capiat? Cur à te ipso dissentis? Vt tuas technas paucis aperiam, & dissoluam, triplicis in Diuum Thomam criminis fictæ charitatis, veræ calumniæ, & furti conuiceris. Sed de hoc forte statim plura.

PARAGRAPHVS TERTIVS.

*Vindicatur Diuus Thomas à calumniâ erroris
contra Aluam, & falsi contra Ioannem
Launoium.*

INfortunii genus reputo, impositam mihi contra hos
Iduos sæculi nostri Aristarchos congregiendi necessi-
tatem, quam eluctari non licuit; cum Alua grauissimo-
rum errorum, Launoius falsi ex inscitia, aut malâ Fide
nostræ Familiz summum decus & quintum Ecclesiæ
Doctorem, Diuum Thomam traducant. Quamuis mul-
tis conueniant maxime illâ indole impatiēte quietis,
quâ nec se, nec alios frui sinant, & natiuâ prurigine su-
gillandi, quæ ex aliis à proprio sensu & affectu dissen-
tiant, receptas opiniones futilibus Argumentis laces-
sendi, obloquendi de viris illustribus; nolim tamen
Aluam, ingenio, eruditione, & stilo, aut etiam candore
Launoio exæquare: vel hunc iisdem, aut pari gradu ma-
lis laborare, quibus ex geniali culpâ indicaui, & fusiùs
persecuturus sum, Aluam obnoxium esse.

Nam cum sit antiquitatis longe callentior & forte na-
turâ ac studio ad morum ingenuitatem magis cōparatus,
non eò audaciæ prouectus est, quod sibi singulare assump-
sit Alua, vt euidenter falsa quæque asserat, aut aperte
vera neget nullo verisimili argumento. Sed quisquis
hominem priuatim, seu publicis scriptis intimius no-
uerit, etiam ex amicissimis, non abnuet meum de illo
iudicium, aut verius votum. Optandum plane, ne mo-
res ingenuos corrupisset nimio suarum cogitationum
amore, & alios iure, vel iniuriâ carpendi, in naturam
inductâ consuetudine. Vnde ad minus, vt cætera omit-
tam, illud incommodi accidit, vt magnum potius,
quam bonum nomen videatur ambire, & doctiores
viros voluisse inumbrare, neque, vt conueniebat sa-
pienti Theologo, satis cordi fuerit effarum illud medi-
corum, *malum bene positum ne moueto.*

Plura enim ab heroicis Temporibus communi pio-
rum opinione recepta, quæ nihil Fidei aduersa, pietati:

etiam opportuna, ausus est, longe debilioribus, quam niterentur Argumentis lacessere; nullo alio operæ pretio, quam ex summâ morositate comparati sibi nominis, & iustis possessoribus, saltem ex probabili opinione iuris plerumque inique erepti. Moderatissime de scriptis contra Diuum Thomam Epistolis in Authoris gratiam pronuntiauerim, si illius generis scriptionibus accenseam, à quibus nisi nimium sua adamaret, aut penes se esset scripturiendi Cachoetem cohibere, præstitisset superfedere, aut inter amicos pati ut tantum legerentur: quia magis promptum & iustius erat, Diuum Thomam ob tanti nominis, & maximorum in Ecclesiam meritorum reuerentiam defendere, quam illi quidquam impingere, præter maximi Theologi officium, aut Theologorum Principis dignitatem fuisse admissum. Nam si veris agere liceat, nec causa malignè inuertatur; aliud nihil potuit illi vitio imputari, quam quod Urbano IV. iusta, id est, examen aliquot ex Patribus Græcis testimoniorum, præcipienti, sincerissime paruërit, semouerit ab illis locis, quæ aliquam erroris, aut vocis insolentis auribus Romanis speciem præferrent; nec quasi falsa proseripserit, quæ falsi conuincere non poterat, nec aliquâ similitudine veri carebant: sed suâ passus sit probabilitate frui, neque in maius à se aucta partium studio, nec nimîâ morositate (qualem vbique affectat Aduersarius) imminutâ.

Sic enim præfatur Sanctus Doctor *libellum ab excellentiâ vestrâ, mihi exhibitum, Sanctissime Pater Urbane Papa, diligenter perlegi, in quo inueni quamplurima ad nostræ Fidei assertionem utilia & expressa.* Et addit: *cum eius libelli fructus inde impediri posset, quod auctoritatibus Patrum contenta quadam dubia viderentur contentioni dare occasionem, & calumnia ideo; ut remotâ omni ambiguitate ex auctoritatibus prædicto libro contentis, fructus purissimus capiatur, proposui quæ dubia esse videntur exponere, & postmodum ostendere, quomodo ex eis veritas Catholica Fidei doceatur, & defendatur.* Sed his dubiis & scandalis non annumerabat Sanctus Doctor Petri Primatum in totam Ecclesiam, ne exceptis quidem Apostolis, quos cum Bernardo Christi ouibus Petro creditis accensebat, quasi Pastori ordina-

rio. *Ut capite constituto*, ex mente Hieronymi, *Schismatis tolleretur occasio*. His etiam erroribus non reponerat, servatum Petri primatum à Pontificibus Romanis perpetuâ successionem, quasi ordinariæ potestatis, cum Apostolorum cæteri, nullam in se mutud, & delegatam tantum in totum orbem hâc amplitudine in ipsis desinendam, nullo successore eo ambitu excipiendam, de quo statim plura.

Fateor dissimiliorem Launoio Dinum Thomam, quam ut convenire possent instituto scribendi aut sentiendi genere: Nec dubito quin illi religioni fuisset, aut maximo sibi dedecori vertisset, quæ ad maximam sui nominis gloriam refert Launojus, evulgasse. Permississet haut dubie, Gallos receptâ à Diuo Dionysio, tanquam Galliarum Apostolo, Fide frui, & gloriari. Non fraudasset Phocenses Diuæ Magdalena, eiusque familiaris appulsus ad suos portus, & apud se aliquot annis vitæ sanctissimæ transactæ, monumentis, in suæ gentis decus sempiternum. Non credo deturbaturum unquam Carmelitas Patres conceptæ suæ originis ex Elia & Eliseo repetitæ, vel Scapularis Simoni Stoch à Deiparâ pro magno munere concessi piâ opinione: nec Monasteriorum plura à iuribus longâ nedum annorum, sed etiam sæculorum serie confirmatis depulsurum: quia habebat meliora scribenda, & subodoratus etiam, ut erat emunctæ naris, aliquid incerti, aut minus verisimilis, ex medicorum præcepto, malum bene positum noluisse primus mouere: atque ista longâ traditione rara & firma, quæ nihil obsunt fidei, profunt etiam pietati, in disputationem reuocare, credidisset pertinere ad illius generis quæstiones ab Apostolo damnatas, quæ lites generant, non ædificationem.

Sed esto, aliquid horum sibi permisisset, quod nunquam concesserim; illud apud me omni certo certius est, dubia & in utramque partem controuersa, quæ facilem habent interpretationem, in deteriore partem assumpturum nunquam, multo minus suspectum alicuius falsi, quasi exerte falsa damnaturum, quandiu maioris, aut paris, vel si velis minoris probabilitatis contra, argumenta militarent. Nam si quando cuiusquam falsi, aut suspecti apud illum causa versaretur, Iudicibus in causa

capitis constitutam legem, sibi indictam ratus seruabat, ne quemquam publicis scriptis quâlibet Forensi sententiâ gratioribus, damnaret argumentis negatiuis, apositiue probabilibus nec conuictum, nec confesum.

Vtinam Launoïus eâ cum aliis, & cum Diuo Thomâ humanitate, & lege egisset, quam Diuus Thomas, nedum, in ipsum, seruasset, sed in Philosophos, vt Atheos disputanti sibi præscripsit. At quam longe ab illâ æquitate, cum Diuum Thomam quasi ex incitiâ linguæ Græcæ, aut dogmatum Fidei, aut de industriâ, quæ ignoraret, scribentem, reum peragendum suscepit, Epistolis ad amicos scriptis, quas iuris publici fecit. Explicari plane oportebat, quæ fuisset huius Opusculi contra Græcorum errores occasio, quis scopus, & finis; quid illo præstandum sumpsisset. Neque ad hæc opus erat longâ indagine, cum Opusculi Prologus & Epilogus exerte ista doceret. Sed hæc omnia tacenda censuit, quibus enarratis, nullus accusationi, sed summæ laudi locus erat futurus. At Launoio aliter visum, quia nolebat sibi perire occasione Diuo Thomæ, & Summis Pontificibus genuinum insigendi. Hanc vero captatam iniique reprehensionem Diui Thomæ, in caput Authoris recidere, duplici demonstrabo argumento: primum ipsius sancti Doctoris instituto, deinde, Epistolarum Launoij breui & validâ confutatione.

PARAGRAPHVS QVARTVS.

*Refelluntur Alua & Launoij accusationes,
ex ipso Opusculi contra Græcos instituto.*

Licet dissentiant plurimum Alua & Launoïus, in eandem tamen conspirant sugillationem Opusculi contra Græcorum errores, & videtur Launoïus secutus Aluam suorum Nodorum Fol. 684. dum ait: *Dogmaticum opus pertinere ad Fidei integritatem, & ita deuicare Diuum Thomam à veritate his auctoritatibus; vt omnes generatim sint vitiate, & aliqua omnino supposititia, quia non extant quibus citantur locis, & vt plurimam*

discrepant in essentialibus ab originalibus. Quæ omnia vitio vertunt Diuo Thomæ, quasi negligentia, aut malâ fide peccauerit. Ita uterque, quos vix possis attentata in Diuum Thomam accusatione, malæ Fidei vitio liberare. Id aliquot observationibus in Opusculum euincam.

Quod Iansenii deffensores post primam Innocentii X. constitutionem causabantur, propositiones Pontificio examine discussas, & iudicio damnatas, nullo Authoris à quo circumferebantur depromptæ respectu, sed fidem rei penes Episcopos Galliæ, esse, qui ad Sedem Apostolicam retulerant, iudicandas; quodque alterâ Alexandri VII. constitutio præsidium abstulit, in Authorem, perinde ac in assertiones inquisitum pronuncians; illud ipsum pleno iure sibi vindicat, nullâ vitiligatione Launoiï eripiendum Diuus Thomas: nempe subiecta à Summo Pontifice Urbano IV. ex Patribus Græcis varia testimonia, diligenter examinanda, vt referret quid veri, quid falsi haberent, aut virium confirmandæ Fidei Catholicæ, aduersus schisma Græcorum, attento magis ex contextu verborum, quem sensum haberent, quam quo ipsa Authores protulissent. Huic Pontificio imperio, vt iam relatis verbis luculenter testatus est, velim demonstret Launoius, quid Diuus Thomas Pontifici obsecutus peccauerit, contra legitimi Theologi officium; siue ex incitiâ, siue malâ Fide, aut negligentia culpam natam esse velis.

Dices à me gratis confictum illud genus præcepti, quo Diuo Thomæ iniungitur, inquireret, quem sensum facerent testimonia, non quo protulissent authores; neque reuera imperatam diligentiorē inquisitionem, an ita Patres Græci haberent. Sed hanc vitiligationem dispellunt prima Opusculi verba, quibus sanctus Doctor præfatur libellum Pontificis nomine exhibitum, quo hæc testimonia continerentur: perlata vero ad se horum Patrum volumina, vt legeret, & euolueret per aliquot menses, aut annos, illorum menti rimandæ, nusquam factum. Audio libellum missum, non Patrum Græcorum iniunctam lectionem.

At, inquires, hoc nomine, quo illum excusatum volo, damnari negligentia & temeritatis, quod inconsultis

Patrum locis pronunciauerit contra illorum mentem. Qui hanc accusationem virgent, non attendunt se pu- gnantia obicere Diuo Thomæ, hinc imperitum faciunt linguæ Græcæ, inde huius inscitiz pœnas dare volunt, quod libros tantum Græcè loquentes non consulerit : Mira est horum Aristarchorum sapientia : vt alicuius culpæ incusent sanctum Doctorem ; tria capita illis pro- banda sunt , non libelli tantum à Pontifice missi , sed Græcorum voluminum examen iniunctum, vt Pontifi- cem moneret, quo sensu essent interpretanda. Secundò si hanc diligentiam à Pontifice remissam adhibere vo- luisset sanctus Doctor, habuisse in promptu exemplaria Latine versa : nam si Græcæ Linguæ ignarum velis, satis est hoc illi vitio vertere, & summæ fuerit iniquitatis, eam accusationem nouâ cumulare, quòd ignorâ linguâ libros non legerit : quamuis verius putem, volumina vnde deprompta erant huiusmodi testimonia , plura, vel periisse, vel in Occidente fuisse desiderata.

Scio nonnullos è nostris agte ferre , obiectam Diuo Thomæ Græcæ Linguæ imperitiam , & contra hanc ac- cusionem audio longam & eruditam Apologiam pa- rasse, à quâ abstinui, rarus me tantæ rei imparè esse. Duo tantum dicam Sixtum Senensem à Diuo Thomæ hanc inscitiam non deprecari, eamque Diuum Augusti- num de se ultro fateri, quæ sane si vituperanda sit, tanti viri consortio, excusabitur ; maxime cum ab Augustino hoc Thomas differat, quod illius sæculo omnes fere, Diui Thomæ vero ætate, vix vlli Græcæ scirent, vt si inde aliquod velint in Diuum Thomam dedecus deri- uare, maius sit in Diuum Augustinum redundaturum, quod aliquo suo, Diuus Thomas vero tantum sui tem- poris vitio Græcè nesciuerit, & gratissimum erit hæc le- ui notâ grauiorem redimere & delere, quasi alicuius falsi aut plagij hac testimoniorum relatione suspectus fuerit.

Iis præsidii Diuum Thomam muniuimus, vt illum quisquis laceßere non desierit, canis latrator, non de- morsor sit futurus : Vnum superioribus addam, quo ex- peditior sit nostræ disputationis progressus ; triplex te- stimoniorum genus distingui oportere, quædam certa, alia falsa & commentitia, postremi ordinis & mediij,

dubia & probabilia. Launoïus, quæ Diuus Thomas ex Cyrillo, aliisque Patribus Græcis refert, ad secundam classẽ apertè falsorum reuocat: nos probabilibus & dubiis accensum. Hoc vnum suscipio propugnandum contra Launoïi Epistolas tres, quas breui refellam.

PARAGRAPHVS QVINTVS.

*Confutatio prima Epistola ad Antonium
Faurum.*

HOC habet incommodi nostra cum Alua, & Launoio disputatio, vt non liceat contingere, quid iuris habeat lis, quam quisque illorum prosequitur. Sed id tantum mihi permisi, vt quibus Alua imposturis Diuum Thomam falsi & plagii reum peragit, calumnias valide & modeste depellam. Non puto etiam mihi fraudi fore, si de primatu Petri, & Ecclesiæ Romanæ magis cum Bernardo, Perronio, Coeffetæo tribus immortalibus ornamentis Ecclesiæ Gallicanæ, & cum Græcis in Concilio Florentino Schisma ciuitatibus, quam cum iisdem post Synodum in schisma delapsis, quam cum Marco Anthonio de Dominis, cum Philippo Mornæo, & Blondello, quos vbique sequitur Aduersarius, assentiar. Quæcunque enim habet argumenta, ex his Ecclesiæ Romanæ hostibus deprompsit: nos contra aduersus illius, & sociorum impetus præsidia ex nominatis viris clarissimis extruemus.

Launoïus igitur, quæ ex Cyrillo pro primatu Petri, eiusque successorum refert testimonia Diuus Thomas, non solum incerta, quod vltro concedimus, aut suspecta, sed omnino comperta falsi probat: primo quod nullibi extant apud Cyrillum, opere, quod citatur titulo Thesauri: Ergo commentitia sunt. Confirmat Argumentum exemplo Diui Thomæ, qui subodoratus falsitatem ab illis citandis abstinuit 4. locis ex Summâ Theologiæ, cum plurimum ad causam conferrent, & vno ex illis vsus est Iunior Commentariis in 4. Sentent. dist. 24. Adde omnino supposititium esse, quod refertur ex Chrysostomo ad consulta Bulgarorum, quos cer-

rum est, fidem suscepisse 418. annis à morte Chrysostomi. His argumentationibus, aut potius Sophismatis infinita congerit, quibus putat falsitatis conuinci ea testimonia, quod toti antiquitati repugnent, quæ secus sentiat, quam quod Diuus Thomas Cyrillum loquentem inducat. Fateor priore illius argumentationis parte eleuari hæc testimonia, & ad probabilium classem pertinere: inter falsa autem reponenda, quod vnum contendit Launoïus, pernego, & meis responsionibus euincam.

Primo quod ab illis citandis abstinerit Diuus Thomas in Summâ, & semel, aut bis aliis Opusculis vsus fuerit: argumento est, non habuisse omnino comperta, quod vltro damus; & nisi Aduersarium innatus viros illustres carpendi mos, à recto deduxisset, Diui Thomæ sine dubio laudasset prudentiam; quod iis testimoniis vsus aliis operibus minus accuratis, à Summa semouerit, vbi è multis, quæ dici possunt ad rem, meliora seligit & validiora. Cæterum vt falsi contineat testimonia, probandum est illi ex opere Cyrilli inscripto Thesaurus, nullam desiderari partem, quod hætenus nequidem tentauit, nec illi contigisse, quod commentariis in Ioannem eiusdem Cyrilli (ne longius exempla conquiram) quæ quatuordecim libris continebantur, & supersunt octo: nam reliquos Clichtoueus attus est supplere. Quis nisi temerè, certum asserat nihil ex Thesauro amissum, cum de illius operis partibus sit maxima dissensio? quidam vnum tantum conficiunt librum in 35. assertiones partitum; alij in quatuordecim diuidunt, alij duos tantum numerant, & hoc verisimilius puto: quorum primus, qui superest, 35. assertiones habet: alter, vnde deprompta puro testimonia, eundem passus est casum, cum quatuor libris in Ioannem, qui desiderantur.

Scio Launoïum vix ista concocturum, quod ægre ferat sibi de Diuo Thoma, & de Sede Apostolicâ detrahendi ereptam occasionem: sed is est mos illi perpetuus, leuissimis coniecturis pondus demonstrationum asserere, vt certa & sancta conuellat. Sed, inquit, non potuerunt nisi per summam ineptiam Chrysostomo tribui consulta ad Bulgaros 438 annis post obitum Chryso-

Itomi Christianos. Si quod Aduersarius adhibet ingenij acumen in pungendis, & lacerandis viris sapientissimis, perinde ac defendendos admoueret; commoda occurrisset hæc excusatio: Theophylactum, & Euthymium Græcorum scriptorum, vti Boëtium & Symmachum hominum Romanorum, vltimos, fuisse Chrysostomi studiosissimos, & interdum illius breuiatores potius, quam Authores agere solitos: & cum Theophylactus fuerit Bulgarorum Archiepiscopus, credibile est eo, quod à Diuo Thoma citatur, opere Chrysostomum induxisse loquentem, & testimoniorum collectorem potius in Chrysostomum, quasi Authorem, quam in breuiatorem Theophylactum retulisse.

Si æquo sinus in viros bene meritos animo, audissimè ab omnibus excipietur hæc defensio: sed vix credo ad guttum fore Launoij, in sinistras cogitationes prioris; & licet æquior sit defensionis, quam accusationis conditio, & in illam charitas iubeat propendere; pauciter tamen, & boni etiam consulerem omnes Launoij in viros eruditos censuras acerbiores, si vel minimum ad huius nostræ defensionis probabilitatem accederent.

Hoc primo argumento, quod decem paginis prioris Epistolæ prosequitur, & initio alterius instaurat, expedito, quo totius causæ Aduersarij robur continebatur, obuia & facilis est solutio ceterorum: id commune omnia habent vitium, vt schisma Græcorum magis, quam cum Ecclesiâ Romanâ pacem initam Anthonij de Dominis, Mornæi & Blondelli respiciant officinam; neque enim alia habet, quam quæ inde depromit argumenta, cuius generis est secundum, quod lego primæ Epistolæ p. II, in Synodo Florentinâ Sessione II. *Fuit, inquit, qui palam dixerit, de primatu Petri, se habere multas sententias: sed longè ante omnes Cyrilli in Thesauri; verum, inquit homo iste Sess. 25 obmutuit cum loqui debuisset etiam stentore clamorior.* Hinc concludit, quæ gesta sunt in Florentinâ Synodo euincere validissimè testimonia illa supposititia esse.

Ita sanè apud Aduersarium, qui argumentis negatiuis, aut verius sophismatis, & fraude sic agit vt præcipua causa, quam insectatur, præsidia taceat, & omnia velit eo contineri, quod se facile euersurum putat, his ma-

lis artibus legitimo Theologo prorsus indignis; Ecclesiæ Romanæ primatum contra Græcos comminiscitur solo Cyrilli testimonio ex Diuo Thoma repetito munitum, & identidem quæritur, cur non fuerit aduocatus Cyril-
lus, & Thesaurus ille apertus. Sed hæc verba sunt otiosi hominis, aut sophistæ, non serio agentis. Aduersus Græcos suppetebant meliora iis testimoniis, quæ inter probabilia, non certa reposuimus: & cum Græcis certatum esse, quam credat, aut forte vellet pro primatu Ecclesiæ Romanæ felicius, demonstrat ab Imperatore Græco, & Episcopis, qui aderant summo consensu Pontifici Romano, ut totius Ecclesiæ aspectabili capiti præstita obedientia & fides, felix futura, nisi heu! nimium Græca fuisset: timeo ne Aduersarij sit melior, aut feliciorẽ exitum consecutura.

Tertium ex Cyrilli centonibus instaurat argumen-
tum, quo primatum Petri in Apostolos, & iubeinde Summi Pontificis in Episcopos euersum clamat: quia nihil concedit Petro, quod aliis Apostolis neget. Vnde post relata per quatuor paginas hæc testimonia, con-
cludit, *quos sunt in singulis locis commata, tot argumenta, quibus relata apud Thomam, Cyrilli testimonia, Cyrillo penitus abiudicantur, & illorum vindicationi fortiter interceditur.* Adiungit aliqua ex Petri successoribus, qui sublatâ omni prærogatiuâ, æqualitatem inducunt, & agnoscunt cum aliis Episcopis. Omitto hæc protrita esse ex Mornzi, Blondelli promptuariis precario emendicata, millies à citatis Authoribus profligata, & ne verbum quidem eorum solutionibus reponi. Ad id argumentum duo Respondeo: primum ex Cyrillo apertiora suppetere, quibus testimonia Diui Thomæ roborentur, iis quæ excerpfit, ut illa eleuet.

Non dubito, quin Launojus cum Blondello, & Mornæo, totis viribus intercessurus sit receptæ inter Catholicos sententiæ, Cyrillum in concilio Ephesino Celestini legatum, eius vice Concilio moderatum fuisse, ut probat Coëffeteau lib. 3. contra Spalatensem ex Euagrio libro 1. ca. p. 6. cuius *Celestini locum*, ait, obtinuisse, & ex Liberato cap. 5. testante *Celestinum dedisse vicem suam Cyrillo per Epistolam*, quæ ita habet: *Quamobrem nostra Sedis auctoritate ascessâ, nostrâque vice, & loco, cum po-*
restate

sestare vsus eiusmodi non absque exquisitâ severitate sententiam exequeris. Hinc Prosper in Chronico ait, Nestorio præcipue restitisse Cyrilli industriam, & Celestini auctoritatem; ex qua Cyrillus Epist. 2. ad Nestorium ait, non nisi ex præscripto Celestini Nestorium damnaſſe, & sacris ei interdixiſſe. Hæc euidentiſſe Romanæ Sedis primatum ipſa Cyrilli ſententia, quam centones ex illo à Launoio conſuti æqualitatem probant.

At, inquires, contra ſtant Chryſoſtomus, & ipſemet Celeſtinus, Siricius Papa ad Episcopos Illyrici, Pius I. poſt Petrum decimus Pontifex, qui Marcionem à Patre Episcopo ob conſtupratam Virginem, Eccleſiâ pulſum, abnuſit reſtituere, quia contra ſpectatiſſimum Collegam Patrem tuum nihil moliri poſſumus. Ad hæc Reſpondeo: quidquid ſit de aliis Apoſtolicæ Sedis iuribus, de quibus nolo hîc diſputare; certiffima eſſe duo ſuperiori Paragrapho paucis perſtriſta, fuſius Sect. I. explicata, de bicipiti capite Eccleſiæ Romanæ; vnicum plane eſſe ex Petri poteſtate ordinariâ in totam Eccleſiam, ne exceptis quidem Apoſtolis, cuius ſucceſſio indiſſolubili vinculo, morte à Petro obitâ Romæ, huic Eccleſiæ connexa ſit, vt luculentiffimè Bernardus diſſerit de Conſideratione libro 2. cap. 8. cuius verba omnes Launoij technas, & machinas infringunt, ſic enim Eugenium alloquitur. *Qui es tu? Sacerdos magnus, Summus Pontifex, tu Princeps Episcoporum, tu heres Apoſtolorum, poteſt ſe Petrus, vñctione Chriſtus: tu es cui clauſe tradita, cui oues credita ſunt: (& quali præſagâ mente Launoij effugia occupaturus) Sunt quidem, inquit, & alij cali ſanitores, & gregum paſtores, ſed tu tanto glorioſius, quanto & differentius vtrumque præ cæteris nomen hæreditasti. Habent illi ſibi adſignatos greges, ſinguli ſingulos, tibi vniuerſi crediti, vni vnus. Hinc progreditur ad poteſtatem Petri in Apoſtolos. Nec modo, inquit, omnium, ſed & Paſtorem tu vnus omnium Paſtor, vnde id probem quaris ex verbo, inquit Bernardus, Domini: cui enim non dico Episcoporum, ſed etiam Apoſtolorum, ſic abſolute. & indiſcreſe commiſſa ſunt oues? Si me amas Petre, paſce oues meas quas? Illius, vel iſtius populi ciuitatis, aut certi regni? Oves meas, inquit, cui non planum, non deſignaffe ali-*

quas, sed adsignasse omnes? Nihil excipitur, ubi distinguitur nihil.

Hæc non argumenta sunt, sed fulmina, quæ Launoij effringant præsidia: Posset forte Bernardus alicuius adulationis suspectus haberi, nisi præter, eximiam sanctitatem, quæ id genus vitij ferre non potest, hanc calumniam liberrimis admonitionibus non fuisset amolitus. Nihil ergo apud Bernardum certius illâ primatus Petri duplici dote potestatis ordinariæ, & amplitudinis in omnes, nullâ Christi oue exceptâ.

Sed antequàm ad alia progrediar, non possum audentem, & iniquam Aduersarij in Diuum Thomam censuram præterire. Primo è quatuor locis ab illo notatis, quibus sanctus Doctor abstinerat à testimoniis Cyrilli, non quasi falsis, vt putat censor, sed quasi minus certis, quæstione 1 art 10. ex 2.2. ad Summum Pontificem pertinere ordinationem symboli inde probat, quod illius editio facta sit in Synodo generali, cuius congregandæ ius sit penes Summum Pontificem. Hanc argumentationem Launojus his verbis carpit, *contradicientem inuolues, si Thomæ rationes ad Dialecticorum regulas exigantur.* Ego contra repono, maledicentem Diuo Thomæ, & Summis Pontificibus Launoium euinces, si eius censura ad certas Theologiæ regulas exigatur. Putat enim ex præiudicatis opinionibus, quæ omnino Mornæo, Blondello consentiant, & à Bernardo, Perronio, aliisque Ecclesiæ Gallicanæ Oraculis abhorreant, solam Summo Pontifici iure diuino Diuum Thomam auctoritatem concedere, euocandi Concilium, non conficiendi symbolum: quod cum sit ab eius mente, & à vero, atque vsu, & traditione Ecclesiæ alienissimum, vt multis demonstrant Perronius, & Coëffeteau, nullam Diuo Thomæ contradicentiæ, sed sibi indelebilem morosi & importuni notam inurit.

Quid vero ad ista reponit Launojus? Meras nugas, & ineptias. Pag. 16. contra Bernardum obnitiitur, nihil commendatione ouium, Petro supra ceteros Apostolos concessum; quia ex Chrysostomo hæc verba vni Petro dicta, ad sacerdotum singulos diriguntur. Quis non mireretur ista obiici quasi inuicta argumenta tollendæ Petri supra Apostolos potestati; quæ si obtineant, sacerdotum

minimus Episcopos exæquabit , cum illis sicuti Petro ouium curam indictam esse velit , sed an pari iure , & æquâ potestate ?

Quid mirum si Patres Græcos contendat inensos fuisse Petri , & successorum potestati , cum euerfam asserat ab iis , quibus maximè cordi esse oportebat , Pontificibus Romanis Siricio , Pio primo , Leone &c. Sed quid ista ad rem ? Non quærimus an Petrus , eiusque successor sit solus , & vnus : Sed an summus , & primus Ecclesiæ pastor : relata testimonia illud prius damnant , aliud vel non attingunt , nec opus est primatum vrgeri , cum de communi Pastorum officio aliquid sancitur.

Mirari subit hominis fiduciam , profert Syricij Papæ Epistolam , aliàs Ambrosij nomine editam , sed à Cardinali Francisco Barbarino suo Authori restitutam , & Alexandro VII. nuncupatam , *in quâ quòs periods , quot versus , tot , ait , fulmina* , quibus suppositæ Cyrillò authoritates , id est , primatus Petri euertatur. Bone Deus ! ita ne desipuit sapientissimus , ac religiosissimus Cardinalis , vt Alexandro VII. Epistolam sui decessoris dedicarit , quæ se deiiciat , tanquam fulmen à Sede , in quam se Dei prouidentia supra cæteros Episcopos promotum , certâ fide reputabat ? Quam bene huius Epistolæ nuncupatione Summum Pontificem demeruit ? Quis illud sacrilegij , aut insanix genus in tantum virum cadere crediderit ? Recidat ergo , necesse est , in eum qui ista scripsit , hoc solum nomine , quod Pontifex nolit sibi licere rem à Synodo maturè discussam , & iudicatam pro suo arbitrio , nullo æquiritatis respectu , ex plenitudine potestatis , non iustitiæ rescindere.

Eodem spectat repulsa Marcionis , quem inconsulto Patre , à quo fuerat loco motus , absoluere negat verè Pius Pontifex sibi licere : non quasi ius defuerit appellantem iudicandi , sed quod id honoris censuerit habendum Patri , & iudici , ne sententiam æquissimam rescinderet , quasi Paternâ charitate abdicatâ , filium durius castigasset , quam Ecclesiæ leges paterentur. Dum antiquitatis monumenta euoluit Launoius , vt Pontificum detrahat potestati , ex hoc inexhausto promptuario profert , quæ illasâ authoritate , eorum sapientiam commendent. Quid enim æquius , aut prudentius ,

quam noluisse Patrem crudelitatis accusare in filium, quasi eâ personâ abdicatâ, iudicem præter fas egisset? Quare immortalis prorsus laude digna est Pij modestia, & cautela, ne filium à Patre damnatum absolueret, cum non posset dubitare veniæ prorsus indignum scelus tantæ atrocitatis, ut æquissimum patrem potuerit in filium exasperare. Excute Launo antiquitatem: plurimum tuæ diligentiae debebimus, si his similia æquitatis Pontificiæ exempla deprompseris, & dum Apostolicæ Sedis ruinam moliris, præter tuam mentem immota eius perennitatis fundamenta ponis: docebis nos, quæ ignorabamus, Pontificum æquitatem potestati moderatam, & licet summam, multis partibus superasse: id est, potuisse multa, nihil nisi quod iustum sit, sibi permisisse; & Patris auctoritatem contra filiorum expostulationes tutatos fuisse. Sed hæc longius, quam disputatio patiatur.

Pagina 24. homo otiosissimus quærit, quo tempore fuerint eusa hæc ex Cyrillo testimonia, *Et quis eorum, ut loquitur, fuerit suppositor & malleator.* Ad novas calumnias cudendas, opus est nouorum verborum opifice, & subinde in aliquot eiusmodi testimoniorum verba, criticum agit, ut à Græcis Patribus aliena, nuper Diui Thomæ tempore, fabricata probet. De re incertâ, quæ coniecturas frustra exerceat, vitiligatoris est longius disceptare. Duo dicam: primum hæc testimonia videri elegantioribus verbis expressa, quam ferret tempus, quo scripsit Diuus Thomas, nec omnino abhorrere a sæculo magis exculcto. A me non dissentiet, quisquis ea expendit acuratius, si Criterio valeat, nec affectu partium laboret.

Deinde in censore prudentiam, & æquitatem desidero, quod Verba latina rigidius ad Græca exigat, quam adeo diuersorum idiomatum ratio ferat. Sed ille ex pumice prius aquam extundet, & quidlibet ex quolibet eliciet, ne taceat, quod sibi inconcessum sentit, & exclamet illud sibi in ore frequentissimum, *utinam perinde cordi insitum, amicus quidem Plato, sed veritas amicior*; quasi aliis ignota, ipsi soli se conspicuam præberet. Probarem hominis consilium, nisi ex aliis probabilia quasi apertè falsa damnaver, sua vero, ne quidem verisimilia iuberet

pro compertis haberi Quis istud imperium, Pontificio, quod vult labefactatum, maius & grauius ferat? Nemo sanè ad libertatem natus, & veritatem, cui vni falso gloriatur se studere & litare.

Huc euocat Ioannis à Montefono longissimas cum Facultate Parisiensi contentiones, de quibus plura, maxime Gersonis lamentationes infra referam, sed parum sincere dicam, Ioannis à Montefono ad Sedem Apostolicam prætextam scribit solis ex Cyrillo testimoniis, quasi cætera iura deficerent, appellationem. Aduersario vltimatissimum est sophismatis agere, nullis legitimis argumentationibus: & cum fallaciarum loca in numero habeat, omnium familiarissimus & perpetuus est illi, quod vocant, à non causâ, quasi perpetuâ & vnicâ rei, de quâ agitur, causâ. Sic hoc loco argumentatur, à lite Ioannis Montefoni, quasi ad Summum Pontificem appellandi incertis Cyrilli testimoniis potiora non haberet exempla Athanasij ad Iulium, & Chrysostomi ad Innocentium, ab Orientalium Episcoporum iudiciis confugientium. Antiquis exemplis recentissimum, & nuperum adiungere licet totius cleri Galliæ, Facultatis Parisiensis hinc, & inde Iansenij defensorum, qui vno consensu Innocentij X. iudicio quinque famosas propositiones subiecerunt.

Dicit Launoius, hos omnes deceptos relatis ex Cyrillo testimoniis, quo vno nomine has appellationes sibi sedes Apostolicâ vindicavit. Ne causæ inuidiosissimæ, & æterno silentio sepeliendæ Ioann Montefoni memoriam refricem; sat fuerit dixisse, omnium fidei & religionis grauiorum negotiorum iudicium ad Sedem Apostolicam reuocari posse, & aliquando debere, duo Ecclesiæ Gallicanæ lumina Perronius ad Regem Angliæ, Coëffeteau contra Mornæum & Spalatensem, apertius longâ Ecclesiæ traditione, & validius probasse, quam Launoij cauillis ius illud vel minimum lacessiri possit. Tolle inuidiosa nomina solius & vnici iudicis, & tum facessent hæreticorum, quas congeris, criminationes. Non dubito, si Launoius vixisset eâ tempestate, quin minus votum pacis Gersonis, quam Alliacensis contentiones esset probaturus. Intempestiua plane est, quam ex Lyzано, & ex Ochamo refert Ioannis XXII. vt priuati

Doctōris singularem opinionem, acius à Dominicanis, quàm à Franciscanis impugnata; quia isti procul, illi cominus intercesserunt, nihil illius faciem reueriti, veritatis causâ.

Plurimum est, maxime suo sensui pertinacius adhaerentium morbus, à quo optarem Launoium remotiorem, ut icterio laborantium more, oculis & cogitationi perpetuo illis obuertantur, quæ animum res occupare: & cum testimonia ex Cyrillo relata insectanda, & falsi conuincenda suscepit, nec dubiorum loco hætenus potuerit semouere; omnes eò refert discordias, aliunde sine dubio natas, ut sicut de Religione Lucretius, nihilo meliore successu, licet minùs impio, ut reor, consilio exclamet, tantorum hæc testimonia fuisse malorum causam.

Non puto veriora esse, quæ de se pollicetur, quæ Epistolam claudit expositulacione, quæ totum impleuit. Promittit, *si qui de se merito conuerantur, inuenturos Theologum, qui se dicto citius corrigit; & correctoribus suis, ut amicis benefactoribus gratias agat, quam plurimas.* Non facile dicti fidem absoluet, nec credam etiam, Augustini, quod sibi sumit, secuturum consilium; dum video editum ab illo sancti Doctōris exemplo, librum retractationum: nam expectationem meam faller, aut vincet, si hæc reimittitur Augustinum, cum non magis exemplum modestiæ, & humilitatis, quàm de gratiâ sententiam Augustini, unde ex humilitate natum est consilium retractationum, videatur probare, & sequi. Faxit Deus ut falsus sim, & falsi accusatum Diuum Thomam absoluat, ut se purget, & stet promissis.

PARAGRAPHVS SEXTVS.

Confutatio Epist. 2. & aliquot obiectionum, quæ ex priore supersunt.

CRambem bis coctam exordio Epistolæ obtrudit falsari Cyrilli, occasione loci à Diuo Thoma Cathedra aureâ in caput 16. Mathei ex Cyrillo relati, qui apud illum nullibi extet, nec eius conueniat principiis. Hoc

postremum nego. Digna sunt plane Legato Summi Pontificis, quas probauimus partes in Ephesino Concilio Cyrillum sustinuisse: atque eo nomine scripsit Epistola 10. ad Nestorium, & vndecima ad Clerum, populumque Constantinopolitanum, nisi intra terminum à Cælestino Papa Romano præscriptum, hæreses suas reuocet Nestorius, ab omnibus, vt excommunicatum, & depositum vitari debere; & Epistola 18. à Cælestino, quem Sanctissimum Patrem appellat, petit sibi significet, num velit cum Nestorio adhuc ad tempus communicari, vel deinceps ab omnibus vitari.

Superioris Paragraphi primum argumentum hinc ro-petit Launojus. Nostræ responsioni addo: bonam fidem videri ad Aduersario exulare, nec vnquam bonis artibus agere. Cur nomen illius Græci tacet, quem Sessione septimâ referebat sic Patres Concilii allocutum, *habemus multas alias hæc de re sententias*: sed longe ante omnes Cyrilli in Thesauro. Is vero fuit Andreas Colossensis Episcopus, cui nullus Græcorum intercessit. Forte dicet Græcos suam causam omnium silentio, & vnus pollicitationibus corrupisse à se vindicandam. Bene est: quare homo alienigena, qui vix litteras Græcas à limine salutauit, nec Latinam Mineruam admodum excoluit; melius nouit res domesticas Græcorum, doctissimis illius gentis Episcopis: vt non dubitarit aliquos ex ipsis reclamantibus, hæc quæ improbat testimonia non magis apud Cyrillum, quam apud Virgilium, vel Hesiodum esse posse.

Prioris Epistolæ pagina 9. & secundæ prima Bellarminum inducit, quasi consilii inopem, præcluso, quo se recipere parabat, effugio, & secum pugnantem; quasi testimonia Cyrilli vno loco certa, alio dubia esse velit. Sed non aduertit, quod iam monui, tres esse testimoniorum classes, quibus certa à falsis seiungantur, & inter hæc media reponantur probabilia. Bellarminus à se non dissentit, nec more Aduersarii pro causâ commodo res inuertit; sed suo quæque loco reposita seruat: probabilibus hæc testimonia accenset, de quibus dubitare liceat, illorum probabilitate illasâ: loco per fugii, quod illi à se præclusum putat, locum rutissimum parauimus diuisione Thesauri in duos libros, quorum pri-

mo continentur triginta quinque assertiones : alter apud nos desideratur, unde probabilius est, deprompta esse testimonia, quæ apud Dium Thomam extant.

Bellarminum fidei Catholicæ inuictum pugilem nunquam desinit laceffere. Quam cordi illi est heterodoxis gratificari, & quæ à Bellarmino lethalia vulnera excipit vlscisci. Carpit illum, quod integrum ex Diui Thomæ cathenâ locum Cyrilli non repræsentarit, quasi puderet retulisse adeo compertæ falsitatis. Sed hæc merum sophistam, & vitiligatorum respiciunt : quasi non potuerit Bellarminus dimidiatum locum referre, non quod falsum reputaret, sed breuitatis & grauitatis causâ, quas parum ipse curat dotes, insinuasse locum eodem consilio, quo diximus Dium Thomam ab illo citando in summanâ abstinuisse ; quod non certam, sed probabilem tantum fidem faceret, & facile à peruicacibus eludi, & eleuari posset, desiderato, unde depromptus erat, libro. Sed cum inde probat Aduersarius falsum esse hoc testimonium, & volumen, unde sumitur, supposititium, perinde argutatur, ac si quis neget Tullium de Republicâ scripsisse, aut Liuium pluribus Decadibus totam historiam Romanam complexum fuisse, quod non nisi fragmenta supersint eorum qui censentur periisse, librorum, ac si huiusmodi Authorum fragmenta indubitata non sint, operum, quæ desiderantur monumenta. Qua ratione efficiet Launoius supposititia esse ex Cyrillo testimonia, quasi nequeant esse fragmenta librorum, quæ perierint : aut immunis fuerit Cyrillus ab infortunio, & naufragio scriptorum omnium, quo plura absorpta sint illorum monumenta quam supersint?

Seposito, & quasi deiecto Bellarmino, ipsa testimonia ad examen vocat, & singula vellicat verba : hæc nouitatis, illa barbariei, multa erroris, omnia falsi incusat. Quibus vero argumentis, quod verba Græca à Latino Interprete non fuerint fere Græcè reddita. O Critici morositatem ! quid eius virgam censoriam effugiet ? Bellarmino vexato, textu verborum torturâ luxato ; Patrem Nicolaium aggreditur, ut se gratuito rixosum probet : iamdiu virum sapientissimum, & doctissimum, quâcunque non datâ, sed quæsitâ, & interdum nullâ, non tam ad litterarium, quam conuictorum certamen

pronocat, ratus sibi quamuis infaultum, non inglorium fore, cum tanto Aduersario congredi etiam vincendum.

At ille suæ famæ securus apud Doctos, nihil moratur sibi in Patribus versatissimo, & antiquitatis callentissimo, Cyrillum inexploratum, & ignotum priscæ Ecclesiæ statum improperari. Vnde in illum concluditur, *si quæ Cyrillus de Petro, & de Petri successoribus, &c. docuit, inspexisset vel leuiter: si Ecclesiæ statum, qui tum erat, contemplari dignatus esset, dixisset rectius, nihil tale in Cyrillo reperiri.* Hæc verba esse præfidentis hominis probant, quæ superiori Paragrapho dicta sunt: nec dubito meliora repositurum Patrem Nicolai, nisi modestiâ, silentio, & grauitate, hominem cui male cum his dotibus conuenit, deiicere maluerit. Fortè Aduersarius experietur vim læsæ patientiæ: & sin iniuriarum suarum sensu affici se non patiatur, easque nolit vlscisci Pater Nicolai, spero commotum iri aliquando fidei communis, & Ecclesiæ Catholicæ in suo capite atrocissime violatæ contumeliis.

Ex hac secundâ Epistolâ, vnam, aut alteram refellendam suscipio commentationem. In hæc duo verba ex Cyrillo, *inquassabiliter solam regnare Petri auctoritatem successionem Sedis Romana, & Apostolica.* Et querit, quo sensu sola regnet, aut regnauerit, saluâ totius Ecclesiæ Orientalis & Catholicæ communione in vnam Fidem & Ecclesiam, vel stabilita inquassabiliter, steterit, Liberi, Felicis, aliorumque Pontificum erroribus concussa, & euersa. Respondeo solam regnasse prærogatiuâ potestatis, quâ nulli obnoxia, reliquas infra se positas habet, & quotquot Christi ouium nomine censentur, curæ suæ creditas, & auctoritati subiectas, vt ex Bernardo probatum est. Si hoc gradu regnet sola; non video, cur falsos dicat Imperatores Gratianum, & Valentinianum, Hieronymum, & Cyrillum, qui potestatis Ecclesiasticæ, & communis Fidei reliquas orbis Christiani Ecclesias consortes cum Romanâ volunt, ne sola regnet. Vnde concludit: ad hæc omnia respectum non habuisse, qui Cyrillo apud Sanctum Doctorem relatum subiecit testimonium. Et opinatur Launoïus, nisi ille fidem cum fronte amisisset, dicturum nunquam, *Aposto-*

licam Ecclesiam Petri in Fide plenissima, & authoritate Petri stabilisam iniquassabiliter, solam regnare

Id verissimum esse sensu à nobis insinuato, & statim explicando, negare non possunt, nisi qui Anarchiam, & Babyloniam confusionem à Christo in Ecclesiam inductam, quasi dogma fidei propugnant. *Nec fidei cum fronte amisse* criminari quisquam potest, eos qui in Ecclesiâ Romanâ cum prærogatiuâ authoritatis incorruptam fidem seruata vi promissionis Christi tutantur, nisi ab iis bonis exciderit, quæ in aliis anxie desiderat. Imprudenter, & inique agit, quisquis alienis in-dolet aut insultat malis, suorum ignarus aut negligens.

Capitaliter pugnare putat ex Cyrillo supposititium testimonium cum veris, & cum Cælestini Epistolâ. Cur ita censet? unde id probat? quod summa authoritas vnus cum communi & minori aliarum Ecclesiarum conuenire non possit: quasi temere à Hieronymo dictum sit, Petrum Apostolis præpositum, *ut uno capite constituto, schismatis tolleretur occasio*. Quis vnquam quid simile audiuit, fidei communione, quam prædicant, quæ proferuntur Imperatorum, Patrum, & Pontificum testimonia, abrogari potestatem in eos, qui fide conueniunt? Ne hæretici quidem quid simile vnquam commenti sunt, singulari vnus hominis, aut Ecclesiæ prærogatiuâ cæterarum gradus, vel communem omnium fidem tolli; quod tamen Launoio absurdum est, adeo ut neget, saluâ fronte, & fide, ab vlllo scribi posse.

Nec contentus abrogasse prærogatiuam potestatis Petri, eiusque successorum, quâ solâ regnent: ad minus gradus maiores ægerrime fert dici, & nomine Cyrilli confirmari, quod totum prædicat Euangelium, iniquassabiliter incorruptam illorum fidem, quæ nunquam deficiat, in quam non sint inualitura inferi portæ, stabiliri.

Ecclesiæ, & Fidei Romanæ Apostoli ore prædicatæ, duabus explicatis ex Petri primatu, & successionem Pontificum, ac pro virili & Apologiæ breuitate vindicatis dotibus, tertiam addo incorruptæ & perennis fidei beneficio Christi, Petro, eiusque successoribus, ne vnquam

deficeret orantis, & pollicentis se Petro astructam Ecclesiam aduersus portas inferi immotam seruaturum. Impleuisse vero promissum, & pro suâ reuerentiâ fuisse exauditum, ac proinde, quod inuidiosissimè traducit Launoius, Catholicum, & verissimum esse, Ecclesiam Apostolicam Petri, solam regnasse aliis gradu maiorem, & saluâ fide antiquâ, ipse rerum euentus, inuicto est argumento: cum Orientalibus præcipuis, quas Patriarchales vocamus, Imperio Turcico oppressis, & quod peius est, in schisma, & hæreses apertas, quas nequeat Launoius deffendere, vel certe non ausit delapsis, sola Romana, *stabilis iniquassabiliter*, & inuicta regnet, quod non posse dici siue eiurata fronte & fide, nescio an his bonis saluis potuerit ipse scribere.

Nisi velit per summam impietatem falsis Christi pollicitationibus nos deceptos, vel cassas fuisse apud Patrem æternum filij preces, negare non potest in Ecclesiâ Romanâ, & Summo Pontifice seruata authoritatem, & illi indiuiduam aut incorruptam fidem, velut promissionem veritatis, & efficaciz orationum Christi testimonium, pignus & monumentum æternum: quod dum audacius arrodit Launoius, totius Religionis ruinam imprudentissimè molitur. Quid enim ex Evangelio superesse possit certi, si nedum dubia, sed falsa etiam, & hæretica esse contendas, quæ de perennitate incorruptæ fidei Petri, eiusque successorum, illique astructæ Ecclesiæ, non solum expressa verba Christi testantur, sed ipse euentus comprobatur Christi fidem *inconquassabiliter intra Romanam Ecclesiam regnare*, & à cæteris Ecclesiis orbis Christiani præcipuis hæresi depulsam periisse; quam si obtineas Launoi, quod totis viribus contendis, perinde à Romanâ, atque à cæteris Patriarchalibus exulasse; quid superest, nisi vt promissorum Christi veritatem eiures, aut cum hæreticis ad Ecclesiam inuisibilem confugas?

Eò sane tuis disceptationibus nos deducis: & dum Pontificum, vel Liberii ignauiam, vel Fœlicis ambitum honorum, vel Ioannis XXII. singularem opinionem, non solum quasi priuatorum hominum culpas, sed Ecclesiæ capitum hæreses traducis, nonne promoues Calvinistarum causam, & iter ad perfugium Ecclesiæ

inuifibilis munis: nifi malis nos in atheorum voraginem præcipites dare. Periere quotquot in Oriente floruerunt Ecclesiæ Patriarchales: vna in occidente Romana stat victrix sæculorum, & hærefum: Euentus pollicitationes Christi confirmat, & hanc post ista, ægerrime fers, *inquaffabiliter regnare folam*, cum reliquæ occiderint. Quò confugiam, quò me recipiam prorfus ignoro: nifi loco Petri eiufque fuffefforum, te fufficias, aut velis à te vno folo repeti, quam in Romanâ Ecclefiâ defideras fidem incorruptam. Non videris omnino abhorrere ab illâ prophanâ cogitatione: perinde enim fcribis, eâque fiduciâ, ac fi fublata Ecclefiæ Romanæ infallibilitatem tibi afferueris.

Quas de Liberii, Felicis, Ioannis 22. post Morneum, Spalatenfem, inftauras accufationes, validiffime refellunt Catholicorum innumeri, quorum refponfa taces, quali crederes non audiendos post hæreticorum vociferationes. Docuiffent te, à Liberio, & à Felice, ficut à Petro non errore fidei, fed conuerfationis, vt loquitur Tertullianus, & ex ignauitâ, atque ambitu dignitatum faluâ fide peccatum fuiſſe, quod animo minus forti tormenta tulerint, aut dignitates ambiuerint. Sed malle hæreticos omnes eſſe, quam te nimix audaciæ, & temeritatis incuſari.

PARAGRAPHVS SEPTIMVS.

In tertiam Epistolam breues obſervationes.

AB inſtituto Apologiæ longius abduceret, ſi reliquas vellem Epiftolas etiam decurrendo, recensere & expendere. Sat fuerit nonnullas obſervationes eruditi Lectoris iudicio ſubiicere, Aduerſarium imitatus, qui ex longâ diſputatione Caietani cum Almaino nonnulla excerptit diſcuriendâ. Eadem methodo, ex eius Epiftolis quædam ſingularia annotabo, quæ à communi Theologorum ſenſu ac methodo videntur abhorrere.

In confutatione Caietani, Almaini cauſâ, ſelecta verba lego, elegantem orationis circuitum: ſolidâ æ-

gumenta desidero : mallet Theologum egisset , quam Gratorem. Quid enim habet, quod impugnet Cajetani ad Almainum responsa. Almainus ex Epistola quadam Ambrosij operibus inserta , & nonnullis inscripta Damaso , quasi negaret sibi licere rem à Concilio Capuano iudicatam , ad examen vocare & rescindere ; inde infert Summum Pontificem subesse etiam priuatis Concilij nationalis Decretis. Respondet Cajetanus his Epistolæ verbis , non negare Damasum sibi potentiam deesse , sed minime conuenire iuxta illud Apostoli , *mihi omnia licent , non omnia expediunt*. Inde confirmat Cajetanus , Pontificem illud iudicium detrectasse , non quia potentia deesset , quâ valide iudicaret , sed minime conuenisse, idque exemplo Pij I. negantis Marcionem à Patre damnatum absolueri , confirmatum est.

Quid affert Launoïus , quod hunc Cajetani obiectum obicem effringat ? videtur quæ refellenda suscipit, suis argumentis confirmare , & inuicta probare. Sic enim te conuenio. Aut negas in totum id genus distinctionis , vt quædam liceant , non expediant ; valide fiant , non inculpabiliter : vel quamvis legitimam , & vsu frequentissimam infinitis difficultatibus enodandis hanc rerum partitionem opportunam agnoscas , à subiectâ quæstione vis exclusam. Si primum obtendas ; stant contra te omnes Theologiæ , & iuris consultissimi , quibus nihil hac distinctione familiarius , nihilque certius rerum quæ valide fiunt plures culpa non carere. Ita efficax est administratio Sacramentorum , validum pactum venditionis , licet neutrum culpa interdum vacet. Si legitimam concedas hanc operationum distinctionem , sed locum habere nolis in causâ Damasi ; qua ratione id probas , nisi apertâ petitione principij ? Neque enim aliud apud te lego , nisi conuitia in Cajetanum , Encomia Almaini , denique Thesim ipsam in probationem assumptam. Diserta vbique habes , non fortia.

Aliam insinuat Caietanus distinctionem , legis cogentis , & dirigentis : quas ferunt Concilia , vel ipsi Pontifices , ligare concedit conscientiam directionis vi , non pœna cogentis. Quare Caietanus remotissimus ab a-

dulatione Principum docet : *minime decere Summum Pontificem determinationes Concilij Prouincialis , multo minus Generalis soluere* : atque inde infert, *secundum sacros Canones , ad Romanum Pontificem spectare maxime , seruare statuta Patrum , sicuti propria*, directionis vi, seu studio virtutis, non coactione, & metu pœnæ. Quid habet Launoius in hanc Caietani distinctionem, quam nec quidem verbo indicauit, rethoricari, aut conuitiari contentus, aut loco argumentorum censuras proferre. Sic enim iterum te conuenio; vel hoc duplex munus legis dirigentis & cogentis, negas, quæ vim dirigendi exerceat in authorem, cogendi etiam in subditos, vel legitimam agnoscis, sed malè à Caietano adhibitam improbas. Primum apertè falsum est omnium Theologorum, & iurisconsultorum consensu: si alterum velis, quæro à te argumenta; neque enim vllum occurrit totâ Epistolâ, quo hæc distinctio, vel illius vsus laceffatur: Ergo, quæ scribis, gratuita sunt, & nullius roboris, aut vtilitatis, & eruditionis modicæ, quæ doctioribus non satisfaciant, licet acerbiori castigatione authorum, quæ aliquid libertatis respiciat, placere possint morosioribus.

Verum si vana ex veteri prouerbio est sine viribus ira, ineptæ prorsus sunt, & ridiculæ acerbiores priuatorum scriptorum animaduersiones in alios se Catholicos magis, & doctiores, nullo munitæ argumento. His censuris, aut verius conuiciis scatent duæ Launoij, tertia scilicet, & sexta Epistola in Caietanum scriptæ. Hic author minus purpurâ, quam ingenio, pietate, & in Ecclesiam meritis eminens & illustris, de subiectâ controuersia, quam vndecim Epistolis Launoius versat, nullo ordine, tres benè longos edidit tractatus, qui primo Tomo Opusculorum ad calcem Commentariorum in tertiam partem D. Thomæ extant. Ex iis libris vnum tantum caput, nempe decimum ex secundo ad Almaini impugnationes libro, refutandum suscepit ne quidem parte dimidiâ, sed ex septem, quas soluit obiectionibus, secundam & tertiam delibauit, ac vix perstrinxit: & quasi totum opus profligasset, Caietanum tantum non triumphat: Cui hoc vnum reponam, quod Laco ille prudenter filium iuueniliter ferocientem monuit: aut magnos illos spiritus compesce, & minue aut vires & robur au-

ge. Ita dico remittendum Aduersario de acerbitate, & ferociâ verborum, ac minarum; vel fortioribus agendam argumentis: nisi enim validiora adhibeat, se doctis ridendum præbebit.

His duabus solutionibus à Launoio laceffitis, tria sibi Caietanus extruxit præsidia, de sacramentis, iudiciis, pactis, &c. validè interdum, & illicitè peractis: alterum de vi legis solâ directione, vel interdum pœnis, & coactione ad rem constitutam vrgente: & de lege diuinâ, aut Ecclesiasticâ solo iure humano positiuo à Summis Pontificibus, vel à Conciliis constituta. Concedit Caietanus lege diuinâ, vtroque nomine directionis, & coactionis summos Pontifices ligari, nec ab humanâ vel Ecclesiasticâ à se, vel à decessoribus, vel conciliis iustè prudentérque sancita eximi, saltem quoad vim directiuam, quæ saluâ conscientiâ lædi nequeat. Hos quibus se Caietanus munit, obices prærumpat oportet Aduersarius, quæ hæcenus ne verbo quidem tentauit, seu ex inscitâ, seu ex conscientiâ suarum virium, quas his solutionibus refellendis impares esse nouit, & si contra eniti, aut eluctari velit, non conuitiis, sed argumentis, ipsemet Caietanus sese tutabitur, aut certò sciat non defuturum defensorem, si disputationem reuocet ad veras Theologiæ leges, nec vitiligationibus agat, quæ otiosi hominis sit refellere aut morari.

PARAGRAPHVS OCTAVVS.

Ex superiori obseruatione breuis, Responso ad septimam, & octauam Epistolam.

Quamuis triplici distinctione Caietani legum iuris diuini, & Ecclesiastici, quæ directione in Auctores, coactione in subditos agant, & validè suscepta, illicita efficiant; his, inquam, responsionibus conuulsa sint, & deleta, quæ longissimis Epistolis 7. ad Hieronymum Sambœuum per 15. paginas & 58. ad Ludouicum Cusinum nummariorum Iudicum præsidem scriptis congerit, & millies repetit, de vi canonum in Summos Pontifices testimoniis; pauca tamen, vt eruditioribus satisfa-

ciam, visum est addere, eâ cautelâ, ne in vitium prolixitatis alieno coarctetur vitio.

Illud enim imprimis animaduerto, quod Bartholomæi à Martyribus Lusitano idiomate edita narrat historia, è tribus illius gentis, qui Concilio Tridentino interfuere Episcopis, hunc multa paucis, alterum multa multis, tertium pauca multis solitos explicare: hic postremus Launoio caracter nescio an placeat, certè genuinus est, & conuenit. Cû multa his vndecim Epistolis probanda suscepisset, & mediocri volumine id potuisset efficere, aut certè niti debuisset; contra totus est in parergis congerendis, quæ nihil ad institutum conferant, vel iisdem exemplis & argumentis millies obtrudendis. Primâ Epistolâ iam discussâ, responsum est ad argumentum ex Epistolâ falsò ascriptâ Ambrosio, & verius ab Almaino Damaso attributâ, tandem vindicata Siritio; & ab appellatione Marcionis à paternâ damnatione ob constupratam virginem ad Sedem Apostolicam. Verumque argumentum prosequitur singularibus Epistolis priore longioribus, additis propemodum infinitis testimoniis Patrum, & Pontificum, quæ Canonum sancti ones commendant, iisque se obnoxios Summi Pontifices profitentur: quis nostrum hoc vnquam negauit, seu ex directione, seu ex coactione, seu ex utroque capite hoc conscientie onus & vinculum existat?

Dum hæc congerit venerandæ antiquitatis monumenta apud omnes obuia, molem Epistolarum auget, non vim argumentorum: & illum pictorem imitatur, de quo in statuam Veneris coniecto auro dictum est, cum non posset facere pulchram, diuitem fecisse. Mallem pauca, & selecta infringendis Caietani solutionibus idonea, & validiora scripsisset, obmissis quæ ex historiâ Theodoretî, ex Epistolis Ambrosij, & Pontificum Romanorum conglobat, nihil prorsus ad rem facientia, nisi vt prolixior, & fortè molestior Epistola euadat.

Non dicam Cardinali Perronio emunctioris naris homini, Theodoretî de Flauiano Antiochenæ Ecclesiæ, id est suo Patriarcha, in quem proinde propensior erat, fidem magis suspectam, quam Socratis & Sozomeni, qui à partium studio aberant, quorum historiam verio-

rem

rem cenferi contra quam sentit Launoius, quod ex Theodoreto, quam ex Socrate Damasi Summi Pontificis in orientales Ecclesias summæ auctoritatis obscuriora depromantur argumenta, quæ una & summa lex atque ratio vltima est Launoio de singulis statuendi: neque enim dubium relinquere apud Lectores, quamlibet disparibus rationum momentis res vtrinque disceptentur, quin in eandem partem toto impetu feratur, cæteris præfidiis destitutam; dummodo Pontificum iuribus aduerfetur.

In ea Flauiani cum Paulino, eiusque successore Euagrio de Patriarchatu Antiocheno, quæ orientem multis annis vexauit, contentione; cuius sopiendæ causâ, habita est in Oriente Synodus Capuana, innumera suppetunt pro Petri primatu argumenta, quæ Cardinalis Perronius replica ad Regem Angliæ à paginâ 97. accuratissimè & elegantissimè prosequitur; quales sunt frequentes iussiones, quibus Imperator Flavianum urgebat, vt quamprimum Romano Pontifici Damaso se tanquam legitimo iudici sisteret, quibus ex Theodoreto resistit Flavianus senectam, incommoda itineris hieme suscipiendi, nunquam vero, quod vnum suggerit Launoius, causatus, nihil in se iuris habere Romanum Pontificem. Plura eruditissimus Cardinalis in eandem rem, ex eadem historiâ congerit argumenta validissima ex ipsâmet, quam refert Launoius, Epistolâ Ambrosij, in Euagrium, quam in Flavianum propensionis; quod illius causam, pro quâ semper steterat Romanus Pontifex, iustiore reputaret.

Has omnes Perronij argumentationes nihil moratus Launoius, ex verbis Ambrosij pagina 11. inquirendum censet, cur cum tantâ sollicitudine & cura rerum Pontificis Romani Ambrosius satagat, vt Theophylum moneat, referendum negotium ad Sanctum Romanæ Sacerdotem Ecclesiæ, quoniam præsumimus ea te iudicaturum, quæ etiam illi displicere nequeant. Huius Ambrosij sollicitudinis fuitiles causas comminiscitur, nihil pensi habet solidiores: vult ab Ambrosio habitam esse rationem Romani Pontificis, quod abesset à Concilio, & absentium curam habendam esse. O nugacitatem! Cum omnes occidentalis Ecclesiæ Episcopi Paulino, &

Euagrio adhæssissent, infensi Flauiano, & pluries à Concilio Capuano abessent; cur cæteris omissis, quibus ex absentia, & vnitæ sacerdotij idem quod Romano Episcopo vindicat iuris, ad hunc solum monet Ambrosius referendum, & approbandum iudicium? Sanè cum ista lego, rideámne, aut succenseam, planè ignoro: incertus futiliora ne sint, an magis ex præpostero, & prauo in Summos Pontifices affectu profecta.

Nam quas addit coniecturæ, aut nugæ, Ambrosium consultum voluisse, vt factum Romani Pontificis in Euagrium malè ordinatum affecti benignè acceptaretur: conuelluntur postremâ Cardinalis Perronij argumentatione; nihil Euagrij ordinationis vitio detecto obmissum à Flauiano, vt in Damasi gratiam rediret, eaque de causâ missos Romam legatos, Chrysostomum pro Flauiano intercessisse, nullum denique à Patriarcha, & ab amicis prætermissum officium, quò Damasum iustè iratum delinirent.

Sed hominis criterium mirare, & quàm mereatur iudicis, quod sibi arrogat munus, inde agnosce: si quæ occurrant ex ipsis, quas præ manibus habet, historiarum monumentis commendandæ Pontificiæ authoritati; aut tacet omnino; vel futilibus deterit argutiis, & minutissima quæque aucupatur, quæ in speciem eius consilio faueant. Aquila non captat muscas: hanc prædam araneis remittit. Ab illarum non longè telis (de veneno absit vt quidquam pronuntiem:) absunt futilissima, quæ leguntur pagina 12. Bonosum post delegatorum iudicium sententiam, ad Ambrosium Capuanæ Synodi præsidem scripsisse, non ad Siricium Romanum Pontificem. Quasi res in Synodo Capuana dirimendæ ad illum nihilo magis, quàm ad alios, qui aberant, Episcopos pertinerent. Quantâ inopiâ solidiorum argumentorum premi oportet eum, qui totus his nugis & siliquis captandis inhiat. Quæ pagina 13. scribit de Flauiano, & Synodo Capuanâ valdè expuncta sunt à Cardinali Perronio.

Quæ ex Epistolâ Siricij elicit argumenta, vt institutum probet, quamuis validiora sint aliis, vix tamen ad coniecturas accedunt. Ipse se remittit ad Epistolam tertiam, cui responsum est argumento superiori: quare ab his supersedeo. Tacere tamen non possum, quod eiusdem

Epistolæ pagina 23. habet plagium Epistolæ Pij secundi ad Carolum VII Regem Galliarum, quâ sic eum monet: *Vnum à te petimus charissime fili, ut detractoribus Sedis Apostolicae semper non credas, multis illorum passionibus tribuens*: at Launoïus, vel ex crassâ inscitia, vel excacâ ad detrahendum libidine locum corrumpit & interpolauit, voci detractorum suffecto Doctorum vocabulo: quasi Summus Pontifex curare velit ut doctoribus Sedis Apostolicæ minor, quam eius detractoribus fides habeatur. Relatum mihi est, priuato colloquio Launoium à viro eruditissimo corruptelæ huius loci conuictum, diu tergiuersatum, nihil tamen respondisse, quod vel inscitiam, vel culpam apud homines doctos, qui intererant, excusaret.

Vbique Bellarminum, ac Peronium allatrat magis, quam mordet. Postremum hunc pagina 24. ait, *Epistolam*, de quâ agimus, *censuisse non esse Ambrosii, quam inter eius opere extaret, sed cuius esset querere neglexisse*: quod huiusmodi diligentiam intelligeret, sibi & Annalium suorum scopo vehementer incommodaturam. Conueniebat te, Launoï, dum alienam famam auidius infectaris, saltem tuæ minus esse prodigum: nam cū irritò conatu, & morsu inani viros celeberrimos appetis, nullo verisimili argumento damnas, quid aliud lucraris, quam iniqui censoris nomen? Quid mali Romano Pontifici ex illâ Epistolâ, vni ex suis decessoribus assertâ existere possit, Tu solus vides scintillantibus aut caligantibus oculis ex nimio in præiudicatas opiniones affectus at, inquires, Syricius totâ eâ Epistolâ negat ad se pertinere earum rerum iudicium, quæ in Capuanâ Synodo constituta, & sancita sint. Ita est sanè; quia ad iudicia legitimè peragenda præter auctoritatem opus est infinitis partibus; nempe rerum diligenti examine, inspectione tabularum, & aliis id genus, quæ cum in se desiderari agnosceret Syricius, merito illud iudicis munus sibi abdicauit.

Nisi afferas apertiora, quæ hanc potestatem deliciant, quam quæ apud te lego, longâ illâ serie testimoniorum, utrâque Epistolâ contexta, oleum & operam planè perdidisti. Probas impensissime, quod vltro asserimus, legibus diuinis & Ecclesiasticis omnes astringi, ne exce-

pris quidem Summis Pontificibus : sed plane erras , si his legibus parem inter se , aut in omnes vim esse contendas : si nullo discrimine Ecclesiasticas diuinis exaques , & paris velis esse roboris ac perennitatis , nec magis Ecclesiasticas , diuinis vlli relaxationi obnoxias esse.

- Eadem responsione refellitur 8. Epistola : quia de eadem controuersia iisdem argumentis , & testimoniis pugnas. Hoc vno differunt , quod testimoniorum congeriem , quæ Canonum commendant obseruantiam Epistola 7. Siriaci testimonio , quæ altera Pij I. Papæ Marcionem absolvere recusantis , repulsæ astruis. Vbi que morositatem prodis. Illius Epistolæ pagina 6. doctissimo , & accuratissimo scriptori Bellarmino pueriliter ἀβελήαν improperas ; quasi alienis , non suis oculis Epiphanium repulsam Marcionis referentem legerit : alias superfessurum ab allegatione , quæ consilio eius obesse poterat , non prodesse.

Chamierius & mordacissimus , & , vt existimo , hæreticorum doctissimus , cum Bellarmino te Launoi humanius disputat. Sin huius heterodoxi facundiam , & eruditionem æquare non poteras , certè non debebas pati , te Catholicum ab Hæretico in Cardinalem æquitate vinci. Quis non credidisset post hanc grauem obiurgationem actum esse de Bellarmino , crassæ supinitatis accusato ? At ne quidem Bellarmini attigisti argumentum ex appellatione Marcionis ad Sedem Apostolicam. Nemo dixerit peritiam rerum Ecclesiasticarum , aut ingenium defuisse hæresiarchæ isti , & si ex Launoio Orientales Patriarchæ , & Episcopi Romanum , iure in res ex Ecclesiæ legibus indicandas longe vincant , & illi pares sint Episcopi Occidentis ; cur Marcio neglectis Ecclesiæ Orientalis Episcopis , qui præsto aderant , Romanum conuenit , nisi ad illum ex traditione Apostolica iure appellari credidisset ? Adeone longi itineris se laboribus confecerit , & obiectasset periculis ; nisi Marcion ex communi fidelium sensu aliud didicisset , quam quod de primatu Ecclesiæ Romanæ scribit Launoius ? Mortalium stolidissimum appellauimus , illa appellatione futili , qua nullo commodo sese tot laboribus confecerit.

Hoc est Bellarmini argumentum, quod quisquis ἀλαίστω dixerit, oculis & mente captus sit oportet. Sed promptius est arguenti insultare, quam respondere argumento. Ad contextam huic exemplo Marcionis seriem testimoniorum, Respondeo: id vnum probare, quod ultro agnoscimus, antiquissimam fuisse Summis Pontificibus legum diuinarum, & Ecclesiasticarum auctoritatem, nec sibi etiam in summa potentia constitutis, quidquam sine causis legitimis detractum illis voluisse: & hoc ad summam eorum laudem pertinet, quod solo æquitatis respectu, nullo pœnarum metu se huiusmodi canonum obseruantissimos, & vindices acerrimos præbuerint; ac proinde dignissimos, quibus summam auctoritatem Deus permitteret, cui ex pari æquitate moderabantur. Hoc vnum probant congesta à Launoio in utramque Epistolam testimonia, iisdem verbis pluries, mediocri volumine dimidiâ sui parte breuius futuro, nisi pluries eadem repetisset.

PARAGRAPHVS NONVS.

*Observationes in 6. Epistolam ad Raymundum
Formentinum.*

AD finem Epistolæ 3. in Caietanum scriptæ narrat Aduersarius, à Sacrà Facultate Parisiensi datam Prouinciam Iacobo Almaino respondendi Caietani libro, pro auctoritate Pontificia aduersus Gersonem scripto, quem Gaufridus Boussardus Parisiensis Cancellarius nomine Pisane Synodi ad Facultatem misit, ut refelleretur, eoque imperio Almainum Theologiæ Magisterio donatum superioris sæculi anno vndecimo, & decimo sexto immatura morte sublatum, tantâ ingenii præstantiâ fuisse defunctum, ut eius liber in frequentissimo Theologorum audientium, & approbantium confesso recitatus sit, & omnium ore laudatus.

Non crediderim has Launonij Epistolas, de eodem ferè argumento, sacre Facultatis iussu scriptas, vel consensu editas, & confirmatas esse: quia licet ætate prouectior, nec forte antiquitatis peritiâ inferior sit Al-

maino; aliis tamen dotibus imparem puto, & longè à gravitate, modestia, & humanitate Almaini abesse. Mallet vero Sacra Facultas in iis, qui suo nomine delecti loquuntur, magis eloquentiam, & eruditionem, quam æquitatem, & prudentiam desiderari. Has verò Scriptionis laudes dolent probi omnes ab Aduersarij libris longe exulare. Mirum sane est Gerardum, Vossium, Grossium, ac similes ex Hollandia, aliisque regionibus Scriptores, etiam hæreticos, Cajetani, Bellarmini, Baronij vix meminisse, nisi cum honorificentissima tantorum nominum prædicatione; quæ tamen Launojus vbique contemptim proferat, ac penè traducat innumeris conuiciis, quod diuersa à se, & quid maius sentiant de primatu Petri, eiusque successorum, tanquam Ecclesiæ Romanæ Palpatores infamat: sic enim Zozimi Papæ verbis abusus *obssiste*, inquit, *superbia & arrogantia venienti*, (ex Romanæ curiæ palpatoribus:) id est, ex Caietano, Bellarmino, Baronio, quibus tres alios addere poterat ex Ecclesiâ, Gallicanâ iam à me nominatos, Bernardum, Perronium, & Coeffeteau.

Pudet singula referre, quæ in hos pietate, eruditione, & sapientia, quam dignitate & purpura viros eminentiores conuicia scribat: sed obmissis Perronio, & Coeffeteau, quos nunquam nominat, licet eadem cum Bellarmino & Baronio de Primatu Petri nedum sentiant, sed etiam latissimè scripserint (si ea excipias quæ Ecclesiæ Gallicanæ iura attineant, extra cuius pomœria latissimè vagatur Launojus:) hoc vno silentio illa Galliæ lumina atrocius, quam superiores apertis conuiciis, & censuris videtur damnare: quasi nullo loco habeat, & nequidem audiendos, aut nominandos putet, nisi inter Romanæ curiæ palpatores. Quis credidisset quemquam ista ausum scribere, nisi quæ à nobis fidei & pudoris ait amissa, peius bonis consulisset? Quisquis in postremæ superioris, & primæ partis huius sæculi historia Romana hospes non fuerit, ignorare nequit, mortalium nullos ab adulatione & ab aliis id generis vilis, & sordidi animi vitiis remotiores his tribus, Bellarmino, Perronio, & Baronio, qui in confesso Purpuratorum Patrum, in electione summorum Pontifi-

eum supra omnem spem, & metum, omni humano affectu intactos, & maiores sese toti Europæ probarunt. Et hos, si superis placet, Launoius Romanæ Curix Doctoribus, aut palpatoribus accenset, qui dignitates prodizione veritatis emant, & aucupentur.

Perronium, & Coeffeteau nullibi apertè, Bellarminum, & Baronium obiter mordet, Cajetanum duabus Epistolis tertia & sexta laceffendum, & lacerandum suscepit: sed scio nihil moraturum has contumelias. Nam secundi libri exordio ita habet *charitas Iesu Christi, sanctaque eius Ecclesia cogit, me virum periculosum, enervatorem Ecclesiastica potestatis, falsarium, adulatorem, atque blasphemum, ad hac quidem exemplum illius sequi, qui cum malediceretur, non maledicebas*: atque hæc præfatus accingit se responsioni ad obiectiones Aduersariorum, à quibus laceffitus, nedum à conuiciis repouendis abstinere, sed ne videatur personas inceslere, magis quam sensa, nullius nomen, eorum quibus cum disputat, memini me apud illum legisse. Vt rem inuidiosissimam absoluiam; miror dum sapientissimis viris adulationem, & deforme obsequium in Summos Pontifices improperat Launonius, non timuisse præruptæ audaciæ crimen, à quo sine dubio propius absit, quam Cajetanus, & Bellarminus ab adulatorum & palpatorum vitio.

Sed ad rem veniamus; Launoius Epistola 6. Almaini argumentum instaurat contra Cajetanum ex Canone 21. octauæ Synodi, quo cauetur, *ut vniuersalis Synodus cum conuenienti reuerentia exortas de Romanâ Sede quaestiones audiat, & eas promoneat, non tamen audacter sententiam in Romanum Pontificem pronunciet*: qua cautela concilium ex Almaino de Romana sede & Pontifice iudicium legitimum credit semoto vitio audaciæ, & salua illius reuerentia.

Ad hæc tria respondet Cajetanus. Primo male eo loco distingui ab Aduersario iudicium in Pontificem ab audacia, sed vnum in aliud recidere, nec vitium audaciæ prohiberi tantum à sententia in Summum Pontificem, cum abesse debeat à iudicio etiam in plebeios suscepto, sed iudicio in totum interdicit eodem sensu, quo de occultis cogitationibus vetat lex diuina quidquam fini-

stri temere statuere. Neque enim temeritas tantum iudicij de occultis damnata est, sed ipsummet iudicium vitio non caret. Hinc tandem concludit Caietanus, eo Canone concedi expostulationes audiendas in Pontificem, abstinendum esse à sententia, nisi in apertam hæresim prolapsus illi pertinaciter adhæreat: tum enim velsenuendum omninò, aut verius ipsius hæresis confessione pertinaci pontificatum censet sibi abrogasse.

Sed contra Launoius insurgit. Primùm conuiciis, deinde argumentis, *Responsionem ait nihil habere solidi, expressi, aut eminentis, iacere in futilium argutiarum satore, & litigiosam esse totam solutionem quæ recitato Synodi Canone sua sponte dissiluit.* Conuicia hæc, surda aure prætereo, Caietanum imitatus, id tantum mirari subit, quod cum hanc artem longissimo vsu didicerit Launoius, barbariem nondum potuerit exuere. Fœtor ex corruptela consequitur, vtrumque vitium rebus crassioribus adnascitur, male cum argutiis, cum rebus subtilioribus, & minutioribus conuenit, quæ in fumum, & in nihilum faceffunt. Iis sane non fœtor adhæret, & obiici solet: sed Aduersarius adeo est conuiciorum audus, vt insociabilia turbinis more conuoluendo iungat.

Verum ad rem: videndum an luculentius argumentetur, quam sit conuiciatus. Contendit eo Canone de iudiciis commune ius statui Romano Pontifici, & omnibus Patriarchis: & cum non possit Cajetanus obtinere omnes Patriarchas à conciliorum auctoritate exemptos, necesse est, patiatur Romano Pontifici æquo iure cum aliis viuendum, & obnoxium esse conciliis. Hic non disputo, an res ita habeat: sed an ex illo Canone id euincat argumentum Launoii: non expendo jus Pontificium; sed vim responsionis Aduersarij, quæ reuera rem propositam non efficit. Quatuor habet illius Canonis editiones Aduersarius, prima ex Almaino solius pontificis Romani meminit: altera etiam ex Græco breuior illius tantum mentionem patriarchis omnibus tacitis facit. Tertia fusior ex Anastasio, licet ex Patriarchis aliquid attigerit, singularem tamen habet clausulam de Summo pontifice senioris Romæ (vt vocat) in quem prohibetur audacter sententiam dici.

Si disputationem exigamus ad has tres editiones legitimas, planè concidit argumentum Launoij, quod inuictum putabat: quia sensus Canonis legitimus est censendus, qui singularem habet clausulam de Summo Pontifice. Quare si quid virium insit argumento Aduersarij, totum est à Gratiano Canonum collectore, non admodum accurato, qui priuilegio de Summo Pontifice simile de aliis inferciuit Episcopis & Patriarchis: Sed quæro an Editioni græcæ, Almayni, & Anastasij sit tribus minus standum, quam vni Gratiano: & cum nullus sit dubitandi locus, quin plures à doctis interpretibus editiones vni à Gratiano parum accurato Collectore, aut callente Græcarum litterarum præponderet, quærendum est aliud Launoio præsidium, vt argumentum fulciat, & solâ lectione Canonis responsio Caietani dissiliat.

Sed quid argumentationi ad hominem, quâ vrget Launoius Caietanum? Dat ille ius Conciliis in Pontificem dubium & hæreticum: Ergo malè negat in Pontificem reum cuiuscunque criminis, quo abdicationem tantæ dignitatis commeruerit: qualia sunt prope infinita, imò quodlibet minimum, si ad lethale peccatum accesserit. Vt hanc consecutionem, sine dubio periculosam submoueat Caietanus, cohibet iudicium intra schismatis & hæreseos metas: id est, dubiæ electionis ex contentione competitorum, aut ynus apertæ hæreseos conuicti. Si dicas hos limites gratis & immeritò præfigi, hoc non obiici debuit à Launoio, sed oportuit impugnari plurima, quibus Caietanus has metas tutatur: nec locus est hic disputandi, cum Aduersarius censuris tantum agat, nullis argumentis. Addo duo, quæ vellem à Launoio refelli.

Primum ex traditione, aliud ex ipsiusmet Aduersarij documentis. Illud quidem ita habet: nulli Pontificum dicam à Conciliis scriptam, nisi hæresis Honorio, & apostasiæ Marcellino, vel dubiæ, id est nullius electionis, quamdiu euidentibus argumentis res dirimi non potest. Huic grauissimo ex traditione argumento aliud adiungo perinde efficax ad hominem. Adeo immane & atrox visum est, & Pontificiæ dignitati infensum crimen hæreseos, vt illius compertum Episcopum Epistola 4. pagina 24. ex Iulij Epistolâ ad Faustum elici ab vnoquoque, &

damnari posse, ut in ^{ir}um non sit, quod ex Caietano Conciliis generalibus in Romanum Pontificem hæresis conuictum ius singulare comparatum est. Atque ex his dissiliunt, quæ in Caietanum congeruntur. Ad ea, quæ fusissimè referuntur de Honorij casu, nihil opus pluribus respondere, cum omnia vnâ solutione occupata sint.

PARAGRAPHVS DECIMVS.

*Ex obseruatione in superiorem Epistolam brevis
responsio ad Nonam.*

HANC ad Claudium Santeulium scriptam Epistolam superiori adiungo, quia idem versant argumentum, hoc solo discrimine, quod sexta Epistola Adversarios imperat Launojus, ista se tutetur.

Nam cū dux sint fortitudinis partes, vna imprimat, altera sustineat impetum; & potior sit ratio fortitudinis ad defensionem, quam ad aggressionem comparatæ; in aliis laceffendis audaciorem, quàm validiorem aliis Epistolis, istâ in se tutando ignaum, & debilem experiemur; non marre, sed arte hic pugnat. Supperunt quædam opinioni laceffitæ à Launoio, ex mediâ inter primam Ecclesiæ, & nostram ætatem monumenta quibus inustæ palpatoribus Romanæ Curie erroris temeritatis, & nouitatis notæ elui videntur. Quid non tentat totâ hac Epistolâ, ut iis testimoniis intercedat? Pudet referre, quæ ille corrupendis ex antiquitate monumentis sit molitus: nulla est ex Neustrio seu gentilitio exlo insita, aut longo litigandi vsu, & studio comparata fraus & solertia, quam his testimoniis eleuandis non adhibuerit.

Sarius sanè fuerat dicere Ennodio Auito, & Synodis Romanis duobus ita visum, *Romanum Pontificem extra iudiciorum aleam aut Conciliorum iudicium*, sed malè, & præter maiorum morem, præter scripturarum auctoritatem: sed maluit litigare, & falsis interpretationibus tria testimonia deprauare. Rem & disputationis statum paucis perstringo: Concilij Romani sub Symmacho.

Papâ, Episcopi à Theodorico Rege, aut verius Tyranno Italiæ, & Arriano aduocati, ad Symmachii apud ipsum ab æmulis atrocium criminum læsæ-Majestatis accusati causam iudicandam, duo confessari sunt: primo malè indictum Concilium ab illegitimâ potestate principis sæcularis & hæretici, quod non posset, nisi ex ipsiusmet rei iudicandi nomine congregari: sic enim sancta Synodus: *Memorati Pontifices suggesserunt ipsum, qui dicebatur impetitus, debuisse Synodum conuocare; scientes, quia eius sedis primum Petri Apostoli meritum, deinde secutâ iussione Domini, Conciliorum venerandum auctoritas, singularem in Ecclesiis tradidit potestatem, nec antedicta sedis Antistitem minorum subiaccuisse periculo.*

Meminit forte Aduersarius illud Virgilianum sibi obiciendum,

Vane ligur nequicquam patrias tentasti lubricus artes

Duo relatis verbis iura Papæ vindicare videntur Patres Synodi: primum congregandi Concilia, idque ex triplici capite confirmant: ex primatu Petri, ex institutione diuinâ, & auctoritate Conciliorum; alterum, quod inde consequitur ius immunitatis à minorum iudicio, id est, ut contextus videtur præferre, ab ipsomet Concilio; sed pessimè habent Launoium iura hæc, quibus conuellendis nihil non molitur.

Primo inculcat Patres, quod nullo Theologiæ, id est Scripturæ, & Traditionis, nullo iuris Ecclesiastici principio, congregandorum Conciliorum, Summis Pontificibus asserant auctoritatem. Hic nolim disputare, probè, an secus Synodus senserit; sed an re vera crediderit hæc duo ad Episcopum Romanum pertinere. Quoad primum ius licet liberalior in principes sæculares etiam hæreticos, quam in summos Pontifices Catholicos, istis auferat, illis vindicet ius congregandorum Conciliorum: hic tamen quasi puderet adeo enormis erroris, eo disputationem reuocat, *an nullo unquam euentu possit Synodus & similis quæ de agitur, præterquam à Romano Pontifice congregari.* Sed quidquid sit de hac metaphysicâ hypothesi, satis est ius statum & ordinarium ad successores D. Petri spectare.

Sed hæc controuersia parte breui expeditâ, grauior impendet de alterâ specie iuris, quo Romanæ sedis Antistitem negat Synodus minorum subiacere iudicio: Launoius pagina 4 contendit, minorum nomine, intelligi senatum, clerum, populûmque Romanum, à quibus perperam ait tentatum iudicium in Summum Pontificem Symmachum, quem tamen negat subduci posse à iudicio Episcoporum, quos Symmachus, eiusque successores, *Collegas, Fratres, Consacerdotes, Commiistros*, vocant. *Hanc ait veritatem argumenta non querere*, sed tantum oculos, qui Ecclesiastica legere possint monumenta, vbi vel oscitantibus, vel dormientibus id occurrat.

Sed mira promittit Launoius, & modica, aut verius nulla præstat. Conspiciuæ veritati, quæ argumenta non querat, probandæ tenebras ingerit, & Auerrois insaniam singularem, intellectum, seu numero vnum per omne humanum genus diffusum & impartitum somniantis, in Ecclesiam inducit, constitutâ vnitatem de singularitate sacerdotij, quod inæqualitatem graduum non patitur: id est, pares autoritate Episcopos Summo Pontifici faciat. Quidni se ipsum, & singulos sacerdotes, eadem consecutione Episcopis exæquet? Cum vnum per diuersos Antistites, id est, sacerdotio initiatos sit sacerdotium, minus distinctionis patiens, quam individualis vnitatis, ex Auerrois insomniis, per omnium indiuiduorum generis humani infinitam multitudinem & seriem, sine partitione diffusæ rationalis animæ.

Sed argutatur Aduersarius, Synodi Romanæ Episcopos Symmacho non dixisse, *iudices tui non sumus*: nec Symmachum Concilij præsulibus, se ab illorum iudicio liberum & immunem esse denuntiassè, nec Theodorico obiectû in alienam messem falcem misisse, sacrilegâ manu thuribulum ardentem, & auctoritatem congregandorum Conciliorum Pontificibus Romanis eximiam sibi arrogasse. Ita est: sed quid illo silentio euinci putat? Omnia, quæ probanda suscepit. Ita est apud illos, quibus argumenta negatiua omnium loco sunt demonstrationum: quamquam nec silentium seruasse, sed omni tubâ vocalius, & altius obrupisse censendi sunt Patres, & Pontifices memorati, relatis verbis, quibus vtrumque

ius à Launoio controuersum, tribus argumentis videntur asseruisse.

Quod ad Symmachum attinet, silentium post has voces meritò putauit sibi tutum fore, satisque suæ auctoritati cautum intercessione totius Concilij, cui si suam apud Theodoricum adiunxisset, visa fuisset intempestiuior, quasi concius criminum, quibus grauabatur, iudicium detrectaret, magis metu pœnæ, quam prærogatiuâ Sedis. Adde Auitum, quem tertium testem aduocat Launoius omni exceptione maiorem, amouisse omninò periculum, quod fingit, vt inde aliquod argumentum arripiat, sic enim scribit ad Faustum, & Symmachum Senatores Urbis, quorum nomine totum Senatuum, populum, Clerumque Symmacho infensissimos, eiusque accusatores, non iudices, vt fingit Launoius eleuandis & eludendis aduersæ sententiæ argumentis, ita compellat.

Perlata est sollicitudini nostra ex Italia in exemplaribus sacerdotalis forma decreti quodam de Papa Symmacho, apud Urbem collecti, Italia Antistites ediderunt: quam constitutionem licet obseruabilem numerosi, reuerendique Concilij reddat assensus; intelligimus tamen Sanctum Symmachum Papam, si saculo primum fuerit accusatus, Confacerdotum suorum solatium potius aspicere, quam recipere debuisse iudicium. His verbis maximè postremis, Auitus, omnesque Galliæ Episcopi vnius calamo, & ore loquentes, Aduersarij machinas, & technas dissolunt.

Quis enim primum non videat, cuius meminit Auitus iudicium, non ad Senatores, sed ad Confacerdotes Symmachi pertinere: à quibus, ait, *solatium*, id est, innocentie testimonium aspicere oportuisse, non debuisse, iudicium recipere? Cur ista? Quia ex mente Patrum synodi, non putabat *Prima Sedis Antistitem minorum subiacere iudicia.* Et cum Aduersarius hæc dicta interpretatur pagina 18 de modo iudicandi, quem improbat Auitus, non de re, id est de iudicio disputare: hæc thesis controuersa est, non tua vlla probatio. Quia ais tantum, non confirmas: sicut nec vim argumenti habent quæ subiungis, de silentio Symmachi, quod mirari potius debueras, quam trahere in noxam Pontificiæ auctoritatis.

Neque enim poterat quidquam prudentius, aut san-

ctius facere præsertim, cum eius nomine, aut saltē causā, satis intercessisset tota Synodus potestati sacrilegæ Theodorici illotis manibus sacra attrectantis. Patrum Concilij voces, Auiti Epistola explicatæ, non exigebant, ut Symmacho contestarentur, *iudices tui non sumus, te ipsum iudica, &c.* quia sub Tyrano Arriano quod breuior, eò efficacior & oppo-ⁿⁱunior asciscendo infonti Papæ solatio erat illorum contestatio; debuisse accusatum conuocare synodum, nec iudicio subiacere: ex hac enim responsione prudens lector intelligit, quo paucioribus rem magis perstringebat, eò validius Aduersarij diuinationes potius, quam argumenta refellere.

Nec felicius sese expedit Launoius à secundo teste, quem ipse inducit, ab Ennodio inquam Papiensi Episcopo, qui Apologiam pro Symmacho, & synodo edidit, contra libellum hoc titulo inscriptum, *Aduersus synodum absolutionis incongrua*: Patrum vero intercessionem his verbis confirmat: *Aliorum fortè hominum causas Demo volueris per homines terminare.* Sedis istius præfulem suo sine quæstione referuabit arbitrio: voluit Beati Petri Apostoli successores cælo tantum debere innocentiam, & subtilissimi discussoris indagini inuiolatam exhibere conscientiam. Eam, quæ Patres pronuntiarunt, ipse effert, & interpretatur apertius, & elegantibus verbis, quantum patiebatur illa ætas, cuius Ennodius Demosthenem, & Tullium agebat.

Vitiligit Aduersarius, eum, qui scribit pro synodo & Papa, supra synodum & Papam sapere non debere; quod putat factum, si postrema verba, ut sonant, intelligantur. Sed melius Launoio mentem suam nouerant Patres synodi, quibus ut scribit Sirmundus suis ad libellum pro synodo notis, adeo probatus est liber, *Ut eum synodus altera, quâ post consulatum Auieni habita est, suffragio suo confirmauerit: atque inter quartam & quintam synodos Symmachianas collocari, decretique vim obtinere iusserit.* Hæc validè præcludunt Launoij argutationes.

Hæc scripta ab Ennodio in Galliâ, aut Liguriâ nato, tum tantum triginta annorum minus callente rerum Ecclesiasticarum & ignaro, quid actum fuisset in causâ Damasi, & Syluestri eodem, quo Symmachum accusationum genere appetitorum, à quibus se apud Impera-

torum purgare non detrectarunt : nihil horum nesciebat Ennodius , sed non sentiebat cum Launoio , iis , quæ de Damaso , & Syluestro refert , pugnare intercessionem Concilij pro auctoritate , & innocentia Symmachi , cui à se ascriptum volebant calamitatis solatium , & innocentia testimonium , non latam in obnoxium sententiam. Summæ profecto fuisset imprudentia , iunioris Oratoris declamationes voluisse insertas synodi decretis , quæ magis sensu , quam stylo , ab illius sententia abhorrent.

Hic Launoio Rethoricâ opus est , ad purgandum , quod Synodo factum imputat : nullâ cautelâ , nullâ castigatione adhibitâ , decreuisse , ut Ennodij Apologia inter acta reponeretur , ne quidem his verbis exceptis , quibus Launoius putat nedom sua , sed etiam omnium Conciliorum decreta labefactari. Quis ista capiat ? Solus Launoius : quem , boni consulam suo sensu abundare , eâ lege , ut patiatur , de his suo quemque frui.

Quid contra tertium testem possit excipere , Auitum dico , nomine omnium Galliarum Episcoporum loquentem ? Qui nedom superioribus assentiant , sed quas Launoius ipse eorum verbis assuit , interpretationes dispellant : Nam imprimis non suo tantum , sed totius etiam Ecclesiæ Gallicanæ sensu , & nomine ista scripsisse apertis his verbis Auitus testatur. *Quamprimum supplici prece posco , ne celeberrimo Ordini vestro pagina hac aliquod moueat , quasi ab uno dictata fastidium : quoniam à cunctis Gallicanis Fratribus meis , ad hoc ipsum , non minus per mandata , quam per litteras oneratus , quacunque à vobis omnes ambimus , vnus suggerenda suscepi.* Quid vero nomine totius Ecclesiæ Gallicanæ Senatui , Clero populoque Romano referendum habeat , supra retulimus. *A synodo Romanâ solatium Symmacho ascriptum , non constitutum iudicium , in lacepsito Episcoporum vertice nutare omnium statum.*

Hæc putat dissolui Launoius distinctione iam insinuatâ , modi iudicandi , & iudicij : istud probatum ab Ecclesiâ Gallicanâ , damnato altero : sed qui Caietano argutarum factorem improperabat , videri ne ipse in eodem , & graueolentiori luto profundius infixus hæsitet : nec enim more Caietani , suam distinctionem aliquâ luce aut

eruditione locupletat, contentus nudis verbis modum, à iudicio; huius probationem, ab alterius damnatione diuisisse.

Sed quâ ratione, ait, Patribus Synodi Auito, & Ennodio probatum iudicium illud, quod à capite ad calcem damnabat, quia à Rege, à Tyranno, ab Arriano indictum est, in hominem suæ permissum, nulli humanæ potestati obnoxium? Eoque collimat Auitus, ita certo & inflexo verborum, & sensus tenore, ut nulla vi & arte Launoij alio detorqueri possint. Hoc enim sine dubio significant relata ex ipso verba: dum ait, *in laeesso vertice nutare omnium statum, quos una criminatio percussura sit sine inuidiâ multitudinis, si statum principis obruerit.* Id est, nihil fore tutum ab aleâ iudiciorum, abrepto præter morem ad iudicium eo, qui nulli, nisi diuino subiiciebatur.

Hunc sensum quæ sequuntur verba confirmant, *non datur facile intelligi, quâ ratione vel lege ab inferioribus eminentior iudicetur.* Gratis vero, & præter Auiti mentem interpretatur Launoius hoc, sicuti superius synodi dictum de Senatu, Clero, populoque Romano, in Symmachum contumacibus: neque enim Iudicium, sed accusatorum apud Principem & synodum partes egerunt; nec nisi magnâ horum vocum corruptelâ dici potest Symmachus à testibus, & actoribus perpetam indicatus, quia nullâ lege cautum est, *ne eminentior ab inferioribus accusetur.*

Eò etiam spectat Auitus, argumento quod vocant, à Minori ad Maius: si ex præcepto Apostoli accusatio in Presbyterum recipi non debeat; quis non abhorreat in Summum Sacerdotem, & in caput Ecclesiæ tentatam sententiam; inde etiam Synodo fere succenlet, quod in Symmachum inquisierit: id enim significant hæc verba. *Quod Synodus ipsa venerabilis, laudabili constitutione prospiciens, causam, quam (quod saluâ eius reuerentiâ dictum sit:) pene susceperat inquirendam, diuino potius seruauit examini. Perstrinxit tamen prout breuiter potuit, nihil vel sibi, vel gloriosissimo viro Theodorico Regi, de his, quæ Papa dicebantur obiecta, patuisse.* Videtur iudicium à Synodo susceptum excusare solâ charitatis, & humanitatis

humanitatis lege, quæ iubet afflictis, & infontibus succurrere.

Ad consequentias Launoij verè inconsequentes, inde effici Synodum Papam sibi obnoxium agnouisse; quod eius causam diuino iudicio permiserit, nihil Respondeo: quia mihi sunt occultiores, quam iudicibus culpæ Symmachi diuino iudicio permissæ. An non sentit hæc dicta à Synodo, ne videretur, cum maximo Ecclesiæ periculo, Theodoricum famæ & boni Principis studiosissimum damnare, & apertâ innocentix Symmachi sententiâ, in se, & in omnes Catholicos, callidissimi & Arriani Tyranni iram accendere; quasi infontem nullius etiam occulti peccati, vel minimè suspectum in discrimen capitis vocasset?

Bonifacij secundi retractantis, quod obtenderat ius sibi defuncto successorem sufficiens, consilium laudo: Sed quid ad causam faciat, aut quo pertineat, non intelligo. Gregorij primi exemplum ab omnibus corripere, & emendari animo parati, & optantis humilitatem, & modestiam commendat: sed hoc nihil ad thesim de iudiciariâ castigatione, nisi tot velit Summis Pontificibus iudices constituere, quot debent, aut possunt fraternæ charitatis officium præstare, quod omnibus licet, & à Christo iniunctum est. Adrianus secundus non detrahit, nec rescidit sententiam sextæ Synodi in Honorium decessorem, latam ob hæresis crimen, in quod si contingeret Summum Pontificem prolabi, à prærogatiuâ Sedis Apostolicæ ex Caietano monuimus esse casurum.

Ad finem disputationis hanc à Launoio æquitatem efflagito, vt minus acerbè in eos qui à se de Primatu Petri dissentiunt, & moderatius agat, remittâtque erroris, (aut si id à se obtinere non possit,) saltem noui erroris notam, cum quantâ, quantâ valet loquentiâ & subtilitate, ab Ennodij, ab Auiti, & eorum, qui in Galliâ tum florebant, Episcoporum, & à Patrum, qui duas Romæ Synodos generales habuerunt, non potuerit sententiâ, ad minus probabilitatem aliquam abitergere. Eos omnes in hunc errorem consensisse patiar à te errorem vocari: dummodo hoc condones, ne Bellarminus, Baronius, Caietanus, alique plures noui erroris quasi cuso-

res audiant. Atque hoc nomine quasi palpatores Curia
Romanae traducantur, cum præsidio Antiquitatis non
deficiantur.

PARAGRAPHVS VNDICESIMVS.

*Observationes in Epistolam quartam Paulo Ra-
tuno scriptam, & in duas postremas.*

QUARTA Epistola eodem, quo duæ omnium pri-
mæ responso refellitur. Duodecim, quæ refert, &
expendit sigillatim Launoius testimonia ab Urbano I V.
Diuo Thomæ missa, ut post serium examen ad se refer-
ret, quem sensum facerent, verumne ac Catholicum,
an falsum, & erroneum; non quo sensu auctores ea pro-
tulissent. Neque enim sapientissimus, & æquissimus
Pontifex impossibilia præcipiebat: & cum testimonia li-
bello contenta non meminissent sigillatim locorum &
capitum, sed vniuersim notarent libros & auctores, vn-
de deprompta significabantur, nec illa volumina nisi
græca lingua sancto Doctori ignota, vel omnino non
extarent, inique exegisset Pontifex si voluisset ad se re-
ferri sensum Auctorum, quos consulere non posset.

Quid igitur sanctus Doctor? De singulis mentem
suam aperuit, testatus sibi visa vera & Catholica, semo-
tis iis, quæ falsi aut erroris suspecta, aut comperta le-
gerat. Quid ergo compendij ex longo horum testimo-
niorum examine captat Launoius ad suam causam? Pu-
tâtne plagij conuictum D Thomam, quod citata testi-
monia iis non extent libris, unde exscripta dicebantur?
Non fuit hoc illi Pontificio imperio iniunctum, nec sibi
assumpsit, quia nec potuit, nec debuit illud examen obire
iis de causis quas iam retulimus. Si velit in hæresim la-
psum, quodd illis assensus sit, quasi certis dogmatibus,
hæresim non detrectabit.

Et si ipse quæras vera ne sint huiusmodi testimonia,
aut Catholica fide credenda, vel damnanda; duo re-
spondeo, nullius erroris Diuo Thomæ fuisse suspecta,
neque Launoium vlla ratione verisimili id probasse, seu
ipsa causa hoc non patiat, seu qui hoc munus susce-

pit, eo male sit defunctus. Aliud addo, si quæ his testimoniis asseruntur, licet non extent aut legantur apud illos auctores vel libros, quibus adscribuntur, eo saltem tenore verborum, quo citantur, non facere rem indubitam, sed non deesse ex eisdem, vel aliis auctoribus loca, quæ ista confirmant.

Vnus Bernardus omnia complexus est relatis ex secundo de Consideratione Libro verbis, & ut cæteros obmittam, de his differit Cardinalis Peronius libro primo Replicæ ad Regem magnæ Britannia capite 25. & 26. eâ eloquentiæ & eruditionis copia, vi, & vbertate, ut in his duobus capitibus refellendis Blondellus in historia Ecclesiastica hæreticorum doctissimus ingenti volumine post octodecim annos ab obitu Perronij edito allaborarit, &, ut credibile est, toto eo tempore elucubrato; ut non credat Launoius se vna aut altera Epistola falsi, & erroris hæc testimonia conuicturum, ut quisquis contra senserit, fidem cum fronte amisisse iure pronuntiare possit.

Communis opinio est Abbatem Sancyranum, antequam in arce Vincenna detineretur, meditatam, & aggressum etiam vindicias Cardinalis Perronij aduersus heterodoxorum plures, qui in virum iam mortuum insurrexerant, vlturi quas viuus sibi plagas inflixerat, & suscepisse defendenda quæ Cardinalis immortalitate dignus scripserat de Eucharistia, & de primatu Petri ab hæreticis maxime lacescita. Id cum obaudisset Cardinalis Richelius, fertur ad id opus, quem currentem putabat, incitasse, & pollicitus si inchoatam apologiam vellet prosequi, curaturum, ne quidquam librorum, & subsidiorum deesset; quæ ad absoluendam vellet, aut forent necessaria; sed excelsio animo responsum à Sancyrano non conuenire Ecclesiæ dignitari, illius caput, & mysteriorum maximum ab homine accusato, qui sui iuris non esset, defendi.

Non est dubium, quin vir acerrimi ingenii, & profundissimæ eruditionis hoc operæ pretium molitus, totus à Launoio diuersus fuisset, quia Blondellum Perronio insensus sectari videtur; & si voluisset, poterat multa ab illo mutuari; id fecisse crediderim, quamuis non ausum asserere, quia Blondellum obiter tantum attingi;

Verum certus sum vbiq̃ue à Perronio dissentire, & stare à Blondello. Infinita vno capite Cardinalis complexus est argumenta, & ne longius abeam ab huius Epistolæ examine, à damnatione Chrysostomi ad Innocentium appellantis, illius capitis pagina 100. plurima depromit argumenta pro primatu Petri, & Sedis Apostolicæ, quæ Launoius totis viribus hac Epistola nititur eleuare iisdem cauillis, quos Perronius validissime depellit, quales sunt Chrysostomum non ad Innocentium, sed ad Concilium generale appellasse, cuius congregandi, cum nulla spes alluceret, appellasse indiscriminatim ad omnes Occidentis Episcopos, & quas scripsit, & quæ exant ad Innocentium Epistolæ, quibus rogat, *ut rescindat* contra se acta præter leges, ex Palladio Dialogo de vita Chrysostomi post finem hæc subnecti *scripsimus & ista ad Venerium Mediolanensem & Chromatium Aquileensem Episcopum*, nec conquestum de Chrysostomo Innocentium, quod prius ad Synodum generalem, & eodem tempore, iisdemque Epistolis, ne mutato quidem apice, solâ variatâ inscriptione nominum, ad quos litteræ mittebantur, ad illos appellasse.¹

Hac vero ex Palladio vocula *scripsimus ista ad Venerium*, in qua totum suæ causæ præsidium ponit, ita exultat & triumphat, ut pagina 27. omnibus à se dissentientibus his verbis insultet, *hic exorietur variarum distinctionum Thesaurus, quarum auxilio perspicaces & acuti homines sibi videntur efficere, ut & dictum & factum sit, quod nec dictum nec factum est, &c. ut fuerit quod nunquam fuit, &c. ut quod non est, nec forsan esse potest esse incipias, & figmento applaudatur ab imperita plebe: & post alia eiusdem fursuris concludit, ex propriis monumentis, non ex alienis Apostolica Sedis auctoritatem defendimus, & periculosis Romana Curia assentatoribus veram ac simplicem illius Sedis traditionem ut murum æthereum opponimus.*

An non miraris, Lector, verba hæc supra Plautinum militem ventosa? Duo aut tria attendas velim, cui nam tot diſtertiis insultet, non Cardinali Bellarmino, qui ieiune admodum & obiter hoc ex Chrysostomi appellatione argumentum attigit, sed Cardinali Perronio, qui

totis illud viribus vrget. Sed vndenam tanta fiducia & inuictissimo religionis athletæ insultandi audacia? Iam monui ex hoc vno Chrysostomi apud Palladium verbulo *ista scripsimus ad Venerium*, quo reperto crediderim quasi alterum Archimedem vix sui compotem, reperta quam anxie querebat, demonstratione Mathematica, abreptum per plateas concursasse hac voce *εὕρηξ* reperi telum quo Perronium, omnesque Romanæ Curia palpones confodiam.

Ad huius exercitationis calcem non prætermittam, quod exordio, & progressu lectionis harum Epistolarum passim obseruavi, Launoii panopliam duplici armorum genere constare, immeritorum conuiciis quos atrociter lacerat, & argumentis negatinis aut debilissimis, quæ deuinationis aliquid habeant, vix ad coniecturas accedant, quas vult nos habere demonstrationum loco, & sibi parendi & assentiendi necessitatem indicit. Hoc scriptiois genere quandam videtur affectare Dei *Omnipotentia*, sicuti loquitur Augustinus, *tenebrosam similitudinem* vti apud Deum tota ratio facti est virtus facientis, & soli nihilo inædificatum orbem tribus digitis appendit, & ex Propheta Regio fundauit terram supra suam, id est nihili stabilitatem, operaque gratiæ aliqua creationis similitudine peragit, & nihil nisi forte pœnas commeritis veniam, aliaque infinita dona largitur. Non longe videtur Aduersarius à præpostera hac imitatione rerum & operum Dei, quæ mirari conueniat, non affectare, aut æmulari omni virtutum genere celeberrimos viros non desinit incusare supinitatis, ignorantia, negligentia, adulationis.

Nullum scriptoribus, maxime historicis vitium grauius potest obrepere, aut impropieri, quam quod obseruauimus Launoium septimæ ad Sambocæuium Epistolæ pagina 24. impingere Baronio Annalium Ecclesiasticorum parenti, ipso immensi ac prope infiniti operis limine, proposito sibi fine & scopo non inquirendi & narrandi veri, sed Romanis Pontificibus adulandi, quam dignitatem suffragiis purpuratorum Patrum sibi iam impendentem totis viribus diu eluctatus & amolitus est & hic, si superis placet, inter Summorum Pontificum Launoij suffragio palpatores primus repo-

nendus Annales scripsit, quas hac sua censura, quasi de lapso è monte lapide Babylonicam statuam omnino euersurum se putat, forte heterodoxis gratificaturus, sufficiat centurias Magdeburgensium, Annalibus Baronij meliores quod longius à Romanorum Pontificum adulatione, quam ab aperto odio absint.

Immanitatem huius calumniæ, si vlla maior & iniquior fingi queat, auget futilitas accusationis: inde enim suspectum, aut verius compertum adulationis notæ Baronium, quod Epistolam millies obtrusam Ambrosio abdicatam neglexerit quærere, à quo esset auctore, veritus, ne si Damaso & Siricio ascriberetur, iura Sedis Apostolicæ ab ipso asserta euerteret: cum tamen si seposito omni perverso affectu in Sedem Apostolicam, legatur, nihil prorsus detrahat Romanorum Pontificum auctoritati; sed argumento tantum sit luculentissimo, qui ista scripsit Pontifici summam affuisse, & omnibus necessariam esse tanto muneri administrando æquitatem, quæ amplissimæ potestati moderaretur. Viderit Launoius, an inde iustam habuerit causam, tantum dedecus Baronio, & adeo atrocem eius Annalibus noxam importandi.

Nec æquior est in Perronium Gallicana Ecclesiæ decus æternum, qui præter cætera in Ecclesiam merita prope infinita infortunium & dedecus Possiaci colloquij foelicitate Fonte-belleaci reparauit & deleuit: hunc vero perpetuo in his controuersis silentio videtur abiicere, quasi sal adulatione infatuatum, quod ad nihilum valeat ultra, nisi ut mittatur foras, & conculceretur ab hominibus. Non potuit occurrere luculentior, aut opportunior locus viri cum laude memorandi, aut argumentis refellendi, quam hac quartæ suæ Epistolæ ex Palladio annotatione. Chrysostomum illa, quæ ad Innocentium scripserat ne mutato quidem apice, sed sola inscriptione Epistolæ variata monuisse Venerium Mediolanensem, aliosque Occidentis Episcopos se præter Canones & leges Ecclesiæ damnatum singulorum auctoritate, qua æquo iure valerent, absolendum esse & restituendum.

Hunc Aduersarij cauillum validissimè Perronius loco citato deiecit, demonstrauique harum *vocularum scriptum*, & ista ad Venerium, &c. sensum esse eorum,

quæ in se perperam gesta erant præter Innocentium, alios Episcopos certiores fecisse suis Epistolis, ut cuiusque dignitati & gradui conueniebat, non tamen eadem verborum formulâ, nec omnes rogasse ut Innocentium *ne confusio hac omnem, qua sub calo est, nationem inuadat, obsecro, ut scribas, ut hac tam iniquè facta, & absentibus nobis, & declinantibus iudicium non habeant robur, sicut nec natura sua habent.*

Et dum Aduersarius contendit eundem prorsus fuisse rehorum Epistolarum Chrysostomi ne mutato quidem apice, atque inde depromit argumentum, quo gloriatur se *variarum distinctionum Theaurum exhaustisse, &c.* præter quod ista magis meram diuinationem, quam ullam legitimæ argumentationis speciem respiciant, ut taceam quod iam monui, illum disputationes suas solere rebus nihili astruere, malè mihi omninò videtur de Chrysostomo meritis quod virum inexhaustæ eloquentiæ, & vbertatis ingenij infinitæ suo modulo meritis sit, quasi præ nimia siccitate, qualem ipse præfert, non potuerit stylum, formamque Epistolarum, sicut nec ipse suarum variare, cum hoc mediocri volumine pluries Epistolam Syriaci & repulsam Marcionis obtrudat, & Argumenta repetat nulla figurarum, aut rerum varietate ornata. At toto cœlo aberrat, si Chrysostomum erediderit aliqua sui similitudine eadem pluribus sola nominum mutatione scripisse, quoad cætera nequidem apice mutato. Atque huic quasi fundamento immoto astructis argumentis à se dissentientes damnat, quasi cæcos aut deformi obsequio palpatores: hoc scribendi genus, si veris agere liceat, ariolari & conuiciari, aut quiduis aliud quam disputare dixeris.

Sed parum est leuibus argumentis quasi inuictis demonstrationibus fidere: quid grauius in disputandi leges peccat. Nam ut causæ inseruiat, aut ut difficultates sibi insuperabiles declinet, nihil est adeo absurdum, quod refugiat. Synodi Romanæ sub Symmacho, quam Sirmundus palmarem ait cognominatam, referente ipsomet Launoio Epistola 9. Patres iura Sedi Apostolicæ singularia, ex triplici fonte, à primatu Petri, ab institutione diuinâ, à sanctionibus Conciliorum repetebant, quos Bernardum secutum supra audiuius; & Perto-

nium pluries indicauimus idem argumentum eloquentissimè versantem. Verum Launoius nihil ista moratus primæ Epistolæ pag. 15. an ex crassâ inscitiâ, an fraude nolim iudicare, sed differendi ratione perito, aut sincero Theologo prorsus indigna, Leonem IX. & Nicolaum I. adeò stolidos, suorumque iurium ignaros facit, ut ille suæ sedis auctoritatem vni Constantini gratiæ & donationi, alter abdicationi Polychronij Hierosolymorum Antistitis, qui nunquam extiterit, ascribant; & his tantum duobus ambo referant accepta.

Sed audi ridicula magis, aut pejora; nullum contendit ius Sedi Apostolicæ diuinâ institutione conuenire, cuius eodem gradu singuli Episcoporum, immo & Sacerdotum (cum vnicum velit esse Sacerdotium) non sint consortes: idque putat demonstrari Epistolâ Iulij Pontificis ad Faustum IV. suæ pagina 24. relata his verbis; *Euphemium verò miror, si ignorantiam suam ipse non perspicit, qui dicit Acacium ab uno non potuisse damnari.* Atque hic statuit Chrysostomum Orientalium Episcoporum Synodo, cui intererant, aut assensu fuerant Epiphanius, Cyrillus, alique plures sanctitate celeberrimi ius absoluendi seu cognitâ, seu indiscussâ causâ fuisse non solum penes Innocentium (quod ab ipso factum vix negare poterat,) sed penes minimum Ecclesiæ Occidentalis Episcopum, & Sacerdotem, quia omnes paris sunt ex Launoio cum Summo Pontifice institutione diuinâ autoritatis, & si quæ sint iura Ecclesiasticæ potestatis, quæ Episcoporum singulis citra impietatem, & insaniam nequeat asserere, quale est munus congregandi Concilia, quod nec etiam ipsi inter Conciliis vindicare magis potest, quam vlli creaturæ sese producendi facultatem. Ne hæc prærogatiua à Conciliis, & singulis Episcoporum exclusa cedat Episcopo Romano, ad principes laicos Epistolarum vltima contendit pertinere, nequidem exceptis hæreticis: cum Synodum Romanam Symmachi causâ congregatam non sit causatus illegitimam, quamuis à Theodorico Arriano Italiæ Tyranno indictam voluerit.

Quid nos ad ista? ut paucis mentem meam aperiarn, dico me non mirari Epistolæ septimæ pag. 23. interpolata Pij II. ad Carolum VII. Epistolæ verba, & loco

detractorum Sedis Apostolica ut mens Auctoris, & genuina lectio habet, ab Aduersario suffectum rō *Doctrinis* vocabulum. Vti enim aliās de Theophilo obseruauit, Launoio hunc locum legenti idem prorsus accidit, quod solet camelo profluens lymphidum trananti, aut ebibenti, ut vel aquam conturbet, vel in rabiem agatur, quod turpissimum sui aspectum, quem aqua pellucida subiicit, ferre non possit. Relatis Pius II. verbis videtur graphicè Aduersarium deformasse, & delineasse. Verissimè enim detractoris Sedis Apostolicæ, nomen à Pontifice positum, aut grauius, eum commeneri dixeris, qui omnia iura Ecclesiastica paria velit; sacerdotibus singulis ex institutione diuinâ, & vnitate impartibili sacerdotij, aut si quæ nequeant ad singulos sacerdotum, aut ad Concilium pertinere, vindicet secularibus & hæreticis, ne reliqui quidquam faciat Petri successoribus: Sed cum sui imaginem paucis his verbis subiectam ferre non posset; in illam exarsit, & inaudita interpolatione corrumpit; quasi non ad se, sed ad Perroonium, ad Baronium, ad Bernardum, aliosque ex institutione diuinâ plurium Sedis Apostolicæ iurium vindices referretur.

Præter communia his omnibus conuicia Palpatorum Sedis Apostolicæ Bellarminum epistolâ decimâ laceffit, & arguit supinitatis, quod elumbi, ut loquitur, disputandi modo originem controuersie de potestate Pontificiâ cum Conciliorum authoritate collatâ quasi recentem repetat à Concilio Pisano anno 1409. sub Alexandro V. quam vult ipse longè antiquiorem fuisse: Arguit etiam malæ fidei & fraudis, quòd Doctorum pro Concilio contra Pontificem stantium imminuèrit numerum: cum infiniti suppetant, paucissimos recensuerit. Videtur hâc censurâ aduersarius cum Amasio Calvinistarum in Hollandia Magistro vindice conuenire, qui in Bellarminum scripsit controuersiarum volumen hoc titulo *Bellarminus Enevuatus*, quod in elumbis nomen recidit à Launoio impositum fortissimo Catholicorum Athletæ. Sed quid peccauit, quòd nouam dixerit quæstionem Bellarminus à nullo Patrum, aut Theologorum constitutam, aut agitatam? Nihil hâc obseruatione verius esse demonstrant omnium Scholasticorum quotquot ante

illud Concilium libri editi supersunt, in quibus ne verbum quidem legas de hac controversiâ, non tacituri, si res ad disputationem vocata fuisset, cum Scholastici minuta etiam quæque accuratè prosequantur.

Monstret Launoïus antiquorum monumentorum indefessus, & diligentissimus Scrutator apud Albertum Magnum, Alensem, D. Thomam, ceterosque Theologos comparationem summi Pontificis vsquam initam cum Concilio Acephalo, id est à capite seiuncto, nec Pontificis nomine congregato, nec definitione confirmato, nec per se, aut per Legatos celebrato: ostendat an collatione, & disputatione sic constitutâ vllus Theologorum expressis verbis definiat, vtra, vtri præstet duorum auctoritas. Cum igitur hac de re altissimum fuerit apud antiquos silentium, cur elumbem vocat disputandi rationem Bellarmini, quod à Concilio Pisano ortam velit controversiam; cum nullum afferat monumentum disputationi elumbi refutandæ eâ Synodo antiquius?

Hanc nouitatem nititur depellere ingestis, & millies reperitis ex Epistolâ Pij & Siricij testimoniis, aliisque id genus, quæ singulis eius Epistolarum paginis occurrunt: atque hoc repetitionum vsu sibi familiarissimo, magnam à se probi scriptoris partem laudum abrogat. Quis enim legat, aut ferat toties eadem scribentem (& quod caput est) quæ nihil ad rem faciant, in quibus nec antiqui, nec recentes viderint quæ lynceis oculis se solum introspicere gloriari possit? Latebat fortè hæc, quæ Bellarminum, pluresque alios effugit controversiâ aut assertio in his locis, quæ refert, velut ignis in silice, nec potuit inde emicare, dum ipse summi ingenij subtilitate, cui conspicua, quæ clam reliquos mortalium sunt, admotâ velut è puteo Democriti hanc veritatem eliceret.

Nec iustior est altera reprehensio, ex priorè consecrata, fraude, aut nimîâ negligentîâ Bellarmini, diminutè recenseri Doctores, qui pro Concilio stant contra Summum Pontificem, quos longa serie innumeros, refert Launoïus. Sed Bellarminum defendit mos receptus in scholis, & apud Scriptores, eos tantùm recensendi, qui ex professo libris editis rem tractarunt. At quos

conqueritur Launoius omisso (si duos excipias, Car-
tusianum, & Maiorem, quos tacite notauit Bellarmi-
nus) cæterorum nullum vsus disputandi exigebat, aut
patiebatur nominari. Vide Launoi quâ prudentiâ res
tuas peragas; graues illustrium virorum reprehensiones
temerè susceptas, nihilo meliori progressu vrges, &
prosequeris. Bellarminum carpis, quod detraxerit de
numero Scriptorum, qui stant pro Concilio; & accu-
sationem ordinis à Ioanne Victorino, qui memoriale
historiarum scripsit nondum editum. Subjungis
omissos Barones Gallia apud Mathæum Parisium, qui
aliquod verbum hac de re mussitant. Non est exordio
foelicior processus; & ridiculus essem, si excusandæ
Bellarmini negligentia decurrerem alios, quos pro hac
sententiâ possis fortè in numerum testium inducere,
non Scriptorum, aut Theologorum, quos tantum ci-
tare potuit, aut debuit Bellarminus.

Hinc facile agnoscas, nullos magis iustis reprehensio-
nibus obnoxios esse, quàm cutores reprehensionum: id-
que exemplo confirmat Launoius, qui accusationum
æstu abreptus, grauissima peccat, quorum numerum non
sit facile inire: & si possem, absit vt vellem, in gratiam
viri aliàs laudandi & humanissimi: Nam si hanc alios
carpendi libidinem tollas, nullus mortalium Launio
melior fuerit, eoque magis dolendum, quod egregias
dotes vno vitio corrumpat. Nam præter quod qui pec-
cat in vno, omnium reus euadit; illo contradicendi im-
petu in infinita prope mala delabitur. Nonnulla obser-
uata sunt, præter omne genus officiorum Theologi &
sinceri hominis admissa; sed multò plura prætermisi:
quia charitas operire nos iubet multitudinem peccato-
rum.

Quid enim, si quo animo & stylo alios incescit, & fo-
dicat immeritos, in illum hoc solo nomine, etiam si
cætera deessent, actiora commertum ageremus? Et ne
iam obiter præstricta repetam, cum non desint noua,
illum impotentiori æstu, qui suum se esse non sinat,
transuersum ferri Epistolæ quartæ pag. 29. heu nimis
certum & indubitatum facit, dum nonnullos Theolo-
gos, qui argumentum ex Petro à Collegio Apostola-
rum Samariam cum Ioanne misso, eleuant distin-

ctione Missionis quadruplicis imperio, consilio, precibus, vel origine, qualis in Verbum à Patre mysterio Incarnationis, & Spiritum Sanctum ab utroque, infusione charitatis, vi emanationis ad nos delapsos cadit; eos inquam Theologos hac distinctione vltos incescit istoverfu

Gens ratione furens, & mentem pasta chimeris.

Nemo negauerit hoc impotentius dictum, & vix vlli potuisse excidere, nisi ex vero morbo, quem aliis affingat.

An eam reprehensionem commereantur ij, quorum interpretatio, seu distinctio, tum diuinis ex Scripturâ, tum humanis ex communi vltu exemplis munita sit, quam plurimum referat ad fidem contra antiquos & recentes Arrianos, seu Socinianos propugnandam probari? Quid vetat quin dicam, medicum ad locum balnei celebrem, agrum principem, consilio & valetudinis gratiâ, amicum precibus, filium & seruum imperio negotiorum causâ misisse? An qui ita distinxerit, vnique vocabulo plura subiunxerit significata, rebus personisque accommodata, accensendus sit genti ratione furenti, &c. An adeo atroci censurâ dignum putares, qui à comitiis Cleri Gallicani diceret, missum Præsidem apud Regem illius nomine oraturum, idque precibus, non imperio referret, quod liberum illi sit id muneris obire? Addam quod iam insinuaui, hâc missionis ex imperio, consilio, origine, distinctione infringi, longè validius contra Verbi & Spiritus Sancti Diuinitatem Arrianorum quam quod Launoïus in eos Theologos intorquet argumentum; nec minùs Socinianos illi repositurum, *gens ratione furens*, vt inde agnoscas in Launoïo desiderari æquiritatem, aduersus eos, quibus cum disputat, quam, vt audio, ceteris hominum præstat: quia si nimum scripturiendi, & carpendi alios æstum, & quæ illi annascuntur vitia, excipias, cæteris ferè intactus est; vt optandum sit, à disceptationibus litterariis omnino abstineat, quasi à veneno: vel sibi moderetur, maioremque fidem & reconditam eruditionem abiectâ vulgari, protritâ, semoris conuitiis argumenta adhibeat.

ARTICVLVS QVINTVS.

*Quæ supersunt ex Aluâ vitiligationes in D.
Thomam, eiusque discipulos depelluntur.*

AD Aluant redeamus, à quo videmur longius recessisse, hac in Launoium exercitatione; quæ digressionis vitio non careret, nisi ambo pluribus simillimi in damnationem Opusculi Sancti Doctoris contra errores Græcorum concordēs incurrissent in eius Auctorem. Non possum benignius interpretari, quàm vitiligationis nomine, quæ ex Aluâ supersunt refellenda: alij, qui minus illi vellent condonatum, æquissimè damnarent contumaciæ, in apertam veritatem renitentia, sacrilegij, impietatis. Multa enim occurrunt, quæ vix possis etiam si maximè velis, à grauioribus notis eximere, qualia sunt imprimis, quibus elogium Sancti Doctoris à Christo, à Summis Pontificibus auctoribus euulgata, in dubium reuocat, rider, arrodit, cauillis, fraude, sarcasinis, & omni denique conuictorum genere, à quorum nullis etiam atrocioribus videtur abstinuisse.

PARAGRAPHVS PRIMVS.

*Defenduntur encomia Alexandri VII. de
Sancto Doctore.*

EXORDIOR has vindicias ab elogio omnium recentissimo & progressu, vix quidquam ex me ipso depromam, contentus paucis perstringere, quæ fusius duo nominati ex Belgio Patres Harney & Ianssens in Aluam suis apologiis scripserunt. Ne aliena potius subripere videar, quam grato animo mutuari; methodum tantum breuitatis & commodiorum responsionum causâ inuertam, & quam illi ab antiquioribus elogiis minus interdum ratione temporis indubitatis aggressi sunt, à recentioribus, Apologia capiam exordium, magno compendio & fructu, ne supersit vllus Lectori locus du-

bitandi, solo veri contemptu, & litigandi astu antiqua
elogia Aluam arrodere, cum à recentibus & nuperis om-
nino indubitatis maximo bonæ fidei dispendio abstinere
non potuerit.

Quid apud illum sanctum & certum putes, qui tamen
certum quid suis libris in titulum inscribit? Qui Brevis
Alexandri VII. ad Louaniensem academiam commen-
dandæ DD. Augustini, & Thomæ doctrinæ, scriptum
præter mentem Summi Pontificis, contra apertum ver-
borum sensum ausus sit interpretari, aut verius cauillis
incellere? Quid enim ad hæc diplomatis expressa ver-
ba? *De reliquo non dubitamus quin vos pro singulari
scientia pietatisque studio, sanam & incorruptam, qua-
lem tot Apostolica sedis declarationes requirunt, doctrinam,
semper amplexuri, &c sitis: necnon præclarissimorum Ec-
clesiæ Catholica Doctorum Augustini, & Thomæ Aquina-
ti inconcussa, tutissimæque dogmata sequi semper (ut as-
seritis,) & impensè reuereri velitis; quorum profectò San-
ctissimorum Virorum, penès Catholicos uniuersos ingen-
tia, & omnem laudem supergressa nomina, noui præco-
nij commendatione non egent.*

Non dicam hac noua laudatione Sancti Doctoris, an-
tiquas commemorari, ac subinde confirmari, cum has
in causâ effedicat, cur suis non egeat: ac proinde con-
tra sensum Summi Pontificis, ab Aluâ, quasi commen-
titias traduci, cum præ hoc postremo elogio, quod om-
nium complexionem & sigillum dixeris, cætera, quæ
nimia contendit Alua, penè sorDESCANT. Quid enim ad
illa, quod Stephani Episcopi, & Academiæ Parisiensis
circumfertur elogium, nihil sensisse, aut scripsisse,
quod sanæ fidei, & bonis moribus aduersetur? Quid no-
ui habet Bulla Urbani V. ad Academiam Tholosanæ,
præcipientis D. Thomæ doctrinam tanquam veridicam
& Catholicam sectentur? Quid Innocentij VI. *Com-
mendatio doctrinam S. Thomæ præ cæteris exceptâ Canoni-
câ, habere proprietatem verborum, modum dicendorum,
veritatem sententiarum, &c.*

Pater Harney sacræ Theologiæ licentiatus pro suo
munere, ut moris est in Academia Louanienfi, oratio-
nis in D. Thomæ laudem habendæ, occasione editionis
Nodorum Patris Aluæ in Belgio peractæ, mutandum ge-

nus & stylum censuit, & semoto panegyrico, instituentem Apologiam aduersus Patris Aluæ calumnias. Oratione itaque recitatâ 28. Ianuarij anno 1663. dicam fraudis, & doli inscripsit Aduersario, quod memoratum Breue Apostolicum anno 1660. 7. Augusti missum, & anno sequenti Bruxellis typis datum, & 7. Martij D. Thomæ sacro ad valuas affixum, omnino prætermiserit, primâ editione suorum Nodorum anno 1662 inchoatâ, & absolutâ, cui eumentum superiorem annum inscripserit.

Quid ad hæc Pater Aluæ? Fraudem occultam manifestâ aut falsi cõuictioni opportuniore cumulauit, cum grauissimâ bonæ fidei noxâ respondit, nec dolo, nec malo animo à se omissum Breue, quod Bruxellis anno 1663. euulgatum, non poterat nisi dono Prophetiæ rescire, cum anno superiori primam editionem Nodorum adornabat. Hanc igitur obmissionem defendit excusatione ipsâ culpâ grauiori, tota mendaciis, quorum reuinci possit, conflata est responsio, eâque vnâ omnem sibi fidem apud cordatos abrogat, dum ait, se scripsisse Breue Pontificium Bruxellis anno sequenti post suos Nodos primum in lucem datum. Condone illi plura apertè falsa, quorum Pater Harney reum peragit.

Quæ enim fieri potuit, rerum omnium, quæ ad D. Thomam pertinent, aucupem auidissimum, eâque de causâ per totam Europam errantem, Bibliothecarum scrutatorem indefessum, ignorasse in Belgio, quod omnî rubâ vocalius, & tonitru altius insonuit, Breue Apostolicum Louanium per latum. Crediderim hoc fulgure percussum, quo suos nodos non tam solui aut scindi, quàm conflagrare sentiebat, vix potuisse ad se per annum redire: atque ita, dum Deum & homines contestabitur sibi ignotum Breue velim iurato haberi fidem. Sed quâ veri specie editionem suorum Nodorum inchoatam 1662. retrahit ad annum superiorem? Obseruat Pater Harney ex eâ mutatione, & retrocessione anni tria commoda captasse, primum, vt prætereundum ignorantiam Breuis Apostolici ad Louanienfes, & Constitutionis de immaculata Conceptione, eodem, quem eumentum suæ editioni inscripsit, anno 1661. datam, quâ cauet Sanctissimus grauissimis poenis indictis, ne

quisquam erroris , aut peccati mortalis aduersam opinionem accuset : & cum pertinaciter constitutum esset Aluæ , hanc censuram ferre, *quasi immediate intensionis Concilij Tridentini , & Spiritus Sancti aduersaretur* , D. Thomas, sensit plurimum referre , si huius Constitutionis ignorationem posset hac mutatione editionis obtendere , ut graues pœnas effugeret. Aliud etiam commodum ex eâ fraude sperabat ; quæ res , cum sit paulò implicatio, omittam ; nec diutiùs Lectorem morabor. Sed hic exclamare liceat verbis Ambrosij paululum mutatis , ut hominis pudori parcam , quanta in vna defensione, aut excusatione sunt peccata ! Sed hæc omnia indulgeamus , nec enim dubium est quin his technis , se hominum damnationem effugisse crederet , nisi suomet ore argui , & reuinci posset. Sed antiqui moniti oblitus , mendacem oportere esse memorem , ipsemet refert folio 724. se non latuisse Breue Pontificium anno 1660. Leodij typis datum. Quam post ista putat apud homines sui opinionem excitatum iri ?

Sed nondum exhaustæ sunt hominis artes. Cum ignorantiam obtendere nequeat Breuis , illud apertè impetit , nihil facere contendit , ad commendationem S. Thomæ , quod Pontifex non suis , sed Academiæ verbis , & subinde illius , non suo sensu pronunciet *Inconcussa D. Thomæ dogmata* ; quia statim interferit , ut asserit is parenthesis quasi Academia petierit nouam doctrinæ Angelicæ probationem , eamque negauerit sanctissimus , illa duo lumina , Augustinum & Thomam non egere nouâ commendatione. O miræ hominis artes ! & si daremus perinde vera , ac falsissima sunt , quæ assumit , nec probat , Summum Pontificem respondisse ex Academiæ sensu inconcussa esse D. Thomæ dogmata , non mediocris foret eius doctrinæ commendatio : maximè cum Sanctissimi assensu confirmata sit , rescindenda sine dubio , nisi verissimam putasset , aut falsi suspectam habuisset. Sed quod omni demonstratione validius Aluæ effugium præcludit , nullo loco Epistolæ Louaniensium hæc leguntur verba , ut poterit ipse Alua explorare ex apographo Epistolæ in acta Facultatis relatæ.

Cum nihil supersit refugij , quasi in desperationem actus , vleiscendæ noxæ causâ , in facultatem Louanien-

sem,

sem, quæ Breui sibi infaustissimo occasionem dedit, inuehitur, & *machinas* *tonis* *diabolica* *incusat*; & quod mirere ex ipso met scripto, quo Pontificis laudes meruerunt, Iansenismi iniquissimâ accusatione grauat: diceres Aluam, quasi rupem de monte delapsam, magno impetu in absurdiora se dare præcipitem; dogmata D. Thomæ inconcussa dici patitur, quia negare non potest, nisi in faciem restiterit Summo Pontifici, à quo definitionem de immaculata Conceptione fide diuinâ recipendam expectat: Sed id roboris negat habere problemata, à genere dogmatum omninò diuersa, quòd adiunctam habeant interrogationem. At quid apud D. Thomam interrogationibus caret? Nonne quærit, an Deus existat? An sit Trinus? Si ergo velis ista posse labefactari, quia à dogmatibus distinguuntur, quibus Pontificium decretum astringet inconcussam firmitatem; nihil planè supererit apud D. Thomam dogmatum, atque ita ex Patre Alua nihil vetat quin dubitemus an Deus sit, an sit Trinus, an sit incarnatus, quia hæc expendit additâ interrogatione, qua à dogmatibus semouet, & ad problematum ordinem depellit, quid quid disputat, aut statuit S. Doctor.

Non desinit cauillari Aduersarius, & Breuis Apostolici verba sugillare: sed timendum est ne infortunium serpentis incurrat, quem fabri ferrarij officinam ingressum, & limam motibus appetentem rident fabulæ, quòd irritò illo labore vni sibi perniciem machinetur, dentium aciem obrundente & hebetante ferro, cuius duritiem vis illa non infringat: haud magis auspicatò Alua ad laudes D. Thomæ abolendas, & conficiendas toto impetu irruit; sed quid eo conatu effecit? Suum animum seu liuore, seu alio præpostero affectu concitatum prodit, in tuto positus, quæ arrodit, encomiis.

PARAGRAPHVS SECVNDVS.

Defenditur elogium Pij quinti.

FVSVS hoc postremum encomium tutatus sum, quod cæterorum sit robur, & signaculum; & quibus

ab Alua impetiturum est, cauillis, agnoscat Lector, quid ab homine, qui euidentiſſima quæque negat, nec minori audaciâ profert quæque falſa, expectare poſſit de reliquis antiquioribus, quæ magis obnoxia ſint exceptionibus. Illi aliud adiungo Pij quinti nihilo minus Aluæ moleſtum, vel cauillis oportuniuſ. Sanctiſſimus Pontifex D. Thomam nouo honore quintum Eccleſiæ doctorem aliis accenſiturus, narrat deceſſorem ſuum Ioannem XXII diuinorum albo retuliſſe D. Thomam duabus potiſſimum de cauſis, nempe miraculorum ſignis, quibus ſerui ſui Thomæ perpetua veræ pietatis opera nobilitare voluit, & *inexhauſta Dei benignitas, & certiffimâ Chriſtiana regulâ doctrinâ, quâ S. Doctor Apoſtolicam Eccleſiam infinitis confutatis erroribus illuſtrauit.*

Niſi expreſſum nomen Summi Pontificis præferret hæc Bulla, non dubito, quin in illam excandeſceret Alua, & hæreſis, atque impietatis damnaret, exemplo Theophili qui ob aſſertum doctrinæ D. Thomæ nomen, *certiſſima fidei regula*, tacito Papâ, in quem cadebat hæc damnatio, Dominicanos grauiffimæ hæreſis accuſauit. Hanc Amici reſponſionem non auſus tentare Alua, ne Summis Pontificibus auferret neceſſariam infallibilitatem ad Immaculatæ Conceptionis definitionem, ait hæc verba, *certiſſima Chriſtiana doctrinâ regula*, referri ad canonizationem D. Thomæ, quaſi ad ſecundum argumentum, quo Ioannes XXII. I. probauit D. Thomam cælo receptum.

Ne ſummum Pontificem hæreticum pronunciet, ridiculum & inſanum inducit. Quid enim ſibi vult ſi illis verbis, *certiſſima regula*, canonizationem, non ſcripta & doctrinam interpretemur, cum ait, *eâ regula S. Doctorem Apoſtolicam Eccleſiam, illuſtraſſe infinitis confutatis erroribus?* Quis illa credat hominem ſobrium, & ſanæ mentis potuiſſe ſcribere? Quaſi S. Doctor non ſcriptis, ſed canonizatione poſt eius obitum 49. annis celebrata hæreſes confutaſſet? Vinci poteſt Alua, ſed vix eſt reſiſcentiæ ſpes. Non deſinit cauillari, iniuriuſ magis in Summum Pontificem, quam in D. Thomam: ſi confutauit errores, vnde tot & tanti progerminant noui, antiqui ſcruptunt, ſiuntque vinaciores Superſedere poterat ab illa reprehentione: Neque enim adeo rudis eſt

quin viderit recidere in illud , quod de Virgine. cantat Ecclesia : *Cunctas hærefes sola interemisti* : si huic elogio veritas constet , inquirendum est cum Aluà , quomodo tot errores pestiferi orbem occupent , & si dicat suum de D. Thoma cauillum , *non habere solutionem* , censet de Deiparâ argumentum insolubile.

Adde Pium V. dixisse errores non extinctos , sed confutatos , quia vi argumentorum D. Thomæ victæ sunt hærefes , non sublata , sed post victoriam sunt superstites : plurimum enim distant , hi tres gradus , vinci hæresim , conuinci hæreticum , & conuerti , atque ad bonam mentem redire. Esto vicerit hærefes S. Doctor , conuicerit hæreticos ; more Ægypti Magorum plures in tertio signo deficiunt , & primum illique proximum gradum emensi , ad tertium non assurgunt , vt conuicti hæresim eiurent.

Sed nullus est cauillorum finis & modus. Quî fieri potest , inquit , doctrinam D. Thomæ antiquas & nouas hærefes confutasse , antequam existeret ? *Ad hoc nullam* , inquit , *solutionem inuenio , nisi recursu ad præuisa merita D. Thomæ*. Quid facies isto homine , qui noli intelligere , ne a cauillando , & calumniando cesset ; nec attendit has nugas , cum Summum Pontificem impetant , non nugas esse , sed blasphemias ? Quasi doctrinæ D. Thomæ sicut Redemptionis Christi præuisa merita statuat , cum præterea apertum res sensum habeat , antiquas hærefes adhuc superstites , scriptis D. Thomæ validè confutatas esse

Duriora hæc elogia expertus , quam vt posset arroderet , toto eo suorum Nodorum decimo , nugatur inirà D. Thomam inter & Bonauenturâ comparatione , & multis de causis D. Bonauenturam anteponit , hancque nouam , vt præcipuam laudat , ex quâ de cæteris iudicaturus est Lector. Præstat , inquit , Bonauentura Thomæ , quod precatio , quæ eius die festo vsurpatur , ita habeat. *Deus qui Ecclesie tuæ Beatum Bonauenturam Doctorem mirabilem tribuisti* Cui decedit , quæ recitatur die festo D. Thomæ , *Deus qui Ecclesiam tuam Beati Thomæ mira eruditione clarificas*. Egregiam sanè regulâ statuit metiendis Diuorum meritis , precationem ex pio affectu Auctoris ad ambitrium conceptam , Præterea quid eximij habet vna

præ alterâ, cum vix differant, *mirâ eruditione, & doctorem mirabilem*? Adde precationem D Thomæ communem esse toti Ecclesiæ, & hoc singularissimum habere, quod nulli legitur contigisse, vt Ecclesia pro summo beneficio efflagitet sibi dari, quas docuit S. Doctor, rerum intelligentiam consequi; quam verò refert Alua ex S. Bonauentura, apud Patres Minores tantum recepta est: communis enim Pontificum adhibetur ad S. Bonauenturæ festum.

Sed quid in his nugis tempus terimus? In causâ est Pater Alua, qui nos suis Nodis, aut verius araneorum telis implicitos, quasi catenis ferreis crederet, nisi effringeremus. Sed aliquid grauius & ferreum magis eo Nodo meditatur in Dominicanos vniuersim, & nominatim in Magistrum Generalem Turcum, quem per ludibrium alio loco Magnum Turcam vocat: illos quidem vanæ & ridiculæ iactationis inculcat; quod in D. Thomam congestis omnium generum prærogatiuis velint ex Austriacâ familiâ natum Gloriationem hanc insulsam putat se demonstrare, breuiario sub Patre Becaria à Morte Regali edito, in quo ait ita legi: *Beatus Thomas de Austriâ profapia comitum de Aquino*. Non dicam, ad quamcumque familiam Diui originem referamus, plus illi gloriæ allaturum, quam inde possit accersere, non addam Aquinatum profapiam ætate D. Thomæ fortè Austriacam æqualle: sed quasi post datum orbi, & Ecclesiæ D Thomam, non posset eius gloria augeri, oportuit illam minui, & alteram excrescere: Sed quid opus his ad depellendam vanæ iactantiæ calumniam, cum nata sit ex ridiculâ supinitate accusatoris? Sic enim habet nostrum Breuiarium, *D. Thomas de illustri profapia, &c.*

Ab hac hallucinatione gradum sibi facit ad nouam calumniam Patri Turco inferendam, quæ recidat in caput Auctoris Iustissima est eorum pœna, qui immeritos iniquè insectantur, & falsi criminis inculant, vt in grauiora ipsi delabantur. Si huius æquissimæ Legis dubitatio supererat, eam sustulit, quam in Patrem Turcum huic decimo nodo inseruit, grauissima ironia, quales sunt Patri Aluæ frequentissimæ, dum alios videri vult laudare & reuereri. Criminatur Patrem Turcum calumniam instruxisse toti familiæ Minorum, quasi commenta sit

Pij V. viua vocis oraculum anni 1569. editum, quo copiam ipsius faciebat recitandi officium Conceptionis à Nogarola compositum. Ista, ait Alua, Turcus falsi putabat se reuincere, duobus libellis inter Dominicanæ familiæ tabulas repertis, quibus continebantur officia singularia Franciscanæ familiæ, primûmque editionis præferebat annum 1564. alterum eiusdem sæculi annum 1585. utrique additum erat Pij V. indultum.

Inclamat Alua apertam esse Turci in Patres Minores calumniam, cum libellus prioris editionis anni 1564. sit supposititium, falsûmque testimonium: quia non nisi biennio exacto, Pius V. ad Pontificatum euectus est, cuius proinde nomen & oraculum Pontificium iniquè in eo priori libello desideratum assumitur in argumentum falsati indulti Pontificij. Sed ipsemet in laqueos Turcoparatos sese induit, & in hallucinationem impegit, Generali nostro obiectam. Sic enim habet vir sapientissimus. *In archiuo Religionis Dominicana duo exemplaria habentur huius libelli festorum Ordinis Fratrum Minorum, unum impressum anno 1574. alterum impressum Parisiis anno 1585. utrumque insignitum eodem oraculo vocis Pij V. anno 1569.* Qui Turco obiecerat uno orbem oculo, altero non recte videre, contumeliaz & conuicij poenam & accusatori atque censori pudendam hallucinationem passus est, affecto prioris editionis libello anno 1564. cum Turcus ex sinceris actis annum annotasset 1574. quâ obseruatione euanescit accusatio, & recidit in caput auctoris.

PARAGRAPHVS TERTIVS

*Defenduntur encomia Clementis VII I.
Pauli quinti & D. Francisci, & Con-
lij Tridentini.*

DVO certiora præmisimus iis quæ supersunt antiquioribus, aut mediij temporis, præsidio futura aduersum Aluæ impetus. Extat luculentissimum elogium Clementis VII I. quod Nodo vndecimo implicat infinitis cauillis & nugis. Sic verò habet. *Doctrina D. Tho-*

ma testis est ingens librorum numerus, quos ille brevissimo tempore, in omni fere disciplinarum genere, singulari ordine, ac mira perspicuitate, sine ullo prorsus errore conscripserit. In quibus conscribendis, interdum sanctos Apostolos Petrum & Paulum colloquentes, locosque illi quosdam Dei iussu enarrantes habuit: & quos deinde conscriptos, expressa Christi Domini voce comprobatos audiuit. Audisti Petre, Summum Pontificem, nedum suum symbolum ad D. Thomæ laudes conferentem, sed alia duo celeberrima Christi, ac Principum Apostolorum confirmantem. Non dubito quin ad ista ringaris.

Idè excipis primò dubiæ esse fidei, & forte suppositium elogium: sed extat Annalium Bzouij Tomo 14. in ordinationibus capituli generalis Romæ habiti anno 1612. ex quibus locis plures alij deprompserunt; nec vilius ante te suspectum habuit hoc Clementis testimonium. Quare huic primæ responsioni diffusus, excipis secundo ad minus addita decreto hæc verba, sine ullo prorsus errore, vti Salmanticenses inseruerunt ista. Tantùmque asssecutus fuit mysteriorum sacrorum, quantum quisque mortalium asssequi poterat. Sed vana est hæc coniectura: cum apud omnes superiora verba, posteriora tantum apud Salmantienenses legantur, immeritò ex istis statuitur illa esse additicia.

Iis duabus exceptionibus diffusus, tertiam addit aliis longè deteriorem, decretum relatum aliud nihil habere singulare, quàm quòd testetur libros D. Thomæ carere apertis hæresibus obfirmato animo scriptis, eo sensu, quo Augustinus dicebat: Errare potero & hæreticus non ero; licet multis alterius generis, etiam formalibus scateant. Quis ista capiat, aut ferat? Ergo falsus est Pontifex, dum asseruit libros sine ullo prorsus errore scriptos, cum indomitâ pertinaciâ innumeris contendat Alia erroribus infectos: vel nos fefellit: nam quòd scripsit, haud dubiè nobis persuasum volebat: nisi dicat Pontificem à se ipso dissensisse.

Non dubito quin hoc D. Thomæ elogium eodem ad minus loco habeat, eodèmq; sensu interpretetur, quo istud Possuini de Scoto testimonium, vt ipse vocat; grande, quod eius libri absque ullo erroris nœuo vsque ad hunc diem trecentis circiter annis in æcumenicis Conciliis

DEFENDUNTUR TEST. CLEM. VIII. DE D. THO. 183
inviolati permanferint Quid enim de hoc testimonio
sentis Petre? putas ne iisdem obnoxium exceptionibus,
quibus Pontificium eleuasti: aut Posseuini indubitarum,
Clementis nullum esse? Non dubito, quin hoc postre-
mum responsum tibi magis arrideat; nam sic compara-
tus es, vt tua miferis, in aliena despuas. Sed ipse videris,
an tutò & saluâ reuerentiâ in Sedem Apostolicam, po-
rior sit tibi vnus priuati hominis, quàm Ecclesiæ Capitis
auctoritas.

Certe si à te obtinere non possumus, vt Clementem
Posseuino præferas, ad minus vtrumque eodem loco
reponere: si Pontificis verba *scripsisse D. Thomam sine ulla
prorsus errore*, contendas stare non posse saluâ Scriptu-
ræ autoritate, & harum propositionum generalium il-
lata veritate, *omnes errauimus, omnis homo mendax, &c.*
Ergo Pontificem inducis à Scripturâ sacrâ dissentien-
tem. Et si nullam habeas Pontificis autoritatis ratio-
nem, cum tuo repugnat sensui; quid responsurus es ad
Posseuinum idem de Scoti libris testantem? Scio te
nullis commoueri rerum & rationum momentis, nisi
tuo priuato affectui indulgeant, & faueant commodo.

Inde etiam vrgeo te: cum Posseuiuo immunitatem
ab errorum etiam *nauo* fidem habeas tuo Scoto vindicanti,
nec putēs Scripturæ verbis repugnare illud elo-
gium, aut eleuari; videris, quâ æquitate Scripturam à
Clemente idem de D. Thoma attestante violatam cri-
mineris. Si nequeas aded inhumane discrimen fingere
Posseuinum inter & Clementem, vt hic in laudando D.
Thoma falsus sit, ille in prædicando Scoto à vero non
recesserit; ergo tuus Scotus scatet erroribus formalibus,
ne nutent generales Scripturæ propositiones, *omnes er-
rauimus, &c.*

Dum ad hæc tua responsa præstolamur, vide, num
in summum Pontificem cadat tuus in Ignatium Galuani
Sarcasmus: *ingens prodigium! nunquam in tot libris
fuisse lapsum D. Thomam*: ita inquis cum aliquâ impie-
tatis specie, *ingens prodigium D. Thomam non fuisse lap-
sum in schola paucimentum*. Sic illudis Summis Pontifi-
cibus, eosque demereris, à quibus cum ambias defini-
tionem, quæ ad fidem pertineat; videris, an nedum eo-
rum dignitatì, sed etiam tuis rebus consulas huiusmodi.

sacrilegis dictariis. Nec à meliori, aut sinceriori animo profecta est (ne quid grauius dicam,) cauillatio in D. Thomam, immeritò a Clemente dictum diuinæ voluntatis interpretem, cum id nomen Bellarminus, quo fidei rudimenta docet Catechismo, iustius sit D. Thoma consecuturus; quòd ille necessaria ad salutem, & credenda vno libello sit complexus, D. Thomas verò totus sit in quæstionibus metaphysicis, quæ magis ad salutem impedimento sint, quàm adiumento. Quasi D. Thomas omiserit quidquam credendorum, quæ ad salutem, & fidem pertinent explicare, & aduersus impios propugnare.

Istane ausus es scribere? In nullam sine dubio sancti Doctoris noxam, quia ille in tuto, & in alto positus est; nec eò linguæ tuæ flagellum accedit: sed in tuum æternum dedecus, & Ecclesiæ hostium gratiam, quibus perinde ac tibi odio est S. Doctor, & eodem, quo tu eleuas testimonium Summi Pontificis, nomine infamant; quasi subtilia, aut futilia tantùm scripserit: illisque gratificari mauis, & assentiri, quàm Summis Pontificibus, qui nos iubent D. Thomam tanquam diuinæ voluntatis interpretem audire: tu contra tui operis titulo & progressu ad pœnam, & ad mortem deposcis, tanquam perduellem Sebam, & vis ut quasi nugacem auersemur, vix legendum, aut attingendum, si nostræ salutis curâ tangamur: quia ad illam, & ad fidem impedimento est, tum nugis & tricis futilium subtilitatum, tum erroribus formalibus, cum ad hæc duo capita reuoces, quæcumque eius scriptis continentur; ut minus tot voluminibus, quam Bellarminus vel vnico Catechismo, mereri potuerit titulum interpretis diuinæ voluntatis. An non intelligis te in vno Thoma, Augustinum, Dionysium, aliosque Ecclesiæ Patres damnare, cum ea ipse complexus sit, & explanarit vno volumine, quæ ipsi prope infinitis prosecuti sunt, nec sensu, rebus, & argumento, sed stilo, & methodo differat ab illis? Et post ista miraris tuos in Hispaniâ, & Romæ damnatos libros, quos ad hæreticorum sensum, & gustum, & ad Catholicorum, quibus S. Doctor probatur inhonorationem edidisse videris?

Nec reuerentiùs habes Paulum V. Nodo tuo duode-

cimo : ægerrime fers quibusdam litteris hæc de S. Doctore scripsisse ; *splendidissimi Ecclesia Catholica Attoleta Thomæ Aquinatis cuius scriptorum Clypeo militans Ecclesia hæreticorum tela feliciter eludit ; honores & venerationem in dies magis , magisque augeri , plurimum in Domino gaudemus* Præter dictoria , & sarcasmos tibi familiares , in hunc Clypeum telum vibras ; quo , inquis , *hæretici impugnare , imò & expugnare volunt Ecclesiam Catholicam*. Quodnam verò id telum est ? propositio , inquit , ista : Virgo fuit concepta in peccato originali : & inquit an inter scripta S. Thomæ sit aliquis Clypeus contra telum istud.

Respondeo illo telo fidem minimè peti ; quia hætenus , dum , quam vrges , definitio accesserit , ad fidem non pertinet hæc propositio : atque ita præter infinitos , hoc telum depellunt fortissimi duo Ecclesiæ aduersus hæreticorum furorem Propugnatores Bellarminus , & Perronius Non puto te adeò tibi ignotum esse , vt his duobus Cardinalibus te ingenio , eruditione parem credas ; vel meritis in Ecclesiam & victoriis ab hæreticis reportatis , nec de tuis Nodis dicturi sunt hæretici , quod de his duobus inuictis Athletis , ipsimet prædicant.

Si Pergama (id est Ecclesia Romana) dextrâ,

Defendi possent , dextrâ hæc defensa fuisset.

At illi duo viri supra omnem comparisonem & laudem positi , eo , quod hæreticorum nomine Petrus vibrat telo , fidem nullâ ratione imperi docent. Cur ergo intempestinè omninò (ne quid aliud dicam) in Clypeum manu Summi Pontificis porrectum , & obiectum hæreticorum telis , quo se tueretur Ecclesia , laceffis & laceras controuersâ , quæ ad pietatis exercitationem , non ad fidei subsellium pertineat ? Et si eò erectam velis , vti contendis eodem Nodo , indulgentiis à Paulo V. ad venerationem Conceptionis immaculatæ concessis , adæone rerum Theologicarum rudis es , vt ignores illud genus testimonij probabilitatem piæ opinionis , non indubitatum fidei diuinæ assensum sancire , aut exigere ; nec deesse S. Doctorem , cum à Pio V. addictæ sint indulgentiæ sacello , quo Neapoli imago Crucifixi colitur , quam pia fert historia vocalem factam , orantem

coram se Deum, certiore fecisse D. Thomam, *benè scripsisti de me Thoma*? Nec tamen pateretur Alua, hoc argumento ab indulgentiis in fidei indubitata testimonium, aut fide diuinâ credendum euasisse, quod ipse totis viribus quasi commentitium reiecit à Christo vniquam dictum, *benè scripsisti de me Thoma*.

Cæterum vana est hominis sollicitudo, cum subiungit, si ster Pauli V. de Thoma elogium; quid denique dicturi sint hæretici, nisi quoddà vomeribus Catholicis facturi sint enses, quibus nos feriant? Quid enim mali nobis aduenire potest, si D. Thomas Ecclesiæ sit loco Clypei, quem ipsimet hæretici suis telis impenetrabilem experiuntur? Sed hâc inutiles curâ depositâ, ne quidquam detrimenti capiat Ecclesia ex scriptis D. Thomæ, longè iustior, magisque necessaria illi capescenda esset, ne ipse suis libris sit offendiculo hæreticis, quibus ridendam præberet Ecclesiam; cum aded ineptis argumentis, & malis attribus piam Ecclesiam defendat: nec dubium, quin pessimè de Ecclesiâ Catholicâ sentiendi causam haberent, nisi aded imperitos & ineptos, & sanctis, ac summis Pontificibus iniurios libros Hispania, & Roma proscripsissent.

Sed Nodo 13. ferre non potest à Parente suo D. Francisco summè commendatum S. Doctorem cuidam è suis filiis nomine Eleutherio, graui difficultate de rebus sacris & theologicis laboranti, cui euincendæ cum aliud non superesset, quàm orationis remedium, eò & ad suum Parentem confugit: oranti verò præsto adfuit humanissimus Pater, seque filio visendum præbuit comite D. Thoma, illumque digito demonstrans; sic Eleutherium allocutus est. *Crede huic, quia eius doctrina non deficiet in æternum*. Nec vana fides fuit, aut visione illusum Eleutherius; nam ubi se ab illâ recepit sui Parentis consilium secutus, D. Thomam consuluit & statim, ut Augustini verbis loquar, *omnes ab eo dubietatis tenebre diffugerunt*, & ne ingrati animi in Diuos notam, ac pœnas incurreret, miraculum, & beneficium hoc prædicauit. Falsum verò post Vvadingum, & Theophilum Raynaudum inclamat Petrus à Dominicanis huiusmodi fabularum peritis artificibus inuectum.

Sed plurimum debemus duobus cum laude memoratis

Patribus Belgis, qui nos ab hac calumniâ vindicarunt conquiſito egregio, certoque teſtimonio cuiuſdam Canonici Regularis, ex Monasterio Rubæ Vallis ad Bruxellas nomine Ioannis Gielmans, qui primo è quinque manuſcriptis voluminibus ingentibus, quibus, vt inquirunt, exſcribendis vix bene longa hominis vita ſufficeret, & in eodem Monasterio quaſi pretioſo theſauro aſſeruatis, horum, inquam, primo volumine, folio 297. cap. 86. hiftoriam à nobis perſtrictam fuſius deſcribit, & Aluam in Belgio commorantem, prouocant nominati Patres ad fidem comprobandam hiftoriæ à ducentis annis conſtatam, quam anno 1620. calumniatur Aduerſarius à Dominicaniſ confictam; huiuſque ſacrilegij conuiſtos putabat, quod nullis ſcriptorum monumentis rem comprobare poſſent. Conſulat Ioannem Gielmans fidem noſtram liberaturum, & calumniam in Auctoris caput depulſurum.

Ex Tridentino tria accerſuntur teſtimonia ad commendationem D. Thomæ, quæ ordine referam: primum ex Baronio, notis ad Martyrologium Romanum die 7. Martij D. Thomæ ſacræ: *vix ullus enarrare ſufficeret, quot vir ſanctiſſimus atque Doctiſſimus, Theologorum præconiis celebretur, quantumque illius illibata doctrina* (quam Alua erroribus grauiſſimis ſcatere ſcripſit) *à ſanctis Patribus in ſacro-ſancto Oecumenico Concilio Tridentino fuerit acclamatum.* Aliud teſtimonium eſt à Didaco Paiua Luſitano, Tomo ſecundo Concionum de Sanctis ſermone 2. de D. Thomæ: vbi reſert cum parati eſſent Patres ſancire, Apoſtolos ſacerdotio initiatos fuiſſe, quibus nocte Cœnæ Chriſtus illos compellauit verbis; *hoc facite in meam commemorationem*, Episcoporum vnus monuit videri D. Thomam ſecùs ſentire: tum ſuſpenſa fuere ſuffragia, iuſſumque eſt deferri D. Thomam, vt conſuleretur locus, & cum aliquid præferret difficultatis, in ſequentem diem dilata eſt definitio: nec quidquam ſtaturum eſt à Patribus, donec omnibus conſtaret, à ſanctione non diſſentire D. Thomam.

Hæc omnia ſpernit Alua, & illiberalibus iocis irridet, ipſe reuera miſerandus: quem enim commiſeratio hominis, aut in illum indignatio non tangat, cum de-

prompta ex D. Thoma interdum verba, quibus suos Canones sanciant Patres, ait eo referenda, quoddam veteres Theologos complexus sit suam Summam, quam vix inconsultam quidquam posset sanciri, quasi de essent alia compendia à pluribus scriptoribus edita post D. Thomam, & ipse Breuiatoris, aut compilatoris nomen, non Auctoris laudem esset consecutus. Nec parcat Theologo, qui nomine Concilij die festo D. Thomæ orationem habuit panegyricam coram amplissimo confessu. Notat illum nomine, quo prius D. Thomam donauit, Fratris cuiusdam communis ex ordine Prædicatorum, quamuis à Rege Hispaniæ Theologus, adiuncto sibi altero perinde Theologiæ consulto, missus ad Concilium audiretur, ut solebant Iuris-Canonici, aut Theologiæ consulti.

Notant scripturæ Interpretes, Saulis odium & liuorem in Dauidem pluribus argumentis, maximè illam suagillationem, & contemptu nominis filij Isay prodidisse: faxit Deus ne Petrus uti Sauli, affectu & animo, ita exitu & fine conueniat. Quid enim aliud respiciunt illa, quæ scribit verba, fol. 629? *Cum omnia sint prorsus gratis dicta de laudibus D. Thomæ, non erit proteruis, illa negare, aut in aliquo labefactare gloriam D. Thomæ, sed Religionis causam ostendere, euellendo à tritico doctrina Catholica introducta bolis, id est, quæ circumferuntur laudes D. Thomæ, fictis, falsas, aut dubias, & incertas, nullam, vel rarissimam veram, & illam in multis viciatam.*

Sanè quibus studium litigandi, aliosque carpendi charius est ipsam virtute, & veritate; qualem se vbique prodit, & hinc maximè Pater Alua; nihil pensi habent à grauiorum virorum sensu, & ab omni specie veri longissimè recedere. Nisi ita comparatus esset Pater Alua, reueritus sine dubio fuisset Baronij Annalium Ecclesiasticorum parentis iudicium, & testimonium grauissimum, & ad minas totius Concilij Tridentini in S. Doctorem ipse priuatus sibi imitandam potius, quam suo exemplo damnandam suscepisset summam obseruantiam.

Quid vero ad hæc Alua? Contrà pertinaci animo contendit, Synodi definitione de peccato originali hæresis notam D. Thomæ inuictam, idque totis viribus nititur

demonstrare argumento, cui jam responsum est. Sed cum sensisset hoc audax consilium castigandum grauiissimis pœnis ultimâ constitutione Alexandri VII. datâ anno vno ante p̃timam Nodorum editionem, quâ seuerissimè cauetur, ne peccati mortalis, aut hæsis notareretur sententia D. Thomæ; vitiauit editionem Nodorum anno 1662. anteoccupato, & per fraudem operi inscripto anno superiori; vt posset obtendere, id à se factum ignoratione Constitutionis Pontificiæ, quæ omnibus censurâ D. Thomæ interdicebat pœnis grauissimis. Verum Alua cum sui impos abstinere non posset, à damnando S. Doctore, anticipauit annum editionis, non solum vt impunè D. Thomam traduceret quasi hæreticum, sed etiam vt se impensissimè laudaret,

Hominis profundam calliditatem aperit Pater Harney loco aliàs citato. Certum est, vt ipse comperit eodem anno 1662. circa mensem Septembrem, curante Aluâ sub prælo fudasse Bruxellis Nodos Aluæ, & trutinam Marraccij, qui *Petrum Aluam*, tot meruisse elogia, suorum Nodorum libro, quot litteras haberet, magnificentissimè prædicabat, illud verò elogium attribui non poterat Maraccio in Italiâ degenti, cum Alua Nodos eodem tempore, eodemque loco typis daret, quo Marraccij trutina edebatur: ergo in ipsum Aluam referendum erat elogium; ridendum planè, quòd ita impensè se laudasset. Quid igitur? Auertendæ huic infamiz ad mendacia confugiendum fuit, & annus impressionis præuertendus, vt nodos à Marraccio ex ipso falso supputo potuisse legi, iudicaret Lector, atque ira à Marraccio, non à se ipso laudatus fuisse Alua videretur.

Sed vt rem molestissimam paucis absoluaui, hoc vnum te velim, Christiane Lector, vt apud te statuas, quæ fides habenda sit homini, qui tot nectit mendacia, vt suas fucare possit laudes? An putas sincerius D. Thomam reprehensurum, quàm se cominendet? Aut quo loco eum repones, qui adedò altè de seipso sentit, adedò demisse, & abiectè de D. Thoma, vt se quidem plura meruisse elogia, quam satis grandis liber litteras habet, vel de se primus dixerit, aut passus sit dici, & adminus edicauerit? De D. Thoma verò, quæ circumse-

runtur encomia, *absolute falsa quadam, alia dubia, paucissima vera*, longo opere probandum suscepit?

PARAGRAPHVS QVARTVS.

*Alia sex Elogia D. Thomæ defenduntur
generatim.*

HActenus sex encomia tutati sumus: totidem supersunt propugnanda. Sed quæ præmisimus, præsidio sunt futura securis; idque duplici nomine; primum quòd cum Petrus superiorum examine fidem Græcam compertissimam nobis fecerit, ius non habeat à nobis exigendi, ut credamus, se in posterum meliorem adhibiturum. Deinde relata Pontificum testimonia vniuersim, & interdum nominatim elogia antiquiora cum laude memorant, ac subinde confirmant. Quare methodo, quâ solet omnis probè instituta disputatio, à compertis ad minus certa progressi sumus, infringendis Aduersarij machinis validâ & conuenienti. Duplici enim fraude elogia D. Thomæ aggreditur: vel in totum tollit, & negat vsquam data: vel, si id nequeat prætexere, eleuat, & nihil contendit habere eximium & singulare. Recentiora erant, quæ retulimus monumenta, quam ut posset inficiari, aut traducere, quasi à nobis conficta, cum indubitati essent Authores. Quare totus fuit in vitiligando, & in aucupandis oculis, & litterarum apicibus, ut posset adulterare sensum. Sed contra antiquiora encomia primam admouet machinam.

Pronunciat esse commentitia, & in orbem inuecta à Bandello vnius immaculatæ Conceptionis odio. Si quæras quibus id probet argumentis? Præter negatiua aliquot, hoc vno positiuo, folio 218, id putat confectum, *Bandellus qui prius introduxit in litteraturâ Ecclesiasticâ, auctor est, qui in suis libris nullam veritatem obseruat, nec in toto, nec in parte*; igitur falsa sunt hæc elogia. Probabilis, non necessaria consecutio, etiam si præmissa sint certæ: Quia mendaci potest interdum aliquid verè accidere. Sed quâ ratione probas viro grauissimo, & totius Prædicatorum Ordinis Generali Magistro impo-

fitum Falsarij, Sycophantæ, & Impostoris nomen ac crimen? Non aliam apud te lego probationem, quàm quòd ista elogia primus in orbem importarit. An non vides te in circulum vitiosum delabi? Antea arguebaris syllogismos, quatuor, aut pluribus terminis, collatione partus ventris & mentis confecisse; cum legitimi, nec plures tribus admittant, nec pauciores patiantur. Nunc ab hoc vitio in aliud nihilominus graue impingis, vno, aut altero termino tantum syllogismos conficis, identicis propositionibus conflatos. Quid hoc mali est, vt quidquid scribas, semper à ratione exeret? Nunc à disparatis argumenta in infinitos diffindis terminos; nunc identicis ludis, & merâ positione principij thesim in argumentum sumis.

Mendax, inquis, est Bandellus; ergo quas inuexit primus commendationes D. Thomæ prorsus abiiciendæ sunt; vnde probas mendacem? Quia has merces primus intulit. Vt obmittam te falsò hoc postremum asserere, operâ P. Bandelli primum hæc orbi encomia innotuisse; Egregiè rem propositam conficis: in argumentum arripis, quod tibi probandum susceperas; atque his ineptiis Nodos tuos nectis. Atque inde laceassis retractationem Episcopi, & facultatis Parisiensis eorum, quæ superioribus censuris viderentur vllâ ratione D. Thomæ doctrinam notare. Idem est neruus, & robur Nodi secundi contra Urbani V. bullam ad Archiepiscopum, & vniuersitatem Tholosanæ ciuitatis, quâ iniungit, vt *D. Thoma doctrinam tanquam veridicam, & Catholicam sectentur, eamque studeant totis viribus ampliare.* Ista, & his similia euulgauit Bandellus: ergo commentitia sunt. Et cum ferè semper contingat illa confirmari, antiquiore & potiore testimonio quale est SS. Vincentij, & Antonini, qui propius Bandello ad D. Thomæ ætatem accesserunt; argumentum negatiuum adhibes à D. Thoma ad hos authores, cum plus vno sæculo temporis effluerit, causaris toto eo spatio deesse testes coetaneos D. Thomæ, qui ista referant, vnde apodicticè concludis conficta fuisse à posterioribus. Et cum aliud non suppetat telum, quod intorqueas in D. Thomam; ne quid in illum laudis redundet, nihil dubitas, eodem cum Bandel-

lo crimine mendacij DD. Ferrerium, & Artoninum notare, & inuoluere.

Non dicam genus huiusmodi argumentorum negatiuorum, quibus totam tuam disputationem munis, incertum semper, plerumque etiam infidum, & periculosum esse quod inde quaeritur subsidium, ut luculenter contra Launoium probat bene longa, & eleganti exercitatione Ioannes Baptista Thiers, quo vno verbo cadunt, & rescinduntur omnes tui Nodi. Debueras habere aliquam rationem tot illustrium testimonium, tot Pontificum, qui rebus à te falsi accusatis, ad minus validiora tuis argumentis testimonia præbuerunt.

Mirum est non timuisse ne in te recideret, quo omnem Bandello fidem abrogas, argumentum; quia author iste, inquis, in suis libris nullam veritatem obseruat. Medicel cura te ipsum, legem à te constitutam subeas ipse, oportet, *nullam fidem habendam auctori, qui in suis libris, nec in toto, nec in parte, nullam veritatem obseruat.* Non recusabis eam te lege iudicari, quàm de Bandello statuis, hoc vnum inter vos distatis, quod tu illum mendacij accusaris; probaris nunquam. At ne id vitij nostra responsio, aut recriminatio incurreret, tunc cauisti, supeditatam propè infinitam colluuiem falsationum, quibus tuos Nodos implicuisti, quarum ex infinitis aliquot tibi syllabum dabo Imprimis ipsomet operis limine psalmi 57. falsasti hunc versum, *alienati sunt peccatores ab vtero;* nec additamento, *to omnes,* notæ vniuersalis, timuisti, quas Deus intentat, grauissimas poenas iis, qui suo verbo vllum addiderint, aut detraxerint. Neque plagium excusant, quæ aduocas similia in speciem Scripturæ verba, sensu omnino diuersa; *omnes declinauerunt,* &c. psalmo 113. cum istis, & similibus locis scriptura de enormibus sceleribus; à te verò corrupto de errore doctrinæ agatur, & si superiora velis in D. Thomam, & Sanctos quoslibet cadere; innocentissimum tuum Patrem Franciscum lethalis criminis per totam vitam expertem, pluresque Sanctos eadem gratiâ donatos, iniquissimè immanium flagitiorum peragis reos

Non recolo hallucinationes iam obseruatas, qualis est euentus editionis tuorum Nodorum annus 1661. Cum sequenti tantum fuerit adornata; Qualis est obiecta Dominicanis

minicanis vana gloriatio repetitur ab Austriacâ familiâ originis D. Thomæ, quasi nostro breuiario scriptum esset natum D. Thomam *de austriâ familiâ*, cum legatur *de illustri*. Eodem spectat, quod a viginti annis criminabaris, Dominicanos confinxisse Sancti Francisci commendationem doctrinæ D. Thomæ nunquam defecturæ; quæ tamen à ducentis annis manu scripto Canonici Regularis extet, & legatur. Eò pertinet hallucinatio Patri Turco impacta, quæ in ruum caput recidit; quasi librum protulisset Pij V. viux vocis oraculo munitum anno 1664. id est biennio antequàm in Pontificem eligeretur Pius, typis datum: cùm in testimonium aduocet librum anno 1574. post Pij Pontificatum editum.

Et ne videar ista repetere neglectæ sinceritatis argumenta, quasi noua nos deficient, quibus probemus in te cadere dicam falsi Bandello scriptam; tui Libri folio 71. incusas Choquetium, quasi primus Spiritum Sanctum columbæ specie affinixerit ad aurem D. Thomæ dicentem, quæ scriberet, aut doceret. Sed contra te pro Choquetio proferuntur tapetes ab anno 1540. acu elaborati, & imagines ab anno 1497 picti, quibus eadem formâ columbæ Spiritus Sanctus ad aurem Diuo Thomæ dicenda suggerit. Tui operis folio 117. scripseras *nihil absurdum in re scholasticâ, & à doctrina D. Thomæ deuia, huc usque excogitatum fuisse, quàm quod P. M. Leonarus Dominicanus dixerat, interdum à D. Thoma solui argumentum, quod vocant, sed Contra*, id est, præuium ad assertionem Articulo probandam: *Eam vero responsionem vocas inauditam inter Thomistas, nimiumque distare à veritate, & miraris quomodo sui permittant, id est, Dominicans ab illo impune dici*; quasi non extarent apud D. Thomam argumenta, sed contra, quibus responderet, quasi aduersis suæ sententiæ articulo confirmatæ. Sexdecim huiusmodi solutionum exempla relata sunt à Patribus Belgis, quibus vinci potuisti, non respiscere, nec posteriore editione accusationem priore perperam susceptam retractare.

Si ista cauferis leuiora esse, & magis seria scribenti potuisse per incogitantiam obrepere; nec creati inde vllam suspicionem neglectæ à te veritatis: præter quod multò minutiora captas ex nobis, quæ veluti scelera in maius

auges; suppetunt falsationes multo grauiores, & præter omnem veri speciem nostris obiectæ. Ex infinitis tres tantum attingam, quæ demonstrant abiectam à te curam omnem veracitatis. Nodorum folio 573. obiter, & ex professo in Sole veritatis folio 808. Bartholomæum Spinam accusas plagio, corrupisse locum D. Thomæ in 3. sentent. quo à geniali culpâ Deiparam à D. Thomæ eximi putas: Sed contra te, tot instaurantur testes, quot eiusdem libri ante Bartholomæum Spinam edita fuere exemplaria; quæ nihil prorsus dissentiunt à Spinæ editione adornata anno 1534. Non minus atrox, & aperte falsa est altera accusatio Turrecrematæ Cardinalis, de quo ita ausus es scribere tuorum nodorum folio 588. *Scio quando Concilium Basileense discessit ab Eugenio IV. propter illam propositionem, Concilium est supra Papam; Ioannes de Turrecremata extraxit ex D. Thomæ, & tradidit Concilio, quæ habebat in suis operibus pro illa opinione.* Horum verborum excuso barbariem, sed malam fidem condonare vix possum.

Scio, inquis: merito Pater Harney ad hoc verbum exclamat, *si hoc est tuum scire*, (id est, si quasi comperta asseras, quæ falsissima esse nosti, non solum omnium historicorum relatione, sed ipsiusmet Turrecrematæ librorum monumentis) *quid, & quale erit tuum opinari?* Nihil apud omnes scriptores illius sæculi certius, quam Turrecrematam inuicto animo pro Eugenio pugnasse; unde datus illi à Pontifice defensoris fidei titulus, & Eugeniani cognomen illi adhæsit. Id ipsum testantur tractatus 73. quæstionum de autoritate Pontificis, & Concilij, quæ falsi aperte conuincunt ex Alua de Turrecrematata relata; & adhuc dictorum suorum fidem exiger, quam videtur omnino eiurasse. Eadem audaciâ paginâ 123. in Concilio Tridentino scribit, laceratam esse D. Thomæ opinionem, de quâ ne verbum quidem, sed innouata fuit Sixti IV. Franciscani constitutio ab Alua grauissimè læsa, quâ seuerè prohibet ne vlli harum opinionum nota de Conceptione erroris inuratur.

Iam satis superque falsationum, abrogandæ Petro fidei, quam Bandello nullo argumento detrahit: quid enim de se statuendum censet apud Lectorem, cum ne-

VINDICANTVR ELOGIA PONTIFICIA: 195
dum abiectam veri curam, vbique prodat, sed pœnè
etiam pudorem, aut metum excussum, ne falsi conuin-
catur. Hoc vno præiudicio euersa sunt, quæ à Nodo se-
cundo ad octauum vsque fusiſsimè scribit. Placet tamen
aliqua excerpere refellenda.

PARAGRAPHVS QVINTVS.

*Refelluntur obiectiones præcipue contra anti-
quiora elogia Dni Thomæ.*

VERBA à Christi Crucifixi imagine D. Thomæ di-
cta Neapoli, *Bene scripsisti de me Thomæ*, iam muni-
uimus Pij V. collatis indulgentiis sacellum vbi hæc colit-
ur imago, adeuntibus, item & Clementis VII. atque
Alexandri VII. commendatione confirmauimus: qui-
bus adde testimonium Sixti V. Franciscani æquioris
Petro Alua in D. Thomam, quem in secretiori Biblio-
thecâ Vaticanâ cum D. Hieronymo pingi curauit, sini-
strâ manu Ecclesiam gestantem, dexterâ vero, quâ scri-
psit, ingentem luminis splendorem euibrantem, cum
hâc inscriptione: *Sancti Thomæ de Christo scripta, à Chri-
sto Crucifixi confirmantur.*

Quid ad ista Petre, nedum à Summo Pontifice, sed à
Franciscano tui instituti profecta? Sed nihil hæc mora-
tus, falsi historiam accusat, argumento negatiuo, quod
rem, si vera sit, contingere oportuerit ante annum 1274.
quo D. Thomas vltimum diem clausit, nec vllus tamen
scripserit ante annum 1387. nec qui referunt concor-
dant. Verum, si ad certam rerum fidem requiras. æqua-
lium, vel subparium Scriptorum libros apud nos super-
stites, notabit rerum pœne infinitarum persuasio, nec
tuta erit Desparæ corporis in cœlum assumptio: conuel-
lentur innumera, traditione apud omnes recepta, quæ
nominatus Author Thiers longâ serie recenset. Deinde
cum in D. Vincentium referat Alua hanc historiam; vel
contendit à se inuentam, vel ab aliis exceptam enulgaſ-
se. Non arbitror edò audaciæ progressurum, vt primum
responsum tenter, & Diuum Catalogo Sanctorum

ascriptum, aded enormis imposturæ accuset, ut quem Deus dignatus est huiusmodi beneficiis, & miraculis, false mentiat: ab aliis ergo recepit sine dubio fide dignis; nisi in illum velis cadere sapientis verbum, *qui cui credit, levis est corde.*

Sed iterum urget Alua, si orbi innotuerat hæc D. Thomæ commendatio; cur obmissa fuit à Montefono ad suam causam utilissima? Semper negatiuis agit: quasi Montefonus omnia sciret, vel omnium meminisset; quid si ab illâ historiâ abstinerit, quod ad manus non haberet acta, quibus rem contumacibus persuaderet? Si dicas D. Vincentio non convenire cum D. Antonino eadem referenti. Sed leuissima est dissensio de circumstantiis, quas saluâ rei veritate contingit res certissimas narrantibus variare; & si satis idonea sit ad dubitationem inducendam huiusmodi coniectura Aluæ, multa nutabunt ex annalibus Franciscanorum. Mirum quantum apud illos Authores rerum certissimarum dubiæ sint circumstantiæ. Si dicas ista narrari à solis Dominicanis; quot & quanta ex Patrum Minorum historiâ, à solis suæ familiæ scriptoribus celebrantur, tacentur ab extraneis? Exemplo sit sanctissima Elizabetha Hungariæ Regis filia, quam suis Diuis accensent annales Fratrum Minorum, quod tamen tacet vita à Surio suæ historiæ inserta, primum scripta à Contado, qui Diuæ à confessionibus fuit, primus ex nostro ordine Germaniæ Inquisitor. Putatne Alua, hoc vno silentio, seu argumento negatiuo eripiendum Franciscanæ familiæ tantum decus? Adde falsum hanc historiam à solis Dominicanis referri, illam scripsit memoratus Ioannes Gilemens Canonicus, suisque operibus inseruit.

Calumniis calumnias congeminat, quæ sacrilegio non careant. Audiuimus D. Vincentium obliquè inculsarum imposturæ, D. Thomam innumeris fædatis erroribus; quæ omnia non solum crimine vacare putat Alua, sed eximiam etiam pietatis, & sanctitatis operibus accenset. Satis ipse suam mentem aperit folio 175. *Falsissima est*, inquit, *impostura; quia Christus non approbavit doctrinam D. Thomæ, nec dixit illud benè scripsisti de me Thomæ.* Cur ita censes contra tot Pontificum, ne quidem excepto Sixto V. sententiam? *Quia* (ut inquis barbarè)

quando, id est (licet) esset certum , & infallibile , quod Virgo Maria contraxit peccatum originale, filius eius non reuelaret ; quia aliàs Christus esset alter Cham filius Noë, frangendo præceptum, quod ipse seuerissimè imperauit, Leuitici cap. 8 Ego omnis turpitudinem patris tui, & turpitudinem matris tue non discooperies : mater tua est, non reuelabis eius turpitudinem

Non mirum est ; Aluam implacabili animo D Thomam insectati : cum ne quidem Christo se condonatum testetur hoc grande piaculum, etiam si res ita haberet vilius Adæ contagij Deiparam fuisse participem , quod non putat ab ipsomet Vnigenito Virginis potuisse dici, nisi effracto, quod omnibus, sibi que imposuit , præcepto, ne turpitudò Patris, aut Matris à filio discooperiatur : & si hanc etiam fide credendam veritatem docuisset, Christus Chami maledictionem in se asciuisset. Inde etiam folio 623. eodem animo scribit *nimis durum, imprudens, & infidele videri matrem laudare filium, dominam seruum, Magistram discipulum, & in eadem re, materiam, & puncto filius, seruus, ac discipulus diffinet matrem, dominam, ac magistram.*

Id velim ab Alua rescire, an illud ex Leuitico præceptum, quo vno D. Thomam reum peragit impietatis & blasphemix, cuius venia indignum pronuntiat Christum fore, etiam si verum diceret, an re vera interpretandum censeat ad litteram, vel tantum accommodatio sensu, & per metaphoram referat ad subiectam questionem ? Si primum contendat, ridendum se præbebit, nedum hæreticis, sed etiam doctis omnibus ; quibus nunquam venire potuit in mentem, eo loco ad verum, ac genuinum sensum explicato prohiberi, ne parentes nostros in Adamo mortuos, & cum originali peccato natos fuisse mussitemus ; aliàs cum Chamo maledicendi, quod parentum nostrorum turpitudinem detexerimus. Si tantâ absurditate deterritus, dicat hunc locum de originali peccato explicatum, Christum duntaxat præcepto illigare : ineptior est priore interpretatione hæc restrictio, quasi soli Christo fini legis, eius aduentu, & morte abolendæ, legalia præcepta sint constituta. Vt hæc absurda, & impia euadat, Petro consurgendum est ad alteram responsionis partem, metapho-

tut rescindi putas præcepto Leuitici, *turpitudinem Patris*, &c. quo Christus ipse ligetur, & quo vno cætera, quæ mendacia, calumnias prohibent præcepta, tolli, sin verbis, certè factis significas se reputare.

Vt rem inuidiosissimam concludam; audi Petre, quam virges definitionem fundamentis à te positis conceptu mentis, & ventris, & ex Leuitici præcepto, tu solus ex Catholicis opas, & Ecclesiæ Romanæ hostes tui voti & consilij consortes habes & socios, & si quæ prosequeris (quod absit, & horret animus cogitare) consequeretur, vt metaphoricæ verbi Dei interpretationi res fide diuinâ credenda inædificaretur, actum esset de Religione. Hæretici tecum votorum rei & compotes insultarent Ecclesiæ Catholicæ, si adeo caducis & ineptis, ne quid aliud dicam, fundamentis, à te toto tuo libro substratis, suas definitiones astrueret, & immoliretur. O cæcites, talem auertite pestem: sed frustra hæc timeamus. Indolendum magis est cæcitati Aluæ, qui hanc vnâ metaphoricâ vnus legalis præcepti interpretatione, se exolutum putat à legibus iuris diuini legitimo sensu explicatis, ne mentiaris, &c.

Hunc Paragrophum claudam, aliâ paris cum superiore momenti obseruatione. Dum opusculum contra errores Græcorum grauissimis post Launoium erroribus ait scætere, non animaduertis, Petre te consilium tuum labefactatâ authoritate Pontificia prorsus euertere: neque enim vllius erroris potest argui hic liber, quàm quòd ex Launoij opinione deceptus B. Thomas vel malâ fide Cyrilli testimoniis, quæ apud illum hodie non extant probet, iure diuino toti Ecclesiæ esse præpositum. Summum Pontificem, ad quem eodem iure, rerum fidei definitio pertineat: Tres verò, de primatu Petri, & Summi Pontificis sententiæ occurrunt hîc distinguendæ, extremæ dux, & tertia media. Prima opinio cui, videtur adhærere Launoius, nullum Petro, eiusque successoribus institutione diuinâ ius concedit in alios, nisi Episcopis, & sacerdotibus omnibus commune in Laicos: altera extrema sententia summum, & plenum ius Papæ propugnat, etiam in Ecclesiam collectam, & in Concilia Oecumenica: tertia inter extremas media ius illi institutione diuinâ in Ecclesias diuisum, non collectam.

in omnes confert. Huic ad minus consentiant Catholici omnes, necesse est: secundam defendunt Bellarminus, Turecremata, Cajetanus; quâ de causâ inter palpatores Curix Romanâ à Launoio recensentur.

Quæro, Petre, cui harum sententiarum adharceas? Non dubito quin pedibus, manibusque in sententiam Bellarmini eas. Nam nisi plenum ius definiendi res fidei Summo Pontifici concesseris, frustrâ ab illo efflagitas definitionem fide diuinâ excipiendam de Conceptione immaculatâ, cui putas, te satis idonea & solida fundamenta præstruxisse ex Levitici præcepto. Sed si ita censes, cur opusculum D. Thomæ contra Græcorum errores traducis; quasi erroribus gravissimis scateat: cum vnus tantum Launoio suspectus, aut compertus sit, quoddâ tecum sentiat Summo Pontifici datam facultatem determinandi res fidei, à quo cum immaculatam Conceptionem definiri efflagites, & illud opusculum cum Launoio infames, planè contra te pro Aduersario pugnas, & tuum consilium euertis.

PARAGRAPHVS VLTIMVS.

Alij lapsus Alua, & in omnibus pertinacia.

A Solo Appelle pingi, & à Lyſippo fingi voluisse Alexandrum, aliquâ suarum Epistolarum obseruat Tullius. Ideo sui imperij statuariis, & pictoribus seuerè inhibuit ne quisquam præter hos duos, sui imaginem moliretur, quam ab aliis non crederet pro dignitate defformari posse. Non dubito, Petre, quin Deipara ægerimè ferat, suæ Conceptionis immaculatæ vindicationem à te susceptam. Profectò id operis nemini mortaliū minus, quàm tibi conueniebat; quia cum huic immunitati propugnandæ querendus esset vindex par rei, id est ab illo Adæ contagio remotior; vix vlium hactenus noui, in quem certius, & atrocius, quàm in te communis ille morbus sauerit.

Quid enim ex illo malorum omnium fonte profluxit grauius iis, quibus hanc tuam scriptionem vitiaſti, nempe illâ detrahendi alienæ famæ, & te, tuæque prædican-

di cupiditate ; illâ infontibus grauiâ quæque , & falsâ affingendi licentiâ , vel morositate in leuissimis supra modum exaggerâdis culpis , & in tuis quamlibet apertis , & immanibus cæcitate & pertinaciâ ? Horum verò maiorum in tuo scripto frequentiora & manifestiora extant vestigia & exempla , quàm nos tuæ salutis solliciti velle-
mus , aut in quibus liber , etiam nobis amicis excusare possimus. Id tantum dubium relinquis , temeritate magis in affingendis D. Thomæ , eiusque Discipulis falsissimis , & atrocibus erroribus , vel morositate in augendis leuibus , ac nullis culpis , an pertinacia in his omnibus defendendis ac nunquam retractandis grauius , aut frequentius peccaueris.

Videris his tuis Nodis tragicomœdiam instituisse , seria & immania misces cum ridiculis : vt pro conditione cuiusque Lectoris , quibusdam risum , aliis indignationem , sed re verâ melioribus tui commiserationem excites : vt dolendum planè sit , vnius bonæ causæ prætextu tot & tanta mala potuisse tibi permittere quasi honestarentur : cum æterna sit lex immota , *nunquam facienda mala , vt eueniant bona.*

Credebam , te vnum D. Thomam deponere ad mortem , vtî Sebæ tuo operi præfixo nomine significabas , quasi alter Ioab in hunc vnum perduellem sævitarus , & cæteros omnes humaniùs habiturus. Sed nulli patcis , omnes spirans minarum & cædis insequeris , apud quos perfugium putas posse habere S. Doctorem. Hinc in totam familiam Dominicanam atrocissima hæc accusatio fol. 512. *Pro vno fratre sequuntur vestigia vnius Matris Ecclesia , & pro tres sainte Vierge aspernantur & contemnunt tres matres , & tales matres , Mariam in Calo , Ecclesiam in terrâ , & vniuersitatem Parisiensem :* Iam mouui te , grauiâ ridiculis , & immania ludicris permiscere : vt tragicomœdiam conficias , & simul nos ludibrio , & execrationi omnium deuoeas : Nec sine causa Ioabi supremi Ducis exercituum Regis Dauid personam induisti , eo consilio , vt sicut Imperator ille sub Dauidæ Israelitarum militiæ tribus lanceis perduellem in Patrem , & Regem confodit Absalonem , ita tibi assumes totam Familiam Dominicanam triplicis Matris con-

temptu vnus Fratris causâ , quasi mucrone diro triplicis lanceæ perimendam.

Quid nos ad ista ? exhorrescimus , & obinutescimus : sed nobis tacentibus , quas iniquissimè criminari contempnas & cæsas , matres contra te inclamant nos ab iis sacrilegiis insontes , & , si obfirmato animo nolis credere , obtestantur nostram innocentiam suis in nos effusissime , & certatim collatis beneficiis , tanquam suæ in nos beneuolentiæ immortalibus monumentis.

Sed cùm trium matrum , in quas nos læsæ maiestatis , & pietatis reos peragis ; quæ in cælo residet , potestate & munificentia alteram in terra militantem Ecclesiam , ut ipsa iisdem doribus superat vniuersitatem Parisiensem ex Dominicanis satis copiosâ sobole fœcundam , materna etiam vbera Deiparæ vberioribus , quàm alterius , & huius , quàm tertiæ nos beneficiis lectarunt : Et quidquid calumniatur Petrus , nos à sui contemptus atrocissimâ calumniâ tot testimoniis & Apologiis D. Thomæ Scholam liberant , quot extant antiqua & recentia omnium ætatum in Magistrum & Discipulos immortalia beneuolentiæ monumenta ; quæ non dubito apud cordatos omnes inualitura aduersus Petri calumnias , & inconditas vociferationes.

Vbi omnes generatim variis locis inuasit Dominicanos , insensius præ cæteris incurrit in Turrecrematam , quem cum Petro à clausa valle post D. Thomam , se maximè testatur odisse. Quam verò ob causam , vix alia occurrit , quàm quod in Concilio Basileensi omnes , illius sæculi testantur scriptores tantâ animi constantiâ pro Eugenio egisse , ut inde iam memoratos honoris titulos sit consecutus. Hunc tamen Petrus apertâ calumniâ scripsit folio 635. Eugenij causam prodidisse , cum omnî certo sit certius , acerrimè propugnasse pro Eugenio contra Ioannis à Segobia Franciscani impetus. Sed Petro licet pro suo summo in omnia iure personas mutare , & quas ex suâ opinione pœnas Segobia commeruerat , à Turrecremata deposcere : Hinc post exercitam in illum summam crudelitatem ob crimen confictum , vult etiam suam experiri morositatem : Iam obseruauit duplex esse calumniandi genus ; vno immania & falsâ insontibus affingi , altero leuissima & futilissima in ma-

REFELLUNTUR VARIÆ ACCVSAT. ITERATÆ. 203
jus ad odium & inuidiam augeri. Vtriusque generis calumniarum insignia voluit extare in Turrecrematam exempla: primi id est afflictorum falso immanium criminum iam dedimus: audi Lector, alterius rationis accusationem.

Quinque vitia capitalia incurrisse ait Turrecrematam folio 158. quod locum D. Thomæ ex 3. d. 3. semel vsque ad minimum apicem transcriptum, alio loco vt mortis est Scriptorum, inuariato sensu sex v oculis paululum immutatis recitauerit, & cum textus D. Thomæ habeat, *non potuit esse*, posuerit, *non fuit, necesse potuit*: En duo priora capitalia vitia: tertium est vox *decenter* obmissa, sufficientissimè ex iis, quæ præeunt, aut consequuntur, significata: quartum est quod, *preservaretur*, dixerit, vbi alia lectio habet *conseruaretur*: quintum denique quod pro *incurreret culpam*, dixerit *contraxisse*. Hæc iudice Alua sunt quinque vitia non qualiæcunque, sed capitalia. Sed vti Pater Harney huic peremptorio Aluæ iudicio adiungit, iuxta eos, quos nec dum planè excæcauit affectus, & qui saltem *videns homines, sicut arbores ambulantes*, ne vitia quidem sunt.

Eadem seueritate tota illi Academia Salmanticensis dat pœnas grauissimas, ob similes culpas, id est prorsus nullas. Suo iuramento Academia nulli in toto orbe Christiano secunda, retulerat ex S. Antonino historiam allocationis, quâ Apostolorum Principes se dignatos S. Doctor socio suo Reginaldo cum fide iuramenti aperiebat; & cum elegantix causâ, vel libertatis honestæ ab omnibus vsurpatæ sine vlla noxa, Sapientissimi viri verba Antonini immutassent, sensu prorsus inuariato, sic in illos quasi Plagiarios seuerissimè agit Alua fol. 188. *In vna auctoritate habente viginti quatuor dictiones Latinas, in additis, derelictis, ac mutatis inueniuntur plura, quàm quadraginta vitia* & si aliquis de hoc dubitauerit. enumeret: & hoc, inquit, non est factum antiquitatis, sed modo; neque in aliquo angulo terra, sed in insigni Academia Salmanticensi; nec denique ab aliquo ignoto Scriptore, sed à nouem præclarissimis Magistris, in iudicio contradictorio, & quando nitebantur excludere ab illâ insigni vniuersitate omnes Ecclesia Doctores. Quæ verò

illa vitia sint ipsemet aperit nimirum, pro *te* rogavit, *ta* sciscitatur; pro *autem* dixerunt *vero*, idemque de aliis triginta octo iudicium esto.

Sed parum erat, nisi & S. Thomas illâ Salmanticensium accusatione grauissimâ per parenthesisem carpere-tur; dum enumerat quadraginta vitia, *Quarto*, inquit, *perueniendo ad auctoritatem formalem, ubi S. Antoni-nus vitur verbo rogavit, Salmanticenses excogitarunt aliud aequalitatis, scilicet sciscitatur*: Et addit Petrus; *nam S. Thomas non rogat scilicet Apostolos, sed scisci-satur.*

Quid nos ad ista? Videris mihi Petre, in te, Tuof-que, & in Aduersarios eodem discrimine & animo comparatus, quo Calvinistæ Deum in Catholicos quasi in reprobos, & in suæ sectæ homines, comminiscuntur affectum. Istorum parricidia, incestus, quasi veniales culpas habet, & ad nullam imputat pœnam: nostras verò labeculas, motus etiam indeliberatos, quasi enor-mia scelera, & lethalia peccata æternis suppliciis casti-gat. Ad hanc iudiciorum normam tua componis, Petre: hinc tantâ crudelitate excepti à te Turrecremata, & Sal-manticenses, ob aliquot vocularum immutationes, quasi ob enormia peccata. Si tibi particula, *autem*, mu-tata in *verò*, *praeservare* suffectum in *custodire*, & alia his similia, sunt capitalia vitia, quæ tandem leuia tibi sunt futura? Quæcumque ipse enormia admiseris præ-textu piæ causæ insontibus, & de Ecclesiâ benemeritis traducendis.

Magnam de te excitasti expectationem, aduocatâ ad tuum tribunal Salmanticensi Academia; sed vix poteris sustinere, quin ridiculus euadas, aut quid peius. Scribæ olim sectæ Principes magnificentissima legatione, cum maximâ pompâ ad Christum in remotis regionibus degentem, miserunt accusatum Apostolos grauissimis de rebus, quodd Seniorum traditiones impunè transgrederentur. Quas verò tandem? Nempe quod inopiâ & fame oppressi illotis manibus excussa ex spicis ad mes-sem maturis comederent grana omni alio obsonio de-stituti.

Non dissimiles sunt tuæ in nos Petre, accusationes; promittis, aut intentas capitalia peccata te probaturum.

& profers inepta & ridicula. Faxit Deus, vt à meliore animo prodeant; nec infelicem habeant exitum, quàm Sycophantarum in Apostolos criminationes sortitæ sunt, in speciem graues, affectu malignæ, re ipsâ ridiculæ, & suis authoribus exitiales. Timendi tibi essent illorum casus; à quorum imitatione non videris abhor-
rere.

Sed omnem stuporem superat tua in his malis cæcitas, cui secunda tuorum Nodorum editione pertinaciam addidisti; eaque omnem, nobis quidem tuæ resipiscentiæ spem, tibi verò horum excusationem abstulisti. Mirum planè est, te in alieno oculo festucam deprehendere, nec in tuo trabem sentire. Et cum tuis, quibus laboras, indolendum, & medendum esset malis grauissimis, illa foueas, ruteris, qui aliena etiam leuissima nec ferre possis, nec excusare, & in infinitum augeas. Puto in te cadere commune illud Philosophorum effatum de elementis, vbi suum locum occupauere, nullo innata leuitatis, aut grauitatis pondere ferri & impelli. Sic amor, & admiratio tui, aliorum neglectus, ne contemptum, & odium dicam; & quæ inde prorumpunt, cæcitas & ignoratio sui, opinionum præiudicatarum impotens æstus, & alia id genus vitia, quasi innata, te inducto stupore effugiunt, tibi que sunt insensilia.

At fortè puras piæ causæ zelum, quidquid præter fas moliris, honestare; sed nescis damnati ab Apostolo zelum cæcum sine scientia, & à Sanctis Patribus amarulentum, quem charitas non condierit. Nec vides has dores in eo, quem obtendis, zelo desiderari; nec quamlibet sanctæ & iustæ causæ studium, ne dicam immanes falsationes, à quibus non videris abhorrere, sed etiam tot morositates, & vitilitigationes perpetuas nec pati, nec excusare. Si cui aliquid religionis & conscientix sit residui, quatuor suppetunt ad resipiscentiam, & ad bonam mentem remedia, nempe peccati & erroris, in quæ impegerit, aperta & inexcusabilis damnatio, deinde atrocitas sceleris, quæ stupidos etiam percellat, præterea priuata amicorum correctiones, aut obiurgationes inimicorum, castigationes tandem, & poenæ maiorum, quibus in nos sit nedum authoritas, sed etiam imperium.

Quid horum tibi Petre, defuit, ut eorum quæ primâ editione perperam, & apertè atque immaniter falsa scripseras, secundâ deleres, aut certè, ut omnes mirantur, & dolent te fecisse, non augeres? Poteras causari piæ causæ studio tibi impositum, te aliorum relationibus deceptum, multa per incogitantiam non malo animo scripsisse (quamvis ægrè ad omnia quæ euulgasti, possit hæc excusatio pertinere;) hæc tibi ficulneæ folia, quibus exemplo protoparentum nuditatem regis, abstulerunt suis apologiis Patres Belgæ. Cur non emendasti? Aut saltem non excusasti prope infinita, quæ apertè falsi conuicerunt? Ut argumenta quæ vocamus, sed contra præfixa articulis nunquam à D. Thoma solui.

Si ista hisque similia, quorum aliquot tibi supra subiicimus, leuiora videbantur, quàm ut tuæ famæ noceres solemnî palinodiâ, aut ut excusare ad tuam salutem iniretesset; cur Turrecrematæ proditiõis causæ Eugenij per summam calumniam traducto, adhuc secundâ editione falsi conuictus ineluctabilibus argumentis, genuinum acrius insigis? Si leuior etiam tibi sit hæc accusatio, an eo genere repones, quod scribis, doctrinam D. Thomæ 22. errorum in Angliâ, & in Galliâ à Parisiensi, & Oxoniensi facultate, & ab Episcopis censurâ damnatam, à scholis proscriptam fuisse anno 1216. idque ais *constare actis authenticis, hodie etiamnum subsistentibus?* Hincque nodum nectis longissimum à paginâ 161. vsque ad paginam 257. atque inde concludis passim; *quomodo autem Christus Dominus hæc doctrinam approbaueris, cum non sis errorum approbator Deus, non habebis adeo expeditam solutionem.*

Quam falsa sit hæc criminatio; omitto dicere, cum errorum his censuris damnatorum vix vllus extet apud D. Thomam, si vnâ vel alteram propositionem excipias, quæ sensum Catholicum admittant; cum eo, quo lata fertur censura anno, vix suæ ætatis secundum attingisset D. Thomas. Deinde cum eiuranda omninò esset, & execranda adedò falsa, & atrox criminatio, vitilitigat Aduersarius folio 167. & ait vitio præli annum 1216. suffectum anno 1277 excuso mendum. Sed eandem à Petro gratiam exigo, licet non ausim sperare; simile ex prælo citatum contigit ad elogium ex Urbano V. & loco annî

1379. septimi Pontificatus Urbani , appositus fuerat anno 1377 Ad hæc Alua , folio 193 prorumpit in huiusmodi verba. *Tene me amore Dei , ut ex ore meo me iudices ?* Et huic exordio consentanea adiungit , quibus nos nedum falsi , sed pene sacrilegij reos agit , cum in promptu esset excusatio , quâ simile , & grauius erratum vult sibi condonari , id est mendum ex prælo contigisse.

Sed quid his leuioribus , ac pene nugis collatione aliorum , quæ hic castiganda sunt , longius detinemur ? Patres Belgæ vrgent Aduersarium ; Cedo , inquit , *illa testimonia authentica , & originalia usque in præsentem diem subsistentia* , quibus folio 219. ais , *omnem tolli dubitationem* de doctrinâ D. Thomæ , sub pœnâ excommunicationis quoad 211. articulos , vt erronea in fide condemnata & prohibita. Ad hæc respondet folio 192. hos 212. errores damnatos in Angliâ , ab Archiepiscopo Cantuariensi , & Parisiensi in doctrinâ D. Thomæ inuentos *ut referebatur* , atque hæc tandem est tota tua defensio , quæ venditabas testimonia authentica , &c. in vagum vulgi à te confictum rumorein facefcunt.

Ex uno crimine disce omnes.

Poterâsne Petre , hac 211. errorum ex doctrinâ Angelicâ censurâ aut delatione maior , grauiôrque , quàm à te suscepta sit , institui accusatio ? Et cum testimoniis destitueris , quibus prædicabas munitam ; poterâsne magis pudendâ , aut puniendâ perfidiâ , ne vel minimo retractationis aut pœnitentiæ dato signo , quàm vulgi rumoribus eam tutari , & excusare ? Post istud omninò profligatæ fidei argumentum , frustra tibi de aliis litem moueam. Addam etiam , quod te vtcunque leuare & solari possit , dictum de viro linguæ petulantia apud omnes pessimè audiente : Quidquid in alios effutiret , videri culpâ carere , quod nullam fidem faceret : vereor ne de se ita sentiant boni omnes , verum si nec aperta calumniarum falsitas & immanitas , nec priuatorum monitiones te à tam retrâ edirione poterant detertere : debueras ad minus abstinere post quartum , & vltimum ad resipiscentiam remedium ; nempe post damnatos Romæ , & in Hispaniâ tuos libros ,

Nam si à falsationibus adedò manifestis , quibus pudor suffundi possit deploratis , & cōscientia quâlibet dura velli-

cari, vnum supererat ex tot malorum naufragio reliqui, quo causæ piæ prætextu tibi blandiebare, hoc adeo acerrimum studium non displiciturum Remæ, & gratum futurum Hispaniæ, quæ præ cæteris Christiani orbis regionibus impensius fauet piæ opinioni, & vtramque boni consulturum quidquid in D. Thomam, & in nos scriberes relictâ penès te dictorum fide. Sed cum illud solarij, & excusationis tibi præceptum sit censurâ tuorum librorum lata Remæ, & in Hispaniâ, quibus te probatum iri sperabas; Quid supererat, nisi vt iudicio æquissimo acquiesceres, palinodiam caneres, aut saltem desineres insontes vexare? Sed nouissima prioribus peiora facta sunt, & tuæ in nos sæuitiæ, ne procacitati dicam, in maiores contumaciam, & in malis pertinaciam addidisti.

Iam monui te ementito primæ editionis animo, fraude illusile constitutioni vltimæ de Conceptione; vt prætextâ illius ignorantia, quod cauebat sapientissimus Pontifex, in nos ageres, quasi impios & sacrilegos. Sed quo nomine excusabis tuas satyras & insectationes, cum Romæ, & Hispaniæ execrationi sint, quibus te gratificaturum sperabas? Quid tu ad has vndequaque ingruentes censuras? Libro à te Hispano idiomate edito, illas solo halitu diffas, quasi quasdam atomos, quæ solem veritatis à te ex nouo orbe inuectum obscurabant, tuumque consilium satis hac inscriptione testataris, *Soplos contra algunas atomos, que se han leuantado, y opuesto aquestos dias al sol de la verdad: por F. Pedro de la Concepcion Religioso minimo entre los Menores el menor. Con Licencia de los superiores impreso en Vaylona anno de 1661 por Iacobo, Brigh.* omnia inmutas, & sus deque euertis, modo *Terri à Conceptione*, modò veterani militis Flandriæ personam assumis, vt bellum indicas tuis maioribus, illisque insultes ventosis Plautini militis verbis, eosque omnes vno tui oris halitu euertas. Si optandum nobis fuerat ab vilo aduersario laceßiri; poterátne felicior contingere aggressio, quàm ab illo, qui vt Eucherij Lugdunensis verbis vtar de morte differrentis, cuius insigne tibi assumis; *nulli cedo tendens in nos quasi reos, incurris in iudices dominatus seruis & clientibus, exardescis in dominos: sauiens in priuatos homines, prosilisti in Summos Pontifices,*

Pontifices, quorum iudicia veluti atomos dispellis.

Huius dissertationis finem faciam monito omnium grauissimo: iniquius & impotentiùs nobiscum agis Petre, dum congelitis omnium generum erroribus, & criminationibus in Familiam Dominicanam; addis illi congenitam in malis pertinaciam, & Scripturæ sacræ, factorum Conciliorum contemptum præ doctrinâ D. Thomæ cui pag. 159. per dirissimam ironiam ais *Summum Pontificem hoc illi priuilegium dedisse, ut Scriptura sacra & Concilia præponatur*. Atque hinc tuo, *certum quid*, aliis Nodis, in 16. inserto dicis, *D Thomam quæ sanctum posse, non pudere retractationi errorum quos commiserit, sed ut Dominicanum nunquam retractaturum, quia Dominicani nimis adhærent suæ opinioni, & pluri faciunt illam, quàm auctoritatem Ecclesiæ, & Doctorum.*

Ad ista Pater Harney *Hactenus dicis Pater Alua, & adhuc vis de modestiâ commendari?* Aliquam tuis dictis fidem haberemus, si vel vnum Dominicanum proferres, qui tibi ad hanc in supremam Ecclesiæ potestatem contumaciam præiussit, aut te imitatus fuisset contradicendi audaciâ. Absit verò ut tibi vicem reponamus, tuæque priuata mala in aliquod matris tuæ Familiæ Franciscanæ conuertamus dedecus, quasi illud præpositi, & amatulenti zeli genus, & in nos odium, congenitum tibi sit, ubi primum hanc vestem induisti.

Horret animus ista etiam cogitare. Scio te sanctissimè institutum ad modestiam, ad humilitatem & charitatem, còque te sanctissimi Parentis exempla, & leges Seraphici Ordinis vocare; sed indolem non admodum sequacem sortitum, aliò te tui affectus deduxerunt: unde hoc maximè tuam peruicaciam auget, & cumulat, quod nedum infinita apertè falsa, & atrocia, nedum castigatus priuatâ monitione, sed publicâ etiam censurâ majorum, tui etiam instituti, quod ad omnem humilitatem & modestiam effinxerat, oblitus, secundâ tuorum Nodorum editione peccaueris; & adhuc Dominicanis contumaciam retractationis impatientem, & contemptum Ecclesiasticæ potestatis obliuiscies, quasi mala instituto nostro congenita? Posses aliquâ specie veri id inuidiæ, & infamiæ nobis creare,

si aliquis nostrum cum Occhamo dialogos in Ioannem XXII. scripsisset, aut cum Ioanne à Segobia Eugenio IV. totis viribus impugnasset; si ex nobis prodissent pauperes Lugdunenses, qui odio in Sedem Apostolicam Luthero, & Caluino prolusissent.

Sed absit ut hæc priuata nonnullorum Franciscanorum crimina in totam familiam regeram, tuæ calumniæ depellendæ etiam necessitate adactus. Scotus, Occham, Aureolus ex professo D. Thomam aggressi sunt: Nostri eorum impetus intra inculpatæ tutelæ fines sustinuerunt. Sed quis Dominicanorum corruptorium Scoti molitus est, quale D. Thomæ vnus è tuis statim post sancti Doctoris obitum edidit; cui nobis tacentibus Ægidius Romanus correptorium apposuit? Modestiam nostrorum Patrum tua conuicia excipio; & cum vniuersam Dominicanam Familiam, quasi communi crimine, nullius etiam priuati culpâ traducas: ego Familiam Franciscanam pronuncio immunem, & innoxiam ab his, quæ tu, tuique similes in nos, & Summos Pontifices grauissimè, & frequentius peccastis.

ARTICVLVS VLTIMVS.

Plagij librorum D. Thomæ tria genera refelluntur.

INexplebili ardet Alua Dominicanos insectandi cupiditate, quæ vno genere conuictorum cum satiari nequeat, omnia arripit, quamuis inter se pugnantia: ut vnâ videatur captare voluptatem in D. Thomam, eiusque discipulos sæuendi. Hinc nihil pensi habet à se ipso dissentire, dum nos traducat. Imponit quæ simul stare nequeant. Primo impetu D. Thomam aggressus, deinde eius libros incessit. Nullum, nequidem Summam Theologiæ contendit genuinum esse illius opus; sed omnia vult supposititia esse, & aliis authoribus plagio subrepta. Hanc accusationem totis viribus diu persecutus, deserit, ratus se nihil promouisse, & à Magistro in discipulos arma vertit. Quos sentit se non posse eripere Sancti Doctoris Libros, criminatur à nobis interpolatos & falsatos: nec hætenus est insectationum meta;

nouam instaurat: Demus, inquit, quæ circumferuntur opera D. Thomæ legitima esse, nec a discipulis temerata; si hodie superstes esset S. Doctor, illa retractaret. Itaque tribus insistit gradibus, & vrget nos imposturis, quæ in Authoris resiliunt caput.

Quæro, Petre! vel quod probandum suscepisti, putas confectum, & quæ ascribuntur D. Thomæ opera aliena esse; vel sentis, te oneri succubuisse: si hoc tibi postremum acciderit, fateris te calumniarum artificem: si primum contendas, ad quid vellicas discipulos, & arguis corrupisse Libros Magistri, qui nihil ad illum pertineant? More Achilleæ hastæ, & scorpii sanas vulnus quod inflixisti. Standum enim erat primæ accusationi, si veram censebas: sed dum huic alteram addis, & istam tertiâ cumulas, priores posterioribus deles, & te plagiarium prodis. Poteram hac breui, & validâ refutatione esse contentus, & tuo operi hunc versum inscribere. *Statuerunt consilia, quæ non potuerunt stabilire. Sed placet singula expendere, vt alterum eiusdem Prophetæ versum apponamus, exinanite vsque ad fundamentum in ea.*

PARAGRAPHVS PRIMVS.

Summa Theologica, & singula eius partes vindicantur D. Thomæ aduersus Aluam.

N Vllum est homicidij, & furti genus, lege seuerius domestico castigatum, quodd nisi cohibeatur sæuitia, & iniquitas contubernalium, nullum sit contra perfidiam perfugium, & tutissima quæque obnoxia sint prædæ, & latrocinij. Nullum opus suo authori magis assertum, & tutum fuit, quàm D. Thomæ Summa Theologica, ab eius obitu millies edita, omnium diu noctuque detrita manibus. Placuit tamen Aluæ hunc partum & thesaurum S. Doctori præripere, seu vt cupiditati detrahendi nobis indulgeat, seu vt Academicorum more, monstreret, nihil adedè indubitatum, de quo non sit litigandi locus, seu fortè verius, vt Lectorum, pro cuiusque affectu risum, commiserationem, aut iram

prouocet ; quorum hæc disputatio , cum vberissimam materiam præbeat , vnum tantum dubium relinquit , quid horum iustius , consilium Petri , & argumenta mesceantur.

Videtur Zoilo inuidere , quem in Repub. litterariâ occupat locum Homeromastigis , seu ex liuore arroboris virorum illustrium : nisi fortè ambiat illo genere superiorem. Homero Poëtarum principi honores pene diuini ab antiquis delati sunt , quòd artis Poëticae vnus fundamenta posuerit , & supremum culmen sit consecutus , cui aded ingenita , & singularis erat poëmatís admiranda illa elegantia , vt prius Herculi claua , quàm Homero vel vnus versus præripi posset. Quo inter Poëtas Homerus , eodem inter Theologos loco D. Thomas reponitur. Sed an Zoilus Homero fuerit iniquior , quàm Alua D. Thomæ , non ausim dicere ; hoc solùm nomine possum excusare , quæ Zoilus solo liuore in Homerum scripserit , hunc zelo amariore , quàm charitatis suauitas patiatur , fuisse meditaturn. Sixto V. seuerior , Christo non parciturus ; sed Chami loco habiturus esset , si re verà communi ex Adamo lege natæ Mattis labem contractam verbo aperuisset. Quid putas in D. Thomam sibi permissurum , id falsò scribentem , cuius causâ adeo durè Christum esset vexaturus , & in illum etiam vera dicentem anathema maranata pronuntiaturus ?

Hac tantùm ratione Zoilo meliorem Petrum existimo , quoad cætera Zoilum planè assequitur , nisi velis vicisse ; quòd hic principem Poëtarum , Alua principem Theologorum perpetuò arrodat. Ille Homerum suâ Iliadè , & Odissea frui passus est , hic D. Thomæ nihil suorum operum reliqui facit. Sed rem difficilem aggreditur : prius enim Herculi clauam , Homero suos omnes versus , quàm D. Thomæ Summam , vel suorum operam minimum eripuerit : habet enim , vt loquitur Innocentius VI *eius doctrina , præ cæteris , excepta Canonica , proprietatem verborum , modum dicendorum , veritatem sententiarum* , vt qui hoc singulari charactere , ac certissimo criterio , & omnium sæculorum voce asserta opera neget genuina D. Thomæ , inuidiosius Zoilo nomen sit apud posteros habiturus.

Nihil tamen hæc moratus Alua, per omnia compita inscripsit *certum quid* aduersus Angelicum Doctorem. Quid verò illud est? Nimirum Summam Theologicam ad D. Thomam nihil pertinere, *idque efficacissime* (ut loquitur) à se confectum putat his quatuor argumentis, quorum duo priora vniuersim totam Summam impetunt, posteriora partibus ostendunt Summam, pleraque alia opera aliena esse, ab eo. Primò ex Morelles, *in editione Romana inter opuscula, aliqua dubia, quæ plurimorum Doctorum consensu D. Thomæ doctrinam non referunt, sunt excusa*: Quidni his dubiis operibus Summam annumeremus? Deinde non constat, an iuuenis, an senex summam conscripserit: ergo ex eius officinâ non prodiit. Hactenus velatum est; ad Triarios pugnam deducit hoc argumento: Tertia pars D. Thomæ ab antiquis Thomistis Eymerico, qui anno 1395. latissimum Tractatum scripsit, & à Girando Renerio anno 1471 de eodem Conceptionis argumento disputante tacetur, & à Bromiardo, qui floruisse videtur anno 1290. refertur questio ex tertiâ parte 27. in qua verba relata non extant hodie. E quibus mira dialectica tum argumento negatiuo, tum positiuo infert Alua tertiam partem dubiam, ac proinde in totam Summam, cuius est pars, à D. Thoma alienam esse.

Quartum argumentum rem omninò conficit opinione Alux: secunda secunda tota collecta est à Vincentij Bellouacensis speculo morali, qui Author cum ex Garzia obierit anno 1240 vel ex Sixto Senensi anno 1256. quo vix D. Thomas ætatis annum vigesimum sextum attigerat, nec tum prima lineamenta Summæ posuisset; non ab ipso Bellouacensem, sed à Bellouacensi Thomam mutuatum esse hanc partem chronologica ratio demonstrat. Aliunde Bellouacensis professus se Compilatoris, non Authoris munere defunctum, à quo potuit hanc partem locupletissimam colligere, nisi ab Alensi, ut collatione huius Authoris cum D. Thoma post Patrem la Haye contendit Alua, qui his argumentis putat, se Sapientiam Salomonis æquare?

His argumentis, velut quadrato agmine nos Alua aggredditur; ad quæ nos dicimus generatim, omnibus duo

an esse vitia, falsi ubique antecedentis, & si vera daremus, assumi, fallaces omnino esse, quæ ex illis præmissis deducuntur consecutiones. Esto, Petre, de aliquot operibus D. Thomæ dubitarum sit ex Morelles, an essent legitima, incertum sit quo tempore Summa sit scripta; quâ ratione inde inferis hæc dubia recidere in Summam omnium operum D. Thomæ certissimam? Esto aliquid controuersiarum de vnâ, aut alterâ parte ab otiosis aut male feriatis hominibus sit excitatum, quid inde tibi iuris comparatum præsumis, vt integrum opus D. Thomæ abroges, quasi parte aliquâ detractâ, vel ambiguâ non possit sibi, suoque Authori constare?

Nullus est auri argentique thesaurus, libris vero mentis, facultatum præstantissimæ, partui comparandus, nec subinde furti, & latrocinij genus plagio execrabilius, quo legitimi Authores suis ludibrationibus fraudantur. His adde ab orbe condito nullum hæcenus opus, si Annales excipias, quo Tacitus inermem molem appellat, magnitudine, argumenti dignitate, ingenij contentione, temporis & laboris impendio maius, aut par Summæ D. Thomæ susceptum legimus, aut ad nos vsque seruatum; nullum pluribus, & certioribus titulis suo Authori assertum Summâ Angelicâ, quam his quatuor futilissimis argumentis gloriatur Alua, tanquam quid certum se D. Thomæ abstulisse. Nec aded immanis plagij, & latrocinij iniquissimi villo scrupulo percellitur.

Quam vana & præpostera est huius hominis religio? cum sit regulæ S. Francisci, cui vim legis diuinæ alio loco asserit, obseruantissimus; non dubito quin illi religioni foret, non dicam vnus nummi furtum, quod laxioris conscientiæ seculares fugiunt, sed etiam vsus in scio prælato, vel contactus, quem Seraphici Ordinis constitutiones prohibent. Sed qui ista timet, & cauet, nihil dubitat D. Thomam rei omnium pretiosissimæ, cuius collatione vilescant, & sordescant omnium regum thesauri, & infinitis titulis asserta, ob cauillos, nescio quos, iure delicere. An non timenda illi est reprehensio Evangelica, *colantes culicem, camelum glutientes*? Sed aded valida illi visa sunt, quæ ex eo retulimus argumenta, vt nedum conscientiæ remorsus compescant, quos iniquissimum rei pretiosissimæ suo legitimo possessori

ereptę latrocinium, & plagium ingerere debuerat; vt sibi etiam applaudat, quasi hoc iudicio, æquitatem, & sapientiam Salomonis superarit; vt meritò dixerim, his suis Nodis copiosissimam præbere, vel risus, vel commiserationis, aut indignationis materiam.

Sed pressius tecum ago, Petre: Nihil asserre te dicam certi, aut probabilis, quod ad legitimam argumentationem: quæ *certum quid* concludat, aut probabilem assertionem: nihil assumis, quod vel ineptum vel apertè falsum non sit, & sæpius vtrumque, quàm alterum seorsim. Quam alieno à mente Morelles sensu, eius verba primo argumento ad tuam trahis thesım! Celebriorum Authorum nomini inscripta sunt triplicis generis opera; nempe certa & genuina, vt Virgilio Æneis, D. Augustino Libri de Ciu. Moralia in Iobum Gregorio, de Consideratione, & in Cantica Bernardo.

Ad id genus pertinet vtraque Summa D. Thomæ Theologica, & contra Gentes. Secundæ classis sunt incerta, non tamen omnino aliena ab Authorum, quibus attribuntur, eruditione, & grauitate, vt sermones de operibus Christi Cardinalibus Cypriano attributi. Hoc loco reponerem inter opera D. Thomæ de regimine Principum, Ægidio verisimilius Authore. Tertiæ classis sunt Libri omninò nothi, quales sunt inter opera Augustini, homiliæ ad Fratres Eremiti, & miracula D. Hieronymi Augustino falsò ascripta. Celebris hæc librorum partitio omnibus magni nominis Authoribus contigit, vt verba Morellis relata ab Alua significant; vnde mira est hominis vel ridenda, vel stupenda, aut miseranda supinitas, vt ex operibus Nothis postremæ, vel incertis secundæ, consecutionem velit legitimam esse ad opera primæ classis, quò Criterio, vt modestè dicam, totius Litterariæ reipublicæ, & Librorum tum profanæ, tum sacræ sapientiæ œconomiam, & fundamenta conuellit. Sed, quod omnem superat stuporem, illa consecutione putat se iudicium protulisse Salomonis sapientiæ dignum.

Non minùs absonum, & falsum est, quod secundo argumento assumit; dubium est, quo tempore scripta sit Summa, an à D. Thoma iuniore, aut prouectæ ætatis, ergo est supposititia. Quæ consecutio? Si dubiæ cir-

constantia, quibus variatis nihil depercat rei, incertam faciant; quid tandem indubitatum relinques? Ne quidem Evangelia; quia infinita continent, quibus nihil certius: licet quo tempore contigerint, & de aliis circumstantiis disputare, in utramque partem integrum sit cuique. His adde assumptum omninò falsum, & Summam inter postrema opera elucubraram esse: præter styli maiestatem, sententiarum pondus, aliud etiam certius suppetit argumentum, nempe retractatio nonnullarum assertionum, quas aliis libris docuerat, & Summæ quasi posterioribus cogitationibus emendauit.

Intricatiora sunt, sed nihilo meliora duo alia argumenta ad virilitigandum, quàm ad thesim efficaciter probandam opportuniore: totum argumentum negatiuum est, & præter ingentem infirmitatem falsa ubique assumuntur. Antè Eymericum tacentem tertiam partem Summæ meminit Ioannes à Monte-sono, libello suo supplici ad Summum Pontificem, aliquot annis ante Eymerici opus euulgato: ante Girandum eiusdem, quo floruit, sæculi 1400. exordio quoties non citat tertiam partem Capreolus? Præterea citatione Authorum certiora suppetunt Criteria de Authoribus, quibus asserendi sint libri, ex stylo, methodo, principiis, antiquis exemplaribus manuscriptis, aut typis editis.

Quid verò horum desideratur in hac tertiâ parte seruandâ D. Thomæ, de qua litem mouet gratis Aduersarius? Non est ouum ouo similis, quàm hæc postrema pars superioribus consentit; vt iurare possis hoc solo indicio, ab eâdem omnia officinâ prodiisse. Deinde cum infinitâ in bibliothecis extant exemplaria tertiæ partis inscripta Sancto Doctori, idque inuictò argumento confirmet silentium Petri, hætenus ab illo idem (hoc sublatâ comparationis inuidiâ dictum velim;) quod Iudæorum pertinax perfidia præbet Evangelio indubitatae veritatis testimonium: ideo Augustinus capſarios Ecclesiæ, & librorum salutis baiulos vocat Iudæos; quia ab inimicis nostris excepimus vaticinia Prophetarum, quibus nunciantur, quæ Euangelium exhibet impleta; ne causentur Ethnici hos libros à nobis confictos.

Idem argumentum à Perro depromimus: omnes fere Europæ bibliothecas lustrauit; maximo pecuniarum,

& laborum impendio, manuscripta euoluit, atque excep-
pit, non tam eruditionis sibi comparandæ causâ quàm
doctrinæ D. Thomæ corrupendæ, quacumque id ra-
tione posset: occurrerunt illi infinita exemplaria, om-
nium temporum, tertiæ & secundæ partis Summæ An-
gelicæ. Si vel vnum reperisset, ne dicam diuersi Authoris
nomini inscriptum, sed quod vel D. Thomæ nomen
tacuisset, per totum orbem cum Archimede inclama-
set, *inueni* quod quærebam, id est argumentum negati-
uum, & meâ opinione inuictum, quo D. Thomæ plus-
quam dimidiam partem Summæ eripiam. Sed profun-
dum Petri hac in re silentium, omni tubâ & tonitru
altius inclamat, nihil tale repertum in totâ Europâ, ac
proinde insertam omnibus exemplaribus à primo ad
vltimum inscriptionem nominis D. Thomæ, illi asserere
tanquam genuinum opus totam Summam Theologi-
cam, & Petrum hac suâ lite quid peius cauillatoris, &
veteratoris nomine commeteri.

His tamen nondum acquiescit Aduersarius: sed ar-
gumento negatiuo adhuc ineptiori vrget ex Ioanne
Bromiardo, a quò plus noxæ, quàm adiumenti sit per-
cepturus. Intricata res est, hinc illi gravior, quia No-
dos tantum quatit; sed plane infidum à Bromiardo
auxilium futurum est, quo eius consilia euertantur; vi-
detur illum aduocare, vt febre laborantes gelidam ex-
petunt, & ebibunt, quæ sitim, & æstum ad tempus
temperet, statim intolerabiliorem factura: Bromiardus,
inquit Alua, Author subpar D. Thomæ, ejusdem sæculi
Summa prædicantium scripta circa annum 1290. refert
nonnulla de sanctificatione Deiparæ, ex tertiâ parte
quæ non extant in eâ, quæ hodie legitur, vt sanctifica-
tionem Deiparæ factam nec ante, nec post animatio-
nem, sed in ipsa coniunctione animæ cum corpore:
vnde duo commoda captat Aduersarius, corruptum
esse locum quæstionis 27. ex 3. parte, & ipsammet com-
mentitiâ esse, & falsò D. Thomæ ascriptam.

Hac argutatione vnum nesciens, & imprudens de-
monstrat Aduersarius, suo exemplo, & damno, nihil
impotentius esse, & in maiores laqueos inducere præ-
judicatæ opinionis studio, & piæ opinionis prætextu.
Nihil clarius, & apertius loco Bromiardi; nihil ineptius,

& ab omni similitudine veri alienum magis consecutionibus & assumptis Aduersarij, quæ stupendam, nec vlllo modo ferendam præferunt cauillandi libidinem. Quis fuerit Bromiardus incertum facit nomen multis commune: probabilius est plures fuisse eiusdem, aut similis nominis, & subparem D. Thomæ, quem consultum iuris faciunt nostri Historici, diuersum ab illo, qui Summam prædicantium scripsit, post D. Thomam Cathalogo Sanctorum relatum: quia vbique sanctum nominat, quod summâ cautelâ tacuit Petrus: quia inde sibi sensit perire multa commoda; hinc enim euanescit totum argumentum à testimonio huius scriptoris, quasi antiquissimi, qui primus hanc partem retulerit; cum Capreolus qui vnus infinitis Bromiardis præponderet, millies hanc partem citet.

Præterea quem non capiat indignatio, aut commiseratio hominis, cum ita argumentatur: verba ex Bromiardo relata non reperiuntur in tertiâ parte: ergo ea, quæ nunc extat, non est D. Thomæ? Magnâ, fateor, oportet munitos esse patientiâ, quibus cum hoc scriptore disputandum. Bromiardus vbique D. Thomam Sanctum compellans, posterior est Thomistis, eandem partem referentibus, & ipse concionatores instructurus, negligens verborum, sollicitus sensus, & breuitatem captans, triplicem distinctionem sanctificationis, ante animationem post factam vnionem, & in ipsâ coniunctione, in duo membra contrahit, & secundum cum tertio, vt contingere solet, ad alia properantibus, in vnum compingit. Quid potest hinc expiscari certi Aduersarius? Inde demonstratum putat inuidto argumento, supposititiam esse totam Summam, falsarios & interpolatores esse Dominicanos, denique quid non? O mortalium foelicissimum! dum de his consecutionibus sibi applaudit, triumphum extruit, & parem Salomonis sibi arrogat sapientiam: Quid aliud dicam? Non dissimilem videri illi, qui quotquot appellebant portum Athenarum naues, opibus referatissimæ, ad se pertinere somniabat, & ægerimè tulit curatione morbi, hoc perenne gaudium sibi ereptum; non puto me ingratior operam Aluæ hac nostra responsione nauare, quamuis ad meliorem mentem reuocandus sit, nisi deli-

riis, & his chymicis pasci pro summâ foelicitate ducat.

De secundâ secundæ parte acriorem pugnam instaurat Alua. Sed è pluribus argumentis de librorum critério, & à quo sint Authore, omnia stant pro S. Doctore: vnum in speciem tantum Aduersario fauet ab incerta, aut veriùs falsâ chronologiâ. Si obrineret opinio Garciz, Bellouacensis mortem ad annum 1240. vel Vascij, & Sixti Senensis ad annum 1251. adnotantium, quos sequutus est Bellarminus, non potuit Bellouacensis hanc partem exscribere ex S. Thoma, cum iuxta priorem chronologiæ rationem, sexdecim tantum annos, & iuxta posteriorem viginti sex natus, adhuc Summæ Theologiæ prima lineamenta vix posuisset. Hæc ratio temporum apud Aluam certa, omni demonstratione certius rem ex illo conficit, D. Thomam hanc partem à Bellouacensi, & hunc ab Alensi mutuos: sed Bellarminus *nullo modo credibile* reputat, quod venditat Alua quasi certum *S. Thomam, Summa sua secundam partem, eamque nobilissimam, ex alio Authore scripsisse.* Quare censet Speculo morali Bellouacensis, quasi posthumum additamentum, ab alio hanc partem insertam, vel Speculi moralis non eundem esse Authorem, qui cætera compilarit. Denique quiduis aliud placet sapientissimo viro, quàm quod certum scribit Alua.

Sed nihil opus èd confugere. Ex chronologicâ argumentatione, nedum incertâ (quod sufficeret euertendo consilio illi Salomonico,) sed etiam apertè falsâ: indubitatum enim est Bellouacensem diutius opinione Garciz, & Vascij vixisse. Claruit quidem anno 1240. vt scribit Trithemius, & hinc fortè Garzias intulit eodem tempore obiisse. Sed ipsemet testatur se multis annis superstitem, cum Speculi naturalis lib. 32. cap. 101. meminerit sancti Ludouici à Saracenis capti, & dimissi anno, vt notat, 1210. & speculi historialis liber 31. totus est de rebus post il'um à Garzia suæ mortis notatum annum gestis, ibique narrat S. Petrum Martyrem ab Innocentio IV. Diuorum albo relatum, quod eiusdem sæculi anno 58. contigit. Constat etiam peruenisse ad annum 1260. quia rum primogeniti filij defuncti morte S. Ludouicum afflictum solatus est Epistolâ, cuius Annales nostri meminerunt. Quid si addas, quod

tradunt multi, inchoata illa & prouecta opera S. Ludouici munificentia, absoluisse liberalitate Philippi paternæ potentiz & virtutis hæredis, qui Patri successerit anno 1270? Et cum eo tempore superstes fuerit Bellouac, quis dubitet non potuisse hanc partem mutuaria D. Thomæ? Et si potuit, non oportuisse? Nam, si Bellarminus recensendis libris S. Doctoris, eodem, quo Hieronymus S. Cypriani opera prosequitur elogio, scripsit, *sole clariiores esse, ut supernacuum videatur eorum indicem texere* (quem Alua incertissimum asserit) non passus est hanc partem ab aliis seiungi, quasi ab alio, quam à sancto Doctore censeret non potuisse scribi ob rerum dignitatem, & summam cum aliis partibus cognitionem, quæ ab eadem manu exaratas omnes, etiamsi cætera tacerent, larrat, ut Lucretij verbo utar: quid dicturum putas, si chronologiam attentius explorasset?

Hinc obiter Aluæ fraudem obserua, qui Bellarminum pro se stare gloriatur, quo nullus illi capitalius aduersatur, cum etiam errore ex chronologia deceptus, inducere in animum non potuerit, hanc partem à D. Thomæ non prodiisse; multoque æquior Alua maluerit, toto speculo morali Bellouacensem fraudare, quam vel minimum suspicari D. Thomæ quidquam à Bellouacensi mutuatum fuisse. Nouerat, vir Sapientissimus (& ut paucis eius elogium complectar) eruditione, candore animi, aliisque dotibus, Aluæ dissimillimus, minus D. Thomæ, ne dicam partem ex Summâ insignem, sed vel vnum articulum eripi posse, quam Herculi Clauam, aut Virgilio Æneidem, Iliadem Homero.

Quare sic disputo: non est dubium, quin à D. Thomæ hanc partem Bellouacensis mutuo acceperit, si chronologiæ ratio id patiat: cum cætera omnia id persuadeant, & euincant; atqui iam demonstratum est chronologiam consentire, & probabilius etiam sit, Bellouacensem vixisse D. Thomæ superstitem: quid ergo vetat quin à D. Thomæ hanc partem mutuam suo inferuerit speculo morali, cum plurima testetur se à D. Thomæ excepisse relato ipsius nomine lib. 26. speculi naturalis. 74. nec solum ex cõmentariis in sententias; sed etiam questionibus disputatis post commentationes in sententias, paulò ante summam elucubratis? Et cum speculuma

naturale, quo hæc disputationes citantur, primum videatur opus à Bellouacensi editum, aut certè præiuerit speculo morali; videtur Bellouacensis eodem ferè ordine cum D. Thomæ libris sua specula cudisse, eoque ferè tempore illum speculum naturale, quo D. Thomam quaestiones disputatas molitum, & procedente labore speculum morale adornasse, cum D. Thomas Summæ partes aliquot elucubrauerat. Hinc Theologi Vedastini ex familiâ Benedictinâ, de republicâ litterariâ & de Ecclesiâ optimè meriti, editione Bellouacensis, Aluæ etiam sicuti Bellarminus dissimillimi annotant, *sine dubio primam partem, & secundam longè ante obitum D. Thomæ, inter discipulos eius communiter habitam*; unde addunt *Herneum, & Agidium eius auditores ex his partibus quadam adducere, sicut alij amulî qui doctrinam eius etiam ipso superssiste impugnarunt.*

Videntur sapientissimi viri alludere ad Guillelmum Lamarensensem Authorem corruptorij, cui diximus Ægidium correptorium apposuisse. Ille visus, sui instituti Aluæ præiuisse ex 1. 2. sexdecim loca impugnavit; sed nondum illi in mentem venerat plagij, cuius D. Thomam accusat Petrus, quamvis cum recentissimum esset opus, oportunius erat accusationi, si illius furti reum suspicatus fuisset Lamarensis. Atque hoc silentio damnat Pettum, quasi se longe audaciorem, qui litrem moueat, dubia ferat, aut potius certa, & indubitata ad noxam in controuersiam, D. Thomæ vertat, quæ ilius decessor, & prodromus in hoc munere, Thomæ mastigis in tuto posita, quod voluisset maximè, se non posse arrodere sentiebat, tum cum prætexti à Petro, & suâ opinione certi plagij; si verum credidisset, in promptu haberet argumenta, quibus probaretur.

Sed contra Bellouacensis, cuius prætextitur ius in hanc partem, quasi furto sublatam læsum, accusationem sui causâ susceptam depellit, cum fatetur plurics, se non authorem agere, sed collectorem, & idèd cap. 9. prologi in speculum naturale ait, *tertiâ parte speculi moralis non potuisse visâ describendo omnium librorum moralium, etiam quæ in promptu habebat, omnes flores in unum colligere & alibi, audiat me Lector, non per modum authoris, sed excerptoris ubique procedere; ergo præter ipsius men-*

tem Alua facit Authorem huius partis , quæ stylo , & eruditione Bellouacensis reliqua opera longè vincit. Quod verò ad suspensionem attinet , hanc partem ab Alensi elucubratam Bellouacensem , & ex illo D. Thomam excerptisse , vt tanti operis decus ad suos deriuat Alua ; vana omnino est iactantia & gloriatio , quam fucat potius , quàm confirmet à Ioanne De la haye , collatio aliquot locorum Alensis cum D. Thoma adedè improbabili inira , vt Lectorem , qui hæc expenderit , admiratio subitura sit huius consilij , & conatus , suos Authores non puduisse. Sed quid non tentat liuor , aut gloriæ cupido , si præter vim sibi insitam accedat fucus ex causâ piâ , cuius prætextu putat Petrus sibi omnia licere , & honestari quidquid in D. Thomam , quem Chamo deteriorem habet , molirus fuerit ? Quid non mortalia pectora cogis zeli & famæ sacra fames ! quamuis furilissima sint , quæ hætenus in hanc rem protulit Alua , non dubitat tamen scribere folio 521. *Nihil affirmamus nisi quod demonstramus , nihil dicimus , nisi quod ostendimus , nihil persuadere nitimur , nisi quod constat ex instrumentis authenticis ; debuerat certè aut pauciora polliceri , aut plura præstare.*

PARAGRAPHVS SECVNDVS.

*Catena aurea . aliæque opera minutiora
D. Thoma vindicantur.*

Certum quid & iudicium Salomonis seorsim & tacito Authore contra Angelicum Doctorem editum , deinde 16 loco Aluæ nodis 2. editione insertum , catenam aurea à D. Thoma manifesto plagio ereptam contendit Pontio Carbonello Franciscano , præceptoris S. Ludouici Regis Francorum : idque inclamat Alua , non quomodocumque , sed efficacissimè probatum. Verum præter plura , quæ disputationem pro secunda secunda muniebant , & hanc etiam iuuant , nempe consensus præteritorum cum nostro temporum vnanimis , monumentorum , & exemplarium , quæ in omnibus Europæ Bibliothecis huius Catenæ antiquissima extant contestatio ; duo hîc suppetunt singularia argumenta , primum à Chronologiâ , quæ in

speciem superiori disputatione fauebat Aduersariis, hic pro nobis tota stat, cum ex Alua Carbonellus totis triginta annis, quatuor nonagenario maior mortuus anno 1290. superstes fuerit post absolutam Catenam à D. Thoma ad minùs in Euangelium Mathæi, nuncupatam Urbano IV. anno eiusdem sæculi 64. viuus exempto, quam proinde à D. Thoma Carbonellum potuisse mutuatam sumere, ratio temporis euincit.

Ita verò factum omni demonstratione efficacius probat ipsamet præfatio S. Doctoris ab Urbanum IV. quem ita alloquitur ac compellat: *vestra Sanctitati placuit mihi committere Mathæi Euangelium, exponendum: quod iuxta propriam facultatem executus sollicitè, ex diuersis Doctorum libris prædicti Euangelij expositionem continuam compilauit: & in alios Euangelistas, quam mortuo Urbano persecutus fuerat, expositioni, præfixâ dedicatoriâ Epistolâ ad Cardinalem Hannibaldum ait, se ad id operis indultum mandato Urbani IV. Et cum eo ex hac vitâ substracto tria Euangelia exponenda superessent; ne opus quod obedientia inceperat, negligentia imperfectum relinqueret, cum multo labore diligens adhibuisse studium, ut quatuor Euangeliorum expositionem compleret; atque ut integra esset sanctorum expositio, curasse, ut quâdam è Patribus Græcis in latinum transferrentur. Potuitne D. Thomas saluâ veritate, nec nisi grauissimè læsâ, ne dicam sanctitate, sed etiam modestiâ & conscientiâ, ita præfari ad opus alienâ industriâ elaboratum, & quasi à se elucubratum falsò obtruderet venditare? Sed parum pensi habet Petrus, D. Thomam nedum à legitimo in suas elucubrationes iure, sed etiam à certâ sanctitatis opinione, & quasi à cœlo ad infernum delicere, virumque sanctissimum, ut sæpius loquitur, nugiuendulis accensere, dum suo zelo indulgeat, & falsò scribentem de Conceptione Deiparæ vexet, qui Christum vera etiam dicentem, si D. Thomæ accineret, reponendum Chami loco scribere non dubitauit folio 575.*

Ad hanc ex præfatione secundam argumentationem, nisi D. Thomam inter reprobos reponamus, non video aliud posse responderi: quàm præfationem commentitiâ esse. Sed contra illud effugium præter infinita catenæ exemplaria antiquissima, statim post obitum S. Do-

ctoris, vel certè antequam Sanctorum Cathalogo accenseretur, quæ fratris Thomæ nomen præferunt, in quorum nullis desideratur hæc præfatio, seruatur in Bibliothecâ Varicanâ hoc ipsum exemplar, quod Urbano IV. obtulit S. Doctor eadem præfatione munitum; de quo Vadingus gratulabatur Patribus nostris, magnum eos in Vaticano thesaurum habere. Ad ista nisi iam multis experimentis nossem Petrum, non crederem ausurum contrâ verbum hiscere: sed quibus alij deterrentur difficultatibus, ipse audentior euadit, nec immeritò sibi *veterani militis* nomen sumpsit, suòque libro inscripsit *Flatus contra atomos*; hæc enim, quibus munuimus catenam, præsidia validissima sunt, illi atomi vno halitu à se distandæ.

Omitto Carbonellum nullo testimonio Magistrum dici S. Ludouici Francorum Regis apertâ hallucinatione loco nepotis S. Ludouici Episcopi Tholosani in Cathalonîâ pro Patre obsidis, cui facile ex eâ gente Carbonellus contingere potuit præceptor, Patrum S. Ludouicum Regem esse suffectum. Totius disputationis, quo rem confectam clamat Alua, neruus iam succisus est: Carbonellus viginti octo annis maior natu D. Thoma, & sexdecim superstes, in vtrumque testamentum octo edidit volumina stylo, & methodo catenæ aureæ, quam in Euangelia cuderat, Carbonello legitimo auctori à D. Thoma plagio subreptam demonstratum quasi certissimo Salomonis iudicio putat inde, quod annis vicerit D. Thomam, idem argumentum tractarit, & duo, aut tria extent exemplaria, in quibus desiderato nomine D. Thomæ, Carbonelli sit inscriptum. Sed quæ consecutio? Quis tuæ argumentationis, Petre, vitia enumeret?

Inprimis quæ præmittis illationi, nutant te vno teste confirmata, cui pessimè cum bonâ fide conuenire pluribus demonstratum est: & ne superiora recolam, aut dicenda occupem, hæc controuersîâ luculentum præbes nobis argumentum, eos velle decipi, qui tibi etiam iuranti credant. Antè D. Antoninum asserebas nullum Cathalogo operum D. Thomæ catenam auream inscripsisse; cum tamen S. Thomæ scripto librorum indiculo Summi Pontificis iussu à Raynaudo perpetuo S. Doctoris

Doctoris socio sit inserta. Cur igitur rem inexploratam ita temerè asseris, vel, si consulueras Raynaldi cathalogum, potuisti ne saluâ conscientiâ, & veracitate, negare ante Antoninum à nullo Catenam auream fuisse inter legitima D. Thomæ opera annumeratam?

Sed istud tibi condono erratum; do etiam extare, quæ refers, tria exemplaria, quibus Carbonelli, non D. Thomæ nomen præfixum sit; *prius mel de Petrá, oleum-que de saxo durissimo elicies*, quam ex illo assumpto probaueris subreptam à D. Thoma Carbonello catenam ex eo opere laboriosissimo in totam Scripturam exarato: quasi non potuerit suo Marte, & exemplo D. Thomæ hanc commentationem in Scripturam contexere, illique adiungere catenam in Euangelia absolutam D. Thomæ operâ, qui se hoc labore leuarit, & animum addiderit, ut in vtriusque testamenti libros reliquos idem commentationis genus prosequeretur. Sed non conuenit, inquires, senem à iuniore doceri; quasi annis merienda sit eruditio, & scientia: nec D. Thomas *super senes intellexerit*, & paucioribus annis plura scripserit Carbonello, nec ex illo thesauro inexhausto potuerit Carbonellus mutuari hanc catenam, quæ ad eius institutum maximo vñ futura erat.

Quid ergo habet Alua, quo sibi applaudat de iudicio Salomonis, quasi Regis sapientissimi, vindicata Carbonello cathena aurea, æquitatem ac prudentiam superauerit? At contrâ paucis demonstro, nullum esse iudiciorum vitium, quo expers sit illud quod tanti facit, ut sibi inscribat, *Ecce plusquam Salomon hic*. Iudicium eo iniquius nullum est, cui legitima desit facultas iudicandi, si partium studio laboret, malèque apud omnes audiat, quasi omnia gratiæ, & odio, nihil der æquitati. Conuenio vos Petre Alua & Pater Gueuara! quis vos constituit iudices in hac causâ grauissimâ; & quam obtenditis potestatem, à quo excepistis? Deinde quamuis daremus, vos iudiciariâ authoritate, quâ omnino caretis, munitos; quis non suspectos habeat in eâ causâ, quæ inret vnum è vestris & D. Thomam agitur? Si præterita tempora, & exempla recolatis, meministis è vestris vnum D. Thomæ vix adhuc terris erepto, & in cœlum recepto, dicam multarum falsitatum libello, cui corru-

prorii titulum dedit, inscripsisse, quam alij longa nec interrupta vnquam serie sunt prosecuti, & vos tandem excepistis; & in hac causa actores, partes, testes, delatores, non potestis, nisi abdicatis per summam iniuriam iuris solemnibus, iudicis personam sustinere, aut munere desungi.

Et ne videar ad cauillos & apices iuris vestro iudicio detrectando confugere; quis non videat vos in hac controuersia omnia iura conuellere? Vnicum aut alterum exemplar catenæ aureæ solo vestro testimonio notum, cui desit nomen S. Thomæ, ascriptum sit Carbonelli è situ & puluere bibliothecæ nescio cuius ostentatis ad pompam, nec re ipsa monstratis, quod vnum infinitis vultis præponderare, quæ D. Thomæ, nedum nomen præferant, sed habeant etiam præfationem ipsius S. Doctoris, quâ contestetur à se summâ diligentia elaboratum opus: nec contenti hunc manuum suarum fructum præripere; si stent vestra iudicia, non Sanctum, sed, Sycphantam fuisse probatis: nec post ista dubitatis hoc vestrum iudicium Salomone dignum, aut eius sapientiâ maius. Non puto vobis cæteros hominum assensuros; & iam video diuersissimas fore de hoc vestro iudicio sapientum opiniones: multi risu & cachinnis excipient, alij vix ferendum, & censuris grauissimis castigandum dicent; reliqui lachrymis & commiseratione prosequendum esse pronuntiabunt. Postremo huic iudicio assentior, nec dubito quin omnes mecum qui vel sapiunt, vel studio & voto pacis his Ecclesiæ dissidiis indolent, & torquentur.

Vti ex versibus Ennii, quasi ex stercore margaritas Virgilius legere se dicebat, ita ex Aluæ inconditis, ne quid aliud dicam, sermonibus aliquod excerptimus commodum. Gloriatum passim se magnum ipse librorum heluonem, se Europæ bibliothecas ferè omnes rimatum, & manuscripta deprompsisse cudendis armis, quibus D. Thomam, eiusque discipulos, quasi quibusdam tormentis quatit, ad deditionem cogendos, & nisi victoris nos permitramus arbitrio, extrema quæque denun-
tiat esse experturos. Pluribus nos impetit manuscriptis, quæ apud se habere gloriatur magno pretio comparata, quorum proinde fides sit penes ipsum actorem, iudi-

cem, testem omnia denique. Quam verò fidem mereantur, quæ *ut quid certum*, venditat nec nobis comperta esse possunt, aut nota, nisi eius ore & testimonio; ipsemet docet nos luculento exemplo cuiusdam manuscripti, quo munitus, ita scribit, *Expositio supra salutationem Angelicam nullo modo est S. Thomæ, neque supra Orationem Dominicam, e- idem dico de Opusculis, de articulis fidei, de Ecclesia Sacramentis, atque super Symbolum. Hac enim quinque Opuscula sunt Innocentij Papa III. qui mortuus est antequam Angelicus Doctor nasceretur.*

Vnde verò tibi Petre, ius arrogas D. Thomæ abdican- di hæc Opuscula, omnium opinione, & editionibus innumeris operibus D. Thomæ accensita, & Innocentio III. vindicas, quorum tamen inter illius Sanctissimi Pontificis opera nullum extat vestigium, & aliunde stylus hoc ipsum inclamat? Iudicium hic Salomonis audiamus, omnibus reclamantibus, quod pronuntiauit Alua, *constat*, inquit, *ex quodam originali manuscripto apud D. Martinum Louanij, littera O num. 7* Quæcunque manuscripta illi originalia sunt, si eius affectui faueant, & studio detrahendi S. Doctori: leuissimæ, & futilissimæ coniecturæ sunt illi demonstrationes inuictæ, si inde incautis & ignaris illudere possit aut imponere. Et ne quis hominis laceßendi causâ à me gratis dictum suspicetur; exemplo & argumento sit totum huius iudicij momentum ex hoc manuscripto. Sic enim inde argutatur; ad eundem authorem pertinent septem, quæ vno codice, & volumine continentur Opuscula, cui illorum primum ascribitur: at primo loco, & voluminis limine extat interpretatio in septem Psalmos poenitentiales authore Innocentio III. cui ante Pontificatum Lotharij nomen inerat, ipsi codici interscriptum: cætera ergo, quæ consequuntur, Opuscula Innocentij Authoris sunt, & falsò D. Thomæ: scripta.

Plurimum debemus Patribus Belgis, qui hoc manuscriptum explorarunt, & plagium, quod inde moliebatur in nos Alua, in ipsius caput detorserunt, adedò manifesto argumento fraudis, ut meritò dicant, hinc dedolo, & malâ fide conuictum Aluam, nullam in postum mereri ea quæ narrat de libris à se visis, cum de hoc

Martiniano codice Lectoribus manifestè imposuerit. Certum quidem est, vno volumine septem Opuscula contineri, quorum primum, nempe Commentarius in septem Psalmos præferat Innocentij, seu Lotharij nomen, cætera nullum omninò designant authorem, nec vllâ ratione ad Innocentium possunt referri, nisi hâc leuissimâ coniecturâ quòd hi omnes Tractatus eodem codice inuoluantur, quo primus, qui sine dubio ad Innocentium pertineat: sed hanc diuinationem potius, quàm argumentationem vanam, & falsi conuincit penultimus in Orationem Dominicam Tractatus, qui S. Thomæ ipso limine nomen præfert his verbis, *Pater Thomas de Aquino, non Dominus, quia amari appetit, non timeri.*

Hinc colligere est, quo animo sit excipiendum, quod Alua scribit secundâ editione, *ego qui manuscripta exemplaria Madritense cum alijs, quæ in Belgio sunt, consuli, aliquam fidem præstare possum.* Poteras sine dubio, vti debebas, præstare sinceriorum, sed re ipsâ vbique nihil Græcâ, & punicâ meliorem præstitisti, vt demonstrat Pater Harney pag. 49. ex ipsomet loco de quo tibi credendum suades. Meministi tantum secundâ editione manuscripti Madritensis, illud sanè primâ non taciturus, si vidisses; cum etiam non visa, & falsa obtrudas, nec primam inter, & secundam editionem, quod intercessit, tempore Belgio discessisti. Quâ ergo ratione potuisti Madritense manuscriptum cum Belgicis conferre? Nullam ergo fidem potes exigere, cum eadem, qua te præstare posse gloriaris, collatione à te facta exemplarium suspicio sit vehementissima, ne quid aliud dicam, tibi non admodum religioni esse laxam veracitatem.

Sed hæc sunt leuiora; ad Martinianum codicem redeamus, cuius vnus fide, quod septem complectatur opuscula, quinque ex illis aufert D. Thomæ, hâc solâ coniectura futilissima, quòd consequantur ad primum ordine, cui Lotharii nomen inscribitur: sed cum eodem codice, quo propiora primo obuoluantur interpretatio in orationem Dominicam, quæ D. Thomæ eripi nequeat, cuius nomen præfert; viderit Aluâ, quo iure certum asserat, nihil ad D. Thomam, quæ antecedunt,

pertinere. Viderit etiam, quam fidem mereatur de iis, quæ eminus positæ sũt Bibliothecis, quas ait se explorasse, nec à nobis comprobari possint: cum de his manifestè apertè fraudis peragi reus. Ipse quidem folio 529. contestatur: *Cum qua de D. Thoma circumferuntur elogia, vel ipsi ascribuntur volumina, sine ullo fundamento excogitata sint, proteruia non esse, illa negare, aut in aliquo labefactare gloriam D. Thoma, sed religionis causam ostendere, dum omnibus unicuique quod suum est, iustitia zelus tribuit, euellendo è critica doctrina Catholica introducta lola.*

- At si illo, quod obtendis, religionis & iustitiæ summæ cuique seruandi ius studio teneraris, nonne tibi religioni esset, non modò futilissimis coniecturis (quod satis graue contra iustitiam peccatum fuerit) sed crassissimis etiam mendaciis certissimâ tot librorum possessione D. Thomam deicere, iudicio, quod, licet tot vitiis corruptum, audes Salomonis iudicium appellare? Dum excutis bibliothecas, si occurrat codex manuscriptus, aut typis editus, qui vel minimam dubitationem ingerat, quâ D. Thomæ gloriam obscurare possis, audissimè arripis. & tibi demonstrationis loco est, & omnibus iubes esse. Occultas verò, & si tibi liceret, flammis absumeres quidquid eius nomini fauet; & hæc tu zelum iustitiæ vocas? Negabis te ita affectum. Sed Pater Harney aperit id demonstrat, quàm vt tergiuersari possis. Cur tacuisti, quæ sine dubio Martinianæ bibliothecæ libros excutienti, & rimanti angulos occurrerunt litteræ E. num 7. quæstiones quodlibetales, & tota Summa, id est, quas ereptas volebas, secunda secundæ, tertia pars, ad cuius quæstionem 90. adduntur hæc verba, *explicit Tertia Pars Summa S. Thoma de Aquino, quam ipse morte præuentus incompletam reliquit, Deo aliquid melius de eo disponente: quam Petrus de Auernia Doctoris Sancti sequens vestigia ex quarto scripti eius super sententias consummauit. Deo laus.*

Quid Petre, vnquam iudicio, ne dicam Salomonis, sed hominis fragi, & Ethnici, es de D. Thoma constituturus, cum contendas non solam Tertiã Partem, sed neque etiam Supplementum illi additum quidquam

ad D. Thomam pertinere, & certissimum dicas, Henricum Gorrichem Benedictinum, aut Albertum à Brissà complevisse, cum verbatim sit extractum ex commentariis in 4. sentent. de quibus hactenus litem D. Thomæ non moueras? Quid simile vnquam Zoilus in Homerum tentauit, qui morositate, & detrahendi libidine minore tuâ Theologorum Principem laceffendi, inuidi & detractoris nomen atque æternum dedecus sibi comparauit? Cur similem poenam, & infamiam non times, qui videris prætergressus hominis in detrahendo licentiam?

Eadem morositate, & mala fide (qui tibi zelus iustitiæ est) eripis S. Doctori quæstiones Quodlibeticas, & esse alicuius sui discipuli fol. 734. ais *satis liquens*, ex quâdam authoritate *2* acriis Ioannis de Tabiena, in Summâ, verbo *Feria* num. 13. Vbi ne verbum quidem legitur de quæstionibus Quodlibeticis, sed antecedenti proximè num. 12. citantur, tanquam indubitatum D. Thomæ opus. Deum immortalem! Post euictas tot fraudes, præ pudore aut conscientie remorsu, si quid tibi horum bonorum super sit, planè emoriendum esset. Non es æquior erepto S. Doctori compendio Theologico, quod legitimum esse illius partum, præter S. Antonini testimonium euincit præfatio ad fratrem Reginaldum, quam Pater Ianssens testatur non desiderari in manuscripto Abbatie Parcenfis, quod nomen fratris Thomæ præfert in argumentum suæ antiquitatis indubitatum, quasi scriptum antequam S. Doctor Diuorum Cathalogò ascriberetur.

Eodem zelo iustitiæ non secundum scientiam negas commentaria in Machabæorum libros esse D. Thomæ opus legitimum, quamuis contra stet Ægidius Romanus D. Thomæ discipulus, qui in 4. sentent. distinct. 45. ita habet ex Sampaio: *sicut in expositione Machabæorum Reuerendus Præceptor noster Thomas tradidit*, nec Petrus negat; sed ait, leuem coniecturam esse hoc Ægidij testimonium: miror non damnasse falsationis & mendacij. De hoc plagij genere satis, quo peccauit Alua sine dubio plurima & grauissima, sed præ omnibus maximè, quòd cum vix potuerit iniquius de D. Thoma, eiusque operibus statuere, iudicij tamen Salomonis sibi æqui-

VINDICANTUR THOMISTÆ A PLAGIO: 237
tatem, & sapientiam arrogarit cum iustitiæ zelo. Vi-
dendum, an secundo Plagij genere verius, ac sincerius
agat.

PARAGRAPHVS TERTIVS.

*Vindicantur Thomistæ à secundo Plagij genere,
seu à falsatione librorum Dni Thomæ.*

PLAGII nomen & crimen à gemino sensu, iniuriæ
homini sui iuris in seruum vendito aut empto illatæ,
vel domino, cui vernæ & mancipia vi, fraude, aut
qualibet alia ratione inuito præter fas subripiuntur, ad
libros translatum, accommodatio perinde ac genuino
significatu multiplex est, & varia vitiorum genera com-
plectitur, flagro & pœnis seruorum digna, unde com-
mune Plagij nomen habent. Horum omnium Domini-
canos Alua accusat; & vbi S. Doctorem grauissimo no-
tarit, id est Furto librorum, quos suis Authoribus erep-
tos sibi per summam iniquitatem, & parem impu-
dentiam vindicasse contendebat, diffusus se tanti sceleris
virum sanctissimum etiam suspectum fecisse, potius
quam inmanitate aded execranda accusationis deter-
ritus, noui Plagij accersit discipulos, quasi Magistri, quos
tentauit, nec potuit eripere, librorum temeratores &
interpolatores, in vnius Conceptionis immaculatæ
odium; neque enim aliud diu noctu illius animo obuer-
satur. Si id ab vilo nostrum tentatum sit, non solum
Plagij, seu Flagri constitutas seruis pœnas, sed nec ro-
gum, & ignes, condignum impiis supplicium deprecamur.
Verum ipse viderit Petrus, quid commereatur, si
falsò infonses sit criminatus, nec, quæ obicit enormia,
euicerit.

Quâ verò ratione Dominicanos Plagij reos probas
ipsâ, inquis, confessione Dominicanorum, quos Pius V.
præfecit editioni operum D. Thomæ Romanæ, qui hæc
præstantur verbis, quæ velis auro exseribi, quasi huic
sceleri probando tuâ opinione efficacissima, *Cyprianus*
itaque (hi ex Alua temeratores & Plagiarij) ut quam
emendatissimè oratione, amatis etiam ex hisdem commentis

sariis, atque ex punctis omnibus locis iuxta nostri Ordinis sanctiones, qui post decreta Tridentina Synodis, lectorem poterant detinere dubium, aut suspensum: quos videlicet, vel ipsemet commentator (Caietanum hoc nomine significant) vivens emendauerat, & si viveret, emendasset: vel, uti diximus, falsariorum, & impiorum perfidia temerauerat. Ne cuiquam dubium superesset, aut vitiligandi ausa eriperetur Aluæ, hæc de Caietani commentariis, non de D. Thomæ textu scripta, adiunxerunt exemplum loci pessimè deprauati, & à se restituti ex commentario in articulum 4 quæst. 122. ex 2.2. Quamvis apertissimus sit horum Theologorum sensus, & videantur omnes Aluæ cauillos quasi prælagâ mente præclusisse; ipse tamen triumphat, quasi hac præfatione nihil super sit reliqui D. Thomæ suorum operum, quæ certò sibi possit vindicare, vel ex textu ab eius discipulis non temeratum.

Mirum est sanè Dominicanos tantum scelus nedum ausos tentare Romæ ipso Summo Pontifice spectante, sed etiam conscio ac iubente admisisse; & quæ sanctissimus Pius V. regiâ liberalitate ad augendam Sancti Doctoris reuerentiam & maiestatem curauerat edi opera, illis omnem abstulisse fidem, & authoritatem. Quis non malit Aluam morosiores, & litigiosum, ne impostorem dicam, credere, quàm adedè malè Summum Pontificem suo, & S. Doctoris honori consuluisse; & tam immane Plagium eius consensu & iussu molitos viros doctissimos, & Religiosissimos, teste toto orbe Christiano, & quorum correctioni præfecti fuerant, libros deprauasse corruptelis grauissimis, quarum tot testes contra se stare non dubitabant, quot D. Thomæ nedum editiones præcesserant, sed infinita manuscriptorum omnibus Christiani orbis bibliothecis seruabantur? Certe si ista impunè ferat Alua, nescio quid tandem falsarij crimen commereatur, aut sit daturum pœnarum. Viri Sapientissimi aliud nihil restantur relatis verbis, quàm quod re ipsa præstitere, & quæ omninò curant, qui editiones adornant quorumcumque librorum etiam factorum, ut quæ irrepsérunt menda, & errata prioribus editionibus, seu ex prælo, seu Correctorum negligentia, seu sciorum temeritate, quantâ fieri

potest diligentia virorum eruditorum, & collatione recentiorum exemplarium cum antiquis, emaculata fiat editio.

Si hæc vocet Petrus Plagium, & corruptelam librorum, vnde inferat nihil operum D. Thomæ superesse certi & genuini, nouerit, se eandem calumniam importare omnibus omninò libris sanctorum Patrum, & vtriusque Testamenti; quia certum est non alia ratione eorum editionibus allaboratum esse ab iis quibus à Regibus, Summis Pontificibus demandata est, & à viris doctissimis, & integerrimis suscepta est cura, non corrumpendis, sed emaculandis, & certæ fidei faciendis librorum editionibus. Quod verò Alua de Caietani commentariis verissimè dictum detorquet ad sensum & textum D. Thomæ; adeò manifesta est horum verborum deprauatio, vt si aliud nihil peccasset, omnibus suis Nodis hæc solâ interpretatione, posset sibi virilitigatori, & quodlibet aliud grauius nomen & crimen parare, cum ipsimet Theologi mentem suam explicarint, tum commentatoris nomine, quod in Caietanum cadit, non in D. Thomam horum librorum verum Authorem, tum exemplo correctionis commentarij in vnum ex 2. 2. articulum.

Explicatâ mente, & sinceritate generatim vindicata eorum qui editioni Romanæ operum D. Thomæ præfuerunt, cadunt acernatim falsationes nobis affictæ, & horum verborum falsæ interpretationi astructæ. Conqueritur grauissimè eâ editione sublatam ex lect. 6. in cap. 1. ad Gal. quæ decem editionibus post annum 1529. inserta erat exceptionem Deiparæ ab originali contagio, & eadem fraude erasam à commentario in illud Romanorum 5. *Omnes in Adam peccauerunt*, & ab Oputculo in Salutationem Angelicam; vnde inferit Petrus ab his tribus libris sublatâ exceptione potuisse simili sacrilegio in tertio sentent. dist. 3. & in quæst. 27. 1. partis hanc clausulam intrudi, nec antè, nec in ipsâ infusione factam Sanctificationem: quod tamen Bromiardus assertum ex hac 27. quæst. retulit.

Dum obscurandæ S. Doctoris gloriæ totis viribus ad-

laborat Petrus, omnes excutit bibliothecas, & editiones inquirat, mirum in modum illam auget. Si libris, & authoribus vix maius possit decus accedere, quàm ex editionum frequentia, plures commentariorum D. Thomæ in Paulum ab anno 1529. adornatae sunt, quàm Scoti à quatuor sæculis; & cum Aluam pessimè habeat, D. Thomam omnium manibus teri, vbique terrarum illi præla infundere: suos vero *Nodos*, aut *Solem Veritatis*, & *Naturæ portentum*, &c. nunquam, nisi suis expensis, typis data, aut danda esse: hinc ira, hinc lachrymæ. Sinceram, & accuratam editionem operum D. Thomæ molituri, hæc Patres noua exemplaria inter se, & cum antiquis, & vetustis MSS. contulerunt, & cum exceptio inserta esset editionibus nouis aliquot, quarum antiquissima esset anni 1529. & ab antiquis omnibus abesset, vti à MSS. quæ potuerunt explorare, hinc eradendam sibi persuasērunt. His conuellitur diuinatio potiùs, quàm coniectatio, aut veriùs calumniæ, iniectam negationem sanctificationis primo instanti commentariis in tertium sentent. & in quæst. 27. 3. partis. Idque primum à Spina tentatam editione quam moliebatur anni 1554.

Hæc omnia accuratè purgant pari diligentia Ianssens & Harney; hic vltimus addit elegantiam arguti styli, & planè Lipsiani, quem gentilitium, vel à naturâ, vel studio, & imitatione viri clarissimi sibi Belgæ effecerunt. Legendus omnino est à paginâ 51. ad 60. vsque, & obmissis cæteris, quæ perinde diserta sunt, ac fortia, mirè & æquissimè exagitat quintum Aluæ argumentum, quo Dominicanos falsarios probat ex Petro à Clausa valle Diatribâ 6. Cosmam Morelles quasi corruptorem D. Thomæ 1. sentent. dist. 44. his honorificis Epithetis compellente: *teneo te, falsarie effrontissimè adulterator, impudentissimè; sic D. Thomam dehonestas*, vt purissimam Virginem violes? Miratus Alua tot conuiciis pulsari Morelles inmeritum, quia editio Antuerpiensis ab Morelles curata integra est, & conformis antiquis originalibus, consuluit Petrum à Clausa valle amicum suum, sicut, inquit, *doctissimum ita integerrimum, vt sciret, quo fundamento hoc scripsisset: & respondisse se hoc non ex proprio capite dixisse, sed sic delatum comprobaturque iuridicè in Curia Romanâ.*

Sed quid id fieri potuit, si Morelles editio integra fuerit, & omnibus antiquis consentiens? Nisi velis (quod fortè Petrus à Clausâ-valle obliquè obtendebat traducendæ Curia Romanæ, & censuris suorum librorum vliciscendis) quæ perinde, Petrum à Clausâ-valle, ac Morelles inauditum & insontem damnasset: nec fraus illa in Curiam Romanam occulta, & aperta in Morelles calumnia deterrere potuit Petrum Aluam, quin ipsammet calumniam arriperet in quintum, & postremum, id est omnium validissimum argumentorum, quo Dominicanos reos faceret falsationum: nec, compertâ hac Petri à Clausâ-valle sycophantiâ, dubitauit *integerrimum, vti doctissimum*, de bonâ fide, ac sinceritate in superlatiuo collaudare, aded, inquit Harney, *nihil sinceri nihil integri est à similibus expectandum*. Contra calumniam etiam in Spinam importatam, quasi primus omnium falsarit Articulum 3. dist. 3. ex 3. sentent. ablatâ exceptione, Patres Belgæ referunt manuscriptum ex Abbatîâ Paracensi anni post S. Doctoris obitum octauî, id est 1282, ita habere ex distinct. 3. art. 3. 2. l. quæst 2. *Sanctificatio B. Virginis, non potuit esse decenter ante infusionem animæ: quia gratia nondum capax erat. Sed nec etiam in ipso instanti infusionis, ut scilicet per gratiam tunc sibi infusam conseruaretur, ne culpam originalem incurreret, &c.*

Huius manuscripti vetustissimi fides, quam sine dubio explorauit Alua, firmata manu publica Notarij, omnes Aluæ cauillos conuellit; sic enim argutatur, si exceptio sublata fuit à tribus D. Thomæ locis contra decem editionum testimonium; quidni potuerunt eâdem manu, & fraude irrepere in 3. sententiarum hæc verba: *sanctificatio non potuit esse decenter ante infusionem animæ*? Sed vt primùm ad assumptum, seu antecedens respondeamus, cur taces, aut dissimulas, Petre, antiquiores editiones, & manuscripta omnia illam habere? Quamuis Patavinum nescio quod & Sfortianum aliud dissentire ab aliis obmurmures; quid enim duo incerta, id est tuo tantum testimonio nota, ad tot & tanta compertissima, & multis bibliothecis seruata? Adde editionem, in quâ primùm legitur hæc exceptio, adornatam fuisse anno 1529. quam secutæ falsatam aliquot posteriores non pos-

sunt inualescere contra cæteras tum antiquiores, tum recentiores, ad minus numero pares, & autoritate, ac iure potiores, cum ratione antiquitatis, tum consensu cum manuscriptis.

Quod ad suspicionem Aluæ pertinet; interpolari potuisse locum tertij sentent. eadem audacia, quâ temerata fuere alia Diui Thomæ loca, præter quoddam futile astringitur fundamento, & iam euerso; conuellitur testimonio manuscripti Parcensis, quod in tuto ponit plures huius commentitiæ interpolationis accusatos. Illam Syluester de Saavedra referebat in Thomam Nerium; sed cum huius editionem præcessisset altera antiquior curata à Bartholomæo Spinâ anno 1534. quæ nihil dissentiebat à Neriana, visum est Aluæ huius corruptelæ inuidiam à Nerio in Spinam deriuare: & cum nec stare posset hæc calumnia, quoddam Turrecremata hunc ex 3. sentent. locum retulisset opere edito anno 1437. eodẽ tenore verborum, quo in posterioribus operâ Nerij, & Spinæ editis commentariis legebatur. Hinc à Spinâ in Turrecrematam inuehitur, quasi primum interpolatorem. Sed Turrecrematam ab hac calumniâ vindicat Capreolus, qui suis in 4. sentent. commentariis locum refert omnino consentientem posterioribus editionibus, & citationi Turrecrematæ, quem accusare debuerat Alua Capreolum, quasi primum huius falsationis authorem cum præiuerit Turrecrematæ. Nec sanè huius criminationis futurus est finis, dum retrocesserit ad D. Thomam ipsius libri primum Scriptorem cum manuscripta Turrecrematæ, & Capreoli libris antiquiora, & ut annotaui, octauo ab obitu Sancti Doctoris anno exarata habeant verba, quæ fraude inserta à nostris Alua calumniatur.

Si alia non suppeterent malæ fidei Aluæ argumenta, præter hoc postremum calumniæ corrupti sententiarum loci primum in Thomam Nerium, deinde in Spinam, tandem in Turrecrematam congestæ, quam Capreoli commentarij, & S. Doctoris plura Manuscripta refellunt; indignus planè habendus est hic scriptor, qui de Dominicanis obloquens audiatur. E pluribus accusatorum capitibus, si vel centesimum apertæ fraudis euincatur, cætera hoc vno; planè labefactantur; quid de accusatore nostro statues cum ex mille obiectis criminibus

VINDICATVR D. TH. A POSTREMA CALVMN. 247
nullum hæcenus verisimili aliquâ ratione, ne dicam probare, sed ne fucare quidem potuerit; & aliunde innumera, quæ impropere, compertissime falsa esse demonstrauerimus?

PARAGRAPHVS VLTIMVS.

*Tertia criminatio Aluæ depulsa, & totius
Sectionis conclusio.*

HOc differt maximè accusatio in flagitiosos, boni publici causâ, & iustitiæ zelo suscepta, ab eâ, quam ex liuore, vindictæ cupiditate, aliisque turbidis affectibus in insontes moluntur mali; vt erendo vires acquirit, & graua crimina grauioribus cumulet: altera verò progreßu minuatur, & tandem euanescat, aut in caput authoris redundet. Hunc habuit exitum magno boatu, & hiatu suscepta in D. Thomam, eiusque scholam criminatio Aluæ. Contendebat primùm omnes D. Thomæ libros supposititios, & aliis fraude abreptos; sed æstu, & impetu primæ accusationis remisso, secundâ quatuor aut quinque ex illis selecta sunt loca, quæ corruptelæ vel comperta, vel certè suspecta esse volebat. Sed cum ne id quidem à se confectum nisi apertâ fraude sentiret; tota accusationis moles in hanc tandem suspicionem recidit; multa ex libris D. Thomæ legi retractanda, quæ, si viueret, ipsemet corrigeret. Postrema accusationum minima, cum maximam esse oporteret ex criminationum, seu calumniarum lege, cæteras refellit, monstratque nihil in D. Thomæ scriptis potuisse acerrimum Aduersarium bono animo, aut etiâ vllâ veri specie carpere.

Illud satis mirari non possum; cum omnium nostrum sit mos, aut morbus, vt alios nostro modulo metiamur, & pro suo quisque affectu de singulis statuat: Aluam sibi persuadere, D. Thomam, si licuisset per tempus, emendaturum multa, quæ scripsit; cum ipse, ne dicam dubia, & incerta, sed ne quidem falsi apertè conuicta propè infinita, quæ priori editione (sciens, an imprudens, nolim iudicare) effutierat; alterâ editione noluerit, aut

forte non potuerit præ nimia in præiudicatis opinionibus pertinaciâ reuocare : quamuis ad hoc insuperabilia vrgerent rationum momenta : & nunc omnium retractationum ipse impatiens , pronum ad retractationem futurum , aut esse oportere D. Thomam , sin qua Dominicanum quoddam illius instituti velit omnes deplorata salutis ex pertinaciâ in malo , saltem qua Sanctum , inclamat . Optimum sine dubio bonæ & sanæ mentis est argumentum , nedum resipiscentia à peccato , & errati ingenue confessio & emendatio , sed multò certius , ad meliora & certiora contentio , relictis minùs bonis , aut minùs certis , quibus adhærebat : in D. Thoma hoc etiam postremum admirari licet , sed in Petro vtrumque desideramus hominis frugi operæ pretium .

Equidem S. Doctor , graues & crassos errores , quales Petro innumeros obreplisse demonstratum est , retractare non potuit , cum nullos illius generis vnquam incurrit : sed si quando veritas illi clariùs , aut , quid melius eluxit , quæ priùs scripserat , posterioribus curis emendauit . Atque huius modestiæ singularis plura extant exempla , etiam de rebus minimis , quæ suâ vtrunque probabilitate non carerent ; atque ita quam secutus fuerat in 1. dist. 11. art. 4. opinionem : duos spiratores , perinde ac duos spirantes , Patrem & filium dici , & constituere , retractauit primâ parte quæst. 16. art. 4. ad 7. *Sed melius* , inquit , *dicendum videtur , quod sint duo spirantes , non duo spiratores* . Eadem modestiâ in 4. distinct. 5. quæst. 1. art. 3. assensus Magistro Sententiarum admittenti creaturam vt instrumentum ad creationem , primâ parte quæst. 45. art. 5. in aduersam sententiam discessit .

Hoc etiam exemplum præbet Theologiæ tertiâ parte quæst. 9. art. 4. correctâ , quam in 3. distinct. 14. art. 3. docuerat , opinione : Christum nullam sibi propriis actibus scientiam comparasse : eiusdem partis quæst. 70. Item corrigit , quod de Circumcisione in 4. distinct. 1. quæst. 2. art. 4. scripserat : gratiam Circumcisione collatam nihil iuuisse contra concupiscentiæ motus , *sed diligenter consideranti* , inquit , *apparet hoc non esse verum* . Item in 3. dist. 34. quæst. 1. art. 2. & 1. 2. quæst. 68. art. 4. hoc inter dona Spiritus Sancti constituerat discrimen , vt intellexit .

ctus, & sapientia speculatiuam rationem, consilium verò, & scientia practicam partem perficerent. *Sed diligenter intuenti* (inquit 2. 2. quæst. 8. art. 6.) *donum intellectus non solum se habet circa speculanda, sed etiam circa operanda.* Ex hoc vltimo retractationis exemplo elegans eruit argumentum Pater Harney paginâ 19. quo euincit Bellouacensem excepisse à D. Thoma secundam Theologiae partem, quia refert quod habet D. Thomas loco citato ex 1. 2. lib. 1. parte 4. distinct. 1. ad 4 & deinde eadem parte distinct. 6. ad 3. retractationem ex 2. 2. inserit, quod potuit contingere Vincentio exceptoris & collectoris tantum munus obeunti, D. Thomæ nunquam, quia cum Authorem ageret, vno loco non posuisset, quod altero videbat eruditionem.

His exemplis præter eruditionem non contemnendam, agnoscere licet tum modestiam D. Thomæ, quem tantum abest, vt pudeat, quin gloriatur etiam à se dicta reuocare, tum seueram in sua scripta censuram, ac præ nimium rigorem, cum probabilia, quæ excusari possent, castiget, nec velit audienda esse minus probabilia, cum primùm probabiliora illuxerint. Atque hinc refellere licet audaciam Petri in lacescendo S. Doctore, & in suis malis pertinaciam. Conueniebat certè magis imitari, quàm insectari D. Thomam. Ille verisimilia, nec falsi comperta è suis libris volebat deleta, cum probabiliora innotescebant. Petrus verò nequidem errores, quos nisi cæcus, & vecors excusare nequeat, etiam monitus, etiam correctus nec vult, nec præ nimiam contumaciâ potest abicere, multo minus autem scripto reuocare. At si D. Thomas in suos libros adeo sollicitè inquisuit, & deletum omninò voluit, quidquid minus probabile secundis cogitationibus censebat, quis credat, vel ausit scribere, nisi Petrus Alua, & à Clausâ. valle, reliquisse errata, quæ neglexerit corrigere, ad quæ cæcutierit, & quæ emendaturus, si licuisset, erat? Emendauit leuissima; quæ fieri potest, vt grauiora prætermiserit? Id mihi certissimè persuasum est, nunquam id facturum vllis vtriusque Petri argumentis: leuiora enim sunt, quàm vt illa tantus Doctor moraretur.

Atque hæc est tandem meta longissimæ sectionis, in quam plura videmur coniecisse, quàm breuitas & con.

ueniens differendi ratio patiatur. Excusare possem prolixitatem hanc, & à scopo exerrationem æmulorum importunitate, qui cum in accusando S. Doctore nec finem faciant, nec modum habeant, terram denique cœlo, & infinita generâ diuersissima misceant: hi suum mihi vitium affricuerunt. Quamuis hætenus dicta non sint omninò aliena ab huius sectionis scopo de fide & reuerentiâ in Deiparam: nam cum Alua (quod vnum contendit tot libris) vtramque à nobis criminetur grauissimè lafam, vindicatione opus fuit, quæ à sectionis huius fine non recedebat. Sed vtinam hoc vno, aut certè præcipuo nimix prolixitatis argueret, longè grauioris criminis me reum puto. Quodnam verò id est? Retulisse quæ vterque Petrus horrenda, & immaniter falsa in D. Thomam scripserunt. Neque enim non potest non vergere in maximum Ecclesiæ & Religionis dedecus, hæc ad eò enormia à Religiosis & Theologis in Diuos scripta: vt penè me puderet referre etiam necessariò refutanda. Sed quid facies istis hominibus, qui nec laboribus, nec expensis parcant, edendis, spargendis his calumniis, quas videaris maiori scandalo agnoscere, nisi refellas?

Hic ad finem duo addam: memini me Capreolum nescio quo ex quæstionibus in primum sentent. loco legere, soluto quodam argumento Aureoli, quo ad grande aliquod impium, & absurdum ex falsâ interpretatione nostræ sententiæ rem deduxerat, hæc modestè adiunxisse Capreolum: ex nostrâ responsione patet hanc obiectionem Aureoli profectam esse ex *peruerso intellectu, quidquid sit de affectu*. Hoc dictum volo, atque eâ moderatione accipi, quidquid hætenus vel in posterum Aluæ responsum fuerit, de affectu nolim iudicare, de intellectu ne Capreoli verbis utar, iurare, quæ profert, non esse digna titulo quem sibi vindicat, *certum quid, iudicium Salomonis*, & apud me ita à vero, à sensu communi & à regula hominis frugi aliena esse, vt credam Ecclesiam & Religionem, sed ipsammet rationem, & naturam graue inde damnum, & dedecus pati; meumque laborem ipsâ necessitate iustæ defensionis excusari non posse, quin apud Deum me grauissimi sceleris reum peragendum crederem, nisi ex animo vouerem, vt hu-

ius mei libri post decennium nullum omnino superstit vestigium; ne posterì vnquam doceantur Theologum, & Religiosum piæ causæ, aut alicuius boni prætextu tot mala ausum scribere, & cudere; vt videri possit omnem fidem & pudorem, omnem veri, & honesti curam euersasse.

Atque in hanc rem mihi maximè placent, quæ ante me vsurpauit Pater Harney verba: *Nolite annuntiare in Geth, neque annuntiatis in compitis Ascalonis, ne forte læsentur filia Philisthim, nec exultent filia Incircumcisorum.* Quid enim dicturos puras hæreticos, & impios, cum ista legerint ab Alua conficta, & obiecta nobis, quæ æquo & forti animo ferremus, vel aspernaremur semel, aut iterum dicta; sed cum superioribus sæculis cusa, & milies reposita, nostro Porza instaurarit; à cuius imitatione, nec censuræ Romanæ grauissimæ in illum latæ, nec responsa Grauinæ, aliorumque Scriptorum doctissima detertere potuerint Petrum à Clausâ valle, quin eadem, & noua, atque iniquiora protulerit, nec huius pœnæ à foro sacro, & sæculari indictæ Petrum Aluam moderationem effecerint, quin portentosa in nos congerat, & iteratis editionibus euulget, & spargat; si his calumniis referendis, aut refellendis desiquimus, quod præ atrocitate calumniarum non negamus: culpam eluet aut eleuabit Apostoli verbum, & exemplum, *Insipiens factus sum, vos me coëgistis.*

SECTIO TERTIA.

Fides, obseruantia, & Pietas Dominicanorum in sedem Apostolicam vindicantur à calumniis secundæ Diatribæ.

PRIMIS secundæ huius Diatribæ verbis, magno hiatus in Dominicanos latrat Petrus, & vsorum more, quos gentilitios ac penè collactaneos in syluis & montibus Sabaudix habuit, præsentem videtur mortem, aut

quid peius morte, hæresim scilicet, vel saltem hæresim proximum errorem, nobis minari, & intentare. Sed bene est, quod suæ infirmitatis, vel nostræ innocentiae conscius mansuescat, & post obiectam hæresis accusationem, quam se posse ne dicam conficere, sed ne quidem prosequi diffidit, asserat, Dominicanos minus grato & reuerenti animo in Summos Pontifices fuisse. Gratulor nostro Theophilo, & gratias habeo, quod nonnullam bonæ mentis & resipiscentiæ spem præbeat, & aliquam palinodiæ speciem canat. Ab hæresis nota absolutis aliquam ingrati animi labem aspergit. Galliarum annales referunt summum maris Præfectum exclusum gratia, qua apud Franciscum primum maxima & diuturna valuerat, Regi, conscientia seruatz fidei, liberius respondisse; se hunc casum nec meruisse, nec timere, si in suam vitam inquiratur. Hac fiducia & animi constantia offensus Princeps, permisit illum iudicio Cancellarij, qui post exactam inquisitionem, cum nihil morte vel pœna dignum inuenisset, ne videretur omnino absolute contra Principis sensum aut voluntatem, sententiam in illum tulit, non tanquam rebellionis aut proditionis reum, sed quasi beneficiorum regionum immemorem. Hæc damnatio fuit rei defensio, omnium sapientum sensu, qui nouerant in ingratos hæc iudicia non exerceri. Theophilus ius vitæ & mortis in Dominicanos, & supremam iudicis aut Cancellarij Ecclesiæ auctoritatem sibi arrogat, & odio actus, inuidiæ oculis in illos inquit: sed quamuis his affectibus caliget & excutiat, adeo tamen aperta veritas & accusatorum innocentia in illos incurrit, vt coactus sit mutare, aut mitigare sententiam, & ad mortem damnatis tantum ingrati animi notam inurere: illam tamen facillimè mox diluemus.

ARTICVLVS PRIMVS.

*Summa Diatribæ, consilium Authoris, & brevis
refutatio ipsius.*

SED id primum moneo, non tam nostram quam Pontificum causam agi, in quos Petrus (an sciens

& prudens nolim iudicare) certe per summam cecitatem, aut temeritatem, huius accusationis inuidiam deriuat. Si vera sunt quæ de nobis narrat Petrus, profecto vecordes, rerum suarum & totius Ecclesiæ ignari, & negligentissimi fuerunt; quod Dominicanos nedum beneficiorum obliuiosos, sed infidos, proditores, ineptos, & ridiculos, non minus quam improbos, ad grauissima quæque negotia adhibuerint, vt præter officia statuta Inquisitorum, &c. creauerint ex illis 50. Cardinales, plusquam 600. Archiepiscopos, Episcoporum vero (vt quidam scriptor Franciscanus ait) vix numerus iniri possit; & præter ista officia Ordini, aut singularibus perpetuum addicta, legationes honorificentissimas, & difficillimas ad Reges, aduersus hæreticos & Turcas obire iusserint Dominicanos. Prodigij omnium maximi fuerit, tot Pontifices sapientia, sanctitate illustrissimos, non potuisse per 500 annos respicere, consulere sedis Apostolicæ dignitati, reiectis Dominicanis, muneribus indignissimis, quibus præficiuntur, & in Summos Pontifices sacrilegis. Sanè si vera sint, quæ obliicit Petrus, nulla maior fuit vnquam cecitas tot Pontificum, qui adeo præpostero affectu, & iudicio immeritos Dominicanos fouerunt, & promouerunt; sin vero falsa narret, nulla eius calumniæ, par esse potest.

PARAGRAPHVS PRIMVS:

Aperitur consilium Petri & euertitur.

Cyriaci inquit, priores in donis, maiores in imperio, præcipui sunt administri Pontificum in plerisque tribunalibus, non absque pingui annuo censu, & spe insularum aut purpura, insignibus prærogatiuis exornati, supra omnes religiosos; ac etiam supra clericos. Quare videtur esse extra dubium, quod Cyriaci debuerint stare semper præ sede Apostolica. Eâdem Diatribâ parum abest, quin infallibilitatem, quam vbique probat, abstulerit à Ioanne XXII. quod nimio in Dominicanos affectu Ochatum impulerit in ruinam, & multa Ecclesiæ mala crearit. Horum tamen beneficiorum videntur Dominicani obliu-

longè à reuerentia, & obsequio in sedem Apostolicam recessisse: Imò illi etiam conuulsæ inuidiam, iniquâ librorum censurâ, vel inquisitione crudeliùs exercita, vel inuentis fabulis, qualis est illa, inquit, Martini Poloni de Ioanna Papissâ: vnde ad finem diatribæ concludit (quod totius libri vnicus scopus est,) *malos male perdendos esse*, & quæcunque per quadringentos, & amplius annos, quasi hæreditario iure à Patre nostro excepimus, & seruauimus officia; qualia sunt Magisterij sacri Palatij, inquisitionis in hæreticos; aut in libros malæ, vel suspectæ doctrinæ, ad alios transferenda esse, qui *ferant fructum temporibus suis*.

Verum adeo aperta est, mi Theophile, tuæ sententiæ iniquitas, vt nullum, ne quidem te ipsum iudicem recusemus, dummodo per affectus, qui continuo perstre-punt tuis auribus, liceat nos audire. Religio Dominicana sic à Parente suo est instituta, vt is ipse qui fundamenta iecit, penè absoluerit, & patrimonium reliquerit amplissimum, quod filij seruauerunt tantum, non auxerunt: Quid enim habemus, quod Parens noster in suum Ordinem non induxerit, si vnâ excipiamus Angelici Præceptoris doctrinam? Quare vt omnia paucis complectamur etiam illis donis quibus ægre fert Theophilus, nos aliis anteponi, Dominicana familia à suo Authore instituta, & à Thoma ornata, videtur aliquam Paradisi terrestri imaginem præferre: Nam vt ille locus deliciarum vno fonte rigabatur in quatuor fluuios copiosissimos diuiso, sic planè Prædicatorum Ordo, capite, & institutione vnus, partibus quadruplex, Rosario, Magisterio sacri Palatij, inquisitionis officio, & sanctissimi Thomæ doctrina, veluti quatuor fluuiis, totum ambit, & irrigat orbem Christianum, & qua potest, fecundat. De singulis dicere nihil attinet, certum est, quod de Rosario sapientissimus & piissimus dixit Doctor Martinus Nauarrus, *patrimonium esse Ordinis Dominici*, idem nomen reliquis partibus conuenire. His ergo veluti quatuor elementis coalescit Religio Dominicana, atque his ad Paradisi similitudinem accedit. Longius me comparatio hæc abriperet, nisi in materia copiosissima mihi temperarem.

Sed istis obiter notatis, ad nostra veniamus. Qua de causa, mi Theophile, hæc Diatriba, & reliquis omnibus,

ira impotenter in Ordinem Dominicanum inueheris ? Quare ad finem tui operis concludis , auferenda nobis, quæ apud Summos Pontifices officia obtinemus ? Nec dubium est (id enim satis apertè præ te fers) quin , si per te staret, Religio nostra humiliatorum loco esset. Verum compeſce paululum iram, & odium, quo in nos flagras, & illos affectus semoue, qui te ita excœcant, ut æquitatem inspicere nequeas. Itane indignè fers, tuum *pro pefte de martyrio* librum improbatum, ut in illius poenam delicti, cuius immunes sumus, velis nos expelli à patrimonio, laboribus, & meritis in Ecclesiam à Parente nostro, & ab eius filiis comparato ? Demonstra mihi, si possis, nedum in Ecclesia, sed etiam in toto orbe possessionem ab ullâ familiâ iustius initam, aut diutius, vel moderatius, sine vllò detrimento, vel augmento seruata ? Tardius, mi Theophile, è Sabaudia montibus delapsus es, ut ius illud antiquissimum possis conuellere. Inspice originem, attende perennitatem.

Dubitas ne Dominicum suis in Ecclesiam meritis sibi, & filiis hæc officia comparasse ? Dicesne ad illa artibus nuperis, eius sæculo ignotis, corruptela, & ambitione obrepſisse ? Vel immoderata Summorum Pontificum gratiâ euectum fuisse ? Neutrum sanè potes asserere, quin diris deuouere, ut sacrilegus, aut ut insanus omnium cachinnis excipiari. In vna familia tot sæculis hæc ministeria seruata, cur ad alios peruenient ? At, inquis, læserunt Dominicani reuerentiam sedi Apostolicæ debitam, non fuerunt grati in eos, qui se tot beneficiis deuinxerunt ; fateor, mi Pater, te nos eadem prorsus ratione tibi demeruisse, qua sibi Herodes, quos trucidauit, infantes astrinxit ; plus odio profuisti nobis, quam posses vnquam obsequio. Sapienter ille, qui ad emendationem, vel ad gloriam, aut optimum amicum, aut acrem, & pessimum inimicum requirebat ; ita Dominicani Ordinis hostem insensum te toto tuo opere profiteris ; ut illius, & meo nomine tibi gratias immortales agam, quòd cum totis viribus conatus sis non solum nos innumbrare, sed etiam si licuisset, ab Ecclesia delere, verè tua opera inclarescimus. Profer mihi, si possis, è toto orbe familiam, quæ quadringentis & amplius annis Regiæ, aut Pontificiæ dignitati inferuierit, & quæ leuius, aua

rarius peccarit, quam nostra, etiam si admitteremus vera esse, quæcunque in illam collegisti: quamvis omnia, vel futilia sint, vel fallata, id est te collectore, & te auctore digna.

PARAGRAPHVS SECVNDVS.

Summa calumniarum quibus generatim respondetur.

AT QVÆVT propius ad rem accedamus, Dominicani in his officiis, quæ te præliuore rodunt, duo sibi obseruanda maximè statuerunt, ne scilicet à Patris exemplo, & à Summi Pontificis fide, atque obseruantia recederent; & hoc egregiè præstiterunt, quod ex te ipso probò; quamvis enim corrogaris vndequaue quidquid in nos fingi potest, quid tandem affers, quod hanc receptissimam de Dominicanorum in sedem Apostolicam obseruantia opinionem, vel minimè lædat.

Pro magno scelere reputas, Sotum montem pietatis improbasse, & aliqua labe, aut suspitione vsuræ aspersisse, licet Leo X. in Concilio Lateranensi confirmarit, Nec minus tibi videtur graue, quod idem Soto, & Canonicum aliquot è Thomistis negent absoluendum moribundum, qui nullum doloris signum editit licet edidisse testentur alij Tertio Pater Combesius, & Riccardus ausi sunt castigare Martyrologium Romanum à Baronio correctum, & à Gregorio XIII. approbatum. Quarto Thomistæ asserunt, nec Conceptionem immaculatam, nec quicquam aliud contra D. Thom. definiri posse: cum tamen de voto solemni, & de irregularitate ex homicidio, secus quam sentiat, sit à Gregorio XIII. & à Bonifacio VIII. sancitum. Quinto Canus in confirmandis Religionum Ordinibus negat Summis Pontificibus infallibilitatem, & in illis desiderat prudentiam.

Sexto cum pertineat ad honorem Summorum Pontificum, etiam ut priuatos homines immunes esse ab omni hæresi, Combesius, & Canus illos multis implicant erroribus: ac proinde, si cuiquam Pontificum ut priuato, aliquis per ignorantiam error obrepserit, idem accide-

re cuique potest. Tandem Dominicani inique agunt, & personam potius, quam meritum causæ inspiciunt, quia vni homini Germano gravissimam litem moverunt, quod thesi publica negarit de fide habendum, vt Christi vicarium hunc, qui sedes singularem Pontificem, quam opinionem Turrecremata, alii que Dominicani plures, editis libris docuerunt.

Hæc sunt veluti capita septem Hidræ, quam Theophilus nobis obicit, & quam debellandam suscipio. Fateor primo, nos plurimum debere diligentia, & odio huius hominis, quod è tot scriptoribus nostris, in quos acriter inquisit, qui per quadringentos annos suas lucubrationes ediderunt, & nullam sacræ doctrinæ, quæ latissime patet, reliquere partem intactam, è plurimis paucissimos in re nullius momenti, quæ omnia, præter ipsius sensum ad fidem non pertinent, proferre potuerit. Respondeo secundo, nisi sola defensione contentus, ex postulandi, vel accusationem reponendi facultatem mihi abstulisset, duplo, & decies plura possem è Societatis Scriptoribus repræsentare, qui longè magis aliena ab obsequio Summi Pontificis, & à communi pietatis sensu docuerunt. His addo Dominicanorum plures, quos traduxit, hoc solum nomine peccasse, quod prophetiæ dono caruerint, nec potuerint scire, quæ futuri Pontifices decreta essent edituri, longè eorum scriptis posteriora, quæ ad ius positivum pertinent, & ad arbitrium Pontificum quotidie nihil mutari vetat, interdum etiam ratio, & utilitas Ecclesiæ requirit. Dico tandem nihil eorum quæ assert, ad dogmata credenda spectare, quæ certis fide regulis constituentur, sed ea, in quibus ordinandis ipsimet Pontifices solis probabilibus ducuntur, & aliis liberum probabilitatis usum, & iudicium permittunt: imo boni, & æqui consulunt, Theologos aliquando à se dissentire. Verum Theophilus hæc omnia confundit, aut per summam ignorantiam aut malignè, vt imponat, & illudat incauris, & calumniis, quas nostris hominibus instruit, aliquam mali speciem affingat. Sed dum ipse omnia, quæ Pontificis nomen præferunt, vult nos habere nullo discrimine quasi regulas, & fundamenta fidei, ipsam fidem, & auctoritatem Pontificiam fundi,

tus euerit. Itaque, ut quas ille tenebras offundit, dispellamus.

Id diligentissimè notatum velim, Religionem à Christo institutam his tribus partibus, nempe Legibus diuinis, Sacramentis, & Dogmatibus constare; Leges agenda præcipiunt, dogmata, quæ sunt credenda, continent, Sacramenta vires præbent, quibus mysteria credamus, & præscriptas leges impleamus. Præ multis dotibus, hæc est eximia singularum partium, quod omnes sint origine diuinæ: Nec vllum Angelorum aut hominum, sed Christum vnice authorem habeant; ipse vnigenitus Patris, quæ ex sinu ipsius hauserat, mysteria nos docuit; ipse Leges diuinas sancit, & Sacramenta instituit. Quid iuris, quid potestatis dedit in has Religionis partes Petro, & Summis Pontificibus, qui auctoritatem Apostolicam sortiti sunt? Dum vis, Theophile, Dominicanos conuincere, contemptæ potestatis Pontificiæ, nisi calumniatorem agas, hæc, quas recensuimus partes Christianismi, erant tibi diligenter expendendæ, & monstrandum quid in quamque possent. Verùm illi nunquam id sibi assumpserunt, ut Sacramenta condere, Leges diuinas statuere, aut mutare, vel noua dogmata facere putarent se posse, aut vellent. Quid igitur sibi à Christo datum agnoscunt? Quod omnes pij farentur, nempe summum Pontificem posse instituere Sacramentalia, non Sacramenta, interpretari legem diuinam, non sancire, posse scribere Canones, non libros Canonicos, nec dogmata condere, quæ noua reuelatione egeant, sed ea deducere, & declarare, quæ verbo Dei, aut scripto, aut traditione excepta, implicite, aut virtualiter continentur. Has sibi metas præscriptas nouerunt, & præ se tulerunt Concilia œcumenica, & Summi Pontifices.

Hæc sunt Religionis Christianæ elementa. Si illa ignores, Theophile, non es dignus ne dicam Theologi, sed nequidem Christiani nomine: si noris, & dissimules, aut confundas, inique agis. Quidnam illorum, quæ confusissimè proponis ad fidem pertinet? An omnia certa? An omnia probabilia? Aut partim hoc, partim alterum putas? Tu, ut nobis inuidiam pares videris omnia fide certa statuere, hoc solo, quod Pontificis nomen

REVERENTIA DOMINICA IN SED. APOSTOLI. 249
præferant, etiam in Rituali, Sed qui ita temere omnibus
fidem astringit, omnibus abrogat, & qui ubique vult ha-
bere, nullam habet. Possem iure meo à te exigere, vt
antequam ad hæc capita responderem aperires nobis,
quo loco singula reponeres. Sed hoc à te frustra expete-
rem. Quia reuera melius Luciani Dialogos, & Satyras
scribere nostis quam, ne dicam D. Thomæ, quem nullo
loco habes, sed neque Augustini, neque Ecclesiæ Theo-
logiam. Certè, Theophile, tacuisses ex iis plurima,
quibus librum tuum inferfisti, nisi hæc solidissima prin-
cipia, quæ in tuto ponunt, quos gratis laceassis, te latuiss-
sent.

ARTICVLVS SECVNDVS.

Cultus Dominicanorum in Sedem Apostolicam sincerus & perpetuus.

NON miror, Petre, te adeo infensum Dominica-
nis: Causa est in promptu; nempe summa mo-
rum dissensio. Illi æquitati student; tu nihil, nisi gratiæ
& odii causa agis; ideo ipsi maiores suos, & Summos
Pontifices colunt obsequiis legitimis & sinceris, quæ
longissime absunt (vt monebat ethnicorum prudentissi-
mus) à deformi obsequio, & à prærupta audacia: tibi
vero cum ignota ubique sit, media illa sedes virtuti
propria, iis duobus vitiis te laborare argumento sit Pa-
ter Nicolaus Riccardi, quem singulis tui libri paginis
mordes & dilaceras, quem alio à sapientum sensu
Monstrum, harpiam &c. eiusque verba baubatus
vocas: is ille est, quem Magistrum sacri Palatii, adhuc
superstitem, dum Romæ degebas (vt à fide dignis ac-
cepi;) præ metu, & fictâ reuerentiâ, demissis in terram
oculis, vix audebas adire.

PARAGRAPHVS PRIMVS.

Exempla obsequij Dominicanorum.

Non sic Dominicani, non sic, quos suus pater exemplo, & institutione supra omnem spem, & meritum posuit, quos docuit vno Deo contentos, *vnâ gloriâ*, nempe *testimonia conscientia frui*; quos Sedi Apostolicæ, à qua tot beneficia, & ornamenta receperat, æternum addixit, hoc quasi voto, vt nullum ipsius causâ detrectarent, periculum & obseruantiam exhiberent, qualem infra Deum summa dignitas exigebat, *rationabilem*, legitimam, sinceram, quæ non minùs ab assentatione, quàm à temeritate abesser.

Hoc non solum Familiæ nostræ, sed Ecclesiæ Annales singulis sæculis prædicant: neque vllum tempus potest Petrus designare, quo huiusmodi officiorum exempla apud celebres autores desiderentur. Omissis propemodum infinitis, quis vnquam atrocius & periculosius Ecclesiam insectatus est Federico II. & Ludouico Bauaro? Vnde nam grauius malum Pontificis authoritati impendit, quàm à Concilio Basileensi, quod supremam sibi potestatem in Ecclesiæ Caput arrogauit? At his omnibus fluctibus, qui naufragium, naui Petri minabantur, se se intrepide obiecerunt Dominicani, vt ab Ecclesia depulsi in proprium caput redundarent; & pro summa gloria duxerunt perire incolumi sede, naui, & authoritate Apostolica: cuius causâ, Federicus II. quotquot intercipiebat Dominicanorum, capita, in crucis figuram dissecabat: quod contra se belli sacri præcones vexillum Crucis sustulissent. Nihilo mitior Ludouicus Bauarus omnibus suis diuionibus Dominicanos expulit, eorum domus euertit, & bona diripuit. Nec minus intrepido oportuit Dominicanos animo esse aduersus Concilij aliquot Basileensis; qui vbi sessione trigesima tertia Eugenium in ordinem coegere, sequenti sessione, quâ licuit, in Dominicanos sauiuerunt. Neque præter antiqua exempla, recentiora desunt, vt Seraphini à Porecta, cuius inuicta in Sedem Apostolicam fides emicuit, tum

eum Respublica Veneta in Paulum V. bellum meditaba-
 tur : sed Apologiam scribo , non historiam ; idè à plu-
 ribus exemplis referendis supersedeo : nam quæ com-
 memorata sunt , satis demonstrant inuictos aduersus
 omnia pericula & mala Dominicanos , pro Sedis Apo-
 stolice defensione vsque ad sanguinem decretasse .

Sed fortè infracti metu , in deforme obsequium delapsi
 sunt , & assentationibus hunc cultum corruerunt . Ve-
 rum non pauciora in hanc partem , quam in alteram
 extant veræ liberratis Christianæ exempla . Multi no-
 strorum Theologorum , vt Turrecremata , Ioannes à
 Monte nigro , Caietanus , alique Scriptores acerrime
 pugnarunt pro Monarchia Ecclesiastica , penès Petrum
 eiusque successores à Christo constituta & seruata , pro
 iure definiendi res fidei controuersas : sed nulli etiam
 liberius , & sincerius limites à Deo huic potestati præ-
 scriptos designarunt : aut sicubi inde recesserunt , maio-
 ri libertate , ac reuerentia monuerunt . Nonnulli Do-
 ctorum , bono fortè animo veramque Petro , eiusque
 successoribus hereditariam , in totum orbem nedum
 Christianum , sed etiam Gentilem potestatem plenissi-
 mam datam contendunt . Atque hinc Hispaniarum
 Regem totius Indiz Orientalis dominum ab Alexan-
 dro VI. iure constitutum fuisse . Sed Bannes quamuis
 Hispanus & summè Catholicus , non putauit sibi licere
 Regi suo & Pontifici hac in re adulari . Itaque negauit
 re ipsa datum hoc Imperium à Pontifice in Ethnicos ,
 aut iure dari potuisse , illique Bellarminus , alique Theo-
 logi maxime ex nostra Schola assentiuntur vni veritati
 addicti ; neque inclamant *vocem hominis , vocem esse Dei* ,
 nec quicquid pronuntiatum fuerit , vel approbatum de
 quæstionibus facti , aut iuris naturalis , aut Philosophiæ
 moralis , quæ reuelatis non continentur , nec illis con-
 nectuntur , nisi fortè aliqua consecutione probabili , aut
 humana coniectura , nec certo sciri possunt vlla anti-
 quarum reuelationum , nisi noua accedat : horum in-
 quam à me relatorum , quidquam hætenus fide defini-
 tum fuisse , nec eorum definitionem tentatam esse , nec
 posse dari , sentiunt plures Theologi , idque boni con-
 sulunt optimi Pontifices , qui magis sibi cauent à deformi

obsequio aulicorum & adulatorum, quam à præruptâ audaciâ hæreticorum.

Certè si cui Pontificum gratificari & assentari oportuisset Dominicanos, is erat maxime Ioannes XXII. non minus prudentia, aliisque animi dotibus, quam diuturnitate Pontificatus paucis decessorum aut successorum inferior; quem ubique carpit Petrus, & accusat nimij in Dominicanos affectus; quos quamuis demeruisse innumeris beneficiis, relato in Diuorum album sancto Thoma, assumptis tribus ad purpuram Dominicanis & toti Ordini his duobus verbis *lucere & ardere* in insigne datis, obtinere tamen non potuit, vt à traditione recepta in eius priuatas opiniones abirent Dominici aut fauerent, si vellet suum sensum antiquæ Patrum sententiæ anteponere. Hinc illa Durandi Episcopi Meldensis, hinc Thomæ Valdensis (quem ubique carpit Petrus) inuicta constantia, & libertas, qua Pauli exemplo, sicut hic Petro, ita ipsi restiterunt successori Petri, quod vterque reprehensibilis esset; neque ab hoc officio deterreri potuerunt tot beneficiis, & ingrati animi suspitione, neque metu carceris, quo iniectus est Valdensis; atque hanc Dominicanorum libertatem, non solum boni omnes probarunt, sed ipsorum etiam hostis acerrimus Ludonicus Bauarus, non potuit non laudare & admirari. Nam forte suspicatus Dominicanos sibi insensos fuisse & Sedi Apostolicæ addictos spe præmiorum; vbi audiuit, neque etiam Ioanni XXII. à communi Patrum sensu aberranti pepercisse, exclamasse fertur, *Ordinem Prædicatorum, Ordinem esse veritatis*, cui vni se deuouit. Assentires huic Imperatori, Petre, nisi te maior cæcitas, quam ipsum & acrius odium in nos transuersum agerent.

Nec dicas recentiores Dominicanos discessisse ab aucta illa virtute: recole animo, quæ à Bartholomæo à Martyribus, quæ à Pio V. sub nomine Cardinalis Alexandrini dicta, gesta que celebrantur à florentissimis omnium gentium & linguarum scriptoribus; maxime historia Gallico idiomate nuper edita Bartholomæi à Martyribus, quæ omnium manibus excipitur, omnium ore laudatur, & vix secundo postquam euulgata est anno, quarta eius editio adornata est: adeo illius Domini-

cani virtus primis Ecclesiæ sæculis, quam nostro piopior; adeo libri stylus elegantissimus, *omnium iudicia rapuit*; quod maius censet Seneca, *quam meruisse.*

Sed quis ab illo Lusitanæ Primatæ sanctissimo, in Concilio Tridentino, vel Romæ dicta, ab omni adulatione remota cum summâ in Sedem Apostolicam reuerentiâ, non miretur? Agebatur in illo confessu Patrum de moribus omnium Ecclesiæ Ordinum corrigendis nec ullus audebat Cardinalium gradum vel vno verbo attingere. At Bartholomæus à Martyribus, omnibus tacentibus & arepidantibus, in hanc vocem nunquam perituram Apostolicâ libertate erupit, *Illustrissimi & Reuerendissimi Cardinales uti loco supremo sunt, ita omnium primi egent Illustrissimâ & Reuerendissimâ reformatione, ad quam veluti ad exemplar reliqui Ordines instaurentur: Quæ & quanta Pium IV. sua sponte & consilio sanctissimi sui nepotis Borromæi in se propensissimum, eorum quæ ad officium Summi Pastoris pertinent, seposito omni humano respectu admonuit?*

Deduxerat illum Pius ad hortos Pontificios visendi causâ locum amænissimum & magnificentissimum Palatium, quod ab aliquo decessorum inchoatum, absoluebat: quærenti Pontifici, an huiusmodi Palatia Bragæ extrueret, Respondit Bartholomæus, *se non esse iis natalibus, aut eo loco, ut se Palatia decerent; & si forent sibi paranda, nunquam passurum extrui bonis alienis, multominus spoliis pauperum exornari.* Virgente Pontifice quid de toto ædificio censeret: *Meum est, inquit, Beatissime Pater, operis, quod dignaris mihi ostendere, artem observare, nihil vero de illo statuerè aut iudicare: cum vero instaret Pontifex, suum sensum aperiret, & præ se ferret sibi placitum, quicquid diceret: Quandoquidem iubea, Beatissime Pater, qua sentio aperire, ne libertate mihi concessâ abutar, dicam sincerissime ita me comparatum, ut nequeam cogitare de adificiis, quæ tempus vel Dei Filius ultima mundi conflagratione absumant. Poserit forte illud Palatium summâ arte confectum architectum commendare: sed nihil ad tuam laudem conferre, neque te dignum puto, quia Deus se præfecit visui adificiis sibi parandis, quæ ultimo mundi incendio non sint conflagatura; picturas etiam nihili facio,*

distare hi duo Dominicani, quod Bartholomæus compertum haberet, quæ à se dicebantur, non fore ingrata Pontifici, qui se prouocabat vt sensum suum sine vllō fuco aperiret. At Cardinalis Alexandrinus multis experimentis nouerat, suam in ferendâ sententiâ libertatem eidem Pio IV. molestissimam, odiumque parituram veritatem, à qua tamen euulganda, ac defendenda, nullis vnquam minis aut pœnis deterreri potuit.

Ex multis quæ referunt historici inuicti animi exemplis, hoc vnum attingam. Mantuæ & Etruriæ duces suum quisque filium, adhuc teneræ ætatis pueros, in Cardinalium cætum adoptari ambibant, eorumque votis annuebat Pontifex. Anniversario itaque die suæ in Sedem Apostolicam electionis, post grande conuiuium, quo Ecclesiæ Principes & legati Principum quolibet anno excipiebantur, (quem morem Pius V. abstulit, erogatis in pauperes mille nummis, qui in huiusmodi sumptus coniuiales expendebantur:) Pontifex ratus opportunam occasionem, Cardinales qui eo conuenerant, de his pueris Principibus suo collegio aggregandis, sententiam rogauit. Quamuis omnibus nedum tempus electionis post prandium, sed ipsa de pueris facienda summe displiceret: omnes tamen in speciem repugnante conscientia eam, laudabant; nec vllus ausus est illi intercedere, præter Cardinalem Alexandrinum.

Vbi enim ex ordine dicenda fuit illi sententia; nihil eorum qui se præcesserant, orationem moratus, omni humano affectu, aut respectu seposito, grauissimè disseruit, gratificandum quidem Principibus, qui loco clypei & teli sint Ecclesiæ; non tamen seruiendum morte mancipiorum, quasi eorum quæ rogant vel ambiunt, etiam minus iusta & honesta, non sit ius aut locus recusandi. Hanc puerorum in cætum sacrum inaugurationem, nec ipsis quorum causâ petitur, nec eorum parentibus, nec Ecclesiæ, nec tempori, nec Collegio grauissimo conuenire: Eò aduocandos ex toto orbe Christiano Sapientissimos, non pueros ignaros & ineptos, fraudaturos Ecclesiam suffragiis hominum prudentissimorum, quorum præmia & locum occuparent,

Inde ansam hæreticis dandam, decreta Romana quasi puerorum ridendi & traducendi. Hanc creationem nedum hæreticis ludibrio, & piis scandalo, sed maximè Tridentinæ Synodi Patribus adhuc congregatis iniuriæ dedecori & offensioni fore grauissimæ, quod decreta de disciplina Ecclesiastica, de Pastorum eligendorum ætate & moribus sancita ipsis spectantibus, subsannantibus hæreticis, conuellantur tam præpostera & intempestiua puerorum electione. Ecclesiam Pastoribus & Patribus egere, non pueris: nihil dilatione ad maturiorem ætatem creari illis damni, quia non sunt illis defutura dignitates, si natalibus merita adiungantur & respondeant; ex illâ verò festinatione, præter obseruata, plura damna & pericula impendere. Et illud præ omnibus timendum ne immaturæ ætatis in biuio positæ, & ad malum quam ad virtutem magis pronæ, purpuram vitiis maculent, aut cum aliquo contemptu abiiciant, vt contigit Cæsari Valentino, aliisque eadem ætate promotis. Addebat non conuenire legendorum Cardinalium locum, qui ex more in eorum publico consessu legi consueuerant; nec tempus, quoniam cum illicò sit à prandio (quod plurimum exaggerauit,) maximos hominibus sermones id daturum erat.

Hæc ab Alexandrino inuictâ constantiâ dicebantur, cum indignatione paucorum, cum cæterorum omnium admiratione audiebantur: vnde solutâ concione, hæc vox excidit Cardinali Sancti Angeli, pudendum plane, inter tot procures summo loco natos, ausum neminem verbum hîscere, præter hunc nouum hominem, quem non dubirabat Deum breui largè remuneraturum, & ad supremam Sedem prouecturum, quâ se vnus dignum probauerat: & summam vici libertatem ardensque sacræ disciplinæ studium admiratus, dicere solebat se libenter quemcunque vel pretiosissimum thesaurum habere vnquam posset, impensurum, si huiusmodi, quæ nemo alius dicere ausus fuerat, ipsi ad Pontificem verba facere datum fuisset.

Audisti, Theophile! quâ libertate, quâ grauitate, & omnium Sapientum admiratione, agere soleant Dominicanum cum Principibus summisque Pontificibus: quâ tantum abest, sicut tu falsò criminaris, vt læserint reuerentiam

reuerentiam Sedis Apostolicæ, quin potius eâ se dignos omnibus sapientibus, etiam æmulis comprobarunt, & iis veluti gradibus ad id fastigium conscenderunt. Nec credas velim, Pium V. recusasse, aut ægrè tulisse, aduersus se exercitam, quàm in commonefaciendis Pontificibus præ se ferebat opinandi libertatem. Exemplo sit ipsemet Pontifex, qui Cardinalium nullos honorificentius habebat quam qui suæ aduersarentur sententiæ: & domesticorum vno coram se impense laudato ob egregias dotes, adiunxit illi deesse sibi omnium gratissimam, quod nimio placendi studio suæ sententiæ numquam obtinisset.

Rem fecisses, Theophile, tibi honestissimam, & omnibus vtiliorem, gratioremque, si à Dominicanis sapienter dicta factaque collegisses, quorum copiosissimam messem notissimæ suppeditaissent historiæ, quàm illa farragine gerrarum, ineptiarum, quas ipse commentus Dominicanis affingis. Si illis excidissent, non conueniebat cartis mandare; cum id genus stultiloquiorum, spongiâ egeat non stilo. Quis igitur excuset ista suo ingenio fingentem? Quis hæc sua commenta ridicula ferat aliis falso ascribentem? Quis omissis quæ suppetebant prope infinita, acute sapienterque dicta, condonet libros nugis refercisse?

Si dignior Theologo labor placuisset, poteras seriem longissimam texere huiusmodi Apophtegmatum, exorsus à Iordane II. post parentem Dominicum Ordinis Præposito Generali; cuius innumera memorantur dicta, de quibus dubites acutius ne, & amoenius ingenium, an sanctum & intrepidum viri animum respiciant. Præluxit ille Bartholomæo & Cardinali Alexandrino, liberâ & acri castigatione Imperatoris Federici: ille huius nominis secundus, multas magnasque dotes imperatorias maioribus vitiis corruperat; & licet Herode forsan nihilo melior, eodem quo isti Ioannes Baptista, Iordanes erat illi loco & venerationi, qualem eximia virtus & sanctitas ab improbis & aduersariis interdum extorquet. Itaque Cæsar humanissime & honorificentissime Iordanem se adeuntem habuit. Sed vir sanctus istâ humanitate non magis à corripiendj illius consilio deductus, quam minis & seuitiâ deterreri potuisset,

Prophetæ Nathan Dauidem increpantis solertiam imitatus, post aliquot colloquia, miror inquit Cæsar, te rerum quæ toto orbe geruntur adeo incuriosum, ut nihil illarum quæras à me, qui possim certissima narrare, & compertissima, ac visa mihi visitandi Cœnobiaz Ordinis causâ, per varias Prouincias decurrenti.

Respondit Fredericus, se omnia excipere per cursores veredarios, & quos haberet legatos apud Principes. Tum Iordanes: quamuis omnia ex vero nosces, (quod vix crediderim, cum ministri Principibus blandiantur & imponant:) conueniebat te Christum imitari, quem licet nihil lateret, sciscitabatur tamen à Discipulis, quem se homines esse dicerent & crederent. Si quid simile à me quæreres Cæsar, non ita promptum esset, rem expedire: quia innumera & immania sunt quæ de te euulgantur. Audis enim quasi hostis non filius Ecclesiæ, quasi bonorum prædator non Princeps legitimus. Diceris causam Reipublicæ Christianæ prodidisse turpi cum infidelibus fœdere, permissâ illorum tyrannidi Hierosolyma, quam poteras vi recuperare: ferunt te omni vitiorum genere laborare, & fauere Sarracenis, à nulla superstitione, ab auguriis, & magicis incantationibus non abhorrere. Hæc Iordanes apud Federicum nedum libere & fortiter, sed etiam impune, & cum ipsius Imperatoris stupore, qui satis mirari non poterat hominis constantiam, & charitatem: Sed ex illis erat de quibus scribit ex Euangelio Augustinus, *mirabantur & non conuertebantur.*

Ita Dominicani exemplis domesticis imbuti, agunt cum Principibus. Sed quos induxi ea summâ libertate & constantia sententiam ferentes, pretiosum nouerant à vili separare, mores à dignitate, vitia à potestate fecerant, & increpatis acriter vitiis Principum auctoritatem ex animo reueriebantur. Posterioris huius virtutis non aliunde repetenda sunt exempla, quam vnde superiora assumpsi. Duo pulcherrima præbet Bartholomæus à Martyribus, quæ historia Lusitana referuntur. E Synodo Tridentinâ cum Romam pergeret reuerentiæ Summis Pontificibus præstandæ causâ, ubi ab aliquot miliaribus primùm in conspectum venit ciuitas, delapsus æquo, totoque corpore humi prostratus, cum omni

comitatu & famulatio, obortis & fluentibus præ sensu pietatis lachrimis, cæpit altâ voce compellare Sedem Summorum Pontificum, quibus ipse Hispaniæ primas se obnoxium contestabatur: *Salve, inquit, parens, sancta Christiana religionis magistra, columna & fundamentum veritatis: unde ortum est lumen toto orbe diffusum; quo mortalibus verum numen, summumque bonum innotuit. Salve pulcherrima Civitas, custos fidelissima sacratissimarum Apostolorum: principum reliquiarum, quæ te altius, quam imperatorum victoria exulcerunt.*

Hæc aliaque plura locutus, se se erigens, reliquum itineris pedes prosecutus, suos sic instituebat: ingredi-mur filij Civitatem sanctam, Caput Christiani orbis, totius doctrinæ & sanctitatis originem, unde & mundus hausit decreta Fidei & Religionis quam profitemur, & exempla virtutum. Quam calcaturi sumus, terra sancta est, & plusquam ter centorum millium martyrum sanguine consecrata: si ille sit numerus martyrum, quis & virgines, quis & confessores recensent? Recogitemus, nos ubicunque vestigia ponemus, Martyrum & Sanctorum cineribus imprimere, & si offensa in Deum ubicunque admittatur, grande sit piaculum, quis caperet quam immania futura sint peccata, si quod absit à nobis, vilius in hoc sanctissimo loco perpetraremus.

Sed aliud illustrius reuerentiæ in Summos Pontifices, pari libertati adiunctæ, refert eadem historia Lusitana. Bartholomeo è Tridentinâ Synodo ad suos reuerso, nihil prius aut potius fuit, eo decreto quo Primatibus & Archiepiscopis indicit sancta Synodus, quam primum ad suas Ecclesias redierint, Concilia habeant provincialia: atque vti primus omnium, litteris Pontificiis Episcopos ex toto orbe Christiano Tridentum euocantibus, paruit, eoque inter primos licet remotissimus accessit; eadem festinatâ obedientiâ Episcopos suæ Sedis adiunctos asciuit, & decreta Synodi Braccarensis condidit, plurimum, non omnium consensu: quæ à dissentientibus quasi seueriora apud Pium V. ex multis capitibus impugnabantur. Ea vero Pontifex discutiendâ tradidit Episcopo Cameracensi.

Vbi hoc rescriptum rescivit Bartholomeus, Epistolam scripsit se dignam, in quâ eminent dotes, quas in

Dominicanis desiderat Theophilus, quasi totis vel ad præruptam audaciam ex insolentiâ, vel ad deforme obsequium comparatissimi. Calumniâ depellunt Dominicani litteræ ad Dominicanum, in quibus nescias quid prius mirere, an scribentis animum intrepidum, an reuerentem, an in dicendo libertatem, an obsequium promissum & præstitum. Quid liberius & generosius his Epistolæ verbis, *Rescripto tua sanctitatis, quo totius nostri concilij examen uni committitur Episcopo, turbatus sum, & obstupui quasi dubio mihi penitus incredibili. Qui enim fieri potuit unquam à seruentissimo pastore, huiusmodi decretum in manifestam Synodorum Prouincialium exaurationem, ne dicam vilipendium, emanaturum?* Et post multa. *Absterge maculam hanc à tempore tui Pontificatus.* Quid illis verbis liberius? Sed quid etiam iis quæ adiungit, demissius & in Sedem Apostolicam reuerentius? *Nostri Concilij expurgationem ad tuam limam reuoca: sub tuâ expurgetur, mutiletur, & si dignum sit, in totum abrogetur. Tamquam enim de cælo allatam ut par est, tuam censuram qualemcumque excipimus.*

Ita Bartholomæus in Sedem Apostolicam domesticâ disciplinâ institutum se probauit, id est, reuerentem & intrepidum, perinde ab adulatione, & à temeritate alienissimum. De Pio V. referre quid attinet, quæ in Sedis Apostolicæ reuerentiam egerit, cuius, virtutibus eximiis omnium gentium, aut venerationem aut terrorem ingessit? Exemplo igitur huius paris Dominicanorum, eiusdem ætatis & virtutis, agnoscat Theophilus Dominicanos duplici spiritu à suo parente donatos, libertatis & obseruantix, ut quos officij causâ reuerentur, nec ex adulatione colant, nec vllius periculi aut damni metu.

Sed alio illustriori exemplo, diuersæque virtutis genere, aperuit sanctissimus Pontifex, quam immane auctoritatem inter & mores, seu priuatam & publicam Principum personam, discrimen constitueret. Bona mens non minus subtilitatibus distinctionum, quam acuta abundat & indulget: vtramque dixeris vim habere fulminis, quod illæ sâ vaginâ ferrum infringit, & integris ac ferè intactis carnibus comminuit ossa, & subtilissimo mortis genere exanimat. Hoc differunt Scholæ

& virtutis subtilitates, quod illæ apte sint acuendis ingeniis, & indagandæ veritati, illæ opportuniore sint ad eximia virtutum opera.

Ne te diutius morer, erudite & pie Lector, mirare id distinctionum genus à Pio nostro adhibitum. Eius Pontificatus initio, nebulo quidem euulgato maledico carmine ipsum petulanter inceserat, & subinde comprehensus, ac in quæstionem traditus, criminisque confessus, ex lege ab aliis Pontificibus præscriptâ, seuerissimo mortis genere pœnas daturus erat. Antequam iure in illum ageretur, iussit Pius coram se sisti, & carmen suum recitare: quod ubi agnouit in se ut priuaturn hominem scriptum, hanc æquissimam sententiam tulit: si tu mihi uti Summo Pontifici maledixisses, non ferres impune; at verò quia in Fratrem Michaëlem, in Monachum humilem in Cardinalem Alexandrinum conuicia iactasti, ab liberi quo velis: ego humilitatem generis, vitæ, & habitus mei semper animo retinebo & præ me feram, eròque vilis & abiectus in oculis meis: & si quid vnquam à me minus rectè factum obseruaris, mone me, & ad emendationem paratum comperies. Has in Familiâ S. Dominici & D. Thomæ scholâ edoctus distinctiones, ad vsum reuocauit, & in exemplum omnium. Ita Dominicani solent libero & reuerenti in Principes, & in omnes seuerò & beneuolò, cùm æquitatis ratio patitur, animo esse.

PARAGRAPHVS VLTIMVS.

Concluditur argumentum.

HISTORIAM scriberem, non apologiam, si referre vellem quæ legimus à Dominicanis eiusdem generis gesta, dictaque, à probis omnibus summè laudata, quæ summis etiam Pontificibus placuerunt; qualia sunt ipsamet, quæ damnat Petrus quasi ab ingrato animo & contumaci, profecta, vel hæresi proxima. Quid enim impij & sacrilegi tuo iudicio, Petre, futuri sunt Dominicani, quod asserant & scribant, probabilia, quæ ad Philosophiam naturalem pertinent, Ecclesiæ & Sum-

morum Pontificum definitionibus non esse idonea, & rationibus debere expendi, non decretis sanciri? Hæreticos ne putas, quod ad idem genus reuocent quæstiones facti, & multa alia, quæ Martyrologio, Rituali & Catechismo Romano continentur? Dominicanorum more longe ab adulatione absunt, & Bartholomæi à Martyribus, Cardinalis Alexandrini, Thomæ, Valdensis sin assèquuntur, saltem imitantur constantiam; neque unquam vitia palpant, vel erroribus, aut minus tutis opinionibus assentiuntur.

Vnus è Summis Pontificibus postremis, multis sanè virtutibus, & præ aliis prudentiâ & moderatione singulari commendandus, sibi à confessionibus delegerat Franciscanum vnum à suo Patre minus degenerem. Is cum animaduerneret affectum Pontificis in suos cognatos singulis diebus exardescere, & illis ditandis magis, quam ferret æquitas & ratio incumbere, conuenit ipsum, & his verbis de vtriusque communi periculo admonuit: *grauis noxa foret mihi, Beatissime Pater, si æternum damnarer, nec minus dolendum, si ipse eandem damnationem incurreres: sed omnium grauissimum puto, si vterque nostrum in communem casum, & ruinam pariter precipites nos daremus. Igitur ut hoc maximum & impendens periculum à nostro capite auertam, denuncio effusissimas in tuos largitiones bonorum Ecclesia me suspectas, periculo plenas, atque illicitas habere.* Nihil hâc libertate offensus Pontifex, admonitionem gratissimam habuit, & cum hinc huiusmodi largitiones essent illi religioni, & aliunde ab illis ægrè posset abstinere præ innato in suos studio, aduocauit ad consilium Theologos celebriores, qui Confessarij monitū expenderent: sed visusest nonnullis paulo morosior, ac conscientie strictioris, vel forte angusti iudicij: Et post longum examen, sin saniori, certe maiori parti placuit hæc sententia, licere Pontifici dare in singulos annos cognatis trecenta millia aureorum. Quidam ex ipsis Theologis celeberrimus (cuius nomini parco,) rationem adiunxit ipsa definitione deteriore, adeo graue & intolerabile, administrationis Pontificiæ onus esse, ut nullus sit illi ferendo humeros subditurus, nisi posset, aliquâ suos ditandi voluptate laborem hunc leuare.

Certè nihil dici poterat à Theologo alienum magis;

pudisset Epicurum ita sentire. Memini apud Tullium de finibus bonorum, & malorum, Manlium qui Epicuri partes agit, & sententiam explicat sanioribus consiliis imbuere Principes & Magistratus. Iubet enim eos ad Rempublicam accedere, eamque administrare semote omni alio emolumento, præter voluptatem de omnibus bene merendi. At Theologus ille ad suscipiendum aut leuandum munus Pontificium nullo loco reponerat animarum salutem, obsequium Christo exhibitum, virtutem ipsam, quæ sibi est maxima merces, neque vitam æternam, quæ nos manet. His enim cogitationibus, & præfidiis instructos, censebat non posse ferre laborem Pontificiæ administrationis, nisi suos locupletandi voluptas accederet.

Ista nunquam docuerunt Dominicani: neque prætermisisset Theophilus, si ab illis tradita legisset. Bene est, quod nos nullius assentationis suspectos, solum morosos arguat, quod probabilia, quæ interdum eligunt Pontifices, non excipiant ut indubitata, & fide certa: quod Martyrologio, & Rituali Romanis non asserant vim librorum Canonorum, quod negent Summum Pontificem definire quæstiones facti, vel iuris probabiliter principiis reuelatis tantum connexas, ut fide certissimas, nec debeant, aut possint, se solis, inconsultis Doctoribus, & Theologis, non expensâ controuersâ nullo Scripturæ, & traditionis examine res dirimere, & sancire, quasi his opinionibus, ne videamur in deforme obsequium delabi, abripiamur in præruptam audaciam. Sed iam demonstrauius nos utroque vitio carere, quod sequentibus responsionibus ad singula accusationum, capita euidentissimè patebit.

ARTICVLVS SECVNDVS.

Respondetur ad tria accusationum capita.

LI CET quæ vniuersim ad totam Diatribam dicta sunt superiori Articulo, omnes depellant Petri accusationes de læsâ reuerentiâ sedis & Maiestatis Pontificiæ, ne tanticriminis vel minimâ suspitione laboremus, si-

gillarim singulis capitibus respondebo, Esto vera sint quæ quæ obiectis tribus prioribus Articulis de Monte pietatis Vfuræ accusato à Dominico Soto perperam, de absolutione negandâ moribundo contra Ritualis Romani decretum; Esto malè Combesius: quid inde contra totam Scholam, & familiam Dominicanam inferis incommodi, & absurdi, quasi in verba Soti, & aliorum iurauerimus, quasi singulos Dominicanos assereremus immunes ab omni errore? Quamuis peccauerint hi priuati Doctores, cur communem vis nobis omnibus esse illorū singularem lapsum? Si velles nos eiusdem erroris conscios esse, tibi probandus erat omnium nostrum consensus in illam Soti, & Combesij sententiam. Hæc dicta sunt per summam indulgentiam; etiamsi, quæ vis improbata à Thomistis perinde certa essent, ac illa, quæ reuelatione, & traditione diuinâ accipimus. Sed longissimè absunt ab illo certitudinis gradu; nam pleraque eorum ad quæstionem facti pertinent, qualia sunt quæ Martyrologio continentur: quæ verò de absolutione moribundi Rituale Romanum statuit, vel de pecuniâ mutuo acceptâ ex Monte pietatis (de qua Leo decimus) hæc omnia spectant ad ius naturale, de quibus nihil certum fide sanciri potest, citra nouam reuelationem, quam nusquam Concilia, aut Pontifices legi obtendisse se habere vt controuersa cum hæreticis, aut dubia apud Catholicos dirimerent. Sed ea omnia decreuere ex verbo Dei scripto, & tradito, nec alium eis asseruerunt, aut voluerunt à nobis adhiberi certio rem assensum, quam iuxta connexionem cum reuelatis necessariam, aut probabilem, vt paragrapho sequenti accuratè imus demonstratum.

PARAGRAPHVS PRIMVS.

Distinctio quæstionum facti & iuris.

VT ex intricatissima disputatione de iudice controuersiarum, & iure rerum definiendarum in Ecclesiâ delibemus, quæ necessaria sunt soluendis obiectionibus prioribus; id apud omnes receptum est, rerum quæ ad

fidem pietatēque Christianam pertinent , duas posse quæstiones institui , nempe facti & iuris , easque definiendi , vt materiæ ratio patitur , aut requirit utilitas Ecclesiæ , collatam à Christo Conciliis œcumenicis , & Summis Pontificibus , non minus plenam quam necessariam facultatem. Præterea eorum decretis , seu iuris , seu facti quæstiones dirimant , parendum esse summæ reuerentia : hoc tamen discrimine , quod cum res iuris ad doctrinam spectent , & sint vtplurimum reuelatæ , aut reuelatis necessariò iunctæ , vbi declaratæ , aut sancitæ sunt , certum a nobis assensum exigant ; & ipsa dubitatio si voluntaria sit , errore , aut erroris periculo non careat. Res vero facti , cum magis ad sensum pateant , quam reuelatione diuinâ innotescant , si quid de illis statuatur , reuerentia & obsequio sic prosequenda sunt earum decreta , vt dubitationem omnem non excludant.

Rem obscurissimam hoc exemplo illustrabo , cum à Deo rerum omnium auctore , & sub ipso à parentibus originem & vitam hauserimus , adeo arcta inter ipsos cognatione principij , vt quidam parentes , à quibus primo geniti sumus , eleganter vocent *Deos nostros aspectabiles* , Deum vero *Patrem inaspectabilem* , ac subinde Theologi vnā specie virtutem , nempe pietatem constituent , quā vtrumque vitæ nostræ principium æternum , & temporarium colamus : id tamen discriminis est vt certissima sit origo à Deo , & si quis dubitet , se ab illo existere , Atheus omnino sit : à Patre vero natiuitas paucis comperta est , neque de illa dubitatio officium pietatis lædit , aut minuit. Quis neget patri parendum & obsequendum ; etiamsi dubites de tuis ex illo natalibus ? Eodem animo , eodémque discrimine rerum facti , aut iuris decreta à Summis Pontificibus profecta excipere , & distinguere nos oportet. Peccamus semper contra officium , nisi ea reueremur , etiamsi factum , de quo statuis , sit incertum , & de illo iure , sicut interdum de natalibus dubitemus.

Hæc decretorum & quæstionum distinctio depellit quas Petrus offudit tenebras de Monte pietatis vsuræ accusato à Soto , de Martyrologio Romano , quod Baronius accuratè correxit , & Gregorius XIII. probauit , & Combesius arrosit. Sed putasne Baronium , & Gre-

gorium potuisse has tabulas Ecclesiasticas ita suo labore & decreto emendare, ut omnia sint indubitatae fidei; cum res facti, quales sunt res fere omnes, quæ illo libro continentur, non exigant certitudinem fidei, nec etiam patiantur? Si licuit Baronio, quod præteritis sæculis in Ecclesia Romana legebatur Martyrologium à Summis Pontificibus probatum, infinitis prope locis emendare; cur hæresis aut temeritatis arguas Antonium Caracciolum è Theatinorum familia, quod integrum opusculum scripserit eorum, quæ in Martyrologio limam & correctionem requirunt? Certè si quod sit crimen, eius particeps est Sacra Congregatio Rituum, quæ quotidianas Martyrologij Romani emendationes edit.

Et adhuc post tot exempla Combessius audiet, quasi temerator aut sacrilegus, quod aliquando Baronij aliorumque in edendo Martyrologio diligentiam requirat? Potuitne modestius loqui, quam cum ita scribit? *Nulla Ecclesia Romana, vel Pontificum culpa, sed eorum tantum, qui ad huiusmodi libros componendos ab Ecclesiâ adhibiti, vel præscientia tenuitate, vel præ humanâ industria inefficacitate cespitarunt: unde nova subinde correctiones affulgente plenior luce, aut maiore examine adhibita.* Putatne Petrus, quemcumque librum extra aleam positum, nec posse ullâ ratione, aliquâ sui parte improbari, aut corrigi, si præferat aliquod diploma Pontificium? quandoquidem hoc solum nomine ponis in tuto Martyrologium Romanum, quod à Gregorio XIII. probatum sit. Fateor, si nullius nomen in hos sacros fastos referretur, nisi prius in vitam & mores cuiusque eâ diligentia & curâ fuisset inquisitum, quam solent adhibere Summi Pontifices, cum aliquem Diuorum catalogo ascribunt Canonisationis ritu, certè tunc reputarem temerarium dubitare de sanctitate, aut æternâ felicitàte cuiusquam eorum, quos Martyrologium celebraret; quia multi existimant (licet alij contra sentiant,) huiusmodi solemnibus decretis Diuorum sanctitatem fide sanciri ut certam; sed quotus quisque est, quos Tabulæ Ecclesiasticæ nominant, qui eo examine & ritu, in huiusmodi fastis relatus sit, maxime ex antiquis Martyribus, qui Martyrologio ascripti sunt, manu & fide alicuius Notarii, quem non est dubium fallere & falli potuisse?

Neque adeo grauis & pudendus error esset, si Martyrologio Prædicatorum Eusebius Cæsariensis obrepisset, (quamuis nullibi apud nos extitisse probet Theophilus,) cum pari negligentia in Martyrologium Romanum immissa fuerint nomina Luciferi Caralitani, & Fausti Regiensis, qui hæresis suspecti aut comperti erant. Nec verius est, quod ad finem illius accusationis de fide Martyrologij Romani à Combesio eleuatâ, addit illi impactum colaphum à Nicolao Riccardio repudiante, quod in illis tabulis 28. Februarij traditur de Martyrio Sanctorum Alexandrinorum, qui ministerio peste laborantium immortui sunt. Hæc querimonia est ex sui per pestem Martyrij censurâ, quam non potuit hætenus concoquere, Sed adeo Riccardius absuit ab eâ, si quæ sit, culpa, vt huiusmodi Sanctis Alexandrinis asseruerit gloriam martyrij, hoc ingenioso argumento, quod obsequium peste languentibus tum temporis impensum, esset quædam fidei Christianæ publica professio, cum hoc charitatis exemplo Tyrannis probarent se Christianos esse. Hæc de Martyrologio Romano: Inde vero videntur inualescere duæ priores ex Monte pietatis, & ex Rituali Romano repetitæ accusationes: nam si ea sit iuris & facti quæstiones inter differentia; vt harum definitiones assensum pium exigant, non certum & indubitatum, qualem videntur requirere iuris definitiones; quâ ratione excusamus Sotum, aliosque Thomistas, qui Pontificum & Conciliorum decreta carpunt, quibus statuunt Montis pietatis inculpatum esse commercium, & moribundo impertiendam absolutionem; qui votum Confessionis testatus se habere, confiteri non potuit; hæc enim ad quæstiones & definitiones iuris pertinent, quibus non solum reuerenti animo parendum; sed etiam indubitato assensu diximus esse adhærendum?

PARAGRAPHVS SECVNDVS.

*Triplex genus questionum & definitionum iuris ;
unde respondetur ad primum caput ex Ri-
tuali , & ex Monte Pietatis.*

SVPERIVS argumentum vrgeret maximè Thomi-
stas, si vno tantum genere iuris quæstiones, & de il-
lis Pontificiæ sententiæ continerentur. Verum diuersæ
& propemodum infinitæ sunt earum quæstionum spe-
cies, quas, vt disputatio sit expeditior, ad tres classes re-
uocamus: prima sit rerum omnium, quæ sub immédia-
tam Dei reuelationem cadunt pari gradu, sed dispari
euidentiâ; huius generis sunt libri omnes in Canonem
relati, quamuis de quibusdam nulla, de aliis aliqua in-
tercesserit contentio & dubitatio: eâ tamen Ecclesiæ de-
creto submotâ, paris sunt omnes libri sacri apud pios au-
thoritatis, quod vi eiusdem diuinæ reuelationis imme-
diatæ recipiantur. Ita Euangelium Ioannis, & Apoca-
lipsis eodem sunt apud nos loco, etsi primum opus in-
dubitatum vbique fuerit, de altero acriter sit discepta-
tum.

Ad idem genus pertinent, quæ communibus Scriptu-
ræ verbis, vt singularia speciei notione continentur. Si
certum fide sit, Christum causâ omnium hominum fuisse
passum; certum est singulos hominum eo numero
comprehendi, nec quenquam saluâ fide excipi posse. Ad
eam primam classem nonnulli satis commodè reuocant
assensum de sanctitate Diui alicuius, cœlitum catalogo
solemni Ecclesiæ ritu ascripti, vel de electione Ponti-
ficis hodie sedentis. Hæc enim asserta putant esse Ca-
tholicæ, & indubitata fidei, & sub immediatam Dei
Reuelationem cadere, quod contineantur, vt singula-
ria sub ambitu harum propositionum, quas reuelatas
aut traditas putant, verè Sanctum & Beatum esse, quem-
cumque cœlitibus Ecclesia solemni iudicio accenset, aut
legitimum esse Pontificem quemcunque vniuersalis Ec-
clesia agnoscit, vt ritè electum; Atqui hæc concors sen-
tentia Ecclesiæ in electionem suppetit Alexandro VII.

sicut ſolemne iudicium Beato Thomæ à Villa-noua : ergo fide certa eſt beatitudo huius Diui, & illius Pontificis authoritas legitima.

Secundi generis, & huic primo proximæ ſunt eæ quæſtiones iuris, quas Theologi neceſſariâ conſecutione ex principiis reuelatis deducunt, veluti conſclusiones ex præmiſſis, effectus à cauſis, proprietates à ſuâ eſſentiâ. neque enim eas immediatè reuelatas dixeris : ſicuti cum quis herbam medicam digito demonſtrat, non cenſetur vim illius medendi aperire, niſi mediâ eſſentiæ rei ſignificatione, vnde quâdam conſecutione deducitur. Ita plane de rebus à Deo reuelatis diſtinguunt Theologi. Quædam à Deo immediate reuelantur, alia vero remote & in cauſâ, vnde deducuntur : atque hæc duo rerum genera primæ & ſecundæ classiſ pleno iure ad Concilio-rum & Summi Pontificis definiendi facultatem pertinere conueniunt omnes Theologi, aliquo tamen diſcrimine, quod maxime ad rem noſtram facit, & diligenter obſeruari velim.

Soto, Vaſques, & alii cenſent, veritatem ex rebus reuelatis conſecutione neceſſariâ & euidenti deductam, fide credi oportere ab eo, qui vim conſecutionis capit; alii verò negant, huiusmodi veritatem fide diuinâ credi poſſe, ſi priuato tantum diſcurſu eliciatur; ſed ad id opus eſſe definitione Pontificiâ, aut Concilii, quâ ſemel adhibitâ, contendunt propoſitionem ſecundæ classiſ, ſeu remote reuelatam in cauſâ prouehi ad primam classiſ, & accenſeri Articulis fidei Catholicæ beneficio definitionis. At contra contendunt Molina, Granado, & alii, nulla Eccleſiæ definitione propoſitiones ſecundæ classiſ poſſe inde ad primam transferri; ſed ſtare ſemper ſecundo gradu, nec eum, qui definitam veritatem negauerit; ſi ab immediatâ reuelatione abſit, hæreticum eſſe, ſed ad ſummum temeritatis, & erroris dâmnandum. In hâc acerrimâ Theologorum, & dubia atque ancipiti diſceptatione, ipſemet ſuſpenſus hæreo; & licet promior in ſecundam ſententiam, alias ſane improbare non auſim ante iudicium ſummi Pontificis.

Sed quidquid ſit de hoc ſecundo quæſtionum iuris genere, quæ fidei proxime attingunt aut ingrediuntur fines; tertii generis longe remotiores ſunt, & probabi-

lium opinionum classem constituunt, quod salua veritate eorum, quæ reuelatione tradita sunt, illis assentiri possis aut dissentiri. Hæc vltima classis omnium est amplissima, quod rerum dubiarum maximus sit ambitus, certarum vero, & euidentium angustiores sint fines.

De his ergo rebus probabilibus, certum est Concilia & Pontifices, si quid vnquam statuerunt, nunquam à probabilium ordine ad secundum aut tertium exexisse. Non est quidem dubium, quin maximum pondus addant opinioni, quam è multis probabilibus elegerunt; sed aliunde certum est, nunquam effecisse, nec obtendisse, nisi præcesserit Traditio, aut Reuelatio, vel ex Reuelatione necessario consequantur, vt Articulis fidei accenserentur, vel fide Diuina ab omnibus exciperentur. Certe si Molina non patiatur propositiones secundi generis, id est fidei, Articulis necessario connexas, vllâ definitione Pontificia, aut Conciliorum, prouehi ad primam classem Articulorum fidei; vix æquo animo ferret opiniones tertij generis, quas saluâ Reuelatione, & Traditione antiquâ ad arbitrium propugnare aut impugnare valeas, eò posse vnquam conscendere. Sed quidquid sit de sententia Molinæ, nullum Theologorum vidi, qui propositionibus tertij generis eum concedat ad primam classem ascensum, quem Molina etiam 2. Ordinis veritatibus negat.

Hoc vno verbo dissiliunt, & in fumum facefcunt, quasunque 2. Diatriba in nos congerit, calumnix, quasi Summi Pontifices, sicubi in aliquam huius tertij generis opinionem inclinauerint, hâc ipsâ significatione ad primû genus euexerint; & quidquid in gratiam contrariæ sententiæ scriptum fuerit, hæresim resipiat. Quam longe abes, Theophile, à mente sapientissimorum Pontificum, quam præpostere eorum dicta interpretaris! Certe si eam sibi auctoritatem vindicarent, vt quæcunque probabilia eligunt, aut sequuntur, aliis indicarent excipienda vt fide certa; quotquot scriberent Canones, aut libros, librorum Canonorum vim, & locum obtinerent; quandoquidem eorum dictis, & scriptis par auctoritas constaret. Nihil hâc consecutione euidentius, iuxta tuam, Petre, arguendi, aut potius calumniandi artem. Nihil magis à veritate, aut Pontificum mente

alienum & tuummet argumentum in te, tuosque validius retorqueo, quam in nos contorseris.

E totâ illâ serie probabilium opinionum, nulla grauior, & momentosa magis, nulla quam plus esset è re Christiana definiri, quæ propius accedat ad certas fidei regulas, cui impensius fauerint, quam apertius & frequentius commendauerint, eâ, quæ ex infinitis prope locis vt iuris canonici dignitas indubitata circumferretur; *In dubiis partem tutiorem esse eligendam*: cettè ea Pontificum sententia (vt Senecæ verbis vtat) *apertior est, quam vt interpretanda, differtior, quam vt adiuvanda sit*; nam millies interrogati de rebus dubiis, hinc, & inde probabilibus, vnde scilicet ab opinione quæ stabat pro libertate humanâ contra officium, & legem Dei impendebat, peccandi, ac subinde damnationis æternæ periculum; quid ad ista Pontifices? Responderunt constantissime *tutiorem partem eligendam*, quæ pro lege, pro honesto staret contra libertatem, & commodum, ac subinde careret omni periculo offensæ Dei, & damnationis: hanc tamen adeo apertam, certamque Summorum Pontificum sententiam, tot Canonibus repetitam, in dubium reuocant Recentiores fere omnes, (si vnum Comitoliū excipias,) vel falsi, & nimij rigoris arguunt, aut quod peius existimo, alienis interpretationibus deprauant, vt videre est apud Merendam Fagnanum & Mercorum parte 2. Basis Articulo 9.

Quid, licere tibi tuisque putas in re omnium grauissimâ, quæ sit Basis totius Theologiæ Moralis, & cardo negotij animarum, Responso Summorum Pontificum, aut potius oracula, vel aperte impetere, vel oblique deprauare, & sacrilegij argues Thomistas si quanda dubitent de his, quæ vt probabilia proferuntur à Pontificibus, vel à priuatis Doctoribus, qui nomine, & iussu Pontificum Ritualement, Martyrologium, Breuiarium Romanum edenda curauerint? De probabilium opinionum vsu, & delectu fuscè disputatum est alio loco, vnde duo tantum delibabo ad huius diatribæ calumnias depellendas omnino necessaria. Primum ad rem sacramentariam pertinet, & eo loco quadruplicem distinguimus materiæ, aut formæ sacramentalis statum, aut gradum, vt primo indubitatum sit materiam validam, & licitam, altero extremo

esse prorsus nullam 3. validam quidem, sed extra necessitatem illicitam, ultimo tandem dubiam. V. g. aqua elementaris est materia certa Baptismi, vinum est nulla, aqua paululum lutosa valida est materia, sed illicita si sit copia limpida, aqua rosacea, aut ex vite profluens est incerta, & dubia.

His quatuor gradibus constitutis, de duobus extremis nulla est apud Authores contentio: omnes assentiunt materiam certò licitam, & validam ubique esse adhibendam, nunquam vero uti ligere inualida, siue nulla. De materia media, quæ ad alteram extremarum partem accedat: hinc ad certam cum valida est, sed illicita, vel ad nullam, qualis est dubia; utraque hoc commune habet, si inestet mors pueri nondum baptizati, & desit omne genus aquæ, nec alterius liquoris sit copia, quam vini, non esse adhibendum baptismum cum materia certissime nulla: si adsit aqua lutosa, & rosacea, illam isti præferendam; quod valida sit, & periculum salutis pueri licitum faciat eius usum, & necessarium. Si suppetat tantum copia rosacæ, licet dubia sit, & subinde incertus illius fructus; eâ tamen utendum est, cum hoc tamen discrimine, ut si puer mortis periculum euadat, aqua rosacea baptizatus, sit iterum elementari aqua baptizandus; secus vero si fuerit aqua lutosa lustratus, quia huius, non illius baptismi certus est fructus, & ideo rosacæ aquæ, non lutosæ iterandum est baptisma. Ita Theologi omnes nullo excepto. Neque aliud statuunt, neque aliud possunt decernere Concilia, & Pontifices.

Atque hoc exemplum baptismi mire illustrat controversiam de absolutione, quam vult Rituale Romanum impendi moribundo, qui nullum confessus est peccatum. Eadem est huius absolutionis, & baptismi ex aqua rosacea vis & ratio. Vtrumque sacramentum hoc modo administratum accedit ad quartum gradum nullius & inualidi, & ad summum tertio gradu reponendum est, ut dubium, ac proinde nunquam citra extremam necessitatem usurpandum, eaque transacta, iterandum: id est, adultus rursus absolvendus est, puerque rebaptizandus, si mortis periculum euaserit. Quid ergo sacrilegij admiserunt Thomistæ quod absolutionem dubiam in dubium reuocauerint, & probabiliter nullam esse censuerint?

At

At contra, inquis, Pontifices & Concilia scripserunt. Sed hoc aperte falsum est; dissentirent à Pontificibus, si suis decretis iussissent adhiberi absolutionem, ut omnino certam, & prohibuissent repeti transacto periculo. At utrumque longissime abest à mente Pontificum; quia permittunt absolutionem impendi reo ut dubiam, & si liceat per tempus iterandam, sicut de Baptismo ex aqua rosacea concedunt omnes, urgente necessitate conferendum, & iterandum cum aqua elementari, transacto periculo; itaque si dubium sit utrumque sacramentum, id status controuersie exigit, ut in utramque liceat partem disputare.

Certe si Pontifices, quam illis liberalissime indulges, putarent sibi concessam facultatem dubia cuiuscunque generis dirimendi, omnia apud nos controuersa, vno verbo indubitata facerent; ad minus definirent certo sacramentum Baptismi, & Absolutionis iam explicatum, vel nullum omnino, vel certum: ac proinde non esse adhibendum, qua inane est, vel non esse iterandum, quia validum fuit. Sed non ita exerce pronuntiant Sapientissimi Pontifices; quia quamlibet illis blandiantur assentatores, potestatem datam nulla lege, nullis meritis coercitam, ad libitum in promptu in consulto Dei verbo, dubia cuiuscunque generis vno verbo dirimendi, non dubito quin huiusmodi voces auersentur. Id certum est, his lenocinijs tyrannorum scuitiâ, & daemonum artibus longe periculosioribus non potuisse corrumpi, nec à legitimæ potestatis sibi diuinitus concessæ vsu & regulis, vel latum vnguem recessisse.

Aliud ex eadem disputatione decerpo necessarium ad huius loci calumnias depellendas; nempe quatuor esse librorum genera, Martyrologium, Rituale, Breuiarium, & Catechismus Romanum, omnes fere eiusdem auctoritatis, quæ nomen Summi Pontificis præferant, quasi eius iussu scripti, & consensu probati; At Theophilus Catechismus licet aliis superiorem, non solum elegantia, & delectu verborum, sed etiam grauitate sententiarum, vbertate & securitate doctrinæ, ut alias demonstrauimus; nullo tamen loco habet, tanquam ab vno Dominicano scriptum, à Manutio latinitate donatum, & quod grauius est, putat scaterere erroribus.

Certe si Catechismus Romanum tot dotibus præstantem sibi permittit Theophilus laceßere, & stabilitas ab illo sententias conuellere, absoluit à suis accusationibus Thomistas, si quæcunque Rituali, Breuiario & Martyrologio Romano continentur, non habeant loco articulorum fidei; & dum vult omnia excipere, quasi ex Cathedra dictasset Summus Pontifex, iniuriam prorsus illi facit. Certe Dominus Fagnano huius sæculi Didymus, & cæcus oculatissimus a quinquaginta annis omnium quotquot sedere Pontificum administer & consiliorum particeps, nihil dubitauit à Ritualis Romani opinione recedere, cum imminente mortis periculo, si adsit approbatus Confessarius posse ait moribundum à quibuscunque censuris & peccatis absolui à quolibet sacerdote, id negat Dominus Fagnanus, suamque opinionem contra Rituale confirmat iudicio sacræ Congregationis Concilij. Vide quo recidant Theophili accusationes, sed de hoc argumento plura alibi.

Quæ hætenus disputata sunt de variis rerum Theologicarum gradibus, liberoque probabilium vsu, & sensu à Summis Pontificibus concesso, Sotum vindicant à Petri calumniis, quibus quasi læsæ Maiestatis Pontificiæ reum peragit, quod ausus sit aliqua vsuræ labe maculare Montem pietatis à Leone X. & à Concilio Lateranensi probatum innoxium. Vno verbo hæc machina dissoluitur, Sotum attigisse tantum ex commercio illius Montis, quæ ad ius naturale, & morale pertinent, quæ rationibus ex Philosophia potius, quam decretis expendenda sunt, quæ probabilium iure gaudent, vt possint in vtramque partem disputari citra cuiusquam offensam, idque etiam boni consulunt Summi Pontifices à Theologis factum, vt de Baptismi & Pœnitentiæ, sacramento iam insinuauimus. Soti vindicationem fusio-rem vide Disp. I. contra Amad. II. Part. nostræ Ethicæ Disp. I. Sect. II. Art. II. Paragr. IV. Hic addo potuisse verius alicuius errati Theophilum Sotum incusare, quod dissertationem de Monte pietatis Tomo Opusculorum Caietani insertam ab illo, Leonis X. Pontificatu ad annum 1515. crediderit post Concilium Lateranense editam, cum ipse ad calcem annotet à se scriptum anno 1498. Sed forte illum Soti leuem lapsura

diffimulauit, quod eo sentiret suam accusationem eleuari; vnde ipse Soto sibi minus vitio verti posse putauit, si quid improbaret ex huiusmodi pio commercio, in quod ipsemet Caietanus tempore Concilij Lateranensis, à quo fuerat permissum, non nulla in disputationem vocarit: eius itaque exemplo suas cogitationes in tuto ab omni censurâ positas existimauit Soto.

Sed defensioni ex lapsu chronologiæ minus fidæ, & firmæ, possumus hanc validiorem, & æquiores sufficere. Quod cum Leo X. decreto Sessionis decimæ Concilij Lateranensis asserat, de nullo vltra sortem, sed moderato tantum pro indemnitate Montis lucro capiendo sententiam probatam fuisse quinque suorum decessorum, & Caietanus sui Opusculi cap. 6. testetur Montem pietatis à Sede Apostolicâ probatum, seclusis illius capitulis, & cum hâc clausulâ, *quatenus sacris canonibus non aduersantur*; manifestum inde est decretum Leonis eâdem cautelâ interpretandum, quam antiquioribus Bullis scribit Caietanus se appositam legisse: quantum addat in nonnullis editionibus desiderari, nec innoxie citra culpam fuisse hanc clausulam deletam, *modo sacris canonibus non repugnent*: quid ergo mirum, aut quid peccauit Soto, si eâ Pontificum castigatione munientum, & aliquâ fraude destitutum commercium habuerit suspectum?

ARTICVLVS TERTIVS.

Responsio ad reliquas quatuor accusationes.

SOLVITUR tribus prioribus argumentis frustra videmur in resellendis quatuor, quæ ex diatribâ secundâ supersunt, calumniis allaborare; cum iisdem exceptionibus retundantur, nihil eorum, quæ tanto apparatu obiciuntur, pertinere ad fidem, sed ad opiniones probabiles, quarum vsum, & delectum arbitrio cuiusque permiserunt Summi Pontifices multò liberaliores, & æquiores Petro.

Sed duo nobis importunissimè obtrudit, quia putat

summè inuidiosa, de infallibili potestate definiendi Summis Pontificibus collata, & de Conceptione immaculatâ; quasi hanc posse definiri contra mentem Diui Thomæ, negent eius discipuli, & malignè facultatem definiendi, ad certam materiam, certisque legibus contrahant. Sed imprimis hâc fidem, & diligentiam Petri requiro; vellem quas refert sententias ex Thomistis, notaret, apud quos authores legisset: sed nullo, vel vno tantùm Combessio citato profert has sententias, quasi scholæ nostræ communes. Verum esto aliquid eorum exciderit Thomistis, certè si vel minima tibi esset veri cura; aut tacuisses, aut bono sensu (qualem patiuntur) interpretatus fuisses.

Putasne nos malè consulere dignitati Summorum Pontificum, si hac parte prædestinationis æquemus? Communis est totius Ecclesiæ sensus, quos Deus dignatus sit singulari beneficio suæ prædestinationis conscios facere (quod Paulo aliisque Apostolis collarum Patres scripserunt:) nunquam sibi deesse, nec solùm accuratè & diligenter, sed etiâ anxie, & cum tremore suam salutem operari; & perinde sollicitos esse bonorum operum, & fugæ peccati; ac si nullum haberent suæ salutis pignus certum. Quia eadem prædestinationis ratio, & efficacia, quæ vitæ exitum felicem statuit, & indubitatam gloriæ consecutionem, è mediis ad hunc finem paratis, præcipuum exigit ipsummet damnationis, timorem, fugam peccati, & sollicitam perseverantiæ curam. Ita planè de facultate Pontificiâ sentiendum: esto demus inflexam à recto & à vero, & à metis, quas Christus præfixit; certum tamen est, prouisa ad hoc media, nempe preces ad Deum, sapientum consilia, verbi Dei examen, inquisitionem Traditionis, consensum Ecclesiarum.

Si dicas ab his omnibus minimè pendere huius definiendi facultatis vsum, & si omittantur preces, consultationes, &c. nullum fore periculum erroris: hoc perinde est, ac de prædestinatorum certâ salute neglectis bonis operibus, vel de rerum repugnantium copulâ: vnde deduci solet vtriusque partis contradictoriæ assertio. Si ponas hominem incorruptum, Leonem fieri, quid inde consequatur? plura absurda, & repugnantia: esse

rationis compotem, cum ponas esse hominem, & esse rationis expertem, cum fingas esse leonem. Eadem fiunt de prædestinatis sophismata; si des in peccatum labi, nec unquam resipiscere prædestinatum, iunges quidem pugnantia: sed si velis stare hanc cognationem prædestinationis, & in malo pertinaciæ; quid inde deduces? Saluum fieri hominem, quia certa est prædestinationis, nec irrita aut cassâ esse potest; & damnari, quia lex est nota, quem suæ culpæ non poeniteat, damnandum? Eisdem sophismatibus vexare nos potest Petrus, aut potius se ridendum præbere de infallibili potestate res ex Cathedrâ definiendi.

Ex scholæ nostræ sententia assero hanc potestatem à Deo constitutam, suisque præfidiis munitam; qualia sunt consensus cum antiquâ Ecclesiâ, Scripturæ & Traditionis examen, cognatio necessaria rerum definiendarum cum reuelatis principiis; quid, si ista desint, aut consulto omittantur? Respondeo id non magis fieri posse, quàm si prædestinatum curam bonorum operum abicere, & nunquam à peccato resipiscere. Quid si fingamus omitti? Certè repugnantia comminisceris. Quid si admittatur? Tunc idem erit saluus, & damnabitur. Ita ad tuum argumentum Petre, respondeo; ergo, inquis, nutat hæc potestas, si necessaria sint ad definiendum huiusmodi auxilia: certè non magis, quàm prædestinationis, quoddam nequeat impleri nisi fugâ, & poenitentia peccati.

Sed antequam ad singula veniam: quæro à te Petre, cur hanc Pontificiæ authoritatis defensionem susceperis? An illius studio, vel potius nostri odio, id est ut illius iura tueris, aut nos calumniaris? Certum est hanc secundam dilemmatis partem inficiaturum; aliàs te sycophantam profitereris: si verò te vna in Sedem Apostolicam charitas urgeat; cur quæso, omissis criminibus, leuiora, aut nulla insectaris? Ignoras ne quæ ex variis authoribus de hac potestate retuli? Qui magis iam in ordinem cogunt, & coarctant? An Molina, an illi, qui negant ex opinione probabili nec proximè, nec remotè reuelata quæ impugnari, & defendi possint saluis rebus, quas docet Scriptura, non posse fieri articulum fide certum, non potentia Pontificæ vitio, sed conditione ha-

ius rei, minimè secundum leges in Ecclesia constitutas ad definitionem idoneæ & opportunæ? An illi, qui id fieri posse negant, cum res est necessariâ consecutione iuncta mysteriis à Deo reuelatis? Atque ita sentit ex tuis Molina, & Granado, ex nostris vero (quod sciam) nemo hoc scripsit.

Cut ergo tuis prætermisissis, qui huiusmodi potestatem coarctant, nos insectaris, qui eam longius, latiùsque protendimus? Molina abrogat Pontifici, quod Vasquez concedit cuique fidelium, & Theologorum, ut sibi indicant fide diuina credendum, quod ratione naturali viderint necessario reuelatis connexum, licet non fuerit reuelatum. Hoc non permittunt Molina, Granado Pontifici, quæ sibi visa fuerint iuncta rebus fidei præcipere aliis, ut eadem fide credant.

Hæc certè si quæ sit iniuria in sedem Apostolicam (nolo enim Molinam damnare,) multò grauior est his omnibus, quæ Thomistis obiicit Raynaudus; nempe quod negent eas opiniones definitionibus in fidei articulos opportunas, quæ possint astrui, & negari saluis rebus immediatè reuelatis. Hic est meus sensus, quem Ecclesiæ iudicio ex animo, & humillimè subiicio, ne occultare meum nomen quis putet, ut liberius loquar, neque enim opus habeo meas cogitationes silentio comprimere, aut verbis ambiguis fucare. Sanè quidquid ipse sentio, velim ab omnibus sciri, maximè ab his, quibus de me iudicandi Deus contulit potestatem, retractaturus, quæ ipsi improbauerint.

Sed ad argumenta redeamus. Quid censes, Petre, ex doctrinâ D. Thomæ damnatum esse, aut posse damnari de Conceptione immaculatâ taceo ob decretorum reuerentiam, & aliunde quidquid eâ saluâ in hanc rem dici potest, à nobis scriptum est superioribus sectionibus: vnum tantùm addo ad querimoniam de corrupto à Cosma Morelles in editione Antuerpiensi D. Thomæ primi sententiarum dist. 44. quæst. 1. art. 2. ad 3. quasi hæc editio à Romanâ dissentiat. Certissimum enim est utramque conuenire, & eo loci nihil habere D. Thomam ab aliis dissonum. Quare gratis nullo fructu corrupisset Morelles D. Thomam, cum nihil sententiæ communi noceat illa responsio quæ ita habet, *dicendum quòd puri-*

*tas intenditur per recessum à contrario, & ideo potest ali-
quod creatum inueniri, quo nihil purius esse potest in re-
bus creatis, si nullâ contagione peccati inquinatum sit, &
talis fuit puritas B. Virginis quæ à peccato originali, &
actuali immunis fuit. Hactenus D. Thomas. Sed audia-
mus Doctissimum Patrem Nicolai annotatione ad illius
loci marginem, immunis fuit à peccato per exemptionem
preseruatiuam, quoad peccatum actuale, quod non com-
misit; vel per subsequentiâ liberationem, quoad origina-
le, quod iuxta mentem D. Thomæ incurrit. Nam hoc etiam
sensu immunem Grammatici appellant, qui ab obligatione
precedenti liberatus est, & ipsemet D. Thomas alibi im-
munem ab originali culpâ vocat eum qui per Baptismum
purgatus est, ac multo magis cum est plena etiam reliquia-
rum culpa purgatio qualem fuisse in Beatissimâ Virgine
profiteretur distinct. 17. unde frustra putatur à quibusdam
aliud hic sensisse, quàm aliis locis passim docet.*

PARAGRAPHVS PRIMVS.

*Responsio ad quartam obiectionem de voto
solemni, & simplici.*

DE voto solempni & simplici vult Petrus à Bonifacio
VIII. & Gregorio XIII. damnatam esse D.
Thomæ sententiam his tribus capitibus, quod votum
solemne contendat esse iuris diuini, eoque solo consti-
tui Religiosum, & nullâ Pontificiâ, aut creatâ potestate
dissolui. At contra repugnant Constitutiones Pontifi-
ciæ, quæ differentiam voti solempnis, & simplicis repe-
runt à iure humano; vtrumque dispensatione dissolui,
vtriusque Ecclesiæ probat; vtroque Religiosum constitui
vt Gregor. XIII. statuit de Patribus Societatis, licet
rei sint voti simplicis tantum.

Hoc Argumentum putabat ineluctabile doctissimus ille
P. Iesuita, cuius in paræneticâ memini; sed nodi indis-
solubilis duplex occurrit solutio. Imprimis quid vetat,
quin totam hanc disputationem ad leges probabilium
opinionum reuocemus cum Vasquez, aliisque doctissi-
mis Societatis Theologis, quos cum Magister Spilla,
S III)

qui Theses sustinebat Tholosæ, obieciſſet arguenti, reſpondit *ſe nec Vaſques, nec alios morari, aut curare*, ſed tantum utgere ſe argumentum a Conſtitutionibus Pontificiis: Sed lepide reſpoſuit alter, nos plurimum veſtros Theologos curamus, quia *ſalutem ex inimicis non recuſamus*. Igitur nihil incommodi video, ſi cum Vaſque, & aliis, hanc voti ſolemniſ, & ſimplicis differentiam expendamus ad leges opinionum probabilium. Quid verò inferri poteſt contra D. Thomam? Nihil proſus, niſi hoc unum; cum ſcilicet de voto ſolemni non habere certam & evidentem apud omnes, ſed probabilem opinionem, cui potuit Pontifex contrariam Canoniſtarum ſententiam antereſſe. Sed quis inde, niſi inſanire velit, ſententiam D. Thomæ eſſe damnatam aſſeret? Non certe magis, quam dum in opinionum probabilium occurſu, & conſictu, una aſſumitur alterâ relictâ, ſed nullâ ratione, vllâ cenſurâ notata.

Nemo dubitat quin Chriſtus potuerit ſtatuerè diſcrimen inter votum ſolemne, & ſimplex, quale omnes agnoſcunt intercedere venditionem inter initam agri, ſolis oppignoratiſ fructibus, ſervatâ proprietate, & venditionem agri perfectam dominiî translatione. Primum venditionis genus multis nominibus differt ab altero, ſed hoc maximè (quod ad rem noſtram confert;) ut ager venditus oppignoratiſ vni fructibus, poſſit validdè, quamvis illicitè vendi alteri emptori. Hoc exemplo ſententiæ Canoniſtarum & Theologorum maximè D. Thomæ de voto ſolemni, & ſimplici diſcordes illuſtrantur. D. Thomas, ut inquit Soto, votum ſimplex cenſet eſſe veluti fructus agri venditos, ſervato dominio; ſolemne vero eſſe quaſi venditionem agri, dominio cum fructibus in ius emptoris omnimodè tranſlato, quia hoc voto ipſe vouens, & eius fructus, & opera Dei obſequio mancipantur, & novo iuris & conſecrationis genere eius accenſentur poteſtati.

Hac differentiâ quaſi eſſentialicè ſervatâ, reliquæ conſequentur. Hinc enim colligitur apertè (ſervatâ rei cum exemplo ſimilitudine) votum ſimplex conſolari poſſe, nec repugnare matrimonio, ſicut nec oppignoratiſ fructus vni, prohibent agri dominium in alterum tranſferri; ſed ſi voto ſolemni fiat illa mancipatio vouentis, &

operum in Dei obsequium, iam quod de prædestinatis Christus asserit, comperet voto solemniter consecratis; *nemo rapiet illos de manu mea*. Extra omnem controuersiam positum est, Christum hoc discrimine potuisse verumque votum sancire; An verò reipsa instituerit, D. Thomas ita censet, quia iudicat, Christum Religionis statutum plenum cumulatam constituisse, cum Dei perfecta sint opera, & illud maximè, quod præ aliis vim, & nomen obtinet perfectionis; quare credibile est voluisse vouentes se, suâque opera Deo in totum dedere.

Hæc est vera mens D. Thomæ. Quid ad ista Canonistæ & ex antiquis plerique Theologorum & Recentiorum? Plurimi negant illud discrimen à Christo fuisse institutum, & illud à solâ authoritate Ecclesiasticâ reputant. Certum est opinionum neutram deduci necessariò ex ullo principio è scripturâ, & traditione recepto. Manet ergo discrimen illud per se anceps, & quasi suspensum. Quid ad hæc Summi Pontifices? In re incertâ id certum est, liberum fuisse illis alterutrius sententiæ delectum, iuxta affectum cuiusque vel temporum, vel rerum rationem. Ferunt Pium V. addictissimum D. Thomæ, & statui Religioso, cui se ab infantia deuouerat, rogantibus à solemniter voto dispensationem, respondisse se id non posse; quia censebat discrimen à D. Thoma constitutum probabilius esse, & iuxta veriore regulam certiora sectabatur. Aliis aliter visum est. Canonistis adhæserunt aliqui Pontifices in hac re, si tamen verum est eos à voto solemniter Religionis dispensasse.

Quid ergo? Inducimus Pontifices inter se digladiantes? Ne id quidem, sine ullâ mentis dissensione quisque usus est iure suo, nulli negata libertate, ne dicam Pontifici, sed ne priuato quidem, ut quisque sequeretur, quod sibi probabilius visum foret. Igitur inquires, iam damnata est D. Thomæ sententia decretis Pontificum. Non magis certè, quàm à P'o V. sententia Canonistarum; cum id se posse negare, quod asserunt illi licitum fuisse. In his enim quæ a ratione, & quæ ad agenda inter homines pertinent, non est certitudo fidei, nec exigitur nec compossibile: hanc de voto solemniter obiectionem etiam a solutione statim mox diluimus. Sed ad S. Thomæ dispensationem hæc ex Soto mihi visa est ex-

peditor, & latè ad multa patere, quæ possumus inoffenso pede decurrere, & in speciem dissentientes Pontifices conciliare; quisque in re probabili, cuique suum permisit arbitrium.

Aliam viam init Ioannes à S. Thoma, quæ non longè à nostra abest. Votum solemne nihil est aliud, quàm sui in Dei obsequium, & ad perfectionem consiliorum mancipatio, quodam consecrationis ritu peracta, acceptaque Dei nomine ab eo, qui illius vicem gerit. Hæc voti solemnitis descriptio est veluti summa quædam, & complexio, atque commentarius omnium, quæ variis locis tradit S. Doctor de voto solemnî. Equidem 2.2 q. 88. a. 7. ad illud requirit quandam consecrationem spirituales ex institutione Apostolicâ ad nos deriuatam, vt habet D. Dionysius c. 2. de Eccles. Hierarch. & eodem loci adiungit conuenienter adhiberi solere huiusmodi apparatus, & ritum, cum rei alicuius sit traditio, aut mancipatio. Hinc veluti nuptiarum solemnitas, quæ est signum, & ornamenti mutui coniugum consensus, quo vtròque se dedunt, sui que inuicem potestatem, & copiam faciunt. Alio loco addit hunc ritum consecrationis indiuiduæ voto solemnî spirituales esse, & ad Deum pertinere, quia solemnitas accommodari solet rei, quæ peragitur. Vnde alia est militiæ, alia nuptiarum solemnitas; illa sit concursu, & apparatu nobilium, & armorum, ista sponsi, & sponsæ ornatu, atque amicorum, cognatorumque conuiuio.

Et cum votum promissio sit, quâ nos Deo alstringimus; conuenit ritum consecrationis spirituales, & à Deo auctore esse, illo saltem genere institutionis, quod dicimus ieiunia, orationes, aliâque pia opera à Deo esse, quia vniuersim illa præcipit, & commendat, licet humano præcepto statutis temporibus, & locis tum ieiunia per quadragesimam, aut festorum peruigiis, tum preces cum certâ verborum formulâ fiant. Ita etiam Dedicationis, aut Consecrationis ritus, quibus res Deo mancipantur, à Deo generatim, deinde Ecclesiasticâ autoritate sub determinatâ specie constituuntur, & si absint huiusmodi ceremoniæ, nullum est, inquit S. Doctor, votum solemne: non quod reuera in huiusmodi consecratione posita sit vis, aut pars voti so-

lemnis, sed quod nequeat rata esse professio religiosa, nisi huiusmodi consecratione adhibitâ, iure Ecclesiastico institutâ, non solum in signum & apparatus affectus interni, quo nos Deo deuouemus, sed etiam vt hac significatione rata sint vota, & accepta Dei nomine ab Ecclesiâ.

Hinc cautè dixit S. Doctor, voti solemnitatem attendi debere secundum illum Spiritualem ritum, qui ad Deum pertinet, non tamen in eâ sitam esse: quia ex illâ vt dispositione, aut conditione firma vouentium in Dei potestatem, & obsequium mancipatio, quâ vnâ constat voti solemnitas, & vis, & vinculum indissolubile, quacumque autoritate, aut dispensatione Ecclesiâ. Sicut enim, inquit S. Doctor, calicem consecratum, quandiu est integer, non licet ad prophanos vsus adhibere, quamuis consecrandi ritus, & formula sit autoritatis Ecclesiasticæ, aut iuris humani; quia vbi ritus ille consecrationis est celebratus, res ita censetur addicta Deo, vt nequeat aliò transferri. Hinc illud Leuitici vltimo, *quod semel est Domino sanctificatum, non potest in alios vsus commutari*. Hinc Leuit. c. 27. *Animal, quod potest Domino immolari, si quis vouerit Sanctum Domino, & mutari non poterit*, nec melius malo, nec peius bono. Nihil ergo iuuat ad dissoluendum dispensatione humanâ votum solumne, aliquid Ecclesiastici iuris admiscere, quo ratum sit, vt insinuat Bonifac. VIII. neque D. Thomas negat. Vnde non infert Papa, permissam Ecclesiæ dispensationem, sicut nec rem Deo sacram in vsus communes assumere licet, quamuis sit Deo consecrata ritu ab hominibus instituto.

Addit S. Doctor eiusdem q. 2. 11. solumne votum castitatis religioso statui iunctum, ab illo quod Clericus emittit, dum sacris Ordinibus initiat, differre multis nominibus: sed hoc maximè, quodd illud statum Religionis efficiat, & constituat, alterum vero accadat Ordini sacro, & ab eo nihil repugnet seiungi autoritate Ecclesiasticâ, quâ solâ illi fuit annexum: secus est de Religionis statu, cuius votum continentia pars est, non accessio. Certum quidem est ius vtrumque votum probandi, & ratum habendi ad Ecclesiam pertinere. Nam

D. Thom. in 4. dist. 38. q. 1. a. 1. ait nullam esse professionem Religionis, nisi fiat, ut iura præscribunt, maxime si à Prælato Religionis, quam quis proficitur, non fuerit excepta. Hoc tamen discrimen est votum castitatis, Religionis inter & Ordinis, quòd istud accedat homini sacris initiato, & addatur Ordini instituto auctoritate Ecclesiasticâ, quâ sciungi, & dissolui potest.

At de statu Religioso secus est, ubi enim semel illum quis ingressus est, nihil opus habet nouo statuto ad perpetuam castimoniam astringi; quia huiusmodi onus inest illi necessario, sine vlllo nouo Decreto annexum; alia quippe est Religiosi, alia Clerici ad rem subiectam ratio. Hic consecratur ad Altaris ministerium, cui conueniens est castimonia, non prorsus necessaria, ideo Ecclesiastico iure, totum illi quasi additamentum, & ornamentum adiungi debet, & potest auferri; Religiosi vero vna ratio, vnus finis est castè viuere, sicut Calicis consecrati Christi sanguinem conseruare. Vnde habet Ecclesiæ consensu ut vota sint rata, non autem nouo statuto, quod exigat castitatem ab eo, qui vouit hoc vnum, cum ad professionem admissus est.

Nulla igitur Diui Thomæ à Summis Pontificibus est in hac re dissentio; concedit enim, quod Bonifacius sancit, nempe à Iure Ecclesiastico esse voti solemnitatem, quia nulla foret, nisi Ecclesia votum approbaret, & nisi fieret legibus ab illâ præscriptis: Sed ubi semel acceptum est, multò perennius est, & minùs reuocabile, quàm ius in Calicem consecratum, aut illius ad res diuinas vsus.

Dices hac re ad minus à D. Thoma Bonifacium dissentire, quòd votum quodcumque solemnne, siue Ordinis, siue Professionis, & perfectionis religiosæ asserat, solo iure Ecclesiastico matrimonium dirimere, cum tamen D. Thomas velit saltem Religionis votum seipso, aut iure diuino eam vim habere; atque hinc negat vllâ dispensatione Ecclesiasticâ, posse hoc impedimentum Religiosæ professionis tolli: sed gratis dicitur à Bonifacio assertum, quodcumque votum solo Ecclesiæ statuto irrita & nulla matrimonia facere: Nam eo capite de voto, & voti redemptione non dicit sibi eam quæstionem

propositam dissoluendam, quo iure votum solemne dirimat matrimonium, an Diuino, an Ecclesiastico: sed ita rescribit se interroganti.

Nos consulere voluisti quod votum debeat dici solemne atque ad dirimendum matrimonium efficax. Et quæstionis solutionem sic prosequitur. Declarandum duximus oraculo præsentis sanctionis, illud solum votum debere dici solemne quantum ad post contractum matrimonium dirimendum, quod solemnizatum fuerit per suspensionem sacri Ordinis, aut per professionem expressam, vel tacitam factam alicui è Religionibus per Sedem Apostolicam approbatis; reliqua vero vota etsi quando matrimonium impediunt contrahendum, non tamen rescindere possunt matrimonium post contractum. Ita Bonifacius. Quo loco id vnum vult explicatum, quæ vota dirimant matrimonium; nec curat ex quo capite hanc vim habeant, an ab Autoritate Ecclesiasticâ, an à Diuina, de hoc enim ne verbum quidem.

Sed instabis; Pontifex vtriusque voti solemnitatem vult repeti ab Ecclesiasticâ constitutione: Ergo vis dirimendi matrimonium non inerit voto Religionis à iure diuino: quæ sententiæ D. Thomæ est consecutio, votum esse indispensabile, verum priorem consecutionem contra hanc pestremam, & doctrinam D. Thomæ, nullam esse demonstrat exemplum Calicis consecrati rebus sacris addicti Iure Diuino, & irrenocabili, quandiu inest consecratio, licet hæc orta sit ab autoritate humanâ. Neque Bonifacius VIII. Decretum condit, quo statuat votum Religionis matrimonium sequens nullum facere: id enim plures Canones antiqui habent, & Innocentius III. cap. *Cum ad Monasterium* apertissimè sententiam D. Thomæ habet his verbis: *Abdicatio proprietatis, & custodia custitatis adeo annexa est Regula Monachali, ut contra eam nec Summus Pontifex possit licentiam indulgere.*

Atque hoc Decreto Innocentij D. Thomas quæst. 88. citata art. vlt. veluti muro arreo suam de voti solemnitis vinculo nullâ potentiâ creatâ solubili munit, & aliorum interpretationem acriter refellit: imò quod præsummâ eius modestiâ mirandum, ignorantia accusat

iuriconsultos, quod asserant Summum Pontificem posse ex professo Religionem facere, non Religiosum. Id enim, inquit, non magis potest, quam ne sit Sacerdos, qui est Sacerdotio initiatus. Neque ad arbitrium Prælatorum Ecclesiæ quod est sanctificatum, amittit sanctificationem etiam in rebus inanimatis, ut Calicem consecratum desinere esse consecratum, si maneat integer; multo minus potest efficere aliquis Prælatus, ut homo Deo consecratus, quandiu viuit, consecratus esse desistat. Et tunc subsumit, *solemnitas autem voti, in quâdam consecratione, seu benedictione vouentis consistit, quæ perfectam in Dei obsequium mancipationem trahit irrevocabilem, licet quidam Iurista ignoranter contrarium dicant.* Vbi Franciscus Syluius commentario ad illum Articulum, ex illâ reprehensione insolitâ sancto Doctori modestissimo, & reprehensionum parcissimo observat, *quam serio, & quàm arcto assensu huic sententiæ adhaeserit iam grandior ætate, quamvis iunior contrariam fuisset securus.*

Ad istud etiam caput spectant duo longe leuiores, quæ obiicit Petrus, nempe à D. Thoma assertum 2. 2. q. 189. a. 2. voto solemnitate tantum hominem constitui Monachum. At Gregorius XIII. sanxit Patres Societatis, emissis votis simplicibus verè Religiosos fieri. Item 2. 2. q. 64. a. 7. ex antiquis Canonibus irregularitatem ait incurri ex homicidio ob iustam sui defensionem securo: quam sustulit Clementina V. Dum hæc obiicit Theophilus D. Thomæ, incredibilem calumniandi sitim prodit: vitio illi vult verti, quod Theologum egerit, non Prophetam, quod Pontificum, qui se præcesserunt Decreta securus, non præviderit, quæ multis post sæculis erant Pontifices definituri. Velim scire à Petro an D. Thomas peccauerit, & sit virgâ censoriâ castigandus, quod cum Summis Pontificibus & eo iure, quod tunc temporis vigeat, docuerit, solo voto solemniter fieri Religiosum, & irregularem homicidam sui defensionis causâ, vel rectè securus sit doctrinam suo sæculo receptissimam? Si hoc vltimum respondeas Petre, quare illum cædis? Quare à Pontificibus damnatum calumniaris? Si verò falsa scripsit; cur illi errorem imputas, quem à Conciliis, à Pontificibus hau-

fit, in quos importas quam in D. Thomam moliris calumniam.

Cerrè D. Thomas moderatiùs locutus est ad mentem Gregor. XIII. quam antiqui Pontifices, qui disertè assertebant *non posse cum effectu Religiosum censeri, nisi solemni voto astrictum*. At D. Thomas ab hoc verbo, *non posse*, abstinuit, & tantum pronunciauit *non fieri Religiosum, quam per vota simplicia*, quasi ex vi innatâ, ipsis, licet non negauerit fieri posse, addito votis simplicibus Decreto Pontificis, ad quod viam potiùs aperuit, quàm occluserit q. 13. a. 2. Supplem. ad 3 p. ubi licet neget votum simplex ex suâ vi innatâ dirimere matrimonium, insinuat tamen posse sanciri, & assumi in impedimentum dirimens matrimonium: atque ita nihil illi deerit adiuncto Decreto Pontificio ad constituendum Religiosum. Ad id enim summè necessaria est quasi perennitas status, quæ ex voto simplici facile poterit repeti, si decreto Pontificio fiat obex perpetuus matrimonij. Atque hoc genere Religiosorum: per vota simplicia præter patres Societatis à Gregor. XIII. institutos Alexander VII. Ecclesiam ornauit, & locupletauit Patribus Doctrinæ Christianæ Institutore Beatissimo Patre Cæsare de Bus, quos aliis Ordinibus accensuit, licet sola vota simplicia emittant.

PARAGRAPHVS SECVNDVS.

Responsio ad quintam, & sextam objectionem, ubi vindicia Cani, Bzonij, & Combessij.

Quamuis assiduitate miranda cuiuscumque sint generis, vilescent, & ad malum aut bonum, etiam si summa sint, desinamus commoueri, si quotidiana sint & frequentia, & aliunde tot & tanta vitia hoc vno Theophili libello obseruauerim: fateor tamen, Lector erudite, me horum malorum frequentia, & atrocitate in quemdam deductum esse stuporem, ut cum has calumnias lego, vix mei compos sim, vix oculis meis credam; & putem me monstra fingere, & insomnia.

Quis enim sibi persuadeat, nedum Christianum, Sacerdotem, Religiosum & Theologum rerum diuinarum

scriptorem, sed vel hominem paganum, cui reliquum sit aliquid humanitatis, ausum esse scribere adeo crassa mendacia; qualia sunt hæc ex infinitis pauca, *Cannum libro 5. de locis c. 5. asserere, qui negaueris, errasse Pontificem approbando aliquod Religiosum institutum, imprudentia, vel etiam stultitia nomine, iure optimo summis rationibus esse arguendum: Bzouium vero ad annum 1371. multum esse in nosandâ erroris grauissimi institutione Franciscanorum; nec exhorruisse scribere artificem omnis doli Sathanam, persuasisse Minoritis, spectare ad perfectionem nihil habere, & omni Domino carere etiam in communi, hancque Bzouij cacochymiam esse ipsammet VViclefi delirationem damnatam Sess. 8. Conc. Constantiensis: Martinum Polonum Ordinis tradicatorum auctorem esse fabula Ioanna Papissa, ut bene statuit Trithemius (ipsissima sunt verba Theophili) libro de scriptoribus, &c. Reliqua minutiora mendacia omitto, quæ statim refellam.*

Quis non obstupefeat ad hæc tria, quæ nescio an atrociora sint, an apertiora? Si Deum non reuereris Petre, nec iudicia eius, & pœnas posthumas, quæ manent mendaces & calumniatores, cur ad minus homines non reuereris, neque curas omnem apud illos bonæ fidei opinionem perdere? Quid enim statuturos putas de te, cum eorum, quæ de Cano, de Bzouio, & Martino Polono refers ex Trithemio, compererint ne vllum quidem verbum extare? Quam tibi fidem habituros existimas de his quæ nullo teste refers; sed vis errata correctâ posterioribus locorum Cani editionibus; cum ea, quæ illorum oculis subiicis, comprobauerint à te peruersissime conficta, aut falsa esse? Sed quid conqueror, quodd huiusmodi mendacia scribas, quasi possis quidquam aliud agere? Certè si Onidius de se testatum reliquit: *quidquid tentabam dicere, versus erat.* De te veriùs asseram quidquid tentas scribere, mendacium respicere & calumniam.

Sed ad rem, quidquid non solum charitas præcipiebat tacere, & excusare apud alios, sed ipsamet æquitas iubet boni consulere, & probare, in calumniæ & inuidiæ argumentum rapis. Iam sæpius dixi, & pluries, quam vellem, me cogis repetere, hoc vnum nostris
Theologis

inſediſſe conſilium & ſtudio, vt ingenitam à Religio-
nis incunabulis in Summos Pontifices reuerentiam, co-
lerent incorruptam integerrimè, nec vllâ ſpecie adula-
tionis adulterarent, nec ipſiſſime hæreticis ſuſpectam
facerent. Quare cum non dubitarent ſe in eo, quod pro
Sede Apoſtolicâ non ſolùm aduerſus hæreticos, ſed
etiam contra Catholicorum nonnullos certamine ſuſ-
ceperant, ſpectaculum factos eſſe Deo, Angelis, & ho-
minibus, id maxime aduſi ſunt, vt omnem Aduerſariis
anſam auferrent ſuſpicandi, ſe aſſentari Summis Pon-
tificibus, & magis eorum gratiam, quàm veritatem
curare. Ideo viſum eſt illis è re fore Eccleſiæ Catholi-
cæ nullum ius, nullam poteſtatis partem aſſerere Sedi Apo-
ſtolicæ, quàm inuidtis argumentis ex Scripturâ, & ex
Traditione non eſſent probaturi. Sed iniuriam facerem
Cano, ſi eius cauſam, aliis quam ipſuſmet verbis age-
rem.

Ille igitur vere inter Theologos Tullius Chriſtianus
lib. 5. cap. 5. ita habet ad calcem. *Quid tandem aduerſus
hæreticos diſputando ille proficiet, quem viderint, non
iudicio, ſed affectu patrocinium authoritatis Pontificiæ
ſuſcipere; neque ita agere, vt diſputationis ſuæ vi lucem
ac veritatem eliciat, ſed vt ſe ad alterius ſenſum, volun-
tatemque conuertat? Non eget Petrus mendacio noſtro,
noſtrâ adulatione non eget. Ordines igitur vel probare vel
refellere, quoniam non è ſcientia id ſolum, ſed etiam è
prudencia pendet, non ad ea pertinet, in quibus Summus
Pontifex errare nequit. Ita ſummâ eloquentiâ, & pari
ſapientiâ Canus. Deinde pluribus Conciliorum, & Sum-
morum Pontificum testimoniis probat aboleri oportu-
iſſe diuerſos Ordines confirmatos: & ad finem appo-
nit verba, quæ ſummâ fraude interpolauit Theophilus.
Noſtro verò, inquit, ſaculo tam multa ſunt Religiones à
Pontificibus confirmata, vt qui eas omnes tueri voluerit,
vel utiles, vel neceſſarias; hic imprudentia, ne dicam
ſtultitia nomine, iure optimo, ſummiſque rationibus ar-
guatur. Vbi ſunt, Theophile, verba à te ex Cano relata,
eos qui negent Pontificem errare poſſe, & reipſa errare
ſtultitia nomine eſſe arguendos: quaſi idem ſint verba à
te falſata, & à me ſinceriffime ex Cano relata? Sed ipſe-
met Canus calumniam Petri quaſi præſcius vidiffet,*

occupat, & vno verbo refellit, *eos qui Summi Pontificis omne de re quacumque iudicium temere, ac sine delectu defendunt, hos Sedis Apostolica auctoritatem euersere, non firmare.*

Non puto, Petre, ita contentionis funem te velle, non solum aduersus hæreticos, sed etiam Catholicorum plurimos trahere, vt Summis Pontificibus in legibus, aut articulis fidei condendis ex Cathedrâ non sis contentus infallibilem potestatem asserere; sed etiam in quæstionibus facti, vel priuatis iudiciis, quæ ad Fidem nihil pertinent, non patiaris posse falli, aut aliquando prudentiam in illis desiderari; quandoquidem ipsimet Pontifices, & maximè Innocentius III. referente Cano, eodem loci dicit, *iudicium Dei veritati quæ non fallit, nec fallitur, semper iuncti: iudicium autem Ecclesiæ nonnumquam opinionem sequi, quàm & fallere sape contingit, & falli: propter quod ait, interdum contingere, vt qui ligatus est apud Deum, apud Ecclesiā sit solutus: & qui liber est apud Deum, Ecclesiastica sit sententiâ innodatus.* Hæc Innocentij dicta interpretanda sunt ex Cano de iudiciis, seu facti quæstionibus, quæ magis à prudentiâ pendent, quàm à scientiâ, qualia vult esse idem Cano ea iudicia, quibus nonnumquam Ordines ab Ecclesiâ admittuntur inutiles potius, quàm perniciosi: & sano nisi ad hanc Cani sententiam confugiat Petrus, vix ipse hæresis notam euadet illâ Ioannem XXII. & Clementem VIII. carpendi licentiâ, quos vult ita deperisse Dominicanos, vt parum abfuerit, quin vnus Molinam, alter vero Minoritas quosdam (vt mox videbimus) Sanctos, & Catholicos hæresis damnaret, & supplicio vltimo permiserit. Hic error longè periculosior, & grauior est, eo quem in approbandâ inutili Religione admitti posse, concedit Canus. Quis enim neget maioris esse periculi insontes damnare, quàm improbos non conuictos impunitatem obtinere?

Sed vt rem accuratiùs expendamus, & tua Petre, à Cano, & Combessio calumnia depellatur; Putas ne, te felicius pro Sede Apostolicâ pugnaturum, si contendas quasi pro fidei veritate Pontificem, nequidem in quæstionibus facti, aut vt priuatum Doctorem decipi posse, vel in iudiciis priuatis quidquam dare gratiæ, aut odio,

quàm Canum, & Combessum, qui iudicia doctrinæ, & scientiæ, à iudiciis prudentiæ, quaestiones iuris & facti, & in ipso Pontifice duas quasi personas, Pastoris communis, & priuati hominis distinguunt, atque ab illis, non ab istis ablegant omne periculum erroris, quorum distinctioni & sententiæ phares Catholici consentiunt? Quare igitur hos duos tantùm Dominicanos laceßis; cum tot habeant ex aliis Ordinibus authores eiusdem opinionis? Quare in re dubiâ non iudicas ex æquo & bono? Quare non permittis in probabilibus quemque suo sensu abundare?

Si dicas nihil concedendum hæreticis eorum, de quibus contendunt nobiscum, & cum illis perinde ac cum Dæmone in malo pertinaci agendum; contra alij censent, Hæreticos non esse exasperandos, quia non eò loco sunt, quo Dæmones, quin possint respiscere, & aliquid eorum pertinaciæ indulgendum, vt sensim ab errore ad veritatem deducantur. Esto, nolint admittere, nullum vnquam Pontificem, vt priuatum hominem errasse, & in priuatis iudiciis lapsum; felicissimè eunt illis, & nobiscum agetur, si hoc illis concedas vitrò, & vicissim ab eis obtineas, rata & vera esse Decreta, quæ vt Ecclesiæ supremi Pastores ex Cathedra pronuntiant.

Cur apud nos damnas, quod apud vos receptissimum est; nec mediocriter res vestras promouit? Nempe conuenientissimum esse, vestros Doctores quasi incertos studia in contraria scindi, quosdam laxiores opiniones, nonnullos in re morali rigidiores sectari: quia cum varia sint hominum ingenia, & multis rebus capiantur, quibus offenduntur alij, istis tutæ sententiæ ad Euangelij amussim constitutæ, aliis placeant liberiores; optimum visum est & aucupij, & prudentiæ genus, abundare huiusmodi lenociniis, quibus quemque allicias ea, quâ scis trahi voluptate. Patere igitur etiam apud nos non vnâ omnium esse sententiam. cum de probabilibus agitur; quia vix vlla est, quæ non sit opportuna ad aliquod Ecclesiæ bonum; si tempestiuè adhibeatur, sicut factum esse contendo ab his authoribus, quos vis minis reuerenter habuisse Sedem Apostolicam. Innumera ad illius dignitatem augendam, &

authoritatem confirmandam dixerat eo capite noster Canus, quibus agrè fidem præbuisset Lector, nisi ad calcem illius capitis eâ libertate testatus fuisset, se ab omni assentatione alienum scribere vno veritatis studio.

Eadem defensionis ratio in tuto ponit Combessum, quòd Summum Pontificem vt priuatum hominem non exemerit ab omni errore: Nam præter quod in re apud Catholicos controuersa, secutus est communior sententiam, cui è Societatis Theologis plures adhæserunt, eam censuit non solum expeditiorem, sed etiam opportuniorem, ad frangendam Hæreticorum contumaciam, eorumque animos aliqua indulgentia deliniendos, & occultâ vi ad salutem, & veritatem deducendos.

Verùm si hoc humanitatis officium noluisti Combessio & Cano, vel fortè non potuisti præ nimio in illos æstu exhibere; debueras ad minùs respondere argumentis & exemplis, quibus suam probant sententiam: vel si te imparem huic rei sentiebas, aut fortè abreptus criminandi ardore malebas illi indulgere, quam honesto, & utili Ecclesiæ labori incumbere, oportebat profecto, abstinere à falsandis, & detorquendis eius verbis, vt illum in inuidiam traheres: quasi stultitiæ damnasset eos, qui negant reipsa errasse Pontifices in approbanda aliqua Religione. Debebas etiam sincerius de opere Cani, quod Cardinalis Pallauicinus Doctissimi Auctoris *opus aureum* vocat, iudicare, quàm vt omnino pereat ob labeculas aliquo, tum rei litterariæ, & Theologiæ grauissimo damno. Multa quidem dicis fuisse inserta primis Cani prioribus editionibus, quæ velis nostrorum hominum curâ, & summâ charitate Terentij Alciati, aliorumque societatis erasa, & correctâ, ne eius Lectio prohiberetur.

Hæc refers, te solo teste, sed cum te ita apertè eiusdem libri & capitis, plagiarium & corruptorem probauerim; quam tibi fidem habebimus de his quæ nullo testimonio probas? Certè mendacij conuictus donandus es mercede mendacium, quibus nec vera dicentibus creditur. Vnum tantum extat apud Canum eorum quæ refers lib. 4. cap. 2. in illa verba Corinthiorum 1. *Fidelis Deus, per quem vocati estis in Societatem filij eius. Qua*

inquit Canus, *Societas, cum Ecclesia Christi sit, qui titulum illum sibi arrogant, hi videant, an Hæreticorum more, penes se Ecclesiam existere mentiantur.* Fateor hoc liberius dictum, non tamen ut mereatur dici *glossa Canina*, ut inquit Raynaudus, neque ob illud vnicum verbum perire opus immortalitate dignum oporteat.

Non dicam eam Cani animaduersionem fuisse sensum, non modo priuatorum hominum; sed etiam Academiæ Parisiensis, cuius in hanc rem decretum refert Orlandinus lib. 15. historiæ Societatis; & Thuanus libro item 15. primi tomi idem habet. *Iesuitæ, inquit, postea nouo, atque ut plerisque visum est, superbo nomine appellati sunt.* Certè non adeo grauis offensa fuit improbarum illud nomen, quod subiunxit Cano, se non morari, ut debuerit eius liber in eadem esse damnatione, cum tuo, Petre, de Martyrio per pestem opusculo, & librorum prohibitorum numerum augere, ut quadam infortunij societate dolorem qui te discruciat, aliquantulum delinires.

Ferunt Perdices canea inclusas, amissam libertatem, & aliis seruata ægrè ferre, & vocem fingere ut liberas inducant in laqueos, & suam captiuitatem eiusdem mali consortio solentur. Non longè mi Theophile, abes ab illâ indole: Ita enim te comparatum vbique prodis, ita te liber ille tuus damnatus, diu noctûque agit; ut non dubitem, quin ad tormentorum tuorum leuamen aliquod velles, opus Cani de locis, & quos liber alios ad iungi Cathologo librorum damnatorum; ut sensum, & dolorem tuarum miseriarum iniquo hoc remedio leuares. Sed præ omnibus velles maximè Canum damnatum, quia caligantibus oculis, non potes ferre micantissimum splendorem illius operis, quod non solum tua opuscula obscurat; sed etiam omnium, qui hæcenus de locis Theologicis scripserunt exarguet.

Sed vide, quàm immane distes a generosissimâ Cardinalis Pallauicini indole. Ita illum dicam ad modestiam, ad humanitatem genete, naturâ, & studio comparatum, ut in toto Concilij Tridentini Historiâ vix passus sit aliquod verbum asperum sibi excidere, etiam contra iuratos Ecclesiæ hostes. At tu nullo conuictorum genere abstinens, etiam contra grauissimos, & religiosissimos vi-

ros. *Quæ contra Canum scribis, confer cum Cardinalis Pallauicini de eodem Cano elogio, & iudicio; Pallauicino Canus author doctissimus vno loco, & altero selectæ, & copiosæ eruditionis, Tibi vero vt ais, Canis rabidus, & molossus est. Pallauicino opus aureum sunt vbiq; loci illi Theologici; Tu spumas rabientis potiùs, quam voces dicis efferati molossi. Dicam quidem te ex eadem matre, Religione scilicet eadem cum Pallauicino natum; sed hoc discrimine, quod ille loco sit Iacobi electi; tu Pilos Esau imaginem præferas. At ineptirem, si te dissimilem genere & moribus cum sapientissimo & nobilissimo Cardinali conferrem.*

Sed contumeliæ in Canum leuiore sient comparatione illarum, quas in Bzouium importat; adeo abreptus Dominicanorum odio, vt parum absit, quin Beguardos, Pauperes Lugdunenses notâ hæresis eximat; vt illam inurat Ioanni XXII. aliisque Summis Pontificibus, qui huiusmodi errores suis decretis damnarunt. Hoc enim vnum crimen esse potuit Bzouij, & EymERICI, quodd huiusmodi decreta in Annales Ecclesiasticos & in directorium inquisitorum retulerint.

Quidquid huic narrationi addit Theophilus, mendacium est, aut calumnia; vt nulla veritas eius accusationi constet. Sciens aut imprudens nescio, malè citat Bzouium ad annum 1,71. vbi ne verbum quidem, nec toto illo anno de hac re, sed ad annum 1,18. & pluribus sequentibus, atque his verbis illius anni, & huius hæresis historiam exorditur: Si quo vnquam alio, hoc præsertim tempore, impletum est in Ecclesiâ Orthodoxâ illud solemne Propheticum; qui manducat panem meum, leuauit super me calcaneum suum. Quidam enim ex Ordine Fratrum Minorum, cum omnium bonorum Religionis suæ dominium Romana Ecclesiâ attribuerent; nec se alios, quàm usufructuarios rerum tam mobilium, quam stabilium esse profiterentur; comedentes panem (ex illorum sensu) Ecclesiæ, contra Ecclesiam insurgere, & tum schismati viam aperire, materiam ministrare, tum hostibus Apostolica sedis occasiones non modicas suppeditare cæperunt.

Deinde refert ad verbum Ioann. XXII. decretum in huiusmodi Apostatas ex Ordine Franciscano; de quibus ne suspecta sint, quæ dicam, nolo quidquam ex Bzo-

nio decerpere ; sed aduoco in testes duos grauissimos scriptores Annalium Ecclesiasticorum , Spondanum , & Odericum Raynaldum ex Oratorij , id est ex Baronij familiâ , qui nihil deterritus Bzouij , & Spondani labore in prosequendis , & absoluendis Baronij Annalibus , vltimus omnium idem opus aggressus est , & putauit Annales Baronij , quasi iure familiaris sibi absoluendos esse. Ille itaque egregius & sincerissimus Author , necnon Spondanus ad annum 1318 , grauiora , quàm Bzouius de huiusmodi Apostatis narrant , & omisso Spondano , qui videri poterit , ita habet Raynaldus.

Signifer horum hypocritarum extitit Henricus à Cerâ familia Franciscana Apostata, atque haresiarcha, qui plures ex eo Sacro Ordine infecerat. Desciuerant ij adeo à B. Francisci institutis, quibus reuerentiam in Christi Vicarium, Cardinales, &c. imperauerat, atque in eum superbiam viri impj proruperant, ut duas fingerent Ecclesias, alteram diffluentem opibus & deliciis, obsitâque sordibus, cui praeffet Romanus Pontifex; alteram humanarum rerum inopiâ diuitem, ac virtutum omnium genere exornatam quâ ipsi soli continerentur, negarent Praefulis vllâ, vel ad ius exercendum, vel diuina conficienda autoritate pollere, virtutem Sacramentorum à Sacerdotis sanctitate pendere, Christi Euangelium extinctum olim in ipsis renixisse, & florere effluebant.

Addit idem Author Ioannem XXII. Bullâ quæ incipit : *Fratrum Minorum sacer Ordo, &c.* Huiusmodi nefandas hareses ut elideret singulas cumulatâ diuina scriptura Oraculis refutasse. Præterea tantarum hareseon calumnias his Pseudo Minoritis contendere Authorem recentiore, (Dermittium intelligit ;) quibus adde Vvaddinghum, & Theophilum, ex inanibus coniecturis huiusmodi Franciscanos à sodalibus contra fas accusatos, eo quod obsolescentem, inquit Dermirius, *sancti Francisci disciplinam suo splendori restitui cuperent, & maxime Petrus Ioannis, qui sub Nicolao IV. incurrit aliquorum, quibus visa laxior placuit, indignationem ex studio vera disciplina.*

Sed contra Dermittium ita prosequitur Raynaldus. *Crederim authorem hunc ignorasse Petram Ioannis insignem Hypocritam, plurimum hareseon inuentorem, iudicem*

riâ sententia damnatum; neque aduertisse, quàm longè absit à sedis Apostolica in condendis decretis maturitate, dignitatique, ob leues obrectatorum susurros, ita Christianum orbem commouere. Hæc ad Theophilum pertinent. Addit efficaciora eius calumniis refellendis, cum refert huiusmodi Apostatarum sectam contaminatam hæresibus, Coelestino Pontifice germinasse, in eam Bonifacium VIII. Benedictum XII. Clementem VI. leges distinxisse, quod inter alia confingerent, omnem Ecclesiæ auctoritatem in ipsos refusam; Pontifices vero illius inanem umbram, & laruam præferre: neque excusari posse huiusmodi Pseudo-Minoritas, quod percussi anathemate auctoritatem soluendi peccata sibi arrogarint; ob quam, & superiorem hæresim illis rogi parati fuerunt, & Massiliæ quatuor flammis addicti propter hæresim de paupertate, ut habet manuscriptum Vaticanum: Ita Odoricus.

Nolim negare Franciscanorum nonnullos paupertatis studio, in hos errores fortè incautos fuisse abreptos. Id enim primum contendebant, abdicationem omnis proprietatis in bona priuata, vel communia pertinere ad perfectionem paupertatis Euangelicæ, quam suo exemplo Christus, & Apostoli nos docuerunt, & suâ regulâ S. Franciscus suis filiis præcepit. Hastenus hæc vera, & ad minus probabilia sunt, nec hæresim respiciunt. Sed ab eâ vix excusare possis quæ subiungebant, hanc abdicationem dominij in quodcumque bonum, seu priuatim, seu in commune possessum, à Christo usurpatam & sanctitam, ita certum esse, ut qui negauerit, hæreticus sit, vel qui passus fuerit aliquod in commune bonum, non solum à perfectione regulæ Franciscanorum deficiat; sed etiam ab exemplo Christi, & à lege Euangelij.

Hinc veluti rupes à monte abscissa in varios errores præcipites abierunt; à quibus Theophilus vult immunes fuisse; ut Dominicanos, & Bzouium grauet odio, & inuidiâ paupertatis, & perfectionis Euangelicæ profligatæ; eosque participes faciat impietatis Vviclefi, in Concilio, inquit, *Constantiensi damnati, quod docuerit Fratres debere victum quarere labore manuum, non mendicitate*; quasi vnica sit mendicitatis, seu paupertatis Euangelicæ ratio indiuisa, expers dominij in quodlibet bo-

num: quasi possessio quæcumque bonorum, quæ in commune habentur, paupertatem Evangelicam prorsus dissoluat.

Quid ergo tibi voti paupertatis reo? Quid aliorum Ordinum, qui bona in commune possident Religiosis fieri? Excludendi sunt omnes à Mendicantium, & Evangelicæ paupertatis Professorum catalogo, ac proinde priuandi mercede à Christo promissâ iis qui sui causâ omnia reliquerunt, & ipsum sunt secuti? Quis hæc absurda & impia non videat necessariâ consecutione deduci, si semel vnica sit mendicitatis species à Vviclefo proscripta? Si ita sit, vt tu ponis & fingis, Vviclefitæ fuerunt Pontifices à Raynaudo recensiti, qui hanc tanquam præcipuam hæresim, & reliquarum originem damnarunt in pseudo-Minoritis; quod paupertatem Evangelicam vnus gradus indiuisi agnoscerent, non minùs positam in bonorum possessorum in commune, quàm priuatim abdicatione. Quis ferat Theophile, tuam in permiscenda sacra prophanis audaciam? Quis numerum inire possit mendaciorum, quibus hanc contra Bzouium vix semipaginæ accusationem constasti? Non satis tibi fuit ipsi improperasse, vt sacrilegium, quod non exhorrueris scribere artificem omnis doli sathanam persuasisse Fratribus Minoritis spectare ad perfectionem nihil habere, & omni dominio carere etiam in communi.

Omitto quod apud Bzouium nullum horum verborum extat. Non dicam potuisse citra vllam culpam his verbis damnare illam vnica mendicitatis speciem à Summis Pontificibus explosam. Parum tibi visum est nos Vviclefi assecclas fecisse; & Bzouium incurrisse excommunicationem ob damnatum Fratrum Minorum institutum, quasi excommunicationem commeruerit relatis decretis Pontificum in hæreticos; quasi non aliud sit Franciscanorum institutum, quàm quod fingebant iurati hæretici, & veri Pontifices profigabant.

Non es contentus hac colluie falsationum; voluisti hanc cum Minoritis concertationem, vel accusationem Bzouij tribus additis nouis plagiiis adornare, & cumulare. Initidè huius operis monui, vix nos posse tuo scripto respondere, quin eius vitii inficiamur, quia co-

gimur referre, & refellere quæ tu futilissima, & falsissima scribis. Primo de Dominicano, cui vis cognomen esse Ioannis, cuiusdam Episcopi parasitâ, mendicitatem religiosam in gratiam Episcopi scommatibus proscindente, quem vis obmutuisse cum rubore obiectis Sancti Dominici ultimis verbis, quibus filijs suis paupertatem hereditariam relinquebat, & intorquebat maledictionem in eos qui prouentus in Ordinem à se constitutum inducerent. Hæc quæ inter pocula narras dicta gestaque, magis ad simposiaca, seu ad Lutheri conuiuialia colloquia pertinent, quam ad seriam disputationem; nisi forte maledictionem paternam intentes in Dominicanos qui annuos census habeant, quasi autoritas Pontificia, quæ ex te possit votum solemne dissoluere, nequeat in tuto ponere eos, quibus huiusmodi census non solum permittit, sed iubet etiam seruare, aut vetat vel minimum minuire.

Multò futilius est secundum, quod addis: negata ab vno concionatore Dominicano Opaniæ in Morauia stigmata Diui Francisci quæ soli hæretici negant; his eodem contextu, & mendaciorum filo alluis ab Eymérico secunda parte directorij visum, hæreseos damnare accommodationem illorum verborum ex Apocalypsi. *Vide Angelum ascendentem* Francisco olim à Sancto Bonauentura factam. Quam longè excutris, Petre, per varias orbis regiones, per superiora sæcula, vt vndequaque comportes varia in Dominicanos testimonia sine vlllo iudicio, aut delectu, aut fide, atque hoc vnico fructu, vt malum tibi nomen nouis titulis asseras, & confirmes. Quid enim ille concionator, potus tuâ relatione, qui nonnisi commenta fingis contra tot illustres testes, tot viros graues, qui Diui Francisci stigmata credunt, & venerantur?

Ignoras Benedictum XI ex Ordine Prædicatorum ad Sedem Apostolicam assumptum Authorem fuisse Festi stigmatibus sacri? Quod etiam apud nos celebratur die 17. Septembris, nec vllus, quod sciam, ex nostro ordine hoc decus Diuo Francisco negauit, nisi velis Diuam Catharinam Senensem eiusdem gloriæ, & gratiæ consortem fieri, perinde esse ac Franciscum hoc miraculo fraudare: quasi inter diuos apud quos regnat charitas

summa, interfit hæc æmulatio, etiam apud homines pudenda, ut nihil suum putent; nisi habeant singulare, & eximium, idemque sit alicuius boni iure excidere, ac quemquam illius vilitate consortem habere.

Eadem fide, & conscientia accusas Eymericum amaro zelo effervuisse in accommodatitium sensum verborum Apocalypsis, *Vidi Angelum*, in laudem Diui Francisci. De Rege illo fertur inaurasse, aut potius in aurum solidum commutasse quidquid contingeret etiam lutum; tibi vero nihil sanctum, nihil verum quod non arripas in calumnie argumentum. Eymericus secunda parte directorij questione 15. Begardorum erroribus enumeratis, hunc 50. recenset, viros spirituales, quales se reputabant, & Evangelicos quorum opera extincto Antichristo fundanda erat Ecclesia 12. tribus Israël prædicaturos, ex qualibet tribu 12. millia electorum conuersuros in milites aggregandos Angeli manibus habentis signum Dei viui, id est Francisci stigmatibus Christi vulnere insigniti, & hos milites signatos pugnatos cum Antichristo, eumque occisuros ante aduentum Elie & Enoch. Hæc insomnia Beguinorum damnabat Eymericus ex Apocalypsi deprompta; non verba in Francisci laudem accommodata: quæ potuissent sine dubio excusari, nisi tot fuissent erroribus corrupta.

Quem putas, Theophile, hæc tua quæ aperio, commenta stuporem lectoribus incussura? Vel quid tibi sensus futurum sit, si vnquam ista legeris, nescio. Certè si quis probus tot calumniarum conuinceretur, non puto superstitem futurum huic accusationi, sed dolore, aut pudore animam exhalaturum. Verum de te nihil tale timendum, aut sperandum. Imo sicut sitibundo turbida aqua suauior est ambrosia; famelico nullus panis est insipidus: ita tibi calumniarum in Dominicanos inexplebili siti flagranti nullum non placet conuictorum, aut mendaciorum genus. Ita enim cæco impetu in nos ageris, ut somnies Dominicanum esse quidquid Sedi Apostolicæ aduersatur.

Heretici, inquis, ad Pontificum subsannationem vix aliquid crebrius ructant, quàm narrationem de Ioanna Papiſſa, At primus orbi hæc merces insulis Martinus Polonia

Ordinis Prædicatorum, ut benè statuit Trithemius libro de Scriptoris.

Quis ad tuam Petre proiectam nos traducendi audaciam non obstupescat, aut cohorrescat? Id enim à te quero, cum Trithemium voces in tuæ accusationis testem; cum duo asseras, Martinum Polonum Dominicanum fuisse: deinde primum euulgasse Ioannæ Papissæ fabulam; in quam vis accusationis partem adsciscere testimonium Trithemij? An in vtramque partem, an quod fuerit Dominicanus, vel fabulæ Auctor? Certum quidem est Trithemio Martinum esse Prædicatorum Ordinis, scripsisse præclara opuscula, qualia sunt tabula decreti, & Chronica succincta. Sed vbinam benè statuit, primum orbi Ioannæ Papissæ commentum aperuisse?

Dices inde haberi, quòd Chronicam succinctam teste Trithemio scripserit, in quâ licet hoc taceat Trithemius, legitur huiusmodi fabula, & hoc potes hoc argumento confirmare. Vnus est tantum scriptor Martinus Polonus nomine, isque Dominicanus, qui teste Trithemio scripsit Chronicam, in quâ extat huiusmodi fabula; ergo vnus Dominicanus primus omnium euulgauit Ioannæ Papissæ. Quid ad istas tuas consecutiones? Minabaris nobis antè maledictionem paternam, quòd paupertatem Euangelicam nobis in hæreditatem à Dno Patre Dominico relictam dilapidauerimus, admissâ in commune bonorum possessione: ego tibi contra repono ex cap. 5. Isaia certio rem maledictionem, quam in tuum caput aduocasti hac consecutionum, vel potius mendaciorum catenâ, *ve, qui trahitis iniquitatem in funiculis vanitatis, & quasi vinculum plaustrum peccatum*

Tria assimis incerta, aut potius falsa: primum dari tantum vnum Martinum Polonum; contra te sentiunt innumeri doctores, qui duos distinguunt, Cisterciensem vnum, Dominicanum alterum. Deinde sit vnus tantum; Bellarminus, Possevinus eiusdem tecum Societatis, moribus dissimillimi asserunt Monachum Cisterciensem, non Dominicanum. Quidquid sit, certum est terribilem fabulam non extare in Chronicâ Martini Dominici, sed Cisterciensis. Vltimo tandem, quamuis

extaret; inuictis argumentis, & testimoniis manuscri-
ptorum demonstratur Beroldum Typographum Ba-
sileensem hac fabula auxisse Chronicam; Martini Po-
loni, quæ cum pluribus aliis figmentis deest manuscri-
ptis, quæ extant in diuersis bibliothecis, maxime Parisiis
apud Gabrielem Nanderum est vnum exemplar in
membranis exaratum valde diuersum ab impresso, in
quo nulla sit mentio Ioannæ Papiſſæ, Teste Labæo in
bibliotheca noua.

Ita ex Seuerino Bino, ex Suffredo refert Carolus de
Viſch, in bibliotheca Cisterciensi: sed eadem habet
Aubertus Mireus multoque fortiora ad refellendas
Theophili fraudes, in sua rerum Belgicarum Chronicâ
pag. 142. *Inter Leonem IV. & Benedictum III. inducti
quidam & male feriat homines, mediam Ioannam Pa-
piſſam inferuerunt apud Sigebertum Gemblacensem, Ma-
rianum Scotum, & Martinum Polonum, qui nihil un-
quam tale scripserunt, aut somniarunt, ut probant in
primis Sigeberti exemplar authogr. phum, aut illius acute
scriptum Gemblaci. aliaque plura manuscripta; in quibus
nihil prorsus de Ioanna illa scriptum, ne ad oram quidem
librorum reperi.*

Quod ad Marianum Scotum attinet, Chronicon eius
in Pergameno caractere vetustissimo ipsius, Sigeberti
ætate, ut videtur, exaratum, in eadem bibliotheca
Gemblacensi aduersatur, in eo nulla Ioannæ Papiſſæ
fit mentio: Martinum Polonum nihil tale scripsisse te-
statur is, qui illius Chronicon Agrippinæ annis supe-
rioribus edidit. Ex quibus liquet Sigebertum, Maria-
num, & Martinum Polonum tanquam fabulæ huius
authores, & assertores à Baronio, aliisque iniuste ac-
cusari.

His omnibus à me relatis, conuenio te P. Theophile,
cur ausus sis hæc verba scribere; *Primus orbi has merces
intulit Martinus Polonus Ordinis Prædicatorum, ut benè
statuit Trithemius lib. de scriptoribus? Ut taceam nihil
tale scripsisse Trithemium, nec ex illo posse erui huius
tuæ accusationis vllum argumentum, nisi funiculis va-
nitatis, nisi incerta & falsa pro veris, & compertis ha-
beas. Vel sciebas quæ ex Bellarmino, Posseuino, Mireo,
Carolo de Viſch retuli, aut duos esse Martinos Polonos,*

aut vnum Cisterciensem, eiusque Chronicon corruptum ab hæreticis, posteriorem esse ætate Sigeberto, & Mariano Scoto, quorum libri easdem corruptelas passi erant, vel hæc omnia ignorabas?

Postremum istud nec fateberis, nec si velles, credi posset de te, tanto librorum helluone: si verò primum vltro agnoscas, quâ fronte, quâ conscientia scripsisti tamquam rem compertissimam, & benè à Trithemio constitutam, Prædicatorum Ordinis scriptorem inuexisse primum fabulam Ioannæ Papissæ? Quasi apud omnes esset certissimum, quod negant Possevinus & Bellarminus Martinum Polonum esse Dominicanum, quasi Sigebertus, & Marianus Scotus, apud quos eadem fabula legitur, Martinum Polonum, vno aut altero sæculo non præcesserint.

Dices forte istorum, non Martini Poloni interpolatos fuisse libros à Plagiariis, & illis insertam fabulam Ioannæ Papissæ: Non dubito quin præcluso omni alio perfugio, isto te recipias: qua vero id ratione queas ipse videris, cum iidem Authores testentur hos tres historicos eandem ab hæreticis iniuriam passos. Sed ipse nullam causam admittis, quæ Dominicanos apud te excusare possit.

Famem Antiqui eleganti epitheto *Malesuadam* vocabant, quòd homines quos premebat, ad horrenda quæque voranda, & si cætera decissent, ad se ipsos mandendos cogeret. Quo te Petre non adigit, non auri, sed calumniæ Dominicanis inferendæ sacra fames? Parum est quòd obuia quæque futilia, falsa, & minùs ad deterendam nostram famam, quam quæ ad alendam vitam fame enecti deuorant, opportuna arripias, Te ipsum etiam videris prodere, & omnem probi hominis de te opinionem profligare; cum adeo enormia, quæ facillime falsi conuincantur, nihil dubites comminisci: in tuum erit æternum dedecus, has duas lineas cum dimidia scripsisse, *Primus orbi hac merces intulit Martinus Polonus Ordinis Prædicatorum, ut bene statuit Trithemius libro de scriptoribus*: quibus plura deprehendimus mendacia, quàm extent litteræ, aut syllabæ: & post ista adhuc Velasco iudice, audies tanquam *totius sapientie compendium*; veriùs dixisset omnis plagij, aut si

quod grauius nomen occurreret. Sed ad reliqua progrediamur.

PARAGRAPHVS VLTIMVS.

Responsio ad septimam obiectionem & ad postremam Diatribæ partem.

Quod ex Diatriba 2. superest, simile est superioribus, nisi deterius dicas, sicut solet cuiusque rei malæ finis pars esse pessima. Verè dixeris *arenam esse sine calce*, aut fabularum & conuitorum colluuiem, quæ nullam nec veri similitudinem, nec speciem habeant argumenti, quia nihil probant.

Huius generis primum est illud, quod dicis à nullo atrocius dehonestatum Bonifacium VIII. quàm à Prolomæo Lucensi Ordinis Prædicatorum, eidem affingente hæresim, quâ litteris ad Regem Galliæ scriptis sibi vindicabat dominium rerum otanium, non solum spiritualium, sed etiam temporalium, tanta asseueratione, vt hæresis damnaret, qui dominium hoc amplissimum vel minimùm minuerent. In primis nullum huius accusationis Testem, nisi teipsum habes; nec citas quo loco, aut libro hæc Prolomæus de Bonifacio scripserit, & quid mali fuisset retulisse, quod eo sæculo vulgarissimum erat: at tu iniquus es in Dominicanos, vt à simplici narratione historica rei compertissimè, putes atrocius habitum à nostro Prolomæo Bonifacium VIII. quàm à Nogareto, qui illi armata manu alapam impegit, quam à Sara Columna, & aliis, qui Ananiz, quasi caprium detinuerunt, quam ab his, qui maligne scripserunt ingressum vt vulpem, &c. adeone tibi atrox visa est, in Bonifacium iniuria, retulisse ex vulgi rumore eam opinionem secutum, quam è Societate Theologus Santarellus, vt veritatem Catholicam scripto libro propugnauit?

Prolomæi Lucensis ante tuas Diatribas erat mihi prorsus nomen ignotum; ex Posseuino didici scripsisse historiam Pontificum vsque ad Cælestinum V. decessorem Bonifacii; ergo non attigit Pontificatum Bonifacii.

prima Religionis elementa ; vt nescias hæc ad fidei dogmata non referri.

Addis, Dominicanos conclamasse, & inflammasse Innocentium X. in miselli Teuthonis caput, qui vulgarat conclusiones de virtute fidei, & iudice controuersiarum; quia inter eas vna fuit, non esse de fide, tunc singularem Pontificem nunc sedentem esse Christi Vicarium; & tamen hanc eandem doctrinam fuisse explicatissimè traditam à Turrecremata, Caietano, & Cando Dominicanis.

Non attendis Theophile, dum Dominicanos læcessis, te in Summos Pontifices crudeliùs sœuire. Quid enim vis à Dominicanis Innocentium X. fuisse inflammatum in Teuthonis caput, vt persuadeas Ecclesiæ hostibus, ita solere circumagi Summos Pontifices, eorumque prauis affectibus indulgisse magis, quàm bonum & æquum inspexisse? Vide quot & quanta importes mala in Sedem Apostolicam; dum cæco in nos impetu ruis. At Turrecremata, inquis, & Caietanus senserunt negatam à Teuthone Propositionem non esse de Fide, eaque saluâ liberum esse opinari, & disputare cuique, in quam libuerit partem.

Quid inde? Alii plures Dominici secus, opinati, sunt nec potest negari, sententiam, quæ asserit esse de fide, hunc singularem Pontificem nunc sedentem esse Vicarium Christi, fauere fidei Catholicæ, vt ex Cardinali de Lugo tract. de fide. Disp. 1. Sect. 13. constat. Quid ergo vis rueri opiniones minùs consentaneas fidei Catholicæ, & iuribus Summorum Pontificum, & Dominicanorum erga rem Catholicam zelum inuidiæ insimulare; eo quod germanus ille è vestris discipulis esset? Eo temeritatis deuenisti, vt asserere audeas, *Hæresim Lutheranam ex cupiditate nimia Dominicanorum omnia ad se trahentium progerminasse*. Parum abest quin Lutherum in totum absolvas, vt Dominicanis crees totam malorum inuidiam.

Lege historiam Concilij Tridentini ab Eminentiſſimo Cardinali Pallauicino conscriptam, Part. 1. lib. 1. cap. 3. vbi comperies indulgentiarum promulgationem in Germania tunc arbitrio creditam fuisse Alberti Archie-

piscopi electoris, qui hac in re sponte suâ uti voluit, opera Ioannis Terzel inquisitoris Dominicani, simili delegatione pro Equitibus Teuthonicis paulò antè feliciter perfuncti, cuius proinde eo in munere obeundo prudentia, atque integritas apud omnes manifesta erat. Quòd autem Lutherus tunc Augustinianus hoc ægrè tulerit, & æmulatio aliqua inter Dominicanos, & Augustinianos intercesserit, non ideo ortus hæresis Lutheranae tribuendus est Dominicanis, qui ab Electore ad promulgandas indulgentias accersiti fuerant.

Quid ergo Theophile, hæresis Lutheranae initia Dominicanis attribuis? Adeo iniustus es in Dominicanos, ut ipsam infallibilitatem, pro quâ acriter in speciem pugnas, paratus sis Pontifici abrogare, si contra tuum sensum illis faueat. Hac de causâ parum abest, quin Ioannem XXII. in dubiorum Pontificum ordinem releges. *Tanta, inquis, Ioannis in Cyriacos inclinatio animi, ita ut ab eis ad nutum circumageretur: quanta mala in Ecclesiam per illud tempus induxerit, nemo ignorat.* Animaduerte Lector, quâ temeritate, de Ioanne XXII. ob eum loquatur hoc loco Raynaudus, Dominicanos iniuriosos esse Pontificibus, asserit & Ioannem XXII. multa mala induxisse in Ecclesiam ex nimia in Dominicanos inclinatione, & ab iisdem etiam circumactum esse.

Multa deinde addit commenta, inter quæ illud palmarè, quod Minores per Ioannem à Cyriacis concitatum malè habiti sint. Constat autem, ut iam diximus, aliquot Minores tunc temporis incidisse in multas hæreses, ut videre est in Annalibus Ecclesiasticis ab Odorico Raynaldo conscriptis loco supra citato: quare non à Dominicanis in fratres Minores concitatus fuit Ioannes XXII. sed ex Pontificis munere debuit in hæreses lapsos compescere; & nisi correxisset, in officium Pastoris peccasset.

Theophilus ita in Dominicanos furit, ut Summis Pontificibus iniuriosus sit, & hæresum patrocinium suscipiat; quod multo gravius est ipsa hæresi; nam ut in eadem causâ Pseudo Minoritarum, quidam Cardinalis relatus à Raynaldo sapientissimè, *atrocissimum est errantis crimen, errorum vindictis.* Sed videat Theophilus, quàm dissimiles sibi, & hominum huius sæculi fuerint Dominicani, dicit Ioannem XXII. maximè Domini-

canis fauisse : sed ut agnoscat , Dominicanos omni humano affectu intactos , aut maiores : sciat , nihil illis antiquius veritate fuisse ; ideoque eidem Ioanni XXII. constantissimè restiterunt , quod visionem beatam ad finem sæculorum differret , & animabus extra corpus positis vsuram beatitudinis negaret.

Sed te intestabilem prodis Theophile ; dum accusas Dominicanos , *concredita de fide Inquisitionis munus*, tam dirè præter Pontificum sape numero mentem obisse ; ut populorum à Pontificibus abalienationem, & Religionis à tam austeris ministris defensa horrorem multis ingenerarint. Pontifices , mandata ministris suis præscribere , non dare prudentiam posse ; itaque , inquis , homines claustro , & vepribus scholasticis assueti , rudes apicum iuris , & à sale , quo omnia negotia , ut prudenter obeantur , condenda sunt , malè constituti feralitate suâ , simplices facile percellunt , non absque graui Religionis detrimento ; ut cum immuni publici boni , & Ecclesiastica Hierarchia sauciatione deprehensum est in inferiori Germaniâ.

At hæc Raynaude , sunt tui cerebri figmenta , & vera calumniarum portenta. Quam enim adeo atrocis accusationis fidem facis ? Quo testimonio probas ? Scilicet vnius Eleutherii Nissenii hominis ignoti. Sed hic superum , & hominum fidem imploro , & te calumniatorum deterrimum demonstro , quod nullâ conscientia , nullo pudore , (vtrumque enim prorsus eiurasti) Dominicanis velis imputare Geusiorum in Belgio strages , & tragœdias inquisitionis odio natas. An ignoras , in Belgio , inquisitionem Hispanam , non Dominicanam , quæ omnino diuersæ sunt , fuisse constitutam ? Sed tu nullâ fide vtramque confundis , ut omnium malorum , quæ vel hæresis , vel metus Inquisitionis his Florentissimis Prouinciis intulit , Dominicanos authores facias.

Neque æquius iudicium , aut maiorem fidem demonstras in causâ Iansenistarum , quam vbique obtrudis , sed tuis artibus falsatam. Putasne nos ignorare , etiamsi pertinacissime taceas , huius successus felicitatem vnice Thomistis deberi ? Vbi nam è toto opere Ianseniano quinque propositiones primum ad Examen vocatæ sunt ? Nonne Parisiis in scholâ Sorbonicâ , vnde ad Episcopos Galliarum delatæ , & subinde Sedis Apostolicæ iudi-

cio subiectæ sunt ? Sed cuius beneficio primam victoriam, unde reliquæ consecutæ sunt retulistis contra septuaginta ita acrimosos defensores ? Nonne Patris Nicolai Dominicanæ Theologi operâ ; qui fama eruditionis reliquis non solum Thomistis, sed etiam aliorum Ordinum Theologis sibi adiunctis, suffragiorum numero vicit Iansenianas partes ?

Nonne conuentum est, & sanctè iuratum non agi de DD. Augustini & Thomæ Doctrinâ, quam sanctam & saluam volebant omnes ; sed totam pugnam, aut iudicii aleam verti in Iansenium Thomistis perinde, ac Molinistis infensum ? Cur hæc Parisiis, & Romæ peracta dissimulas ? Si nesciās, cur ignota tibi adeo fidenter tractas ? Si nosti : cur tot mendaciis rerum fidem corrumpis ? Quale est illud *Patris Generalis exquisitum*, ut tu loqueris *capiti lauium à Pontifice*, quod huiusmodi errorum omni conatu damnationem impedires : cum certissimum sit conuenisse cum tuis, nec ipsum, nec Ordinem huic iudicio reclamaturum.

Nec minus commentitiæ sunt illæ litteræ, quas dicis Parisiis scripsisse ; ut nostri Theologi pugnarent pro Iansenio ; cum certissimum sit, eius consilio, aut potius imperio omnes contrâ stetisse, & plures etiam in ipsum calamum distinxisse. Nec minùs à vero aliena sunt, quæ garris de Patribus, Nolano, Reginaldo, & Dufour. Patris Nolani detenti causam ignoras, si Iansenismo defenso adscribas ; si quæ causa fuerit subiti discessus Romæ Patris Reginaldi ; certo scio non fuisse dissensum à censurâ. Non suscipio Patris Dufour defensionem, cuius ipse partes ita pro dignitate impleuit, ut Aduersariorum ora obmutuerint. Thesis, ad S. Honoratum defendendam adeo falsum est Patres nostros probasse ; ut ipse Vicarius Generalis primus proscripserit, & Cancellarii, atque Nuncij Apostolici auctoritatem aduocarit.

Atque hæc de Iansenianâ censurâ semel dicta sufficiant, ne videar tua vitia imitari, qui multoties nullo ordine, nullo iudicio eadem reperis, ut videaris magis temerè, quàm consultò scribere. Nam quod de Iansenii consensu cum Thomistis toties obstrudis ; adi Patrem Bernardum Guiard Prouincialem Parisiensem, adi Sibyllam, & innumeros alios Thomistas, qui libris editis

demonstrant, quam immane distet cholera nostra à Iansenio: adi ipsum Iansenium, qui nihili sibi vult esse commune cum Thomistis; repete memoriâ, quam non potes ignorare expetitam à vobis nobiscum, & factam concordiam.

Quoad mentem Diui Thomæ circa B. V. Conceptionem nos sapius arguis, tanquam Diui Thomæ plagarios, & interpolatores. Magnâ, fateor, opus est patientia, vt importunissimæ huius hominis molestias feramus. Modo inueheris in nos quasi cæcos, & nullius, aut præposteræ iudicij, quod seruum Dei eius matri anteponamus; quod nobis antiquior sit Thomæ, quàm Mariæ gloria, & illius doctrinæ defendendæ causâ, huius innocentiae aduersemur. Subinde traducis nos tanquam Thomæ corruptores, & loca, quæ de Conceptione agunt, à nobis deprauata cum Pineda contendis.

Antequam ad hæc respondeam, vnum te rogo, ne à te ipso dissentias. Scis comprobatam Susannæ castimoniam dissensione accusantium. Non mirum duos testes seorsim interrogatos diuersa, & contraria respondisse. At quis non miretur, vnum à se ipso disungi? Meministi dictum ab antiquis, virtutem constare conuenientia: sed ea magis necessaria est ad vim testimoniorum: si diuidantur, euanescent: Quo iudicio, & quo sensu nobis impropere, corruptum Thomam, & Deiparæ antepositum? Non sunt magis hæc contra nos, quam quæ Christo obiecebantur, conuenientia testimonia: si interpolauimus, si corripimus Thomam; ergo non ipsam Dei Matri præferimus, sed nostrum sensum, quem hac corruptelâ confirmauimus. Quicquid sit, non potest vtrique accusatio stare, nec debemus vtriusque inuidiam ferre; oportet saltem nos ab alterutrâ leuari.

Quoad stigmata Sancti Francisci, iam diximus à Dominicanis nunquam fuisse negata; & cum hæc commenta scribis, videris exemplo inimici hominis zizania seminare discordiarum inter duos nobilissimos Ordines, neque enim hoc decus præripit Francisco, qui illud asserit D. Catharina, vt legere est in officio sacre Virginis. Sacra Congregatione Rituum confecto, & approbato; in cuius lectionibus habetur, ex Domini Crucifixi vultuerum cicatricibus quinque radios ad quinque loca corpo-

ris *D. Catharina* descendisse, eosque radios *D. Catharina* precibus, colorem sanguineum mutasse in splendidum, & in formâ purâ lucis peruenisse ad manus, pedes, & cor eius.

Eiusdem furfuris, ut tuis verbis utar, est quod addis ex *Ænea Sylvio* (sed hoc loco omisso, ut soles, ne mendacij conuincaris,) quemdam Theologum nomine *Nicolaum Burgundionem* ex Ordine Prædicatorum, acriter impugnasse causam *Eugenij*. Sed præter quod dubium mihi est, an ille fuerit *Dominicanus*, quia iam comperimus te ad libitum hac veste donare quoscumque reperis malè affectos in Summum Pontificem. Quid mirum? si ex omnibus Christiani orbis partibus contra *Eugenium* coniuratis vnus repertus fuerit *Dominicanus*? Sed cur taces in eodem Concilio tantâ constantiâ Sedem Apostolicam à Turrecremata nostro fuisse propugnatam; ut à Summis Pontificibus *Defensoris Fidei* gloriosissimum nomen promeritus sit. Concilium *Basileense* præ cæteris Oecumenicis ab Ordine nostro instituto habitis, Theatrum fuit longè celeberrimum, vnde *Dominicanorum* virtus, per totum orbem Christianum latè effulsit. Hoc singularissimum habet, nec cum aliis commune; quod in eo primum contra hæreticos *Hussitas*, ut mos est synodorum oecumenicarum ferè perpetuus, acerrimè, & feliciter *Dominicanorum* maximè operâ pugnatum sit: deinde quodam illius temporis infortunio & inimici hominis arte, tota belli moles in caput *Eugenij IV.* versa est. Quid inter has rerum vires, & grauissima certamina, ac pericula toti Ecclesiæ impendentia *Dominicani*? Intrepido & inuictò animo contra hæreticos, & pari constantiâ pro *Eugenio* steterunt.

Primâ dimicatione quatuor grauissimis Theologis, qui in hæreticos agerent, à Concilio delectis, præiuit *Ioannes Ragusinus* Ordinis Prædicatorum procurator generalis, & totis octo diebus vnus cum *Hussitis* spectante Concilio, & sedentibus Patribus, manus conseruit: certamini successit per quatuor dies *Decanus Cameracensis*; tertius totidem diebus disputationem prosecutus est ex nostris *Henricus Kalteisen* hæreticæ prauitatis *Coloniæ* inquisitor. Hæc *Dominicani* in hæreticos,

Quid verò in causâ Eugenij, si fides sit Æneæ Syluiio scribenti historiam Concilij, cui à secretis erat, Pontificibus Romanis tunc infensissimo, & illius interpreti Theophilo, vnius Nicolai Burgundionis industriâ videtur Eugenius causâ cecidisse. Ad illud caput accusationis in Dominicanos ex relatione apud me dubiâ responderam coniecturis; quia nihil comperti habebam, nec diligenter euoluenti historiam Æneæ, ipsum nomen Nicolai Dominici occurrerat. Nunc reperto apud ipsum aliorum potius, quàm meâ diligentia loco, quo huius Nicolai meminit, comperi malâ fide (vti solet) Theophylum, & præter Syluij mentem Dominicanum illum falsò accusatum ab aliis; qui Eugenium validissimè propugnabant, defecisse.

Neque enim id significant verba Syluij: & ideo locum subiecit Theoph. vnde calumniam deprompsit, ne ex illius loci lectione fraus euanesceret. Deinde Turrecremata dux strenuissimus aciei pro Eugenio stans, Burgundionem absoluit: Narrat enim eò deductam Eugenij causam; vt quidam hæreticum, nonnulli relapsum pronuntiarent, reliqui ab utroque eximerent, id est omnes, si nouem excipias, qui nec sibi consentiebant. Ex his verò septem erant Episcopi, cœnobitæ duo Episcopatus spe in aduersas Eugenio partes allecti.

Dices nostrum Nicolaum ad hunc postremum ordinem pertinere. Quo id teste probas, cùm verba Syluij alium sensum habeant? Neque Turrecremata id tacuisset, neque alij eiusdem instituti Patres passi fuissent id impunè Burgundionem tentasse: Nam is est mos Dominicanorum, teste locupletissimo Eminentissimo Cardinale Albitio (qui id se ab Urbani VII. felicitis memoriæ, Summi Pontificis ore excepisse asserbat;) si quis Dominicanorum à fide in Deum vel Summos Pontifices, vel minimùm deflecterent, nullos habere qui se prius, vel acrius ad pœnas ipsismet Dominicanis deposcerent.

Tuam hanc secundam Diatribam concludis plaga, quam Cytiaeos asseris honorè Pontificum inferre, per iniustam persæpeli librorum damnationem Roma per eos factam, vel curatam: de quâ, inquis, tot querela verbo, ac scripto pridem insonuerunt ab hæreticis; nec raro à Catholicis.

cas se iniuriâ oppressos videntibus. Doleo Theophile, te adeo inordinato erga tuos libellulos, à Sacra Congregatione Iudicis iustissimè damnatos affectu transuersum agi; vt hæreticorum patrocinium, & partes suscipias.

Itaque non est hæc causa priuata Dominicanorum; sed publica totius Ecclesiæ; dum improbas censuram in libros hæreticorum & Catholicorum malos, à Sacra Congregatione Cardinalium Eminentiss. iustissimè latus. Quasi sapientissimi Principes nullam in iudiciis ferendis æquitatis rationem habeant; nec expendant, quæ à doctissimis consultoribus proponuntur: & nullo delectu, aut examine obductis oculis sinant se circumagi ab vno Congregationis Secretario, quem ignarum linguæ latinæ, vno verbo Arcadium Opilionem vocas incredibili audaciâ, & contumeliâ, quæ tota in Sacram Congregationem, atque illius Præsides Cardinales redundat. Quid de illis iudicas, aut ab aliis iudicandum relinquis, quos vis ab vno homine, quasi ab Arcadio Opilione duci?

Hinc tuus in huiusmodi censuras contemptus, quem litteris postridie Kalendas Maij anni 1662. Lugduni datis, apertissimè testatus es: Dum Amico ita scribis. *Plurimum humanitati tua debeo, & vellem nancisci tempus, quo liceret meum in te animum gratum, & benenolum re ipsa testari: nescio quibus verbis ultimâ Epistolâ meam tibi mentem aperuerim, de censurâ à Dominicanis in Librum Cyriacorum intent. &c: horum minas nihil moror. Certe boni viri in Hispaniâ minore, suâ opinione gratia valent. In Galliâ vero minùs, quam in Hispaniâ; Rome nihil propemodum possunt. Si qua enim Romæ censura, ab alio, quam à Summo Pontifice ex Cathedrâ proferantur, risu, & cachinnis sunt excipienda; & uno contemptu abiguntur. Caterum liber ubique placet, & omnium teritur manibus, nollem secundam in Hollandiâ editionem adornari; antequam libro plura addantur ab Authore parata.*

Hâc Epistolâ familiari suos intimos sensus, de Summi Pontificis, seu, quod perinde est, de Administratorum eius, & Congregationum ab illo constitutarum censuris, ita aperuit; vt verissimè reum agnoscas criminis La-

sæ-Maiestatis Pontificiæ: cuius nos per summam iniquitatem falso totâ hæc secundâ diatribâ accusauit.

De Nicolao Burgundo, cum ex Syluio Ænea hæc retulisset, hæc (id est in Eugenium Pontificem lis mota) circa medium mensis Aprilis initium suscepit, industria quidem ac solertia cuiusdam Nicolai Burgundionis, ex Ordine Predicatorum, viri acuti, & longe maioris animi, quam corporis. Hactenus Syluius: sequentia ex suo penu addit Petrus, qui nec disputationum nec congregationum aures unquam personare obmisit, donec res capta & consummata est. Locum ex Syluio diu quæsitum, cum non reperissem, suspicatus ab aduersario rem confictam, in inuidiam nostrum; responderam nihil mirum videri, toto orbe in Eugenium coniurato, si quis Dominicanorum ad plures, paucitate, relictâ accessisset: sed reperto à diligentioribus loco, euauit calumnia, & in Authoris recedit caput.

Duo enim comprobata sunt: primùm Æneæ verba interpolata; deinde, si quid mali Nicolao nostro impotent, non à Syluij testimonio, sed à verbis quibus Theophilus authoris mentem corrumpit, posse existere. Ea citat Spondanus ad annum 1439. num. 22. quæ ita obscura sunt, vt Oedipo, aut Delio natatore opus habeant; veritas tamen & Nicolai innocentia elucebit, si obseruet Lector Spondanum ex Syluio referre, synodum de causâ Eugenij in 3. scissam sententias: quidam quasi hæreticum, alij etiam veluti relapsum damnandum censebant; alij denique ab utroque reatu immunem absoluebant, Postrema hæc sententia suffragiis longè duas priores vincebat. Qui Concilio intererat cuiusque magna pars fuit Turrecremata, ita testatur: & qui Eugenij damnationem promouerent, nouem tantum recenset, Episcopos septem, & duos, quorum nomen tacet, qui tædio vitæ Cœnobiticæ Episcopatus titulum vacuæ Ecclesiæ ambiuerant.

Hinc aliqua lux affulget ad nostri Nicolai innocentiam comprobendam, quod inter Eugenij professos hostes non recenseat Turrecremata, non taciturus sine dubio: nam is est mos Dominicanorum perpetuus, sicut, comprobauit Eminentissimi Cardinalis Albizij & Vrbanus VIII. testimonio, Dominicanos adeo infen-

los erroribus, vt si qui suorum in eos labantur, primi deferant ad tribunal puniendos: quare non leuis est coniectura nonnullorum, Nicolaum Burgundum cum videret plures ab Eugenio, quam contra stare, ratum, opportunum tempus causæ Eugenij, eam promouisse ad iudicium, sed euentum eius spem fefellisse: vnde euanescebat criminatio Theophili.

SECTIO QVARTA.

Dominicanorum in sanctos Pietas vindicata & calumniis tertia Diatriba.

HÆc superest pars vltima primi libri vindiciarum Pietatis Dominicanæ familiæ, Diuorum cultus, venerationis, & imitationis studiosissimæ; vt demonstratum eo responsionibus ad Petri calumnias huius Diatribæ.

ARTICVLVS PRIMVS.

Diatriba summa, cui generatim respondetur.

OMNIA sus deque miscet Petrus, vt Dominicanos Odip, & execrationi generis humani deuoueat. Non vnum aut alterum priuatim, sed vniuersim omnes accusat, bellum Deo primùm, deinde Sedi Apostolicæ, terribi diuis omnibus intulisse. Quæ de Gigantibus in cælum, & in superos arma mouentibus fingunt Poëta, asserit reipsa Dominicanos tentasse.

Primâ Diatribâ probauit eos esse Theomachos; quo successu iam vidimus: iuratos hostes esse Summorum Pontificum secundâ Diatribâ annexus est probare: Nunc quasi Agiomachos; & Diuorum Mastigas traducit, & longo ordine recenset conuicia congesta, primùm in Beatam Virginem à toto Ordine, deinde à Patre Reginaldo, & Combessio; secundò recenset

Paulum à Nicolao Iansenio per ludibrium habitum : tertio D Stephanum, Hieronymum, Gregorium Magnum à Cano læsos grauitè ; quarto Chrysostomum, & Martinum Summum Pontificem acerbè à Combessio reprehensos : quinto totum Ordinem Carthusianum à Iacobitis lacessitum ; & ab iisdem impugnatas acriter B. Birgittæ reuelationes, in odium illius de Conceptione immaculatâ cælitus habitæ. Hæc est Agiomachiz Dominicanæ à Petro descriptæ summa, vt nos sacros & intestabiles faciat, quasi superum & hominum hostes, & igne, & aquâ interdicat, ob interdictum *de Martyrio, & communionis librum*. Tanti est offendisse Petrum, & in eius indignationem incurrisse ; vt videatur, quasi alter Aman ob recusatam à Mardochæo salutationem nos omnes ad mortem deponere.

Vniuersim ad tuam Diatribam respondeo : deinde per partes singulis satisfactorius. In primis alienissimus es à sensu omnium bonorum, maximè Cardinalis Baronij ; Quem enim Agiomachum, & Diuis infensum calumniaris Ordinem, vir ille immortalitate dignus vocabat seminarium Sanctorum, & re ipsâ erat demonstraturus, si licuisset absoluerè Annales, quos ad Natiuitatem S. Dominici tantum deduxit, morte præuentus. Poterat id scire Petrus, qui à suis alter Petrus Comestor, & Heluo librorum dicitur.

Vorum timeo ne nimia hæc librorum lectio eum exerrare magis faciat quàm sapere. Nō poterat ignorare Ordinem Dominicanū, si numero Religiosorum metiamur cum Franciscanis decimâ parte minorem, sanctis inferiorem non esse, semotis, quos ex statu sæculari in tertium Ordinem adoptant. His addo omnium accusationum, quibus nos grauat, hanc tertiam falsissimam & iniquissimam esse ; cum totius orbis Christiani testimonio compertum sit, nullum in Ecclesia Ordinem efficacius, & felicius nostro populos ad cultum in Deiparam ; & in diuos omnes promouisse.

Quid de sanctissimâ Virgine dicam ? Si aliud operæpretium Ordo Dominicanus præter Rosarium non protulisset, posset cum quocumque ordine contendere : quia diuinum hoc inuentum, est quasi Manuale Euangelicum, & Euangelij complementum, aut supplementum,

& Alphabetum paruulis, est profundior liber sapientibus, est ex Martino Nauarro *Patrimonium Ordinis Dominicanæ*, quo Ecclesiam ditauit; quo non tantum Albigensium hæresim extinxit, sed etiam per trecentos annos orbem Christianum purgauit hæresibus, & nullam passus est diu, aut longius grassari. Hunc ergo Ordinem de Deiparâ, de diuis omnibus, de Ecclesiâ bene meritum, hæresibus fatalem, Petrus (si superis placet) appellat Agiomachum, quasi reliquorum Ordinum, & totius generis humani hostem. Videat ne in illum conueniat, quam nobis molitur inferre, calumnia.

ARTICVLVS SECVNDVS.

Responsio ad singulas Diatribæ calumnias.

L I C E T quæ breuî perstrinximus superiori articulo, quæcumque Petrus obiicit contra Dominicanorum in Diuos pietatem, & Religionem profligarint; ne tamen vel minimæ calumniæ suspicio supersit, & in Authoris caput moles accusationis recidat, singulis obiectionibus respondendum est.

PARAGRAPHVS PRIMVS.

*Saluâ Decretorum Pontificiorum Reuerentiâ,
satisfit obiectioni prima.*

T O T I S quinque prioribus paginis Diatribæ, verbosissimè versat argumentum ex immaculatâ Conceptione repetitum, eo consilio, vt iam monui, quod sciat non licere nobis hanc quæstionem exactè tractare. Excusarem fraudem ipsius, nisi alia belli, alia duelli esset conditio: in bello locum habet sine vlllo vituperio illud Poëtæ, *dolus, an virtus, quis in hoste requirat*. Sed ductula, vix fraudes, aut disparia arma patiuntur citra infamiam illius qui negat æquo Marte certare. Si quis Adversario curet in singulari certamine manum dexteram ligari, & permittat tantum sinistrâ de genu pugnare:

ipse utraque validus & liber, sicarium magis, quam strenuum militem agit.

Hoc quaecumque certamen, quod cum Petro in eo, non bellum est, sed duellum: quia postquam ipse clasticum cecinit, ut bellum accenderet, pacem cum suis Generalis noster iussit esse religiosissime colendam; quam ego seruo etiam cum graui dispendio causæ, quam defendo. Non ergo bellum, sed singulare certamen cum Petro gero, eâ conditione, quam ipse præscribit; quia delectum armorum habet, utraque manu liber, vix vnius mihi usum permittit. Sed vellem te probare generosum, & pro gratiâ, quâ vales Theophile, obtine nobis facultatem loquendi, ac respondendi tuis accusationibus: Nam præ summâ in Pontificias Constitutiones reuerentiâ non auderemus hæc quatuor attingere; nisi nobis loquendi veniam impetraveris.

Primò quid felicitis memoriæ, & summæ sapientiæ Pontifex Urbanus VIII. quasi viuæ vocis oraculo responderit Magistro Generali Ordinis Patri Rodulpho à se quærenti, quo sensu esset interpretanda Constitutio in hanc rem edita à Gregorio XV. & quâ ratione vellet obseruari à Dominicanâ familiâ, paratâ ad vnguem, & toto rigore verborum eam religiose implere. Secundò quos ex Sanctis omnibus, septem Deiparæ habeat charissimos, & quasi septem spiritus throno suo astantes, & quis illorum fuerit hæc de re sensus. Tertiò, in qua positus sit verus Deiparæ cultus eique gratissimus. Quartò, quo motiuo, quo fine non patiantur Dominicani ante decretum peremptorium Pontificis deduci ab illâ opinione; quamuis inde tot incommoda extiterint, & plura impendeant.

Sed saluâ decretorum reuerentiâ, ad depellendam, quam importas calumniam læsi Deiparæ honoris, puto mihi licere, hæc tria respondere, quorum duo ad quæstionem facti pertinent, postremum ad quæstionem iuris. Dum in Hispaniâ degerem, hanc à fide dignis historiam excepi; Ducem & Cardinalem de Lerma Philippo III charissimum, pro suâ in Regem reuerentiâ, & in nostrum Ordinem incredibili beneuolentiâ summè operatiæ, ut relictâ opinione D. Thomæ, communio rem amplecteremur, & grauissimos Castellanz Prouinciæ Ma-

gistros adiucasse Matritum; ut hac de re in commune consulerent; sed nullâ ratione adduci potuerunt, ut in hoc amicissimo Principi, & Protectori morem gererent. Dum hæc agebantur, Patres Societatis huius consilij euentum expectabant auidissimè, parati suscipere defensionem D. Thomæ, si Discipuli Magistrum deseruissent. Quid tum mi Petre, contigisset? Quam diuersæ ab his, quas modò audiuius, voces perstrepuissent?

Quod secundo addo, excepi ab ore Archiepiscopi Ciuitatis inter orbis Christiani pietate, & celebritate præcipuas: Cardinalem Toletum, qui primus hanc dignitatem in Societatem inuexit, ad eam sibi variis dotibus viam munivisse: maximè concionibus per decem octo annos in Palatio habitis, quas Cardinalis Rupifocaldus curauit ex loquentis ore excipi ab Amanuensi, easque duobus Tomis collectas, nominatus à me Archiepiscopus transcriptas suâ Bibliothecâ dignas iudicauit. Argumentum Concionis de Conceptione illud erat, quamam duarum opinionum plus honoris Deo, aut Deiparæ conferret. Non puto intra sexaginta annos ita murata tempora, ut vitio vertatur referre, quod summo totius aulæ applausu ab Authore exceptum est. Controuersia ergo doctissime & elegantissime à Toletio more suo vtrunque discussâ, tandem iisdem ferè verbis, & eodem sensu conclusit, quo Augustinus comparationem Zachæi Christum inuitantis domum, cum centurione in suam ingressum deprecante.

Quis Toletus fuerit, superfluum puto commemorare: cum eius opera demonstrent, præter applausum, ex concionibus per tot annos habitis, præter commentaria in Lucam, & Ioannem; quo præcipuam harum concionum partem congeffit, & Besæ, ac Casobono fuere admirationi, se ipso maior euasit illa iudicii incorruptissimi libertate, quâ supra spem, & metum, supra carnem, & sanguinem, natione Hispanus, cum res Ecclesiæ postularunt, studio Gallus fuit, & meruit sibi ab Henrico IV. gratias agi, & columnam Parisiis erigi pro suâ cum Ecclesiâ reconciliatione.

Ille ergo vir, omni laude superior, non mihi videtur Petre, minùs quàm Cardinalis Pallauicinus tui dissimilis, ne quid grauius dicam. Ad minus ille nos liberasset notâ

inhonoratæ Virginis, quâ tu totum ordinem Virgini addictissimum voluisti perspergere. His duobus tertium adiungo, nempe communem de Conceptione immaculata opinionem, quæ Virginem à peccato Originali liberat, debito obnoxiam facit, quam solam Bellarminus, & Suares tutam putant, parum distare ab antiqua, vt dissertatione contra Petrum de Alua demonstratum est.

Tu vero, Theophile, qui Pontificias constitutiones vrges, ne opinioni Conceptionis immaculatæ detrahatur, incidis in pœnas eisdem constitutionibus præscriptas contra eos, qui contrariæ opinioni notam aliquam incurrunt; dum ais eos, qui sententiam oppositam sustinent, impiè sentire de Beatâ Virgine. Certè si Summi Pontifices opinionem de sanctificatione B. Virginis secundo instanti impiam censuissent, aut improbabilem: non reliquissent arbitrio cuiusque; vt quam vellent, sequerentur. Nec sancti Patres, qui eandem sententiam docuere, minus pii dicendi sunt erga Beatam Virginem aliis, qui oppositum dixerunt. Vide quæ dicit Aluarus Pelagius Franciscanus lib. 2. de planctu Ecclesiæ cap. 12. nec dicas ea à Dominicanis Authori Franciscano addita fuisse; hoc enim est ridiculum, nec ipsi Franciscani negant ea in Aluari Pelagii operibus semper extitisse, & vltro fatentur, Aluarum in eâ fuisse sententiâ.

Sed audi Doctissimum Cardinalem Augustinum Oregium Tractatu de Incarnatione. cap. 12. vbi sic ait: *Vtinam minimam saltem partem habeam illius deuotionis; quam virtutes Virginis imitando, Angelicus habuit Doctor, præclara eiusdem Religionis virorum illustrium sequutus exempla, quæ ita adhuc in obsequium Virginis illibata vigent, ac si summo semper studio laborarent, vt patrimonium à prædecessoribus suis relictum, religione summa custodiendum posteris recepissent.* Hactenus vir ille Eminentissimus, cuius vtinam humilitatem, modestiam, & pietatem omnes Aduersarij sancti Doctoris, ac Dominicanæ Religionis imitarentur.

Quod narras de edito à P. Reginaldo contra Conceptionem immaculatam libello, ab illo negatum est; satisfecit se purgauit, ideoque Senatus consulto Parlamenti Tholosani, atque decreto Vniuersitatis restitutus est

officio Professoris Theologiæ, quod per decem octo fere annos cum summâ eruditionis famâ, atque incredibili Discipulorum frequentîâ, & vtilitate exercuit. Sed ille victor voluit cedere inuidiæ amulorum, & accessit Prulianum, primum à Diuo Dominico sacrarum Virginum Monasterium institutum, quod à primâ suâ origine per quatuor & vltâ sæcula nunquam interrupta, magnâ Religionis obseruantîâ, nobilitas præcipua illius Prouinciæ, & totius Regnî florentissimum in hunc diem serauit.

Ibi P. Reginaldus victis Aduersariis, totum se litteris & otio, & sacrarum Virginum ministerio deuouit: vt inuidiæ morsus euaderet. Sed id frustra meditatus est, nam illum acerrime laceffit Theophilus, magis suo, quàm ipsius P. Reginaldi damno: vt depulsâ valide à Petro a Vincentia, & ipso Patro Reginaldo calumniâ demonstratum eo.

Certe rogandus esset Theophilus, vel Maiorum, & Pontificum imperio cogendus, ne causam Conceptionis Immaculatæ piissimam contingeret: Nam cum possit optimis largumentis comprobati, ille nonnisi sophismata, & falsa testimonia adhibet: quasi putaret ruituram, nisi suis eam mendaciis fulciret. Non dicam quod ab alio obseruatum est, illud argumentum, quod ex Valentiâ assumptum putat Petrus Dominicanos conuiacere impietatis, & esse formæ legitimæ, reuera peccare contra leges artis syllogisticæ, quæ præcipiunt argumentationes primæ figuræ in *Darj* (quò loco suam reponit Petrus) præmissarum priorem habere vniuersam affirmantem; alteram vero cum conclusione singularem etiam affirmatiuam.

Si ad illam regulam expendamus argumentum tuum, Petre, dum formæ legitimæ esse contendis; vel regulas Dialecticæ ignoras, vel illis consultò abuteris. Nam illud confecisti ex vniuersali affirmante, seu (quod idem est) indefinitâ propositione primâ & secundâ negante; vnde inferis conclusionem singularem affirmantem. Sed his tricis, aut nugis non immoror, habeo aduersum te grauiora, quæ exoptulem.

Duabus superioribus Diatribis existimabam omnem calumniandi artem à te exhaustam, neque posse quamlibet

libet projectam ad mentiendum audaciam quidquam comminisci par iis, quæ iam ex te maxime de Bzouio, & Martino Polono refelli. Sed omninò deceptus sum; nam de libro Petri à Vincentiâ, cuius vis Tholosæ editionem curasse P. Reginaldum, quæ scribis adeo atrociz & falsa sunt, ut præ illis leuia sint, quæ hætenus in Dominicanos conuitia coniecisti. Superiora erant sine dubio supra fidem; ista vero sunt etiam supra stuporem: & si præteritis calumniis cæteros omnes superasti, videris hac nouâ te ipsum vicisse.

Accusationem tuam paucis perstringo, illius deinde falsitatem simul cum atrocitate omnium oculis subiiciam: dicis *non inani dubitatione plerosque pulsatos esse ne illud opus Tholosa editum operâ Patris Reginaldi, & ab ipsomet fabricatum, an laciniâ maledicti operis per Bandollum contra Deiparam editi: in illo autem hæc legi affirmas pag. 15. Beatam Virginem usque ad momentum incarnati in ea Verbi fuisse contaminatam peccatis actualibus. pag. 13. astu flagranti carnalis concupiscentia arsisse, & omni vitiorum sorde fuisse maculatam. pag. 67. in peccatorum puluere fuisse conculcatam. pag. 77. fuisse succensam fomite peccati.* Si contineantur ea præpudia libro Petri à Vincentia iustissimè exclamas, *Vah scelus! & qua tantum libri portentum inferna vomuerunt;* immo ipsummet librum cum suo Authore, & illo, qui curauit edi, pronuntio flammis esse absumendum:

Sed vide, mi Petre, ne si huiusmodi blasphemias piis & infantibus imposueris; vere contra te ipsum sint retorquenda tua verba. *Vah scelus! & qua tantum calumniarum portentum, dirisque omnium deuouendum, &c.* Consului librum Tholosa editum: quem habes, verè habeo; iterum atque iterum legi paginas à te designatas; & si penultimi loci vnum verbum alio nomine prolatum excipiamus, nihil prorsus eorum quæ refers, nec quo ad sensum, nec quoad verba vllibi comperi extare.

Quid ad ista Petre? Quâ ratione efficies: ut quam aliis molitus es damnationem, & totius generis humani execrationem, euadas? Contendes forte falsa esse, quæ nos de libro testamur, & omnia à te sincerè verbatim telata; sed libri copiam facturi sumus, si ad examen

placeat rem deducere. Fortè mendacii conscius iudicium hoc detrectabis, & dices te diuersæ à Tholosanâ, editionis libro vsum fuisse; sed hanc viam tibi præclussisti; cum merito dixeris dubitatum esse, an Pater Reginaldus esset operis author: ergo non potuit aliunde ad te, quàm Tholosâ deferri, nec legi aliud, quàm quod à Patre Reginaldo non solum editum, sed etiam scriptum suspicabaris. His pulsus perfugiis, fortè tertium tentabis, te non verba libri retulisse, sed sensum qui illis locis extabat per æquivalentiam, vel inde per consecutionem deducebatur.

Sed ne quicquam solitas tentasti lubricas artes, si æquivalentia, non eadem verba esse, volebas, cur diuerso characterè exarari curasti, quasi essent ipsissima Authoris? Deinde cur dissimulasti Petrum à Vincentia toto libro inducere Patres & Theologos, suis verbis suoque sensu loquentes, & vix quicquam è suo addere, nisi copulas, quibus eorum loca nectat? Sed quid opus singula expendere. Prouoco Theophilum ad paginarum quas notat lectionem: contendo ne per somnium quidem quicquam illis inesse rerum aut verborum, quæ quasi propria Authoris exscribit; & ne Lectorem fatigem inutili refutatione calumniarum Theophili, nullo operæ pretio, aut fructu eruditionis, dum nouas eius fraudes detego, reconditam D. Thomæ è sanctis Patribus hauritam explicabo doctrinam.

Certum est ex mente S.D. duos in Deiparam distingui oportere illapsus Spiritus Sancti, ac subinde duos sanctificationis gradus, vnum, cum in vtero Matris Annæ concepta est, alterum, quo tempore ipsa verbum concepit. Primo illo sanctificationis in aluo materna instanti, & illapsu Spiritus Sancti ligatus est fomes, secundo est omnino extinctus, & utroque omnis peccati actualis occasio semota est, hoc tamen discrimine, quod primâ sanctificatione datum sit illi posse non peccare, & re ipsâ non peccasse; alterâ verò sanctificatione multo copiosiore concessa sit dos beatarum mentium, nullo modo posse peccare.

Hâc distinctione duplicis sanctificationis Deiparæ, illapsus in ipsam Sancti Spiritus, & fomitis primum ligati, deinde extincti copiâ & vbertate gratiæ, veluti face

quâdam omnes tenebras depellimus calumniarum Petri, omnia illi perfugia sic præcludimus, vt ex hâc accusatione pessimum nomen referat, & sanctorum Patrum loca ad eorum mentem legitimam interpretemur; nam Magister sententiarum inductus pagina 1. Beda pag. 33. Andreas Cretensis pag. 67. Cistercienses Theologi pag. 77. aut expressè habent, aut certè supponunt, vt receptissimam, apud Patres omnes, & Theologos duplicem illam sanctificationem, ante partum Annæ, & cum primùm verbum concepit, vtramque autem per summam fraudem permiscet, & confundit Theophilus, vt tot blasphemiarum accuset Petrum à Vincentia, quasi voluerit ex Patribus demonstrare Deiparæ sanctificationem dilatam fuisse vsque ad Conceptionem & Incarnationem Verbi Diuini: & totâ, quam vixit, præteritâ vitâ, non habuisse fomittem ligatum, vno verbo fuisse contaminatam peccatis actualibus, &c.

Nihil occultum est, quod non sciatur, neque absconditum, quod non reueletur; Theophili fraudes è tenebris in lucem meridianâ clariorem eruimus. Quid opus est verbis factum amplificare? Nam præter quod, scelus est supra auxesim verborum, ipsummet Authorem satis prodit & castigat. *Maxima*, inquit, Seneca, *et prima peccantium est pœna, peccasse: nec vllum scelus, licet illud fortuna exornet muneribus suis*, (quale suum forte putat Theophilus Magistri Sacri Palatii infortunio;) *impunitum est: quoniam sceleris in scelere supplicium est*. Vnde non est quod nostram, sed magis ipsius Theophili, & Societatis, atque Ecclesiæ vicem doleamus, nam quod ad nos attinet, quid ex calumniis adeo crassis, & apertis, mali potest nobis accidere? Sibi verò æternam inde infamiam comparauit; sed præ omnibus doleo quod Societati & Ecclesiæ grauissimum vulnus infixit, incredibili illâ mentiendi & calumniandi licentiâ, quam passim, sed maximè hoc loco vsurpasse conuincitur.

Antiqua est hæreticorum in Catholicos omnes, & maximè Patres Societatis accusatio, non minùs frequens, quàm periculosa, eos docere nullam inimicis fidem seruandam etiam iuratam, & integrum esse cuique ad suum commodum mentiri, calumniari, & peierare. Quid vero promouisti Theophile, tuâ in Petrum à Vin-

centia & in Reginaldum imposturâ? Hæreticorum opinionem, & calumniam confirmasti, neque enim adeo atrocia & falsa te comminisci vîquam ausum putarent, nisi id tibi, ac subinde aliis licere saluâ conscientîâ, & salute compertissimum haberes. Quo quid perniciosius tibi, & toti Ecclesiæ excogitari possit, certè non video.

Sed nomina mille, mille nocendi artes tibi suppeditunt; & quamuis nullam audaciæ metam ponas, *voces ea, qua non sunt, tanquam ea qua sunt*; tamen tum licet itius imponis, cum nulla, aut rara putas esse librorum, quos adulteras, exemplaria (qualis est Petri à Vincentiâ Tholosæ editus:) vel illa loca, quæ annotas, sunt amplissima, & vaga, neque putas tantum otij fore Lectoribus, vt occasione duorum verborum, librum integrum relegant. Sic audacter (& id tutum sibi fore putauit:) Theophilus Petrum à Vincentiâ notatis etiam paginis corrumpit, ratus nullum superesse, aut difficulter repertum iri aliquod exemplar editionis Tolosana.

Eâdem fiduciâ, vel audaciâ adulterauit thesim *in regione*, vt ipse loquitur, *Sanctis honoratis ad disputandum propositam*: Ita enim ipse refert distincto caractere quasi essent ipsamet verba thesis, *ad merendum, & demerendum non requiritur libertas à necessitate, sed tantum ab omni coactione*. Idque summâ fraude tentauit vt Iansenianâ leprâ contaminaret thesim his verbis conceptam, *Ad merendum, vel demerendum non requiritur libertas à quacumque, vel omni necessitate*: quod vetissimum est, nedum apud Thomistas, sed etiam apud Aduersarios ad minus de necessitate *infallibilitatis & suppositionis*, quam omnes vtrò concedunt nihil nocere merito, aut libertati.

Cur ergo est proscrip̃ta thesis non quia falsa, & multo minus hæretica, aut dissentiens ab Innocentij constitutione, dam̃ante eos, qui ad meritum non requirunt libertatem *à necessitate*, sed volunt sufficere libertatem *à coactione*. Damnata est igitur thesis occasione temporis, quo suspectum erat quicquid vel minimûm speciem Iansenismi respiciebat. Magis ergo intempestiua, quàm falsa thesis, quæ legitimo sensui patebat, admissâ *infallibilitatis* necessitate ad meritum, exclusâ tamen ab^olutâ, & antecedenti.

Hanc verò corruptelam inuexit Theophilus eâdem fiducia, quòd exemplaribus non posset impostura reuinci; nam præter quod huiusmodi scriptorum genus non est nisi ad diem, aut ad breue tempus; compertum habebat istarum thesum ob infelicitatem euentus, nullum exemplar seruatum, omnia periisse, ac proinde suam fraudem tutam fore.

Ad aliud corruptelæ, vel fiduciæ genus spectat, quod paginâ 46. impropere scriptum à Cano, libro vndecimo de locis capite sexto Summorum Pontificum vitio historiam Ecclesiasticam esse multo deterioris fidei, & corruptiorem, quàm à Suetonio, aliisque Authoribus paganis scriptam, & distincto charactere quasi essent verba Cani hæc apposuisse verba. *Eorum* (scilicet Pontificum) *hac in parte prudentiam desiderari.* Nempe sciebat Theophilus Cani morem esse capita librorum conficere quasi *promptuaria*, Prophetæ, *plena exundantia ex hoc in illud*; & plus eruditionis vno capite complecti, quàm multis eius libris contineatur.

Opportunam itaque putauit, hanc Cani libertatem suis calumniis; & nihil dubitauit ex illo verba notare, distincto etiam charactere, certus lectores ob vnum aut alterum verbulum longissima capita non esse emensuros. Legi ipse, vt hoc labore lectorem beneuolum leuarem, & nihil reperi verborum, quæ Cano adscribuntur, aut quod posset calumniæ, vel in speciem fauere.

Eiusdem fiducia, & fraudis est, quod paginâ 46. refert ex Ænea Syluio, nec libro, nec capite vilo notatò, solertiâ Nicolai cuiusdam Burgundionis in Concilio Basileensi promotam damnationem Eugenij I V. Nulli labori, neque alij pepercimus decurrendis libris, & capitibus ex Syluio Ænea, quæ vel minimùm facerent mentionem Concilij Basileensis: nec vnquam reperire fuit illum virum, teste Æneâ, maioris animi, quàm corporis: fortè eâ de causâ nostris oculis subductus est, quod parui, & angusti, aut fortè veriùs, nullius sit corporis. Certe illius nomen apud nostros historicos non legi. De hoc supra.

Iudicet ergo Lector prudens; quid sibi permissurus sit Theophilus, de his comminisci, quæ nullo scripto, & voce tenus peracta narrat, cum adeo licenter agat, de his quæ libris consignata sunt, & tabulis publi-

cis, quibus eum falsi, & imposturæ reuincas. Hoc præiudicio refellimus, quæ Patribus doctissimis, & Religiosissimis Vincentio Candido, & Gregorio Donato prorsus incredibilia imponit. De Vincentio Candido refert, teste Hipolyto Maraccio, ordinis Clericorum Regularium eiusdem fidei, & paræ autoritatis: Cum ad illum suum Opus, cui titulus est *Bibliotheca Mariana*, detulisset, ad exorandam edendi facultatem: vbi vidit in eo opere signari Authores pro Immaculata Conceptione, sublato in altum clamore, dixisse. *Eya sūt Authores pro Immaculatâ Conceptione, etiam bestia concipiuntur sine peccato originali.*

His relatis, quorum fides est apud ipsum, & Maracium, aliqua addis eruditioni ostentandæ, & maledicentiæ exercendæ, vtriusque cupidissimus. Sed in eo est totum controuersię caput, veriûsne ista à Patre Candido viro compertæ sanctitatis etiam miraculis confirmatę, loquendi ita parco, vt testentur multi numquam se ab illo verbum inane audiuisse, hæ bestiales voces prolatae sint, An à Scriptore miro calumniarum, & mendaciorum artifice confictę? Pronunciet in hanc rem æquus, & prudens lector.

Incredibilis est secundum quod subiungit, Patrem Gregorium Donatum iussisse expungi ex opere ascetico Ludouici à Ponte titulum illum purissimæ Matris, qui in Litaniis Lauretanis per vniuersam Ecclesiam summâ consensione vsurpatur. Hoc dicit indubiis testibus compertum. Cur ergo ab illis citandis abstinet, quasi ad fidem rebus astruendam satis sit retulisse? Certè non ita de te sentiunt, qui te nouerunt; & verissimum est, quod de te ita scribit R. P. Guillelmus Camerarius Scotus, Congregationis Oratorij Epistolâ ad Lectorem præfixâ operi, cui titulus, *Antiquitatis de nouitate victoria*, vbi ita habet.

Theophilus ad me perlatus est. Legi hominem, nullamque in eo argumentationem inueni, quam non soluissem; aut quam non posset quiuis nostra opinionis non penitus ignarus dissoluere. Cetera, quæ maximam operis partem faciunt, aut virulenti scriptoris conuicia sunt, aut tumidi sophista importuna loquacitas. Vbiq; ineptias, ignorantiam, virum doctrinæ, temeritates, hæreses, & alia id genus

obiicit. Ubique dum simplicitatem styli scholastica declinat, in barbariem nescio cuius prarupta, & horrida orationis pueriliter ruit. At hoc illi condonemus. Videtur enim plus affectare declamatoris, aut Satyri laudem, quàm Theologi; ac diligentius legisse Apuleium, quàm D. Thomam. Sed quid dico Apuleium? Si à simplicitate locutionis scholastica alienus est hic novus Theologus, multo minus elegantissimi huius Authoris stylium, & lat. nitatem sapit: ubi ille maiestate mascula orationis assurgit, hic conuiciator in ampullas fadissimè tumet; ubi ille verba illustra exprimendis rebus aptissima seligit, hic nullo delectu, prout quaque vox in buccam venit, eam auidè arripit, & peius locat; ubique denique ille aquabilis sermonis fluxu, ubique elegans, ubique est floridus; hic, inaequali textura, omnia orationis vitia complexus, alibi surget, alibi repit, alibi Lectori suo nauseam parit. Vide quaso, mi Lector, quam modeste, ac leniter se gerat hic disputator, qui pagina libri sui 13. scribit se cum charitate arguere velle, & pag. 13. iniuriis aare surda exceptis, (cauet ne diceres ore tacito) & tamen iniuriis, & contumeliis maximis respondet, &c. De me vero (pergit Guillelmus) sic humanissimus Sabaudus scribit inter alia pag. 354. quod Gibienso Symmista meo suff. ratus sim; quod libri à me editi geria sint; quod ex Collegio quodam Apostolico per posticum ad aliena castra, & pultes Scoticas, quas gentilem meum Pelagium pragrauisse querebatur Hieronymus, Apostatice transfugerim, & quidem ipso die Cana Dominica, ut ad plenam Iuda germanitatem nihil deesset. O Theophile hac cine monstra cogitationum ascendunt in cor tuum, & non elidunt frontem tuam? Quot hic verba, tot mendacia. Meue ausus es Apostatam vocare? Qui optime nosti, quod apud me habeam Generalis tui litteras? Tu, inquam, id ausus es? Qui toties Iesuiticis castris derelictis, ad Franciscanorum, & Augustinianorum castra transfugisti. Primo quidem, ut sub fratris Simonis Emouery Franciscani nomine equiuocationum causam liberius ageres, ac in eadem defensionem librum scriberes, quem non te puduit, splendorem veritatis moralis inscribere, rectius abnubilatam veritatem inscripeurus? Item sub fratris Petri de la Riviere Augustiniani nomine damnatum librum scriberes.

cui titulus, Calvinifmus Religio bestiarum. Verum ut ordine tecum agam. In primis, quare, quod iure, qua Christiana modestia, Collegia vestra Apostolica dici possint? Vosne Apostoli estis? Certè dum tuam animi impotentiam, & effrenem, ac insolentem maledicendi licentiam mundo prodas, omnibus satis ostendis Iesuitas non esse Apostolos, &c. Videat, qui voluerit alia curiosa, quæ de nostro Theophilo dicit Guillelmus in epistolâ dictâ. Sed ad nostra redeamus.

PARAGRAPHVS SECVNDVS.

Vindicia Combesij, & Nicolai Iansenij.

LIET multis vitiis laboret Theophilus, cæteris prætermittis, quæ nihil ad nostram defensionem faciunt, non possum duo dissimulare, nempe fingendi & calumniandi morem in naturam inductum, & tyrannidem intolerabilem censoris morosi, qui supremum in omnes scriptores ius sibi vindicet ab aliis dicta quamlibet reconditæ eruditionis, aut sanæ doctrinæ nauseabundus contemnat, aut censoriâ virgâ castiget. Putes penes ipsum esse omnium scriptorum sortem; sed bene agitur cum Combesio, & Cano huiusmodi imperium non magis perenne, & firmum esse quam æquum & vnâ eius opinione niti: levis vtriusque pœna foret isto iudice, si eorum cum libris nomina in totum perirent.

Quàm morosum, quàm iniquum in hos Theologos vbique se prodit! Eius tantum patto criminis reos, quod hanc gloriandi causam abstulerint de eruditione in rebus Theologicis & elegantia adiunctâ, quasi dote sibi eximia, ac singulari, nec cum vllò extraneorum communi. Sed quidquid de hoc sit. Combesius venerandæ & eruditæ Antiquitatis scrutator indefessus, traditionis Ecclesiasticæ tenacissimus, quâ vnâ fides nititur, & constat, recentes Theologos cum Patribus antiquis sicubi videantur dissentire, pro virili conatur conciliare, ne hæretici in nos regerant quæ illis merito impropereamus; nempe eorum fidem temporariam esse, & annuam in

dies mutari ad arbitrium cuiusque : denique nihil habere commune cum fide antiquæ Ecclesiæ, & à mente, & consensu antiquorum Patrum recedere. Obseruauerat Combefissius post Sixtum Senensem Bibliothecæ sanctæ annotatione 138. Origenem, Chrysostomum, Augustinum, Theophylactum durius, aut alio sensu, aut certè diuersis verbis de Deipara ex conspectu filij patientis, & morientis doloribus locutos, quàm moderni Theologi sentiant, & existimasse ad absoluendam fidem illius dicti à Christo ; *omnes scandalum patiemini à me hac nocte*, & illius Simeonis vaticinij ad Virginem *doloris gladius tuam ipsius animam pertransibit* ; aliquid eorum oportuisse ad Deiparam peruenire, quæ vix referre ausim. Adeo sunt aliena à communi opinione, quæ hodie apud fideles inualuit, quasi aliquid scandali, aut dubitationis passa esset.

• At Combefissius in gratiam Sanctorum Patrum, & in reuerentiam Beatæ Virginis scripsit, eam tempore mortis Christi non laborasse aliquâ dubitatione, aut infidelitate, nisi ad summum negatiuâ, quam sitam esse *in sola inconsideratione ab absorbente dolore posuit, ita Deo permittente, ad auctiorem cruciatum, ac meriti cumulum* : *fit enim negatiua huiusmodi infidelitas, videri posset nec Mariam dedecere, per quam illam æconomiam suam ad suum Martyrium acerbissimum compleret.* Hæc Combefissius. Et reuerâ est quoddam genus Martyrij perinde innoxium, ac intolerabile, Dei à nobis vt solis abscessus, quo ipsemet Deus filium suum dignatus est, cum de illo etiam quasi conquerentem audiuit ista proferre ; *Deus, Deus, vt quid me dereliquisti?*

Hunc fortè Dei à Matre, sicut à Filio ad tempus abscessum, quo nihil vetat credere, & aliquo momento suspensam eius mentis, & fidei operationem, durlus à Sanctis Patribus scandali gladium, aut dubitationis vocabulum mitigauit Combefissius quodam nomine negatiuo. Quare si quid dignum sit censurâ, in D. Augustinum, & Chrysostomum recidit, non in Combefissium ; quin potius videatur laudandus, quod Sanctos Patres excusare sit annixus, eosque ad sensum hodiernum Ecclesiæ trahere, & accommodare. Id enim sæpius à me obseruatum est eos, qui in Sanctorum Patrum lectione,

in controuersis aduersus hæreticos assidui, & exercitati sunt, nec methodo, nec interdum sententiis omnino conuenire cum iis, qui se totos scholasticæ dedunt, eamque spartam sibi curandam assumunt.

Hinc videas dotes Scriptorum diuersissimas, nihil interdum frigidius aduersus hæreticos, illis qui ad miraculum subtiles sunt, & acres in scholæ disputationibus: quasi alia esset scholæ, alia controuersiarum Theologia; illa ad pompam potius, quàm ad pugnam, nisi sub umbrâ, & ludicram; hæc verò ad legitimam certamen parata sit & instructa: eoque discrimine, & interuallo ab inuicem distent, quo videmus exercitatissimos ad palæstram, ad decurrendum stadium, ignauos & ineptos ad veram cum hostibus dimicationem.

At certe non ita Diuus Thomas, & qui vere illius methodum & doctrinam ad omne genus pugne aptant & opportunam sectantur: neque enim arma expedit, & argumenta suppeditat còmoda aduersus Catholicos, & noxia atque infecta, si cum hæreticis agas, qualia sunt plura, quibus Theologorum nonnulli, & maxime Petrus de Alua vruntur: Quæ sibi soluenda putarunt Bellarminus l. 3. de cultu Sanctorum cap. 16. & Perronius Cardinalis, illo felici Ecclesiæ Catholicæ & hæreticis infausto apud Bellacū colloquio, quod Pissiaci infortunium compensauit.

Sed ab his referendis abstineo, ne mihi fraudi sit commemorasse, quæ illa duo purpuræ ornamenta, Ecclesiæ lumina, & præsidia inuicta censuerunt, ad communem fidei causam necessaria, in D. Thoma vix excusant ab errore: adeo sunt diuersa consilia, & arma Petri de Alua, & Bellarmini, ac Perronii: ille dum impetum facit in Catholicos vnicè vrget, & totis viribus contendit vix alio fine institutum Conceptionis Deiparæ festum, quam eius immunitati à communi labe, & debito, in fidei articulum sancientiæ, Illi dum hæreticorum impetum sustinent, negant hanc Ecclesiæ mentem esse: sed asserunt institutam festiuitatem, celebrando communis Redemptionis, quod inde sumptum est exordium: sed de his satis.

Progrediamur ad aliam tuam accusationem, quæ satis manifestè demonstrat, quàm anxie, quàm infelicer, quàm auidè collegeris quæcumque potuisti, non dicam inuenire, sed etiam fingere, ad creandam Dominica,

nis inuidiam : nam ad hoc putasti Theophile , opportunum esse vnum Nicolai Iansenii verbum in sensum ab Authoris mente alienum & te dignum interprete detortum. Dicit Dominicanus ille , Paulum in Thomæ scholam fuisse ingressum ; igitur facit Apostolum Thomæ discipulum. Quæ consecutio ? An non potuit ingredi etiam vt Magister ? Spiritus Sancti in animas iustorum per gratiam illapsus à sanctis Patribus , & à Theologis roties decantatus , nihil aliud est , quàm intus in mentem intra essentia terminos ingressus ; ergo venit Spiritus Sanctus , non vt Magister , sed vt Discipulus ? Quis hoc ferat ?

Non minùs inepta est tua de Paulo ingrediente scholam Thomæ , quam de Spiritu sancto in mentes illabente interpretatio. Adeo alieni sumus ab illo , quem affingis verbis nostris , sensu , vt agnoscamus D. Thomam Dionysii & Augustini Discipulum , quorum vterque Paulum Magistrum habet. Discipuli est agere Magistri interpretem , non Magistri Discipulum commentari ; at Thomas non solum Paulum , sed etiam Dionysium eius Discipulum interpretatus est.

Verum quid moror in his nugis refellendis ? Si scriptura docet nos , otiosi verbi in iudicio reddendam esse rationem , timendam mihi esset , ne quæcumque scribo contra te , huic iudicio materiam suppeditent ; cum videatur ad res adeo ridiculas responsio inutilis esse , & otiosa. Sed duo me excusant , primò iustæ defensionis Ordinis nostri contra iniquissimum accusatorem necessitas ; secundò , quod interdum ex stercore , vt dicebat Virgilius , margaritas lego , id est , occasione tuarum nugarum , & calumniarum , huic Apologia misceo plurima obseruatione , & scitu non indigna ; quale est illud , quod modo subiicio , scilicet Doctrinæ Catholicæ cognitionem , Homeri catenâ aureâ de cælo in terram demissâ , quæ supera mediis , & hæc inferis connectit , conuenienter representari.

Nam gratiæ & prædestinationis œconomia à Paulo in cælum abrepto , ex Diuinitatis visione hausta , in Dionysium & Augustinum , ac subinde ab illis in Thomam , & ab hoc extremo in nos deriuauit ; ergo à Paulo , vt à fonte , per Thomam & reliquos , quasi per riuos , & canales defluxit , quidquid horum arcanorum scimus , &

sapimus; & illi acceptum referimus vt Magistro. Ab illo didicimus, *quid habes, quod non accepisti; quis est qui te discernit?* ab illo totius prædestinationis negotium hausimus; ille enim altè inclamat, *antequam quicquam boni facerent; an non figulus habet potestatem, &c. O altitudo diuitiarum, &c.* En quâ de causâ Paulus ingreditur scholas Thomæ, nempe vt illi hæc arcana reuellet eius ore nobis reuelanda.

Sed non aduerteram Theophilum hunc Pauli in Scholam Thomæ ingressum bicorni argumento imperiuisse. Vel Paulus adiuit Thomæ scholam vt auditor, & Discipulus, & hoc iam cornu fractum est, vltro concedimus non accessisse vt auditorem, sed vt Magistrum. Tum vero alterâ sui Entymematis parte, & cornu illæso imperit nos Theophilus. Si secundum dicas, nempe ingressum Paulum vt Thomæ Magistrum; fatendum erit Thomam esse Doctorem Canonicum, cui eadem fides habenda sit, quæ Sancto Paulo hæc dicenti haberetur. At hoc non modò delirum, sed etiam hæreticum, Ita Theophilus argumentatur.

Sed mirum, ne delirum, aut hæreticum dicam argumentorum artificem, & consecutionum concinnatorem? Omitto Magistrum quidem Discipulo superiorem esse; Discipulum verò ne parem quidem esse oportere Magistro; vt nulla sit consequentia Petri, eandem Discipulo Thomæ fidem habendam, quæ eius Magistro Paulo debeat. Non addam ex Melchiorre Cano lib. 2. cap. vlt. ad calcem (quem locum crudelissimè dilacerat Petrus hac; Diatribâ;) nos omnes nedum à Paulo, sed etiam à Christo, & Spiritu sancto edoctos; nec tamen nos consecutos esse, aut mereri fidem, quæ habenda est Magistro Spiritui sancto; (quod eninceret argumentatio tua, si bona esset.) Imo diuersissimo gradu idem Spiritus aliter in Christo loquitur, aliter in Prophetis & in Apostolis, aliter in Stephano, & Ambrosio: & certè per hos omnes loquebatur. Per Concilium generale Deus Ecclesiæ loquitur, per Pastores etiam, & per sanctos veteres Patres. His tamen omnibus non constat eadem autoritas infallibilis, quæ Apostolis eorum Magistris: neque Apostolis, quæ Christo, & Spiritui Sancto qui illos docuerunt.

Sed his omnibus prætermiſſis te conuenio, Theophilæ: Putaſne veram & legitimam conſecutionem; Paulus eſt ingreſſus Scholam Thomæ illum docendi cauſâ: ergo fecit illum paris ſecum authoritatis? Si ita ſit, quid ſtatues de D. Dionyſio? Negabis ſine dubio cum Laurentio Valla, & Eraſmo fuiſſe Pauli Diſcipulum, ne iuxta tuas leges arguendi, cogaris agnoſcere vt Authorem Canonicum, & eius libros accenſere Canoni Sacræ Scripturæ. Sed quid proderit hoc effugium Eraſmi, cum eodem argumento ſis obruendus de Ignatio, aliisque Apoſtolorum Diſcipulis, qui ſcripſerunt: quos neceſſe eſt admittas in numerum Authorum Canonicoꝝ?

Quid dices de Chryſoſtomo, Ambroſio, Gregorio Magno, Francisco, Bernardo, aliisque Theodidactis, quibus omnibus ſcriptores fide, digni produnt, Spiritum Sanctum ſub ſpectabili forma, Paulum alioſque Diuos affuiſſe, dictaſſe quæ concionabantur & ſcribebant? Quid ad hæc Petre, iuxta leges à te conſtitutas? Vel huiusmodi hitoriæ ſacræ ſunt tibi apocryphis & fabulis annumerandæ, vel tibi his omnibus Diuis eſt aſſenda eadem cum ſcriptoribus Canonicis authoritas; & eâ forte de cauſâ amiciffimus tibi Petrus de Alua regulæ Minoritarum, nomen, & vim legis Diuinæ vindicat, quod legatur diuinitus dictata D. Francisco. Eodem loco planè tibi habendi ſunt libri Sanctoꝝ, quos reſcenſui diuinitus edoctos; vel abiicienda eſt tibi, & perneganda tua conſecutio, non ſolum vt delira, ſed vt hæretica. Vide in quas anguſtias te redegeris, dum vis aliquod negotium nobis faceſſere.

PARAGRAPHVS TERTIVS.

*De Stephano, Hieronymo, Gregorio, Beda per
Canum, de Chryſoſtomo, & Martino Papa per
Combeſium reprehendiſſis, & de D. Thoma
impenſus laudato.*

SEd tertio loco acrius inueheris in Melchiorem Canum, quod in Concione ſancti Stephani ad Iudæos habitâ, & à Luca relatâ notauerit aliquot lapſus, quos

cum defendere non posset, nec aliis Scripturæ locis conciliare, dixit post grauissimos Viros Bedam, & Rabanum, Stephanum zeli, & disputationis ardore abreptum memoriâ labi potuisse Hanc Cani interpretationem mirè exagitat Petrus. Sed cum censoriam virgam assumit in Virum Doctissimum, & sapientissimum, ipse multò plura & grauiora, & actius castiganda admittit. Primum quis ferat, illum contemptum, quem vbique verbis præfert, dum grauissimum virum, & vt Ribadenerii verbis vtat, *deposito Episcopatu venerabilem, fraterculum vocat?*

Non potuit apertius demonstrare se hæreticorum spiritu agi, quàm quod illorum verba continuò eructet; putat se quasi in nihilum deiecisse Viros, qui in Ecclesiâ, & in Doctorum cœtu prima loca occupant, si *fraterculos* per conuicium appellet. Adeo ne cæcutis Petre, vt non videas ista tibi infamiam parare, non illis, qui sunt extra tuorum conuiciorum, & telorum iactum longissimè positi, *Non accedes ad illos malum nec flagellum* linguæ tuæ liberioris ad illos *appropinquabis*. Hoc obiter dictum sit, non solum de Cano, sed etiam de reliquis Dominicanis, quos continuò, more, stylo, & animo hæreticorum *Fratres* per contemptum vocas.

Sed ad rem veniamus. Vbique fraude, & mala fide agis; nam vt Canum lacerare posses impunè, inducis illum quasi solum, & primum huius interpretationis authorem, cum tamen habeat viros grauissimos, qui præcant, & qui sequantur, & qui subinde præsidio illi sint contra tuos impetus. Quare taces à Beda, & à Rabano suam interpretationem hausisse? An ignoras Petrum de Lorca Theologum Cisterciensis Ordin. Complutensem Professore celeberrimum, sequi & approbare mentem Cani? Quâ ergo fronte scripsisti, ferendam nullo modo esse, nec ab alio inter Catholicos, quàm ab infrunito Cani calamo exarari potuisse? Ista forte sciebas, sed existimasti è re tuâ fore si ab aliis nescirentur, vt posses tragædias excitare.

Sed mitius, quàm exigat tantæ culpæ atrocitas, & adeo proiecta audacia, tecum actum est, vt demonstrarem, te nullum in nobis traducendis modum habere, nullis hanc licentiam metis cohiberi, sed quamlibet

enormibus calumniis, & commentis gradum facere ad atrociora: Dum scripsisti primum, & solum Canum ea, quæ ex ipso refers de Stephano tradidisse, vel Canum inauditum, id est, non lecto eius libri 2. capite ultimo ad calcem, damnasti, vel re ipsa accuratè legisti, & expendisti singula verba; ne minùs iniustam, quàm atrocem sententiam pronuntiares. Si primum fateare, re Canum damnasse ad nullum examen vocatum, nec lectum, nec auditum, te prodis iudicem iniquissimum.

Si legisti, quâ ratione, quâ conscientia potuisti illum hâc præsumptâ à te impietate quasi primum authorem grauari, cum ipse ita habeat, & mentem suam aperiat. *Hoc igitur loco mihi Bedæ opinio placet, cui & Rabanus assensus est*, & subinde illorum verba exscribit, Beatus Stephanus, vulgo loquens, vulgi magis in dicendo sequitur opinionem. Sed quid tandem obliis Cano, quod ipse non diluerit? Cum subiungit Apostolorum privilegium esse ut nullus eorum in docendo erraret, nec Stephano hoc privilegium, rationem concedere. Et ne hanc Apologiam longiorem, & molestiorem faciam congestis vndeque aliorum dictis, placuit Loræ verba tantum referre, qui nervosissime & brevissime tuas calumnias, & tuorum, maxime Delrii obiectionem refellit 2. 2. post quæst. 16. in Appendice ad tractatum de fide Disput 2. membro 3. num. 24. ubi sic ait.

Tertio obicitur narratio Stephani Actor. 7 in cuius explanationem libenter amplecterer responsum sapientissimi Magistri Melchioris Cani lib. 2. de locis. cap. ultimo, Stephanum præ celeritate sermonis, & seruire Spiritus, aliò intèntum pauca illa transmūtasse, ut pro Iacob Abraham, pro Patre filium, &c. dixerit. Nam si id dicamus, primò in scriptura nullum mendacium admittitur: scriptura enim non illo modo refert historiam: sed refert, Stephanum ita loquutum. Deinde nec Stephano aliquid detrahatur: nam leues illa immutationes historia, facile, & absque omni culpa contingere potuerunt. Quin potius scriptura veritas maximè commendatur, qua referens viri Sancti sermonem, prout ipse protulit, punctim, & verbatim narrauit; non omittens illa etiam, in quibus memoria lapsus est. Quæ solutio absque omni nota, & scrupulo admitti potest.

Tum, quia primò tradita est à S. Beda, & Rabano in commentariis loci: Tum etiam, quia si quid contra obici potest, illud est, quod Stephanus ante, & post illam narrationem plenus Spiritu Sancto dicitur; in eo autem, qui Spiritu sancto plenus loquebatur, nefas est, admittere non solum mendacium, sed nec lapsum aliquem memoria, aut lingua, in quo à veritate deuiet. Hoc tamen non urget, quia Stephanus dicitur plenus Spiritu sancto, quatenus plenus erat gratia, & sapientia, non tamen quia Spiritu sancto mouente, omnia & singula loquutus fuerit. Neque est verbum quo hoc modo per Spiritum sanctum loquutum fuisse conuincatur. Et certè solutio hac omnem difficultatem euacuat, & infidelibus plus satisfaciet, qui calumniari non poterunt, aliquid gratis excogitatum esse ad fugam argumenti.

Vide Petre, quàm diuersus sit alterius Petri à tuo sensus, vt bonam censuerit solutionem Cani, & expeditiorem tuâ iudicauerit, ad amouenda impiorum scandala. Nec longe abest ab eâdem mente præter Emanuelem Sa, Ioannes Mariana eiusdem societatis, Vir acerrimi, & liberrimi iudicii, qui nec Domesticorum defectibus interdum pepercit; nihil ignorabat eorum, quæ dixerunt Martinus Delrius, & alii. At præstaret, inquis, fateri suam cum illo ignorantiam: id necessarium esset, si de mysteriis ageretur, quæ rationi incomprehensa sunt; secus est in rebus facti, quæ sub sensum cadunt, maxime si supersit alia expedita ratio ad has difficultates amoliendas, qualis est illa, quam ex Lorca subieci.

Quod ex Vielmio refert, Concilia œcumenica Diuum Thomam cuius veterum Patrum parem auctoritate fecisse, & quod addis ex Delrio de interpretatione animalium Ezechielis in gratiam D. Thomæ ita te in furorem vertunt, vt extra propositum afferas Vincenrium Lirinensem, & alios. Illi enim agunt de auctoritate PP. non seorsim, vt privati Doctores sunt, sed coniunctim, vt communi consensu testes sunt Traditionis, ad quam vnâ regulam vult omnes controuersias exigi & resolui; & si cuilibet Sanctorum seorsim D. Thomam quis æquauerit, non adeo erit grande piaculum, vt statim exclamemus. *Blasphemauit.*

Nam

Nam id vnum certum est, amplitudine rerum, ordine, methodo, & forte profunditate, aut subtilitate alios superasse; quia nulli vniuersam Theologiam complexi sunt, qualem nobis mirâ methodo plenissimam dedit. Superior etiam fortè est doctrinæ sinceritate, quia vix vllus est reliquorum, qui aliquando non impeggerit. At pores totam Doctrinam D. Thomæ inoffenso pede decurrere, qui vt dicit Clemens VIII. *sine vllò prorsus errore in omni genere scientiarum plurimos libros scripsit*; Nec debes, Petre, fatuo, vt loqueris, in ipsum amori nostro ascribere, si post Summum Pontificem puritate Doctrinæ cuiuslibet Patrum æqualem fecerimus. Nec admodum nos tua premunt verba cum ais, *Cedo, quæ sunt illa Oecumenica Concilia, sanctum Thomam Patribus, æquantia*? Do omnia quotquot ab eius fœlici obitu sunt habita, maxime Florentinum, & Tridentinum, vt præter Baronium, aliosque, testatur Thomas Aleram ex Theatinorum familia libro de politiâ Ecclesiasticâ.

Sed mira est tua, Petre, cæcitas, & indulgentia in tuos, nec minor in nos durities, & iniquitas. Vis ad seuerissimas leges, & ad rigorem Theologiæ exigere quæcumque dicuntur in Panegyricis, & Laudibus Sanctorum, in quibus fuit semper honesta quædam libertas & loquendi licentia. Quid si iisdem legibus tecum ageremus, quibus nos damnas? Scio à quodam Hispano concionatore in laudem sancti Ignatii vsurpata fuisse hæc verba ex Hebræorum cap. i. *Multifariam, multisque modis, &c.* Et Diuum illum omnibus qui præcessere Patriarchis antepositum.

Novi alterum, qui in eiusdem Diui festo sanctissimam D. Pauli gloriationem totam transtulit in D. Ignatium: *In quo quis gloriatur, &c. ego. Hebrai sunt &c. ego.* Nullum miraculi genus, seu ad depellendos morbos, seu ad mortuos e sepulchro ad vitam reuocandos prætermisit, nullum gratiarum genus, quas gratis datas vocant, nullum denique privilegium, seu raptus, seu prophetiæ vlli Sanctorum datum contendebat, suo parenti negatum; quo reliquos omnes non superaret, aut certe non æquaret. Hæc de illo, cum tamen vir religiosissimus & indiuiduus Diui comes illi superstes Petrus Ribadeneira vitam fidelissimè scripserit, & nil illorum referat; ino-

memini me legisse caput illud, quo exemplo D. Augustini, & Ioannis Baptistæ probat ad sanctitatem miracula, & huiusmodi privilegia minimè necessaria. Vnde constat posthuma esse, quæ de sancto Ignatio præcipua miracula celebrantur.

Si hæc attenderes, Petre, vtereris eadem in nos indulgentiâ, quâ vestra sæpe nos interpretari oportet. Quod si vellem è tuorum scriptis in sanctos Patres reprehensiones iniustas, nec sine graui modestiæ, & reuerentiæ illis debita noxâ colligere tuo more, non vnam vel alteram diatribam, vt tu è nostris facis, sed volumina conficerem; non ex omnibus; ex vno vel altero tantum, vt Vasquez, & Maldonato.

Memini me legisse apud Patrem Richeomum de gradibus humilitatis Maldonatum conuersatione & humilitate agnum fuisse, in disputatione verò contra hæreticos, Leonem egisse. Sed re vera idem non solum in hæreticos, verum etiam in sanctos Patres ita rugit, vt aliquam dederit occasionem Scaligero acerbius ipsum excipiendi, & vocarit *pecus maledicentissimum*. Iniquius hoc dictum reputo, libenter hoc nomen Maldonato condonabo, dummodo in te cadat, nam hoc solo libro tibi hunc titulum asseruisti. Quidquid sit; si conferas, quæ liberius scribunt in sanctos Patres hi duo Scriptores à me nominati, & quos illis errores falsò apponant, conferas, inquam cum his, quæ ex Cano, & Combessio in Hieronymum, in Chrysostomum & alios dicta refers, stillam aquæ oceano comparaueris.

Carpis Canum, quod ab Hieronymo carpendo non abstinerit, & vocarit illum, *Capitosum & in fide adhibendâ morosum*. Vbinam legis, Petre, hæc verba à Cano in Hieronymum? Ferenda sane non est tua in mordendis viris sapientissimis libido, & cupiditas effrenis. Canus lib. 2. ad examen vocat locum Theologiæ ex historia humanâ, & vt vim eius experiatur, ac prober, cap. 3. decem & octo argumenta proponit; & octauo attingit traditionem de Adami in monte Caluarie sepulchro, ab Augustino, Epiphanio, & Cypriano confirmatam, & ipsomet Hieronymo Epistolâ Paulæ ad Marcellum cap. 5. responsioni ad illud argumentum præmittit hæc verba.

Non debuit sane tantopere ridere Hieronymus Adami in loco Caluarie sepulturam, nec nos, viri licet sanctissimi exemplo, historias huiusmodi ridere debemus; potuit ne modestius loqui in gratiam opinionis receptæ, & Patrum, quos tetuli suffragio approbatæ? Vbi sunt, Petre, verba *Capitoli & Morosi*? Et adhuc te patiemur optimum quemque tuis mendaciis fœdantem?

At quarto loco vapulat acerrimè tuâ ferulâ Combessius, quod dixerit à Chrysost. dissimulari, aut leuius haberi potuisse plura, quàm vt tantam viro sancto confarent inuidiam, & quòd solutior fuerit sancti Chrysostomi lingua, & incomparatus zelus in Eudoxiam. Vnum te volo, Petre, qua re grauat Chrysostomum Combessius? Leuissimâ culpâ, à quâ D. Petrus non fuit immunis; cuius causâ Paulus illi in faciem restitit, & quam Tertullianus vocat elegantissimè errorem conuersationis, non fidei. Hoc tantum notat Combessius in Chrysostomum, quòd potuisset moderatius agere, ne exasperaret animum mulieris nullo alio fructu, quàm qui sequutus est.

His addo alterum quo ista tua obiectio, & subinde altera in sanctum Martinum euanescit. An adeo grande piaculum reputas, Combessium admisisse, quod in Chrysostomo, & in Martino animaduernerit similem culpam illi, quam in Petro Paulus reprehendit.

Dices forte, Combessium non esse paris cum Paulo authoritatis. At ego reponam nec Chrysostomum, nec Martinum Petri æquare sanctitatem; neque enim saltem de Chrysostomo dictum est, *Orani pro te, Petre. Tu es Petrus*. Maximè cum non solùm Theophilus, quem tu superbix accusas, sed etiam Epiphanius inter iudices Episcopos sederit, & in Chrysostomū tulerit sententiam, cui accessit nepos Theophili Cyrillus Alexandrinus Chrysostomo, sicut nec Epiphanius, sanctitate & eruditione inferior. Pater Combessius apparatu ad concionatoriam Biblioth. suo de sancto Chrysostomo iudicio inter Pontifices Diuo infensos Principem ponit Porphyrium Gazæ Episcopum virum sanctissimum Eudoxiæ charissimum, cuius authoritate, & fauore vsus est foeliciter excindendâ simulachorum superstitione, ac Christianæ Religionis cultu adaugendo. Ex quibus duo apertè constant,

primò te falsò dixisse, qui tricati sunt circa sancti Chrysostomi relationem in Dyptrica non fuisse nisi dyscolos, & rebelles homines & diem hominis desiderantes.

Vide quomodo Lectori imponas, aut quibus Epiphanium, Cyrillum & Porphyrium annumeres, qui fuere inter aduersarios Chrysostomi. Vnde secundum, quod moneo, euidentissimum est, Combefisium summâ laude dignum, quod levis culpæ vnum accusauerit, vt duos Diuos ab atrocissimi criminis notâ vindicaret. Qui enim Epiphanium, & Cyrillum excusare possis, si, ne quidem in speciem, aut leuiter Chrysostomus peccarit? Sed tu nihil pensi habes causam Chrysostomi. Id vnum moliris, vt Dominicanus audiat, quasi Diuis infensus.

Iterum te conuenio: Censes ne grauius Chrysostomum à Combefisio læsum, imposito errore leuissimo conuersationis, quàm à Vasquez, qui contra omnium Theologorum etiam suæ Societatis mentem, contra expressa Chrysostomi verba grauissimam illi hæresim affingit, quâ totius Christianismi, totius gratiæ ordo funditus eueritur? Contendit enim acerrimè, quasi pro aris & focis pugnet, Chrysostomum Deum facere mentibus creatis inuisibilem, ac proinde visionem beatam, quæ, vt dicit Augustinus, est tota merces Christiani, tota nostra felicitas, esse impossibilem; sicuti comprehensionem Diuinitatis, soli Deo eximiam; nec tamen apud te Vasquez quidquam mali admisit. Adeo æquum iudicem agis. Tu certè eum te probas vbique, qui nullum vitium in amicis, nullam virtutem in inimicis agnoscas.

Sed fortius tecum ago; putasne Combefisium excessisse, si eo loco Chrysostomum, quo ipse Chrysostomus Beatissimam Virginem reposuerit, si mirius cum eo egerit, quàm cum Deiparâ Chrysostomus? Quid ad ista, Petre? Ignorasne Chrysostomum sanctissimæ Matri non vno loco notam aliquam peccati inuisse? Quid ad illud D. Tho. 1. part. quæst. 27. art. 4. ad tertium. *Respondeo quod in verbis illis Chrysostomus excessit*, utcumque tamen excusat, vt intelligatur in Despara cohibuisse non inordinatum inanis gloria motum, quantum ad ipsum, sed id quod ab aliis posset existimari. Ad illam responso-

nem S. Doctoris hæc verba habet Caietanus; *Considera reuerentiam, modestiam, sapientiamque S. Doctoris: Inuenit Chrysostomum in hac materia contrarium Augustino rationique; non clama is accusando, exaggerando (ut hodie faciunt multi) modestissime dixit, excessit, sapientissime subiunxit verba ipsa reduci posse ad sanum sensum, quidquid author senserit, subinens. Vide quæ adiunxit Caietanus, ut inde agnoscas Petre, nos Dominicanos aliosproforus esse, quàm tu, tuique similes animo, & te per summam calumniam obii cere Sanctos Patres à nobis castigatos, cum multo reuerentius eos habeamus, quàm tui, & quàm ipsemet Chrysostomus Deiparam habuerit.*

Sed quàm bellè causam odij in Chrysostomum Dominicanorum ais esse, negatam ab illo prædeterminanem Physicam. In primis ille, in quem agis, ita totus est in legendis, vertendis, commentandis Sanctis Patribus maximè Græcis (in quo genere nullum superiorem, neq; fortè parem fide, & eruditione hoc sæculo habet) ut de scholæ contentionibus parum cogitet. Deinde Chrysostomus apertissimè gratiam efficacem confirmat, dum illius defectu peccasse asserit Petrum. Terribè ad illa, quæ ex Chrysostomo refert pro tua contra nos opinione, facillima & obuia est responsio apud Salmanticenses, qui norant verba ex hom. 16 in Ioannem: solâ persuasione nobiscum Deum agere, non extare in Græco, & appositâ fuisse à Pelagianis; quia etiam secundum tuos verè Pelagiana sunt: ac proinde etiam à te tuisque respuenda.

Te Theologum non serio agere iamdiu probaueras multis argumentis, verum aliquam Grammatistæ hætenus opinionè seruaueras, sed ab illâ planè excidisti, probatione ex his verbis Apostoli, *quando visum est Deo, nos segregauit ex utero, &c.* Quâ vis scientiam tuam mediam ex Paulo eruere; quasi visum est Deo, non sit eo loco idem ac placuit Deo, aut sic statuit. Nil mirum dum temerè potiùs scribis, & impetu in nos inueheris, quàm consilio, & meditarus agas, lapsus tuos numerum verborum superare. Responsione ad accusationem de Chrysostomo responsum est etiam pro Martino, quem male habitum conquereris à Combessio,

Sed si Petrus peccare poterat nimia indulgentia, quid mirum est Martinum in aliud extremum vitium delapsum? Hæc à me dicta fuerunt, dum meliora à Combesisio expectabantur, & promissi fidem absoluit, dum scriptum cum non passurum, se impune laceffitum fuisse per Summam iniuriam à mordacissimo sene, perinde auido spargendorum, quæ longo studio collegit, conuiciorum, sicuti senes solent esse congregandæ pecuniæ, & seruandæ tenaces. Quæ vero ad sui nominis defensionem scripsit fusiori stylo suo illo apparatu titulo sancti Ioannis Chrysostomi paucis perstringam. In primis quàm alienus fuerit semper à liuore detrahendi Chrysostomo, & quanti sit illi hoc nomen, testes vult haberi suas in illum lucubrationes & tot monumenta illius, vel ex tenebris eruta, vel illustrata. Vnde censet, illius liuoris nomine, nulli potuisse esse suspectum, nisi Theophilo, qui Apostolicum ipsum symbolum multiplicis erroris insimulauit.

Quæ verò de sancto Chrysostomo, & Martino Pontifice ex historiæ Monothelitarum paragr. 14. suscepit carpenda, non aliud vitii habere possunt, quàm quòd Chrysostomi magnam seueritatem sibi quidem sanctam, scripserit non perinde vniuersis in Oriente per hæc tempora fuisse probatam, etiam viris sanctis, vt Porphirio, &c. Quod ad Martinum Papam pertinet, illum cum Vitaliano Pont. Rom. contulisse, & vnum eundemque spiritum in vtroque varium suspexisse lenitatis, & seueritatis, neutri detraxisse: sed indicasse tantum quid alterutri commodi, aut incommodi subesset. Et hæc est atrox illa in Chrysostomum, in Martinum Papam, orbemque Christianum iniuria, cuius accusat Theophilus Combesisium, & quasi sacrilegum peragit: quamuis non sit dissimilis, aut grauior, quàm si quis miratus ortam contentionem inter Paulum, & Barnabam Marci causâ, se nescire profiteretur, Barnabæ lenitas, vel Pauli seueritas magis ad Euangelii progressum conduxisset.

Hæc præfatus eleganter Combesisius ad suam causam asserit, & multis probat in eâ Chrysostomi historiâ, vnde calumniandi se ansam arripuit Raynaudus, totidem commenta & mendacia protulisse. Et in primis quod ex

Theodoreto libro nono historiarum refert, Innocentium I. noluisse communicare cum Ioannis aduersariis, nisi nomen eius in Dyplica referrent, falsissimum est. Nam præter quod pauciores Theodoretus historiarum libros scripsit, libri quinti cap. 34. ubi de hac controuersia nominis Chrysostomi in tabulas Ecclesiæ publicas referendi agitur, ne verbum quidem de Innocentio, sed de Orientalis Ecclesiæ Episcopis, Chrysostomo aut beneuolis, aut infensis: nec dissidium, quo totus Oriens flagrauit, extinguere potuit nisi Chrysostomo in Cælum assumpto, eiusque paulatim memoria populis, ipsisque Episcopis Sancta habita. Et hæc erudite prosequitur Combefilius stylo opportuno calumniis Theophili depellendis.

Cæterum Christi gratiæ ad singulos actus necessariæ facultate arbitrii integrâ assertorem Chrysostomum agnoscit, saluo semper altiori Dei vocantis, & excitantis consilio. Vnde tantum abest, ut hoc nomine Chrysostomo infensior sit, ut hanc potius gratiam singulariter olim coluerit, & colat. Tandem concludit longius Theophilum à Chrysostomi obseruantia abesse, & ipsum penè irridere, cum hæresis infamer, quod ex communi Patrum traditione censuerat Beatam Virginem desponsatam fuisse Iosepho, non eius coniugem, cum Spiritu sancto obumbrante concepit. Placuit ex Combefilio colligere quæ ob singularem eruditionem non dubito fore grata Lectori. Ad nostra redeamus.

Vindicias parat Petrus pro Gregorio Magno, & pro Beda contra Canum quod in illis desiderauerit maiorem delectum, & diligentiam in scribendis quibusdam miraculis, quæ minùs certa haberi possent. Verba Cani lib. II. cap. 5. ubi multa dixit pari sapientiâ & eloquentiâ, & utraq; summâ, qualem in Theologorum nullo hactenus vidimus; subiungit. *Qua ego eadem de Beda, atque, Gregorio iure fortasse, ac verè dicere possum. Quorum illa in historiâ Anglorum, hic in Dialogis quadam miracula scribunt, vulgo iactata, & credita, qua huius sæculi Aristarchi incerta esse censebunt.* Potuit ne Canus modestius, & reuerentiùs loqui de summis illis. Viris? Potuit ne acerbius Petrus cum illo agere?

Verum ut rem totam prudentis Lectoris iudicio subiciamus, placet referre, & comparare vtriusque verba;

Cani in Bedam & Gregorium; Petri in Canum. Nam hic ita prosequitur. *Sed quoniam modeste, & circumspetto iudicio de sancto Viris pronuntiandum est, ne in his quidem duobus reuincienda sunt plurima; pauca enim in eis arguere possis, quamuis historiam Ecclesiasticam reuocare ad seueriora iudicia contendas. Ac si necesse est in alteram partem peccare, omnia eorum probari legentibus, quàm multa reprobari malo.* Verum idem Author monstrat se remotissimum ab illo, quod in Petro iam notauimus, vicio; vt sua, suosque adoret, licet erroribus scateant, & corruptissimè scribant; in extraneis ne minimos quidem nœuos pati possit. At contra noster Canus humanissimus in extraneos, summâ reuerentiâ in antiquos Patres; cum suis sui que Ordinis, id est; cum Vincentio Bellouacensi, & D. Antonino, quasi cognatio, & necessitudo, ius daret liberius & seuerius iudicandi, quasi de se sic de illis liberè iudicat. *Vterque, inquit, horum non tam dedit operam, ut res veras, certasque describeret, quàm ne nihil omnino prateriret, quod scriptum in schedulis quibusdam reperiretur. Quamobrem boni licet, ac minime fallaces viri, qui tamen nec authores eos, à quibus suos exscripsere libros, diligenter examinauerunt, nec res iustis libratas ponderibus memoria prodiderunt, apud criticos graues atque seueros autoritate carent.*

Hoc Cani iudicium de Gregorio, & Beda primum, deinde de Vincentio, & Antonino. Censesne, erudite & Christiane Lector, dedisse iustam Petro expostulandi causam, & conquerendi, quod opus illud Cani, non fuerit damnatum, & flammis absumptum? Dubium plane relinquit scriptor ille iniquius ne damnet Cani libros, & velit prohibitis annumerari, an suos defendat, & homines Superosque accuset, quod inter prohibitos legantur, quasi vt ipse inquit, non minor sit iniuria, quàm quòd Christus inter duos latrones fuerit cruci affixus.

Sed vt ad rem redeam, mi Lector charissime, dum Cani, & Petri verba confers, nonne tibi videris audire hinc Cygnum canentem, inde Cauem crocitantem? Hinc hominem humanas voces proferentem, inde bouem reboantem? Colligamus aliquot ex eius viridario flosculos, *Sed redantur Canus; Bedam Canus rudicatis*

Es aucupii fauorum vulgi insimulat, quasi egenum, & tribolare. His quæ retulimus verbis, quasi furore adus addit; Res est profecto dignissima admiratione, talia scriptis de Gregorio, & Bedæ ausum committere Canum. Nec minus stupendum est talia scripsisse hominem religiosum, & impunè tulisse; ita ut nullus index publicus, de libro adeo petulans de sanctis scriptoribus iudicium continente proscribat, aut supprimendum esse, aut corrigendum. Et subinde effunditur in laudes D. Gregorij, & maxime Dialogorum eius, quasi Canus eas non agnouerit. Subiungit eundem Canum, damnaſſe Zachariam Pontificem Dialogorum è Latino interpretem, Quasi tempus male collocasset, gerris narrationum indiscussurum ad lenocinandum vulgo, & indulgendum plebecula sine maturo iudicio contextis ad Græcos Græcè transmittendis. Vbi, Petre, hæc Canus? Profectò stylus monstrat non esse sensum ipsius, sed tuas calumnias; perinde enim facile est stylum eius à tuo distinguere, ac voces humanas à ferinis.

Non immoror in his refellendis quæ Cano obiicis, reprehendisse immerito Gregorium, quod loco Theodoretî Sozomenum citarit, quod è catenâ D. Thomæ locum è Nazianzeno citatum negarit huius authoris esse. Etsi vera demus, quæ obiicis, quid ad tuæ Diatribæ argumentum? Anne quia Canus memoriâ lapsus est, aut totum Nazianzenum non habuit in numerato, Domini cani traducendi sunt quasi hostes Diuorum? Addo Canum occupasse quæcumque Theophilus ex se, vel ex Bilio obiicit. Nam quoad Sozomenum dicit plures fortè, quàm ad nos peruenerint, libros scripsisse; vnde potuerit Gregorius haurire, quæ desiderantur in his, qui supersunt libris Sozomeni. Quoad obiectionem ex Nazianzeno, iniquior est censura Theophili improperantis nobis hallucinationem præſidentem. Sic enim habet Canus libro 12. cap. 14. paulò ante solutionem argumentorum; Græcus, quem refert sæpe D. Thomas in catena, quamuis hoc loco vitiosa sit lectio, & tribuatur Gregorio Nazianzeno. Certe his verbis non negat vllibi extare apud Greg. Naz. quod ex illo citat D. Thomas de incremento sapientiæ Christi.

Sed omiſſis nugis aliquid magis ſerium ex hac diſputatione tibi, erudite Lector, ſubiicio. Hæc ex Cano fuſius retuli, cum vt rem, quam præ manibus habemus, vrgerem, & Canum vindicarem à calumniis, quibus homo importuniſſimus illum vbique ſædat; tum etiam vt hæc demonſtratione, quæ mathematicas euidentiam ſuperat, reſellerem in anteceſſum, quæ ipſe infra falſiſſimè ſcribit de diſſenſione Cyriacorum à ſuis, cuius principium à Cano, quaſi Authore repetit, & natam dicit ab hæc triplici cauſa, à ſuperſtitione, à barbarie, à liuore.

Non te pudebat, dum hæc ſcriberes, calumniæ ab omni ſpecie veri alieniſſimæ? Quis hominum Cano ab his tribus vitiis remotior? Quis illo in iudicando liberior? Et magis abhorrens à fucatâ pietate? Quis inter Theologos Catholicos illi Tullianâ eloquentiâ comparandus? Quæ illi cauſa inuidiæ, in ſocietatem adhuc tenellam, adhuc in cunabulis poſitam, & vix balbutientem? Ac non tunc tantummodo, ſed nec hæcenus aliquis veſtrorum Scriptorum prodiuit, qui in Theologicis elegantiâ Canum ſuperet; certè numquam vidè parem, aut qui ſælicius Thomam Tullio iunxerit. Et audes per ſummam improbitatem ſcribere ab illo natam ex barbarie Dominicanorum cum tuis diſcordiam? An non verius aſſeram, te ſimilem illis qui ictero affecti colorem croceum affundunt his quæ intuentur; ita tu aliis affingere ſoles morbum inuidiæ, quo grauiffimè laboras.

Quod de fascinatione dixerunt philoſophi in plures diuidunt ſpecies, & vnâ naturalem agnoſcunt quæ maximè inſit hominibus, & mulierculis turpibus, & vetulis, cuius vim per oculos exerant acrius in paruulos, qui præ teneritudine opportuni ſunt iniuriæ, & in pulchriores, quod ſuæ turpitudinis pudore, & alterius pulchritudinis inuidiâ exacerbari, ſpiritus vehementiores commoueant, & per oculos validiſſimè vibrent, & eiaculentur in eos, quos execrantur maximè, quod ſint ſui diſſimiles, & eorum collatione, foedi & aſpectu intolerabiles appareant.

Quis tu, mi Petre, præ Cano niſi ſaga vetula, & Medea, ſelectæ & formoſiſſimæ Virgini collata? Hinc tuus

in illum liuor perpetuus, hinc in pulcherrimum eius opus toto loquacitatis spiritu debaccaris. Sed quis indè existit fructus? Cani laus, & tua infamia æterna, quòd vt dixi, caligantibus oculis, tantum lumen ferre non possis. Neque enim tu Gregorij reprehensionem, quæ modestior esse non poterat, vis viciisci; sed diuinum opus ferre non potes, quòd tibi hanc ridiculam gloria- tionem abstulerit, quasi sentes Theologiæ, vt dicis; amænaueris, & solus è tuis, vel certè soli tui Eloquen- tiam Tullianam adiunxeritis rebus Theologicis. Sed hanc laudem (quòd tu concoquere non potes) tibi ab- stulit Canus; hinc liuor. Incidisti in manus medici, qui probè morbum tuum nouit, & censet eius progressum aliquo cauterio cohibendum.

PARAGRAPHVS QVARTVS.

*Satisfit objectionibus reliquis diatribæ de Beati
Xauerij Apostolatu, instituto Carthusianorum,
de Reuelationibus Sanctæ Brigittæ, &
nimis laudibus D. Thomæ.*

EX omnibus Dominicanis, Magister sacri palatij Ricardius post Canum secundus est, quem maxi- me Theophilus allatrat: quia illi accedebat, diuersè tamen indole & eruditione; vterque parem adepti lau- dem, vt pares ingenio; sic tamen, vt vnus impetu, alter iudicio, ille extemporaneâ eloquentiâ, & acutè dictis in promptu, hic stylo valeret.

Nicolaus igitur Ricardius toties his diatribis discer- ptus inuidit sancto Xauerio titulum Iapponum & In- diarum Apostoli Adeo ipse, & nos omnes ab inuidia absumus, vt exclamemus: vtinam tu ipse, vtinam reli- qui omnium vestrum essetis Prophetæ, essetis Apostoli (vno verbo) essetis Xauerij. Vtinam Xauerij spiritus numquam deferbuisset in cordibus eorum, qui eius labores exceperunt: staret nunc Ecclesia Iapponensis olim florentissima eius extructa manibus & Sudoribus coag- mentata, quam nunc penitus euerfam lugemus.

Poterat vir ille Diuinus, si per humilitatem licuisset;

de se vera loqui ac dicere, quod, ut ait Tacitus lib. 2. historiarum, Otho Cæsar ultroque mortem sibi illaturus nepoti consuluit; ne omnino obliuisceretur se Patrum Cæsa-rem habuisse, nec nimium meminisset. At nos ut plurimum majorum, qui præiungere virtutibus, & glori- am nobis compararunt, obliuiscimur ad imitationem; & recordamur tantum ad iactantiam: unde fit, ut ple- rumque degeneres ab eorum moribus, quæ ipsi perfe- cere, evertamus. Pro summo beneficio reputo eum, qui me primus instituit, Magister Nouitiorum Iaponas ornasse sanguine suo, & martyrio longe crudelissimo; nam inter cætera tormenta, quæ recensere longum esset, transfixi fuerunt digiti omnes subulis, & corpus bis mille vicibus aqua, quasi uter, tumidum vi per omnes meatus eiecta eadem aqua, cruciatum fuit multis diebus.

Sed ad rem nostram; Conquereris, Petre, Magistrum sacri Palatii audito nomine Iaponum Apostoli, Xau- erio dato, veluti harpyam illico inuolasse in illud cogno- men, & erasum voluisse. Quam modestè agis ubique, nunquam occurrit tibi Pater ille Monstrum, quin vi- dearis in furorem agi: P. Riccardius non dubitauit, quin Xauerio titulus ille deberetur. Sed scis Romanas aures non facile pati nouitates vocum.

Quid mirum si Pater Monstrum, pro sui officij ratio- ne voluerit causam tituli explorare? Nihil illorum, quæ affers, ignorabat Riccardius ab excessu, & sublimitate sapientiæ monstrum appellatum; sed nolebat fieri vulgarem Apostoli titulum: & ideo iustissimam habebat maturandi potius, quam festinandi causam. Sed tu ita putas tibi tuisque omnia deberi, ut injuriam tibi fieri credas, si vno momento differantur tua vota aut imperia.

Ceterum malâ fide historiam corrumpis, sicuti So- les, Theophile. Post hæc scripta, & semel edita com- peri, datum sancto Xauerio titulum primi Indiarum & Iaponum Apostoli. Quod, cum minimè verus esset & legitimus, & sanctus Thomas Apostolus pluresque alij posterioribus sæculis eò nauigassent, Euangelij præ- dicandi causâ, noluit hanc laudem illis præcipi, con- cesso nomine primi Indiarum Apostoli D. Xauerio;

licet Apostoli vel primi etiam Iaponum nonnegasset. Sic ubique Theophile, veritatem tuis fraudibus, quasi solem caligine obuoluis.

Grauas etiam Patres nostros nouâ accusatione, quod reuelationes sanctæ Brigittæ in odium illius de Conceptione immaculatâ improbarint, quamuis Bonifacius nonus post maturum Theologorum examen edi permiserit. Vbique ignorantiam, & malam fidem proditis. An ignoras has D. Birgittæ reuelationes Turrecrematæ Cardinalis nostri sapientissimi censuræ fuisse permissas à Summo Pontifice, eius lima purgatas, & suffragio munitas prodijisse, etiam retentâ illâ, quam obijcis de Conceptione Immaculata? Adeo alieni sunt nostri homines ab illorum indole, qui ex Sanctorum Patrum libris erasâ volunt, quæ à priuatis ipsorum placitis dissident. At Turrecremata, qui de argumento Conceptionis scripsit in gratiam Diui Thomæ, intractum reliquit in libro eius arbitrio permissio, quod ipsius sententiæ minùs conueniebat. Adeo antiquis moribus, & sincerâ fide viri isti probi, & sapientes res suas peragebant: & tu audes, Petre, vitia huius sæculi illis omnino ignota imponere.

Cæterum indubitatum est, D. Birgittæ reuelationes non esse habendas vt Propheticas, & quæ in sacrâ scripturâ habentur, ab Ecclesiâ item fuisse approbatas, seu potius permissas, *quatenus nihil continent, quod intellectum habeant aduersum sacra scriptura, aut doctrina sanctorum Doctorum ab Ecclesiâ approbatorum, aut ita alienum ab exemplis Sanctorum sit, quod pias valeat offendere aures*: ait Cardinalis Turrecremata in prologo dictis reuelationibus præfixo: & Gabriel Vasquez tom. 2. in 3. part. q. 7 disp. 117 cap. 6. num. 77. sic ait *Neque vero dicendum has reuelationes ita ab Ecclesiâ probatas fuisse, sicut reuelationes Prophetarum in sacrâ scriptura probantur; sic enim tamquam de fide inuicibiliter credenda essent; sed quia tanquam pia, & absque ullâ superstitione prudenter à populo recipi possint. & obseruari*. Hoc fere idem voluit Bartholomæus Sybilla. Nec adeo graue piaculum fuit, huiusmodi reuelationes ad purè humanas cogitationes, hoc est, non ad cogitationes à Spiritu sancto infusas

reuocare ; quidquid Delirius magicis inquisitionibus assuetus , & nimium credulus reclamet.

Non tibi satis fuit asserere Dominicanos, alicui Sanctorum seorsum infensos fuisse : vis etiam Diuorum turmis indixisse bellum, id est toti Ordini Carthusianorum, quam meritò dixeris amplissimam sanctorum societatem, quæ in terris degit , vt Beatorum vitam cælestem imitentur & nobis spectandam & admirandam præbeant.

Accusas nostros Theologos statutum illud Ordinis Carthusiani de abstinentiâ à carnibus , etiam cum vitæ dispendio obseruandum impugnasse , & Arnaldum de villa-noua fuisse acerrime tutatum , vt ipse gloriatur contra Iacobitas , id est secundum tuam interpretationem, contra Dominicanos. Nisi tibi gratissimum esset , & auidè arripes quidquid minùs fauet Dominicanis, suspecta tibi fuisset relatio Arnaldi Medicorum sui sæculi facile Principis , sed Theologi pessimi : & cum eius nomen hæreticorum Catalogo sit adscriptum , poteras dubitare , num hæc scripsisset in odium illorum , qui forè in eius errores inquisierant.

Deinde hæc disceptatio Dominicanorum cum Arnaldo de statuto Charrusianorum ad Philosophiam potius pertinebat , quàm ad fidem , & Theologiam moralem : nam , vt sapienter notat noster Arauius , quæstio hæc grauissima de abstinentiâ à carnibus , etiam cum vitæ dispendio , aut periculo seruanda multiplex partibus est , & secundum tres status agitari potest. Primo cum Carthusiano ægro , aut sano, cui desunt ad seruandam vitam cibi omnes præter carnes ; secundò cum superit omne genus ciborum præter carnes , paris virtutis ad propellendum morbum , vel vires instaurandas , quales dari posse contendebat Arnaldus , quod negabant Dominicani. Atqui in hoc sita erat illorum dissensio quæ ad Carthusianos nihil spectabat. Tertio denique cum cibi adsunt : quos tamen agnoscas minus virium habere , quàm carnes ad mortem depellendam. Hoc triplici controuersie statu posito , mens Dominicanorum interprete nominato à me Theologo primario Professore Salmanticensi , & responsio communis est , si desint omnino alij cibi præter carnes , istis vtendum Carthusiano ne sit homicida sui :

secundò verò casu omnes vno consensu à carnibus abstinentum consentiunt: Tertio paulo difficiliore statu diuisi sunt Theologi, sed Dominicani omnes stant pro Carthusianis. Nam Victoria, Soto, & alij censent, abstinere posse, saluà conscientià Carthusianos à carnibus, non tamen debere. At ego cum Araujo censeo, si possint, etiam debere; quia quidquid licitum est, præcipi potest, & fieri statuto necessarium ad boni communis incolumitatem. Hæc nostrum omnium de Instituto Carthusiano sententia est.

An censes, Petre, illis aduersam esse, & nos huius causâ posse à te accusari, quasi sanctissimi instituti hostes? Sed frustra moliris Dominicanos à Carthusianis seiuungere, quibuscum sunt longissimâ & perpetuâ amicitia, & necessitudine arctissime deuincti. Si originem huius cognationis repetas, inuenies, initam à Sanctissimo Patre Dominico, qui cum in suis monasterijs, nullam studio paupertatis cellam haberet, voluit possidere quasi iure hospitij apud Carthusianos, vt fatigatum laboribus & prædicationibus animum cò aliquando se recipiens contemplatione recrearet, & ministerio Marthæ adiungeret orium Mariæ.

Inchoatam à Parente Nostro amicitiam cum Carthusianis quasi partem Patrimonij nostri diligentissimè coluimus, & perpetuam seruauimus, tum beneficijs vtrò citroque receptis, tum similitudine morum & instituti, quod ferè eiusdem generis est, easdem pendè leges de ieiunijs per septem menses, de abstinentiâ à carnibus perpetuâ, de silentio & de reliquis disciplinæ partibus, quæ adeo intimè vtrumque ordinem iunxerunt, additis etiam ferè eisdem vestibus, vt Dominicanus videatur esse Carthusianus, qui Charitatis causâ paululùm à solitudine secedit; Carthusianus etiam Dominicanus sit, qui actione intermissâ totum se contemplationi tradit. Et ne quidquàm desit ad Institutorum similitudinem, & fraternam concordiam, accessit etiam ipsa vestis similitudo.

Quid beneficiis mutua referam? Quid ornamenta ab Ordine Dominicano collata Carthusianis? Nonne ab illo habuerunt Ludolfum illum sanctitate, & libro de vitâ Christi in totâ Ecclesiâ celeberrimum? Inde Surius

huius ordinis ornamentum accuratius & elegantius vitas Sanctorum Nostrorum scripsit, quasi ad Carthusianos pertinuissent: & ideo comitia nostra generalia scriptis nomine totius Ordinis literis, gratias egerunt maximas pro hac singulari in Dominicanos benevolentia, quam testatam voluit effusis illis laudibus in viros nostros sanctitate illustres. Ipse etiam Pius V. pro suis in Ordinem, & in totam Ecclesiam meritis laudavit, & ad prosequendam historiam hortatus est. Quid igitur discordiarum seminator, inter fratres sapientis iudicio non ferendus, Ordines amicissimos, moribus & instituto simillimos, affectu arctissime iunctos sollicitas ad discordiam? Quamvis rumpas, amicitiam mutuis beneficijs æternum servabunt.

Concludis tandem tuam de violatâ sanctorum veneratione à Dominicanis causationem, ipsâ D. Thomæ inhonoratione, quem læsum, præ nimio affectu nobis impropere, & vis convincere quatuor argumentis, aut injuriarum generibus. Primò asseris malè meritos de Thoma Dominicanos multis scriptorum eius locis corruptis, & deprauatis audacissimè à Cosma Morelles, & à Thoma Lemossio. Secundò adiunctis illi, & adiudicatis quasi legitimis filiis multis operibus spuris; tum ut eius nomine essent vendibilia, tum ut mole voluminum Scoti lucubrationes superarent. Tertium iniuriæ genus Dominicanorum in Thomam asseris esse laudationes illas insulas, quibus sanctus Thomas putidè extollitur supra illud omne, quod dicitur doctum, quæ, ut inquis, non tam extollunt D. Thomam, quàm deprimunt, non tam colunt, quàm infamant. Quartò, inquis, inhonoramus D. Thomam affectis illi falsis opinionibus iniuriosis tanto Doctore, quales sunt de prædefinitionibus æternis, de præmotionibus temporariis, quæ omnem auferunt libertatem, & in Calvinistarum tandem hæresim ita apertè delabuntur, ut D. Thomæ, & Thomistarum sensum gratulentur & Bataui & Genevates Theologastri. Hæc, ut ipse inquis, attingis magis, quàm prosequeris, idè etiam egote imitatus strictim delibabo. De corruptelis locorum D. Thomæ aliquid nobis dictum est superius: plura de his inferius, quò recurret eadem accusatio refellenda: de
variis

variis elogiis, quibus dicis nos fœdare D. Thomam aliquid attigimus, sed iniuriæ atrocitas plura à me extorquer, quam vellem, & quam tuis rebus conueniret.

Videmur tibi adeo impotenter in D. Thomam ferri, vt censeas nos sumis non dissimiles, qui paruulos, dum nimio affectu arctius stringunt, strangulant; verum vt hanc calumniam, cum tuo dedecore refellam; vnum te volo. Credis-ne D. Thomam ab vlllo tuorum superatum omni laudum virtutumque genere, nempe splendore natalium, vitæ innocentia & sanctitate, summo ingenio, eruditione recondita, scriptorum genere & amplissimis in Ecclesiâ meritis? Licet fortè adeo amans tui sis, vt non solum tuorum præstantissimos, sed te ipsum illi anteponas, quamlibet præceps sis, tuum sensum non auderes euulgare. Puro te pluries iam euoluisse illum Auctorem qui sub titulo Anni sæcularis panegyricum scripsit tui instituti, & eorum, quos tulit & educavit. Quid par habet laudatio D. Thomæ à nostris instituta, illi, quam de tuis prosequitur orator ille, cuius fragmenta tantum vidi? Nam virum grauem è vestris, quem rogabam, mihi illius copiam faceret, certè testatus est non obscure, se pudere mihi dare legendum.

Quis vnquam Narcissus de suâ pulchritudine ita complacuit sibi, vt scriptor ille de suorum hominum dotibus, eruditione, & celebritate plaudit, exultat, triumphat? Vt hominis Christiani, & religiosi fastum & philautiam non ferres in philosopho, quem D. Hieronymus gloriæ mancipium vocat, nec in Ethnico, qui omnia ad ostentationem refert. Sordescit D. Thomas auxesi laudationum à nobis ornatus, præ illis heroibus, quos illustrat ille Annus sæcularis. Nec dubito quin apud te reputes totam hanc tuorum laudationem, quæ nostram D. Thomæ multis partibus superat; iacere infra meritum instituti tui, & eius alumnorum. Saltem illud exemplum effusissimarum laudum in tuos, si sciperes, poterat te deterrere à reprehensione adeo acerbâ Dominicanorum, quasi blasphemantium, cum D. Thomam longè disparem, & inferiorem faciunt loco, quo tuos reponis.

Poterat etiam, si sapuisses, abstinere ab alterâ calum-

niâ, quòd auxerimus legitima opera D. Thomæ spurilis auaritiæ & ambitionis causâ, vt venderentur charius, & supra Scoti opera excrescerent volumina D. Thomæ. Vbique prodis te tui similem: si vellem tuas opinationes & coniecturas passim per totum opus sparsas Lectori vno conspectu repræsentare, demonstrarem tua iudicia, dum vigilas, absurdiora esse dormitantium somniis, aut phreneticorum illusionibus: quale est illud tuum de adulterinis operibus D. Thomæ adscriptis Criterium.

Cur imputas tanquam vnicæ causæ, fatuo, vt loqueris, amorì Dominicanorum in Thomam, quod in Diuì vergit dedecus, quod est in tormentum discipulorum, quod denique cuilibet nobiliorum scriptorum contigit? Nonne Augustino? Nonne Ambrosio? Nonne & Doctorum cuique adscripti sunt supposititi libri? An non idem Thomæ potuit accidere, etiamsi in eius discipulorum mentem non venisset ridicula illa cogitatio augendi molem voluminum D. Thomæ supra Scoti opera? Quis vmquam negauit D. Thomam librorum multitudine Scoto esse superiorem, vt dolo opus fuerit ad hanc victoriam comparandam? Verè ostendis, te nec corticem operum Scoti vidisse. Certè sola D. Thomæ summa excedit mole opera omnia Scoti, qui de Theologiâ tantùm scripsit super quartum librum Sententiarum, & inde alium librum; quem inscripsit Reportata Parisiensis, & præterea, quæstiones quodlibetales; alia vero quædam exigua opuscula ipsius Philosophica sunt, non Theologica.

Verissimè dixi, te non scribere cogitationes hominis vigilantis: An ignoras hos spurios libros torturam esse Thomistarum, vt concilient cum his, quæ continent opera indubitata? Nescis in editione Romanâ iussu Pij quinti, alio charactere à legitimis fuisse impressa? Plus ergo molestiarum discipulis indè infertur, quàm possit magister laudis decerpere. Sed affingunt Thomæ opinionones, quæ in totum libertatem auferunt, quas Bellarminus, & Thomas Valdensis à D. Thomâ longè amoliantur, quas Ferrius, & Amesius auidè excipiunt tanquàm vera Caluini Magistri sui sensa. Dominicus Soto conqueritur aliquos, qui se Thomistas dicunt, & non sunt, contendere in potentiâ agente

esse aliquem actum primum distinctum à substantiâ, & potentia operatiuâ.

Hâc obiectione parasti tibi viam ad quartam diatribam, quâ D Thomæ & eius discipulorum doctrinam exagitas: huic difficultati, quam omnibus paginis ingerris, satisfaciam sequenti examine tuz quartæ diatribæ; quantum breuitas apologiæ patietur. Sed quia fortè non occurreret locus respondendi testimonio Soti: Dico cum nihil obesse sententiæ receptæ apud Thomistas de præuio concursu, quia ea quæstione Sotus disputat, an operatio transiens; qualis est calefactio, in igne sit, an in ligno. Hoc vltimum asserit Sotus, & primum negat contra nonnullos Thomistas Caietanum, Flandriam & alios qui actionem in agente ponunt, & suam sententiam quibusdam D. Thomæ locis confirmant, quod improbat Sotus. Sed longe diuersa est ab hâc de prædeterminatione controuersia ex Soto.

ARTICVLVS VLTIMVS.

*Dictorum ad hanc Diatribam, & toto hoc libro
Epilogus, & Confirmatio.*

HACTENVS pro rectâ in Deum fide, pro sincerâ in Deiparam, & in Vniuersos omnes, & in sedem Apostolicam Dominicanorum religiosâ obseruantia pugnatum est à nobis contra Theoph. Quo successu, iudicium sit penès æquos lectores, ex aduersarij malis omnibus artibus quodd vbiq; vel morosum Censorem egerit, vel apertum calumniatorem.

Si quid graue, & alicuius momenti obiecit, falsi manifestè conuictum est, si quid veri calumniis admiscuit (quod solet etiam ipsemet mendaciorum pater) vel nihil ad rem faciebat, vel adeo erat leue, & futile, vt in huiusmodi minutijs aperiendis, aut carpendis morari, & totum esse, non solum otiosi, sed verius sit parum æqui Scriptoris: Præter hæc duo Aduersarij vitia, nempe malam fidem, & morositatem, quorum obseruatio ad iustam defensionem mihi omninò necessaria est, reliquis omnibus peperci, aut si cuiusquam alterius generis

à me subnotatus est, reuocatum volo.

Cæterum quod ad fraudes attinet, nullam videntur prætermisisse: sed illa omnino inexcusabilis est, quæ propius ad hæreticorum plagiarias artes erudito opere à Patre Cothono detectas accedit; nisi fortè eas superauerit. Hæreticis huius sæculi, qui à Luthero, quasi à Tauri putrido cadauere muscarum examina, nati sunt, frequens est vox, & gloriatio; se extra ordinem mirabili Dei prouidentia nullo tamen miraculo confirmatâ, missos, Ecclesiæ iam à ducentis supra mille annis collapsæ in grauissimos errores à casu erigendæ, & instaurandæ vno Dei verbo, eoque scripto, semotis quibuscumque aliis argumentis, & à Traditione & consensu sæculorum, & Patrum, à conciliis &c. Sed dum illos rogamus impensè aut vrgemus, stent promissis, errores nostros coarguant, & emendent puro, & mero Dei, & scripturæ verbo.

Quid ad hæc hæretici? Cum expressa desint ex libris sacris loca: tùm tritari, & rixari, tùm ad suas interpretationes, aut consecutiones confugere, vel (quod omnium deterrimum est,) locorum scripturæ corruptelas moliri, addendo, demendo, immutando. Non tamen edè deuenere audaciæ, quo prorupit Theophilus: nam quas Scripturæ à se in linguam vulgarem versæ admiscerent, & assumunt glossas, interpretationes, vix eodem quo textum caractere edunt, quasi essent expressa Spiritus sancti verba. Sed frequentius diuersis & minusculis litteris ea scribunt, vel subnotant ad marginem.

Sed longè liberior, & minùs sincerus, quàm hæretici, Theophilus; quæ numquàm Canus, & Petrus à Vincentia dixerunt, aut etiam cogitarunt, quæ illis per summam, & apertam fraudem imponit, singulari caractere, & à suo diuerso edi curauit, quasi non solum eorum sententiam, sed etiam ipsamet versa referret. Nec mirum plus sibi indulgisse in hominum dicta factaque, quàm in Scripturam Sacram sibi permiserit Geneva plagiararia, quàm vt à me nominatus P. Coton, & cum laude semper memorandus obseruauit interdum, suos errores tentauerit sancire, & consecrare adhibitis cum Dei verbo similibus characteribus, sed minùs licenter & rariùs, magis repugnante stomacho, aut recla-

mante conscientiâ, quàm Theophilus egit.

Sed quid tandem his artibus, & fraudibus promouit? Dicam: suæ ipse conscientiæ malle, salutem apud Deum consulunt, suam apud homines prostravit famam, nostram potius illustravit & auxit, quàm vel minimum læserit, aut inumbrarit: quia cum ad nos traducendos, & diuersorum criminum accusandos accesserit omnibus instructus prædiis, summâ rerum peritiâ, librorum lectione, vindictæ cupiditate flagrans, innato odio, & rancore in nos à multis annis exacerbatus, tanto apparatu, & molimine, tam longâ & anxîâ indagine in libros, & mores nostros, non potuit ex tenebris eruere nisi conficta aut ridicula, nisi minuta, & futilia, aut apertissima mendacia. Nam exceptis paucis huius postremi generis, etsi daremus vera, quæ tanto labore congescit, quid tandem confecit?

Hoc vnum tantum, nempe Dominicanorum quemlibet, non esse à Deo donatum impeccabilitate, & aliquam culpam posse illis obrepere, cuius dum ludi magistrum agebar, vix reos discipulos flagro, aut ferulâ castigasset. Vide Theophile, quem fructum tuorum laborum colligas? Euasisti ridiculus cum vera narras, & futilia, & maledicus cum rem supra verum auges, syncophanta cum imponis.

PARAGRAPHVS PRIMVS.

Distinguntur varia Sanctitatis genera quæ non deesse demonstratur Dominicanis.

CÆTERVM si sanctissimo Iobo Vxoris, & Amicorum iniuriis appetito, si Apostolo Paulo æmulo- rum fraudibus circumuento, & maledictis laceffito, licuit suas dotes, & laudes non omnino tacere; vix credo nobis vitio vertendum, si tantorum Virorum exempla imitemur; præsertim cum non vnius, aut alterius causa agatur, sed amplissimæ familiæ per totum orbem propagatæ famam, iura, doctrinam vindicandi necessitas incumbat. Non dubito quin probi homines magis Pontificum constitutionibus, quàm Theophili Satyris

sunt fidem habituri. Quid vero Romani Pontifices de Dominicanis?

Certè adeo aliena sunt ab his quæ Theoph. contendit persuadere, eos esse Diuorum hostes, in sedem Apostolicam rebelles, hæresum Authores, & (vt verbis Tullianis Theoph. utar) mangones : vt necesse sit, aut ipsum, aut Summos Pontifices mentiri. Audiamus vnum Alexandrum I V. Virum Sanctissimum, in pauperes munificum, Dei gloriæ studiosissimum reliquorum nomine; *Cælestis*, inquit, *Agricola sacrum Ord. Prædicatorum*, quasi lignum fertile Paradiso Ecclesia inseruit, vt delectaret amantitate, ubertate satiare, & fructuum suauitate mulceret. Hoc lignum imbre superno irrigatum plurima poma profert, quorum odore, & sapore conualescunt debiles, languoribus detenti liberantur, carnis infirmitatibus prægrauati, pabulum salutis inueniunt, & internam recipiunt sospitatem. Hæc est illa plantatio, qua ramos suos undique expandens, flores honoris, & honestatis profert, & virtutis, & odorum conuersationis, longè larèque diffundis. Hic est Ordo honestate floridus, præclarus scientia, virtute sacundus, conuersatione purus, à sede Apostolicâ meritis appellatus. Huius Ordinis fratres sacrarum Litterarum studiis incumbunt, animarum profectibus, Diuinis officiis incessanter intendunt, Prædicationi ardentè insistent, & lumen doctrina ubique diffundunt. Hæc Alexander IV.

Nec dicas ab eius sæculo omnia pessum iuisse. Certè licet (vt de Sapiente Scribit Seneca) non omnes eodem gradu, eadem tamen viâ maior, aut sanior pars ad sanctitatem progressi sunt. Atque vt encomia, quibus eos Summi Pontifices dignati sunt, confirmemus, & defendamus: id obseruo, nullum Ordinem, quibus ornatur ac veluti præfidiis munitur Ecclesia, Dominicano, proprius ad illius similitudinem accedere, eiusque dotes præcipuas, maximè Corporis vnitatem sub vno Capite, vel Capitis incorruptam fidem, vel partium, quibus constat, Sanctimoniam fuisse assecutum.

Quod ad primam, & alteram dotem pertinet, videmus Ordinum plurimos, qui sub eadem regulâ Deo militant, neque habere, neque ambiuisse hanc Ecclesia

Catholicæ sub vno Summo Pontifice, quasi totius corporis sub vno Capite vnitatem; & in varias familias sponte, vel aliâ ratione quacumque diuisas sub multis præpositis Generalibus degere. At Dominici, non minus, quam D. Petri successor semper vnus fuit, Vnus totius Ordinis FF. Prædicatorum Magister Generalis; & quod nonnulli obseruarunt, nec omittendum puto, sicut è tot Petri successoribus in eius reuerentiam, eorum qui ipsius loco sederunt, nullus est Petri nomen sortitus, vel post electionem ausus sibi sumere, aut seruare; ita ex Magistris Ordinis, qui Institutoris Dominici vices gerunt, sedem occupant, nullus nomine Dominicus ad eam hætenus assumptus est.

Vnde cum Illustrissimo Archiepiscopo Anenionensi Magisterium Ordinis quidam congratularentur, ad quod certo certius votis Electorum erat poststridie adiuuendus; respondit ad Electionem se habere impedimentum, nempe Dominici nomen, quod ex Magistris Ordinis nemo obtinuisset: & ita contigit: Nam ab eius electione, in quam pedibus, & manibus erant ituri, Pontificio decreto inhiberi, & in Patrem Turcum consensere. Sed nomina nihil moror, nisi fortè diuino consilio, ad rerum occultarum significationem delecta, euentus, & experientia demonstraret: neque etiam illa deest ad rem præsentem: Nam singulari Dei beneficio concessum est Ord. FF. Præd. vt ex septem supra sexaginta prope quos habuit, Generalibus, vix vnus degener fuerit à Patris indole, idest à boni communis studio, & obseruantia regularis, cuius instaurationem omnes ad vnum promouerunt.

Non ita Patres Franciscani secum actum suis Annalibus testantur: nam qui secundus à B. Francisco Ministri Generalis munus excepit Elias, Sanctissimo Patriarchæ dissimilis, eius institutum funditus euertisset, nisi D. Antonius, & Bonauentura ruentem Ordinem valide sustinuissent. Has duas dotes Ecclesiæ, reliquæ sunt consecutæ. Quid enim à corpore incolumi, & indiuiso sub vno Capite & sano non speres? Hinc illa totius Ordinis cum Magistris Generalibus concordia, duplici quasi vinculo, nempe filiali in Patrem obseruantia, & Patrum pro filijs curâ, sollicitudine, atque artificio

utrinque amore perpetuum sancita, & seruata, aded sanctè, & religiosè, ut auditum numquam fuerit corpus inter & caput vllum dissidium.

Et cum Capitulis Generalibus per leges nostras concessa sit in Magistros Generales potestas eos absoluedi ab officio, si illi deesse, aut impares viderentur: nullum tamen legimus, hanc poenâ ab Ordine vnquam multatū fuisse. Verum quidem est Patrem Munio à Nicolao I V. Sixtum Fabri à Xisto S. Pontificibus Minoritis, Martialem Auribelli à Pio II. & Nicolaum Rodolphium nostrâ ætate ab Urbano VIII. fuisse ab officiis amotos; sed inuito, & reluctantè Ordine, qui illorum causam acerrimè egit, totis viribus eorum amotioni intercessit, & cum licuit, Magisterio restituit, ut Auribellium defuncto Pio II. qui abdicauerat. Idem in Rodolphium obseruantia, & pietatis officium collatura erant comitia Generalia, nisi pridie cum esset iterum eligendus, mors illum aut votis omnium præripuisset, aut subduxisset oneri.

Quid à corpore incolumi, cui bene semper fuerit sub sano, & Sancto Capite, sub Generali digno successore Sancti Dominici, & illius spiritus, æquè ac authoritatis particeps non expectes? Si fides sit iis quæ hactenus scripsit tribus diatribis Theop. hæresum, & vitiolorum sentina, nihilo minus, quam Lutheranorum, & Calvinistarum secta, Deo Diuisque omnibus, & sedi Apostolicæ bellum indixit. Istâ potuit primus Scribere Theophilus, quis verò non videat eum reclamare IV. seculorum Annalibus? Ab illa-ne familiâ hæreses prodire, quæ hæresibus domandis institutione, & studio tota incubuit, quæ plures extinxit, & omnium sine dubio quæ ab eius primâ institutione grassatæ sunt progressum intercepit? Atque illud ingenitum odium à Patre suo hausit, & perpetuâ serie ad posteros transmisit.

Nam ut paucis hanc belli sacri à Dominicanis præclarè & foeliciter gesti historiam delibem, ipse Patriarcha Sanctus Dominicus in Palentinâ Academiâ Theologiæ Magisterio donatus, & instructus armis, Abbatis Ioachim, & Almerici errores, in Concilio Lateranensi sub Innocentio III. & in Tholosatum regionibus Al-

bigenſium hæreſim proſtigauit. Subinde Hugo Cardinalis in Concilio Lugdunenſi primo ſub Innocentio IV. Summorum Pontificum iura acerrimè propugnauit contra Federici II. tyrannidem, & eius Cancellarij Petri à Vineis Capuani, quantum illa ſæcula ferebant eloquentis libros.

Concilio Lugdunenſi II. quod Gregorius X. habuit 1274. præter D. Thomam, dum eò pergeret in itinere deſunctum, interſuere 3. Cardinales, 30. Epifcopi ex Ordine aſſumpti, & ingens, ac valida Theologorum turma, ſub Magiſtro Generali Ioanne Vercellenſi, qui eodem loci & temporis comitia Generalia celebrabat. Hos inter eminebat Petrus à Tarantafia, tum Cardinalis, mox Pontifex creatus nomine Innocentius V. qui Sefſione quintâ Concilij, Regis Tartarorum Legatum ſolemni ritu baptiſauit, & Albertus Magnus ab illo ſecundus, atque hoc petiſſimum duce victi fuerunt Græci, & abdicatis erroribus, & ſchiſmate, Romano Pontifici ſe ſubiecerunt. Neque in Concilio Viennenſi ſub Clemente V. deſuere Dominicani: nam Eymerico Placentino & Berengario ex noſtrâ familiâ Theologiſ, Begardorum, & Beguinorum errores confutati ſunt.

Sed non minùs merito, quàm dignitate ſupra hos duos in Concilio Conſtantiænſi Sigifmundi Imperatoris curâ exſtinguendo Pontificum Schiſmati, & damnandis Huſſitarum & Vuicleſi erroribus anno 1414. ſplenduerunt Archiepiſcopus Ragufinus, & Ioannes Dominici Cardinalis duo Eccleſiæ ornamenta, & præſidia, qui eam à tot malis vindicarunt.

Quid de Concilio Senenſi dicam, cui Martinus V. Legatum præfecit Magiſtrum Ordinis Leonardum Statium? Quid de Baſileenſi ab eodem Summo Pontifice indiſto? In eo pugnarunt acerrimè contra Huſſitas, & pro Eugenij cauſâ, & omnium Pontificum authoritate Bartholomæus Texerius Magiſter Ordinis, Ioannes Nider, & Turrecremata, tum Magiſter Sacri Palatii.

In Concilio Florentino pro Eccleſiâ occidentali aduerſus Græcos pugnarunt Bartholomæus Lapacius Coronenſis Epifcopus, & Ioannes à Monte nigro celeberrimâ diſputatione coram Eugenio Pontif. & Impera-

tore Constantinopolitano, Græcis ad bonam mentem, & ad concordiam, atque obsequium in Sedem Apostolicam reuocatis. In Lateranensi Concilio, quod Leo X. 1517. habuit, suam in autoritate Pontificiâ aduersus Pisanum Conciliabulum propugnandâ, eruditionem, & sapientiam Caietanum tum Magister Ordinis approbavit, & viam sibi strauit ad purpuram, imo ad thiarum, quo ut, inquit Possevinus, vota omnium vocabant, & promouissent, nisi mors præripuisset.

At recentior est Concilii Tridentini historia, quam ut opus sit commemorare nomina, eruditionem, zelum, sex Archiepiscoporum, 7 Episcoporum, & octo supra viginti celeberrimorum Theologorum ex Familiâ Dominicanâ, qui in eo confessu amplissimo damnarunt hæresiarcharum Lutherum pessimum, contra quem Dominicanorum primi Tetzelius, Francofordiensis Inquisitor, Conradus Koelium profundissimus Theologus, Siluester, Caietanus, Hogostratus calamum distinxerunt, sicut Graulina contra Marium Antonium de Dominis ex Societate & Archiepiscopatu Spalatensi Apostatam.

Ex his quæ pauca, in hanc rem ab infinitis selegimus, respiscat oportet Theophilus, eumque suarum calumniarum pœniteat; atque ex animo agnoscat, omnibus Dominicanis pro suo in Ecclesiam studio magis acre in hæreticos odium, quam canibus in lupos pro ouillis salute esse ingentum. Quid verò de Sanctorum cultu & imitatione? Quid de studio sanctitatis? Petrus contendit, ea omnia a nobis exulare, & solam impietatem, & superstitionem regnare, sed non facile persuadebit, nos, quam reliquis doctoribus, hac etiam Ecclesiæ esse dissimiles, & ab illa quæ omnium præcipua est abhorretere.

Inter illustres Ecclesiæ à Christo institutz notas, reponitur sanctimonia: quam variis notionibus, & interpretationibus explicat Bellarminus: vult enim Ecclesiam dici Sanctam à sanâ doctrinâ, iustisque legibus: quod de Deo, nihil nisi supremo numine dignum, de moribus perfectiora nos doceat: deinde vult dici sanctam, quod exemplis documenta cumulet & impleat, nec tantum bonis institutionibus, & legibus imbuat, sed etiam in mores inducat: id est perinde plures efficiat

sanctos, ac omnes iubet viuere sanctè: tertio denique vult Ecclesiam dici Sanctam, quod omni sanctitatis genere, omnibus argumentis (qualia sunt Prophetiæ, Miracula) nullo sæculo non abundarit,

Sed quam harum sanctitatis notionum, quodnam ad sanctitatem præsidium, vel ad Diuorum cultum adiumentum desideras, Petre, in Dominicanis? Si dicas nobis deesse legem, & Constitutiones Sanctas, reclamabunt Pontifices, qui approbauerunt, maximè duo, vterque nomine Clemens, vterque sapientissimus: quorum primus, nempe Clemens IV. collatione initâ inter Dominicanos & Franciscanos, pares ferè facit vbique, nisi quod istis profundiorum paupertatem, illis sanctiorem disciplinam, ex opinione communi vindicat; Clementi IV. assentiebat Clemens VIII. & eodem sensu asserebat ad Religiosum ex Dominicanâ Familiâ in Diuos solemnî ritu, & iudicio referendum, sibi loco omnium miraculorum fore exactam suarum constitutionum obseruantiam. Adeo ipsi sancta videbatur disciplina Dominicanorum.

Fortè respondebis præcepta apud nos perfectâ quidem sed minime impleri, & deesse nobis sanctitatis exempla. Fateor plerosque nostrum longè abesse ab eâ, quam profitemur vitæ perfectione. Sed non reliquit nos Deus vnquam sine semine, neque defuerunt viri sancti, quos imitaremur. Vnde illi octo in sanctorum album, quinquaginta in Beatorum numerum Ecclesiæ iudicio relati, præter quadringentos supra bis mille Martyrii laureâ donatos aliosque innumeros sanctitate & miraculis claros. Sed non omnia huc conferre conuenit: aliis locis cogemur hoc de sanctitate argumentum attingere; vt eius calumnias repellamus, demonstrandum erit nobis ad commendationem Pii V. aliorumque illustrium virorum non esse confingenda miracula, cum veris abundemus.

PARAGRAPHVS SECVNDVS.

Reuerentia in SS. Patres.

Sed longius excurri per omne genus sanctitatis extra diatribæ propositum, quæ de solo Sanctorum cultu, & contemptu agebat. Fateor eò Theophili totam accusationem verti: sed cum nihil magis sit alienum à contemptu Sanctorum eorum imitatione, & sanctitatis studio, ac similitudine, non potui validius amoliri calumniam læsæ Diuorum reuerentiæ, quàm si demonstrarem apud Dominicanos sanctitatem vbique coli, & seruata esse legibus, vitâ, moribus, miraculis, scriptis. Insuper factus sum in commendanda nostrorum hominum sanctitate: sed præter quod possum excusare cum Apostolo, illius stultitiæ genus, quod ista dicere me coegerit Aduersarius; duo addam: in primis huiusmodi viros sanctos datos Ordini, ne (vt in re simili loquitur Seneca) exemplum nobis deesset, & conuicium: id est vt imitari liceret nostros Patres, & nisi illos sequeremur, ignominia nos maneret & pœna; eorumque virtutes non in laudem, sed in iudicium nobis vergerent, & opprobrium sempiternum.

Deinde agnosco Societatem his omnibus sanctitatis partibus & dotibus abundare; vtinam nos & cæteros omnes vincerent; inde enim nihil mali in nos, sed plurimum gloriæ in Deum, & boni in Ecclesiam redundaret. Neque aded malignus sum, vt nullâ boni nostri iactura, ægre feram aliorum sanctitatem augeri & florescere. Quid enim de legum Societatis sanctitate dicam? Quamuis ignorarem à Sede Apostolicâ probatas, & impensè laudatas, non possem dubitare totius Evangelicæ Perfectionis regulam esse & compendium, nisi innotus mihi esset Tomus Suarezij de Religione; qui totus est in commentandis Constitutionibus Societatis: vnde etiam Rodrigues haurit quæcumque suis libris asceticis tradit documenta virtutis Christianæ.

Scio etiam, & plurimum in Domino lætor, vitam ferè omnium consensire legum suarum sanctitati, &

omni genere virtutum præstare. Vna tantum re non decedemus, & nos Patribus Societatis superiores prædicabimus, nempe sincerâ in Sanctos reuerentiâ & in antiquos Ecclesiæ Patres, eorumque doctrinam cultu & obseruantia, idque ex ipsomet Theophilo euidentissimè demonstro. Quàm anxie, quàm infelicitè omnibus diatribis quæsiuit ex nostris libris argumenta, quibus nos hæreseos, & violatæ Sanctorum reuerentiæ, & læsæ Potestatis Pontificiæ accusaret? Nec potuit quicquam ex tot historiis excerpere, quod vel minimam veri speciem haberet: nec retulit nisi vnum aut alterum locum ex Combesisio, & Cano adulteratum. Aded altè insedit Dominicanorum cordibus inserta & innata in Sanctos Patres obseruantia.

At non ita de vobis, Theophile, nos sentire sinunt tot propositiones ex vestris authoribus collectæ, sanctis Patribus & præ omnibus Augustino parum honorificæ, ne dicam prorsus contumeliosæ, quas Inquisitio Hispaniæ Generalis Madriti anno 1659. mense Martio die 18. & Vallisoleti eodem anno mensis eiusdem die 18. damnavit. Deum immortalem! quas in nos tragœdias excitasset Theophilus, si apud nostros Authores legisset censuras, quas quidam Societatis Authores in venerandæ antiquitatis Patres tulerunt.

Memini me legisse in disceptatione quâdam P. Rigordi, celeberrimi olim à Societate Concionatoris & Theologi, Caluinum implexisse votum Caligulæ: Imperator ille summè optabat, haberet vnum caput Roma quod posset vno ictu obruncare. Sed pessimæ voluntati defuit facultas. Verum quod Romanæ Ciuitati frustra imprecabatur malum, Ecclesiæ Romanæ intulit Calvinus: omnes Sanctos Patres in vno collegit Augustino, quem *fidelißimum antiquitatis testem* vocabat, vt in vno omnes pessumdaret. Eò mihi viderur Catholicis omnibus, Augustini nomen habendum religiosius, quod ipse contempit ex Religioso Societatis Theologo, propius accedit ad consilium Caluini, & ad iniuriam Augustino, aut potius Antiquitati ab ipso pessimo heresiarcha illatam. Quare non possum non ægerimè ferre, quas subiungo propositiones.

Augustinum fuisse Doctorem, perinde ac alium quem-

piam ex modernis : nec eius dotes naturales , aut infusæ fuisse altioris ordinis , quam Doctorum Scholasticorum ; & nisi post Augustinum fuisset Christiana eruditionis facta accessio Scholastica Theologia , penitus rejiciendam fore. Augustini auctoritatem non plus valere , quam rationes , quas adhibet , probent. Augustini auctoritatem interponentibus , reponendum esse Ecclesiam suis filiis in dies crescere eruditioribus. Vnde non rectè dici , illud ab omnibus tenendum , quod asseruit Augustinus , nec retractavit : imo non admodum referre ; utrum Augustinus sentiat , quod sentimus ; & ab illo peti posse , vndenam sua sententia certitudinem hauserit. Addunt etiam alij , quid atrocius. Augustini vestigiis non esse insistendum ; sed aliter philosophandum , & miseram fore Ecclesiam , si Augustini placitis obstricta maneret : vnde censent , ab eius tutelâ & Pedagogiâ esse vindicandam. Superbia eorum qui oderunt Augustinum ascendit semper : volunt eius dogmata ab Sede Apostolicâ in terminis esse damnata. Vnde Petavius dissertatione priori Trident. c. 8. dicit, Non pauca, neque contemnenda Augustini dogmata, vel Ecclesia uniuersa, vel Theologorum, aut omnium, aut multorum, nec infimi subsellis iudicio reprobari : & Concilium Tridentinum non nullis necessario additis fecisse Catholica : & disceptatione posteriori. cap. 5. dicit Augustini non pauca quæ nec Catholica sunt nec haberi Synodus vlla Oecumenica voluit.

Volunt etiam hi Censores , Augustinum à Pelagianis , & Semipelagianis victum , & causâ cecidisse : vnde asserunt Iuliani Pelagianista argumentis non satisfecisse : nec qui assentiunt Iuliano posse conuinci rationibus Augustini : nec Ecclesia de Pelagianis triumpharet , si Augustini posterioribus scriptis niteretur : quia censent , eius Theologiam de Originalis peccati traduce esse rusticanam , & inducere in sententiâ Pelagij. Hinc Vasquez in primam 2. disput. 132. ait Augustinum difficultate rei oppressum nihil inuenisse , in quo essentiam peccati Originalis constitueret.

Si Augustinum hi Theologi velint cum Iuliano aperto hæretico de Originali labe , id est pro dogmate Catholico pugnasse Marte ancipiti , imo inclinante in Iu-

lianum victoria, nisi eam suis argumentis validioribus Augustinianis præripuissent, quid dicturos speramus de Cassiano, Fausto, & Massiliensibus Semipelagianis contra Augustinum, Prosperum, Fulgentium, Hilarium Arelatensem decertantibus? Pater Sirmundus Semipelagianos studio partium pro hæreticis habitos satis aperte significat Hist. Præd. cap. 8 his verbis.

Difficile non erat condemnationem librorum Fausti Rhegiensis sperare ab Afris Episcopis (inter quos erant Fulgentius, pluresque D. Augustini Discipuli) apud quos nata Prædestinarianorum hæresis in multorum adhuc mentibus hærebat; quare Mariana libro 3. de morte cap. 8. ait, quæ à Cassiano dicta sunt omnia de Gratiâ, & libero arbitrio à viris eruditissimis nostræ ætatis defendi quasi pietatis consona, neque deflexa à fidei regulâ sanctâ. Bene consultum esset Triadi Patrum Augustino, Fulgentio, & Prospero, si perinde Catholici haberentur, ac Cassianus, Faustus, alique Massilienses. Sed si fides sit his Theologis, isti Catholicis, illi hæreticis annumerandi sunt: idque adeo apud illos certum est, ut Ripalda libro contra Baianos ex Prosperi crimine de ingratæ obiectiones Semipelagianorum assumat, in argumenta quæ ipsemet Prosper soluit.

Cum Semipelagianos, seu Massilienses inter ac Augustinum & eius Discipulos tota controuersia in eo sita esset, quod illi communem tantum salutis omnium hominum Dei voluntatem, & ex illâ communem perinde gratiam prodire vellent, quæ daret posse saluari, & prædestinari; atque hoc sensu interpretarentur verba Apostoli, *vult omnes homines saluos fieri*; discrimen verò electos inter & reprobos nasci ex solo usu illius gratiæ omnibus hominibus, nequidem infidelibus exceptis, vel infantibus in vtero materno defunctis communis, quâ quisque ex innatâ libertate se discerneret, & quasi prædestinaret, ac saluum faceret, & gratiam illam communem faceret efficacem: atque illo usu, & consensu præuiso Deus quemque saluandum prædestinaret: Contra verò Augustinus contenderet præter communem salutis omnium hominum voluntatem (quam vocamus antecedentem;) Deum habere præ-

lectionem saluandorum, & propositum efficax saluandi, unde proficiscatur similis gratia efficax ex se ipsa, quæ non solum debet posse, sed re ipsâ bene agere, sanctè viuere, & perseuerare. Quid in hac disputatione celeberrima isti Theologi, quorum sensum retulimus? ubique stant, contra Augustinum, Prosperum, pro Cassiano, Fausto Semipelagianis.

Et in primis quod ad sensum verborum Pauli attinet, dicunt Augustinum sacrarum autoritatem scripturarum suâ expositione enervare, & ludibrio infidelium exponere: quod maxime cadit in illam Pauli verborum interpretationem de singulari voluntate salutis electorum vltra communem, & antecedentem; quam Molina quæst. 19. art. 6 disput. 2 ait, *vel ipso primo aspectu peregrinam, & extortam apparere*, Lotharienses Societatis dicunt, *non videri secundum intentionem Apostoli*, Octavius tomo primo libro 10. cap. 3. asserit *excogitatas esse ab Augustino huiusmodi expositiones ad eludendum Apostoli locum*.

Quod ad reliquas controuersias partes pertinet, ubique Augustini sententia de proposito efficaci prædestinationis ante præuisa merita, vel saltem præuisum sub conditione consensum ad communem gratiam reiicitur, *ut parum consentanea Scripturis sacris, sicut loquitur*, Molina disp. 5. citata, *imo ut error infide, qua tollat libertatem, præbeat hominibus occasionem despondendi animo, ne dicam desperandi, qua exhortationes, & oburgationes nomine Dei factas in scriptura impiis vertat in fictiones, & irrisiones, potius quàm veri animi significationes*: quod assertum dicit, *non solum indignum Diuina voluntate, sed etiam blasphemiam plenum*.

Hinc alii sententiam illam D. Augustini de prædestinatione ante præuisionem meritorum, aut saltem consensus futuri dicunt, *non mirum iudicari duram nimis, & indignam Diuinâ Bonitate, fidelium non paucos turbasse, qui & Augustini autoritate perculsi in Pelagianismum declinauerunt: & Augustinum quasi in caligine constitutum ad veritatem à recentioribus inuentam non attendisse*, quam Molina quæst. citata, membro ultimo non dubitat, *ab Augustino, & cæteris Patribus*
unanimes

unanimi consensu comprobatum iri, si eis proposita fuisset.

Hinc Vasquez primâ parte disput. 47. gratiam illam communem omnibus, vt supra explicatum est, etiam pueris ab ortu extinctis concessam, quæ ad fidem & salutem æternam nihil præter liberum consensum aut vsum creatura exigit, vt qui illâ potest saluus fieri, re ipsa fiat, fert ab Augustino negari, & vltra illam requiri quid aliud ad salutem reipsa consequendam. Vnde ab Augustino, inquit, & aliis, qui id docuerant, petere possumus, vndenam huius voluntatis Dei certiores fuerint effecti. Mariana verò libro citato cap. 6. Quid hoc aliud, inquit, ex antecedente Dei beneplacito suspendere, quam hominem fati necessitati subicere, non ex stellis, sed quod validius, ex Diuinâ sententiâ, vnde nulla sis ad maius tribunal promotio, nec quis consilio & arbitrio locus?

Omitto plura in Augustinum, eaque grauiora à Patre Adamo libro Gallicè scripto contra Caluinum de Augustino eiusque discipulis irreuerentiùs scripta, quæ tamen minùs curanda sunt, quia non est paris cum superioribus Theologis eruditionis. Ipsemet Theophilus hanc disputationem claudat. Ille igitur in censurâ inofficiosa censuræ scribit, sancto Fulgentio familiare, Augustini placitis ita mordicus adharere, eoque rigore, vt non sit sollicitus sententiam duriorē mollire benigna interpretatione, & quamuis illius, & Augustini opinio de obduratione Pharaonis videatur dura, non tamen ipsi placeat asperiore censurâ percellendam.

Benè omninò & prudenter, Theophile, vellem vbiquè illa æquitate ageres, nec dubito quin tibi displiceant, quæ ex tuis in Augustinum retuli. Certè cum notissimæ tibi essent, debuerant te detertere ab accusatione Sanctorum contemptus. Quis enim nostrum vnquam ita per summum contemptum de Sanctis scripsit, & indicauit?

PARAGRAPHVS VLTIMVS.

Cura, & felix successus Dominicanorum in promouendâ pietate populari.

TVam non poteras, Theophile, causam futilioribus argumentis prosequi, & si statueras præuaricari, apertè consilium tuum implesti, & gloriæ Dominici Ordinis fauisti, quem adedè ab omni errore alienum probasti: ut ne vel minimam suspensionem collectis vndeque argumentis, erroris notam, aut potius umbram illi constare, aut affingere potueris.

Hanc ergò immunitatem ab omni censurâ debent Dominicani non gratiæ, sed æquitati Iudicum, quia sciunt, Thomam, eiusque discipulos vnam sequi Traditionem, quam sibi omnium suorum iudiciorum regulam constituerunt. Hinc damnatum martyrium per pestem, quia antiquitati ignotum, & etiam Traditione visum est tanquam spurium, & adulterinum. At longè verius, & magis legitimum pro traditione martyrium consequuntur, aut merentur Dominicani, quam sit illud nuper per pestem constitutum: si quid enim hætenus patimur variis Christiani orbis locis, vel imperitorum, vel æmulorum fraude, id propter vnum Traditionis diuinæ studium patimur, pro quâ parati sumus prius emori, & ab hominum gratiâ excidere, quàm ab illâ vel latum vnguem recedere.

Probare conatus est Theophilus, nos Diuis iniurios, cum tamen pro Diuis semper pugnaverimus: id certissimè asserendum, nullum in Ecclesiâ Dei Ordinem pietatis Christianæ exercitia, & ex his maximè in Deiparam, & in Diuos omnes, cultus scèliciùs, & impensius Ordine Dominicano promouisse. Cum enim ad id tria potissimùm suppetant præsidia, efficaciora, nempe frequentes conciones, libri spirituales & institutiones sodalitarum, quinam illo triplici genere mediiorum diligentius, & operosius incubuere Dominicanis, pietati, & venerationi in Diuos inserendæ, & augendæ inter populos Christianos? Quinam ad hoc Dei opus

vbiq̃ue terrarum feruentiores habuere conciones Diuo Vincentio, aliisque innumeris eiusdem familiæ viris Apostolicis? Quinam vtilius libros spirituales ad animarum conuersionem, ad progressum in omni genere virtutum scripserunt?

Sed vt hæc duo subsidia prætermittam; de tertio, quod magis populare est, & efficacius, nullus ordo potest cum Dominicano contendere: fateor cuilibet suas esse institutiones, & sodalitates, & licet omnes colam, ipsi tamen spontè sodalitatibus decedant Rosarii à sancto Dominico in Galliâ primùm, deinde per totum orbem, Nominis Iesu à P. Victoriâ ad cohibendas blasphemias Maurorum in Hispaniâ, & Eucharistiæ à Diuo Thoma Officii eiusdem diuinissimi Sacramenti authore institutis, quibus omnibus veluti inuentis, aut thesauris quibusdam cœlestibus Ecclesiam locupletarunt, & mirum in modum pietatem Christianam, frequentiam Sacramentorum, cultum religiosum in Diuos in populo Christiano auxerunt, & promouerunt vsque ad inuidiam, vel potiùs reliquos ordines ad laudabilem æmulationem excitarunt.

Dominicani enim primi fuere, qui auctore suo Patriarcha, Religiosos, ac Cœnobitas è claustris & solitudinibus euocarunt ad celebritatem vrbium, vt proximorum salutem vacarent, contemplationi actionem adiungerent. Illi fuere primi, qui conciones quadragesimales induxerunt, & morem salutandæ Deiparæ ad exordium concionis: vnde meritò illis Prædicatorum nomen adhæsit, & ne cuiquam operam suam negarent, quos non poterant verbo instruere, scriptis docuerunt. Et ne quidquam omitterent, quod conferre posset ad omnium vtilitatem, diuina Sodalitatum inuenta excogitarunt; vt quodam modo certarent cum improbitate impiorum. Sicut enim isti Dæmonem Magistrum professi singulis diebus, noua vanitatis, & improbitatis genera pariunt, & in lucem proferunt; ita nostri homines Spiritu diuino animati non passi sunt se à Ministris Satanz superari, & summè laudandâ æmulatione noua pietatis Christianæ genera, & cultus religiosi in Sanctos & in Deiparam, in Angelos & in Cælites omnes inuexerunt. Et hos Theophilus persuadere vult fuisse in

Diuos iniurios, & sacrilegos Sed certè fidem non faciet apud illos, qui nouerunt, quot bona Dominicani intulerint in Ecclesiam illo triplici genere præsidiorum à nobis enumerato,

His diuinis Dominicanorum inuentis ad fouendam, promouendamque populi Christiani pietatem efficacissimis addam & aliud nihil superioribus inferius, piarum nempe Iconum, & sacrorum numismatum frequentissimum, & iuxta utilissimum vsum; cuius originem, aut saltem incrementum, & instaurationem in Pium V refert eius vitæ Scriptor libro 6. cap. 2. occasione perduellium Belgij, quos Geuseos inde vocarunt.

Nam cum in Regiam Potestatem, & auitam Religionem conspirationis veluti resseram præter vestem, mendici, æreum seu plumbeum numisma sibi fundi curassent; cuius in alterâ facie Regis effigies erat expressa, ipsorum manibus in fidem iunctis cum his verbis: *Regi fideles vsquequaque*, ex alterâ parte mendicantis hominis speciem bulgasque vel sacculos à tergo gestantis deformassent adiectis verbis *Regi fideles vsque ad bulgas*: his simulachris collo appensis vestibus cinericij coloris induti procedebant. Illarum inde gentium Catholici, vt certo Religionis symbolo ab hæreticis secernerentur, æreas, aut argenteas ad collum circumferebant imagines, quæ Christum, & Deiparam repræsentarent: Eas Pius V ritè benedixit & consecrauit, gestantibus sacra Apostolicæ indulgentiæ præmia concessit: quæ Religio sic inualuit, vt vbique gentium Catholici diuinis hisce muneribus locupletari, & præidiis muniri ambiant & glorientur.

Neque huiusmodi pietatis adminiculis, & inuentis populo Christiano cominendandis defuerunt è calo testimonia: quale est illud, quod libro 5. recurret militis Catholici quem cerea agni cælestis effigies à Pio ritè consecrata, quam collo appensam gestabat, aduersus hæreticorum sclopos ita muniuit, vt non potuerit nisi eo præsidio detractò interimi aut cædi. Frequentibus experimentis comprobatum est vim habere huiusmodi res sacras incendiis extinguendis; nec minus in aquas, quàm in flammam valere. Nam ipso Pio superstite & imperante, vnus orbiculus cereus intumescenti

Tyberi, & iam extra alueum defluenti cum maximo viribus periculo iniectus, impetum & vim aquæ repressit, cohibuitque. Sed quibus testibus comprobata sunt Pij miracula? 65. hominum omni exceptione maiorum secundum iuris formulas recepta sunt testimonia, è quibus sex erant Cardinales, vnus Patriarcha, alter Archiepiscopus, Episcopus item & Abbas vnus, sex Canonici, vndecim Cœnobitarum diuersorum institutorum, tres sacerdotes, quinque Administri Summi Pontificis, nouem Doctores Iuris, octo nobiles, aliquot Medici, & Chirurghi. Post hanc testium turbam gregatim, & sigillatim exceptorum, ne criminetur Petrus ad inaugurationem Pij in Diuorum numerum opus esse testibus mendacibus & supposititiis miraculis.

Nihil difficilius, quam abreptum pietatis imperu se continere, & moderari intra prudentiæ præscriptas metas. Vt enim generosum, & fortem equum melius agnoscas, dum se subito cohibet in medio cursu, quam si illum diu, & concitatissimè prosequatur: sic plane veram ac genuinam pietatem à falsâ & fucatâ certissimè distingues, si te tui ira compotem ac potentem faciat, nec sinas te illius ardore adedò ad cursum concitari, vt non possis inhibere, si opus sit, nec patiaris te extra terminos ferri, quos tibi Patres antiqui, quos tibi mos Ecclesiæ & Traditio constituere. Huius characteris & huius generis semper fuit Dominicanorum pietas. Arsit illa quidem, sed semper luxit; feruori prudentiam adiunxit, nec vnquam illi se ita permisere, quin semper sui iuris essent, quin se continerent & tenacissimè antiquæ Ecclesiæ adhererent. Si hanc moderationem & reuerentiam in antiquos Patres, si nouitatis odium, impietatem vocat Raynaudus, spontè fatemur nos huius impietatis reos esse, illâ gloriamur, atque inter illustres Dominicani Ordinis titulos reponimus.



LIBER SECVNDVS.

DEFENSIO THEOLOGIÆ

Dogmatica Dominicanorum & Thomistarum contra diatribam quartam aliosque libellos eiusdem Auctoris, & expositione Carterij.



LTIMA pars libri superioris induxit nos ad secundi & tertij argumentum. Vtroque Dominicanæ Familiæ doctrinam, & Scholæ Thomisticæ, quæ latius patet, & alios Ordines complectitur aduersus quartam diatribam, pluresque Theophili, & aliorum Auctorum libros defensurus sum hoc ordine, vt prius respondeam iis, quæ aduersus dogmaticam Theologiam Thomistarum obiiciuntur generatim, & de diuinâ scientiâ, ac libertate humanâ, deinde ex Theologiâ morali decerpenda ad depellendas in nos, in congregationes Romanas, & in Summum Pontificem querimonias necessaria libro tertio prosequemur. Isto duo exequar. Primò depellam calumnias Diatribæ 4. à D. Thoma eiusque discipulis, 2. satisfaciam expositionibus Carterij, vbi de scientiâ Dei.

SECTIO PRIMA.

Doctrina D. Thomæ doctes & illius ac Discipulorum eius vindiciæ aduersus quartæ diatribæ calumnias.

VBique hæreticos imitaris, Petre, sed hac maximè diatribâ, quâ tuam supinitatem, & fraudem prodis. Is hæreticorum mos est, maximè Petri Molinei, quem in genere scribendi, vt & Lucianum, videris in magistrum elegisse, & longè etiam superas se. Quamuis enim iste suis libris magis scurrâ agat, quàm philosophum, tibi comparatus posset censi alter Cato, adeo præ te ferius est & humanior: alter verò licet hæreticus & vnus Apostatæ filius, longè moderatiùs agit in Catholicos, quàm tu in Religiosos. Ille ludit disticijs & salibus aliquandò, tu semper furis & mordēs. Vide precor, quâ vrbânitâte disputet cum P. Nicolao Coeffeteo Dominicano, antequam ad Episcopatum assumeretur, & quâ tu inhumanitate, & truculentiâ agas cum Magistro Generali omnium Dominicanorum.

Verum propius ad rem. Ille innumeros. scripsit libros controuersiarum, quibus eadem semper repetit: & quamuis eius argumenta millies soluerint Catholici, semper eorum responsa tacet & dissimulat, & ne vno quidem verbo refellit, nempe quia non poterat: Et ita apud se reputabat: Plures hos nostros libros lecturi sunt, ad quos Catholicorum responsa non peruenient, & illos hæc argumenta repetita vrgebunt, & ad partes nostras trahent; perinde ac si à Catholicis non possent solui. Huius consilium & exemplum hæretici tibi sequendum putasti. Repetis argumenta à trecentis annis D. Thomæ obiecta, depromis quasi Scriba, aut Phariseus ignarus, de Thesaurò alieno, non tuo, noua & vetera, ab æmulis D. Thomæ millies de cantata; quibus scis validè responsum à Grauiâ, à Ioanne à Sancto Thoma; & vt ipse refert, ab Ægidio Romano, & à pluribus alijs Angelici Doctoris defensoribus. Ad minùs.

debebas abstinere ab iis propositionibus, quas falsò impositas D. Thomæ non poteras ignorare, nisi D. Thomæ, & eius interpretes tibi ignoti sint. Quod satis testaris hoc tuo syllabo propositionum improbabilium, ve putas, scholæ nostræ, qui potius est tuarum inscitiarum & calumniarum.

Hoc tuæ quartæ diatribæ examine doctrinam D. Thomæ, quam titulo diatribæ solidam negas, paulò liberius, & fusiùs defendam triplici genere argumentorum. Primò diluam quæcumque ex ipso Sanctissimo Præceptore, & eius discipulis refert, & demonstrabo vel à te falsata esse, vel te in D. Thomæ. apertam veritatem, & SS. Patrum ac Philosophorum Principis sensum impugnare. Vbi tua reieccero figmenta, duo addam argumentorum genera: primum, ex ipsâ doctrinâ D. Thomæ vim eius diuinam demonstrabo; secundo loco usurpabo, quod mihi hætenus negavi, licet defensionis, ad quam me coegisti inuitum, necessitas ius mihi daret reponendi calumniis nostrorum apertas tuorum accusationes: abstinui tamen, quia putavi, non licere Christianis, & maxime Catholicis aut Religiosis sibi vitia occulta, & incerta, forte falsa, etiam prouocatos impropere.

Sed alia est morum, alia doctrinæ ratio; cum enim publica sit, & libris extet, certò agnosci & impugnari sine scandalo potest, modò agas moderate intra inculpatæ tutelæ terminos, quibus me continebo. Deinde consilium Ciceronis placet, à quo constitutas & seruatas leges disputationis non licet nobis recusare: Nos, inquit ille parens eloquentiæ, & Academix Philosophus non ignobilis, *qui sequimur probabilia refellere sine pertinaciâ, & refelli sine iracundiâ possumus.* Cum enim plerumque, & ferè semper apud nos certa sint fidei principia, & disceptatio sit de probabilibus, turpe fuerit Christiano & Religioso nolle subiici legibus modestiæ, quas ipsemet Cicero sibi præscripsit; alias vitio maxime verteretur nobis, quod Euangelij perfectionem professi, officia violaremus, quæ sibi Ethnici præstabant; vt sine acerbitate & odio refellamus alios, & sine irâ refelli patiamur. Hac monitione præmissâ ad primam partem huius examinis me accingo.

ARTICVLVS PRIMVS.

*Expenduntur 44. propositiones D. Thomæ à
Theophilo ascriptæ.*

IN primis poteras nos , & teipsum ab inuiti labore
leuare, si abstinuisses à referendis propositionibus, quæ
nihil ad propositum faciunt , & quæ sunt contra men-
tem S. Doctoris. Diligenter omnium propositionum,
quas scholæ nostræ communes vocas, numerum inui-
vim & sensum exploravi, & comperi quatuor esse su-
pra quadraginta in tres ordines diuisas. Ex his sexde-
cim recensui apertè damnatas à S. Doctore, vel sensu
omninò diuerso traditas ab illo, quem affingis; & vi-
ginti quatuor, quæ supersunt, decem à Sanctis PP. de
promptæ sunt, & extra Scholam Diui Thomæ à pluri-
mis & grauissimis Theologis docentur & defendun-
tur. Reliquæ numero decem & octo è Principiis Peri-
patericæ Philosophiæ deducuntur: singulas hoc ordine
à me statuto decurram,

PARAGRAPHVS PRIMVS.

*Sexdecim propositiones falsò D. Thomæ ascriptæ,
aut alio sensu, quàm doceat.*

VBinam apud D. Thomam legisti, extra Deum dari
ens omninò necessarium quod non possit non esse?
Secundo, inquis, cont. Gent. cap. 3. Legistine attentè?
Si negas, tuam negligentiam & temeritatem fateris,
quodd alienâ fide Sanctissimum Doctorem Atheismi ac-
cuses: quid enim aliud est plurima entia omnino neces-
saria admittere, quàm plures Deos? Si dicas te legisse,
arguis te ingenii adeo rudis esse vt non potueris verba
intelligere apertissima D. Thomæ, quibus constat il-
lum agere de necessitate participatâ, quæ competit for-
mis subsistentibus expertibus materiæ, aut quæ habcant
materiam determinatam ad vnâ formam, cuiusmodi

sint Angeli, Anima rationalis, & Cælum, in quibus D. Thomas exemplum ponit suæ doctrinæ; has substantias asserit non habere potestatem intrinsecam ad definitionem, sed non repugnantiam in ordine ad Deum, ut eodem loco expresse declarant verba sequentia: *Dicitur res ad nihilum tendere modo, quo sunt ex nihilo; quod non est, nisi secundum potestatem agentis.* Sed quain falsò affingis scholæ nostræ propositionem sensu hæzerico; illam proprio vnus ex tuis defendit Salmanticæ, scilicet posse dari creaturam, cui repugnaret à Deo annihilari.

De hac propositione iterum cum de Ioanne à Montefono agemus: interim duo certissima sunt ex S. Doctore apud omnes sapientes, nullam potentiam naturalem institutam esse, nisi ad actum, à quo sit perficienda, non destruenda: deinde, si quæ sit potentia ad definitionem rei aut corruptionem, eam non esse in re corruppendâ; sed vel in agente causâ, quæ potest creaturam ad nihilum redigere aut corrumpere, vel in materiâ capaci formarum plurium, quas cum simul complecti nequeat, neque vnâ satiari, dum omnes appetit, necesse est singulas perire, aut corruptibiles esse; & dum vna inducitur, eam, quæ præcesserat, abscedere: hinc rerum contingentia, & ad desinendum potentia, quæ earent substantiæ expertes materiæ, & corporeæ, etiam quarum materia vnius tantum formæ capax & appetens sit: quales asserit Cœlos Philosophia Peripatetica.

Ex his ergo constat, nullam substantiis ad nihilum esse potentiam innatam, sed totam ab extrinseco agente peti, quâ doctrinâ nihil verius, aut solidius. Quare, ut notat Caiet. ad artic. 2. q. 9. l. p. *Magna insipientia fuit damnari à quibusdam Parisiensibus*, ut mirum non sit, hanc Censuram ab Episcopo Parisiensi magis reuocaram fuisse, ipsius Academiæ Parisiensis, quàm Sancti Doctoris causâ; quia re verâ in ipsos Autores redundabat.

Non refert sincerius tertiâ, & quartam propositionem primi ordinis: Falsum est Gregorium Decimum in Concilio Lugdunensi definiuisse Patrem & Filium non dici duos Spiratores: Verba Concilij de Summâ Trinitate in sexto hæc sunt: *Spiritus Sanctum procedere*

à Patre, & Filio, non tanquam ex duobus principijs, sed tanquam ex uno, non duabus Spirationibus, sed unica.

Si dicas idem ferè esse, ac si statuisset esse vnum Spiratorem, respondeo consecutionem esse non omninò necessariam, quia pender ex regulis de multiplicatione nominis adiectiui, & substantiui: & licet D. Thomas in 1. dist. 11. secutus fuerit opinionem illorum, qui nomen Spiratoris, vt adiectiuum multiplicant; tamen, 1. p. q. 36. a. 4. hanc sententiam reuocat, non vt Censurâ dignam, sed vt minùs veram, & nomen Spiratoris secundum leges substantiuorum, negat multiplicari debere. Quâ ergo fide duos Spiratores asseris à scholâ nostrâ admitti contra definitionem Concilij Lugdunensis? Quare sapienter admonet, Concilium statuisse vnâ esse Spirationem & vnum principium, permisisse vero disputationi Theologorum, vtrum deberemus admittere vnum Spiratorem secundum leges nominis substantiui, aut duos Spiratores iuxta naturam adiectiuorum, quæ nihil vetat multiplicari stante formæ vnitæ, si pluribus insit suppositis. Quo sensu dicit Hilarius 2. de Trin. *Spiritum Sanctum à Patre & Filio authoribus procedere.*

Non video quo fine obiicias nobis D. Thomam in 3. dist. 9. q. 2. asseruisse, dici posse absque hæresi, iste homo caput esse Deus. Cum iam te monuisset Ioannes à S. Thoma, eo loco D. Thomam illius propositionis non meminisse. Verum quidem est dist. 7. sequenti, de hac propositione Sanctum Doctorem agere, & idem statuere, quod de ista *Homo factus est Deus*. Et ab vtraque abstinendum, quia respicit hæresim Arii.

Nescio, vnde extraxeris sextam (neque enim vllum locum citas) qua nos fingis dicere, *Deum de potentiâ absolutâ separare non posse albedinem à subiecto, & in illo conseruare*. Quid mali est hoc negare, cum propositio contradictoria implicet idem accidens seiungi à subiecto, & in illo conseruari? Eadem fide Gracâ refert propositionem eiusdem ordinis decimam sextam, *eum qui sordet peccato mortali, etiam occulto, si alij impendat correctionem, peccare mortaliter*. Hæc non est propositio nostra, sed tua calumnia. Verum quidem est D. Thomam in 4. dist. 19. q. 9. alicuius culpæ accusare, non

tamen (mortalis quod de tuo addidisti) eum, qui ex officio corrigit delinquentem, dum ipse reus est, & confcius peccati occulti, & vrgeat ex officio corrigendi necessitas, quia indignè vritur officio. Tamen 2. 2. q. 33. a. 5. à culpâ liberat peccatorem, si corripiat cum humilitate delinquentem. Cur igitur auges dicta Sancti Thomæ, & taces quæ, in summâ, quasi in ultimo testamento statuit?

Visetiam propositione decima septimâ Sanctum Doctorem censere, *omnia verba vulgata forma consecrationis calicis esse ita essentialia, ut si deiunge, sit unum verbum, consecratio non fiat.* Debebas ab illâ objectione supersedere, aut refellere interpretationem communem Thomistarum, qui sanctum Doctorem explicant hoc sensu, vt verba omnia sint de substantiâ consecrationis, quoad integritatem, non quoad substantiam; sicut absolutio Sacramentalis, constat essentialiter his duobus verbis: *Absoluo te*, & ipsum Sacramentum componitur tanquam partibus essentialibus, absolutione, confessione, & contritione; cui tamen addi potest, vt pars integralis, satisfactio, sicut absolutioni, *à peccatis tuis.* Quidni potuit S. Doctor asserere eadem ratione, omnia consecrationis Calicis verba pertinere ad substantiam ipsius, vt partes integrales, non essentielles? Idèò cautissime dixit D. Thomas, reliqua quæ adduntur verba, esse de substantia, non de essentia, & pertinere ad integritatem locutionis.

Propositione vigesimâ primâ, & quinque sequentibus, videris mouere litem Sancto Thomæ, quod Scripserit conclusiones, vt Theologus, non vaticinia, vt Propheta. Ipse, sicut antea monui, scripsit ex decreto Nicolai Papæ, incurrere irregularitatem eum, qui ex inculpatâ tutelâ se aggredientem occidit: & cum obijcis, ius illud antiquum esse reuocatum Clementinâ unicâ *de homicidio*, multis annis editâ post mortem Sancti Doctoris: cerè non potuit de hac reuocatione scribere, nisi Prophetam egisset. Habuisses aliquam expostulandi causam, si negasset ius antiquum potuisse à futuris Pontificibus immutari.

Eadem est responsio ad 21. & 22. propositionem. Diuus Thomas scripsit de votis Religionis secundum

vsu suo sæculo receptum, ut nullus censeretur Religiosus, nisi emissio voto solemnī. Ius Canonicum magis apertè id statuerat, *non potest cum effectu Religiosus censeri*. Mitius egit D. Thomas: abstipuit à verbo *non potest*, solum dixit 2. 2. q. 186. *non fieri Religiosum per votum simplex*; sed non negavit fieri posse iure positivo Ecclesiæ, & auctoritate Pontificis huiusmodi Religiosos, etiam Pontificio iure posse in eodem statu habere rerum dominium. Quare cum statuit Gregorius XII. in gratiam Patrum Societatis, quos voluit cum voto simplici Religiosos esse, & cum huiusmodi votis coherere rerum dominium, nihil lædit doctrinam S. Doctoris, quia si statuit id fieri posse, etiam non negavit. Nec D. Thom. docuit illam propositionem his terminis, quibus illam obiicit Theophilus, scilicet, *Dominium est indispensabiliter impossibile cum vero statu Religioso*, nam 2. 2. q. 186. a. 3. sic tantum ait, *Ad perfectionem charitatis acquirendam primum fundamentum est voluntaria paupertas, ut aliquis absque propriis vivat*, & a. 7. dicit quod habere aliquid proprium perfectioni religionis repugnat. Hæc autem non opponuntur his, quæ habet Grego. XIII in Bullâ *Ascendente Domino*; quodd scilicet in Religiosis votorum simplicium ex Societate remaneat dominium non vsus bonorum; nam eatenus D. Thomas docuit, habere aliquid proprium perfectioni Religionis repugnare, quatenus dominium habet annexum vsu; unde si detur dominium absque vsu, non negat D. Thomas, hoc stare posse cum statu Religioso, licet non perfectissimo.

Itaque mens sancti Doctoris ex vsu suo sæculo recepto, & ex Regulis Euangelij hæc est; nullâ re à Gregorio XIII. Constitutione dissentiens, professionem solemnem Religionis exigere omnem abdicationem, tum dominij, tum vsus, & administrationis bonorum temporalium. Si tamen servato dominio, fiat tantum abdicatione administrationis temporalium, decedere aliquid perfectioni Religionis, non tamen tolli; & hoc consentit Constitutionibus Patrum Societatis, apud quos professi quarto voto solemnī, nec vsu, nec dominium cuiusquam rei servant solis professis vota simplicia, Pontificio decreto, aliquod ius, & dominium permitti-

tur. Quod addis de voto solemnî, secundâ Diatribâ solutum est: vellem solum mihi indicasses, quo loco doceat sanctus Doctor, *non posse Pontificem dispensare in matrimonio rato.*

Non est verior aut sincerior in referendis aliis propositionibus: nam tertiâ & quartâ apertum calumniatorem agis. Vis persuadere sanctum Thomam, & eius scholam docere, Deum non posse præter terram creatam aliam creare. Id conuincit locus à te citatus q. 41. a. ultimo ad ultimum, ubi ait, *non esse possibilem aliam terram quam istam*, & huius repugnantia rationem reddit, quia, inquit, *omnis terra ferretur naturaliter ad hoc medium ubicumque esset: Et idem est de aliis corporibus, quæ sunt partes huius mundi.* Potuit-ne apertius suam mentem declarare S. Doctor contra Petri imposturam, se loqui de hoc tantum vniuerso, & secundum potentiam naturalem, quandoquidem inde assumit sui dicti probationem, nempe *quod ferretur hac terra naturaliter ad medium*: Igitur non negat possibilem alterius vniuersi terram, sed tantum istius aspectabilis, idque secundum potestatem ordinariam.

Nec minùs validè & apertè caluniam tuam amouet I. p. q. 102, a. 2. ad 2. quò assertentem inducis, quasi rem indubitatam, *Æquinoctium, seu zonam torridam esse prorsus in tolerabilem.* Eo loci S. Doctor refert quorundam sententiam assertentium partem Æquinoctialem (quo loco reponebant Paradisum terrestrem) esse temperatissimam; sed relatâ hâc de re Aristotelis sententiâ, existimantis regionem illam præ æstu inhabitabilem, more suo Aristotelis opinionem probabiliorẽ dixit in Autoris reuerentiam; sed rem sibi incertam sequentibus verbis testatus est. *Quidquid sit*, quibus rem in medio, & in ambiguo ponebat; & tu vis ab illo certò pronunciatum, *regionem prorsus intolerabilem.*

Fidem tuam desidero propositione nonâ eiusdem ordinis, quam sic refert: *Brutorum anima sunt indiuisibiles, æquè ac anima rationalis*; Vbinam legisti hanc propositionem indefinitam? Quasi omnium animantium animas faciamus indiuisibiles. Vbinam illam æquiparantiam, *æquè ac anima rationalis*? Sed vbique impostorem agis; & ne desint argumenta, quibus te huius cri-

minis conuincamus, suppeditas noua: nam propositione 12. imputas Diuo Thomæ dictum quasi ex propria mente, *Cœlos non esse contiguos, sed intercedere spatium diuisibile*. Si legeras locum, quem citas ex 2. sent. dist. 2. poteras notare, post relatum Astrologorum opinionem, qui hoc censebant (& inde explicuit, quâ ratione Beati possent voces in cœlo formare;) *Quid autem de his verum sit, incertum est, quia nec fide determinatur, nec ratione probatur*; & tamen vis nobis persuadere esse quasi effatum D. Thomæ: sicuti propositione 13. vis illum statuere denarium numerum cœlorum, cum articuli titulus præferat, *utrum numerus cœlorum conuenienter assignetur à Rabano*: Ergo nihil de his asserit, nisi ex aliorum mente, & iuxta obseruationes Astrologorum sui temporis, quæ futuris terminos non præscribebant.

PARAGRAPHVS SECVNDVS.

Decem propositiones à Diuo Thoma & Sanctis Patribus exceptæ, à Theophilo reprobata.

CONFLASTI nubem sexdecim propositionibus, Caut potius imposturis grauidam; quæ videbatur minari fulmina & tonitrua; sed vno flatu in fumum euauit. Alteram illius loco sufficis, sed nobis benignissimam, quæ effusura sit in scholam nostram pluuiam aureâ pretiosiore, quâ fœcundetur & florescat, vt contra tuam mentem illi hanc laudem paret, SS. Patrum, & totius Ecclesiæ doctrinam assecutam esse, & acerrimè propugnasse.

Neque enim aliud proficis cum Scholæ nostræ improperas primò coexistentiam realem rerum futurarum in æternitate; Secundò Angelum primo instanti liberum, & impeccabilem; Tertio Angelum constitui in loco per operationem. Quarto plures Angelos non posse constitui formaliter in eodem loco; Quintò adu-
rum primo instanti, quo rationis compos est, debere ad Deum conuertri, & ad illum vt vltimum finem, vel certè saltem ad bonum se referre honestum, & si desit huic officio, quod primum instat implendum, peccare mortaliter, ac proinde primum

adulti peccatum non posse esse veniale ; nec subinde adulum cum illo solo originali iuncto decedere , quod nobis tanquam sextum paradoxum impropere ; septimum verò non posse assumi à Deo instrumentum creationis ; octauum benedictionem panis , & vini non esse à consecratione distinctam ; nonum humanitatem Christi existere per existentiam increatam ; decimum & vltimum , essentiam & existentiam distingui realiter in creatis . Dum totis viribus contendis probare , nos ab surdiora Stoicis paradoxa defendere , te ab Ecclesiæ , & SS. Patrum sensu alienissimum , & nos illius defensores acerrimos esse demonstras ; quod harum decem propositionum breuissimo examine efficacissimè conficiam ,

Coexistentiam rerum futurarum in æternitate infinità simul , & indiuisibili (quæ proinde omne tempus ratione infinitatis ambiat , idque simul ratione indiuisibilitatis) necessariam Deo ad immutabilitatem , & intuitionem suæ cognitionis , non à se inuenisse D. Thomam , sed ab Augustino , à Boetio , aliisque SS. Patribus in his versati non abnuent , & hanc coexistentiam realem præter omnes D. Thomæ discipulos è tuis acerrimè defendunt Granado , Christophorus Gil , Ruis , Marcus , Typhano , Henriquez , nec repugnat Fonseca , pluresque alij ; etiam probabilem asserit ipsemet Molina , & qui negant , potissimum Vasquez , & Suarez torquentur maximè , nec sibi , aut aliis satisfaciunt , dum dicunt , quòd cum futura secundum se sint determinatæ & finitæ veritatis , ad illorum certam & intuitiuam cognitionem , non esse necessariam , nec possibilem causæ cognitionem , nec præsentiam etiam realem in æternitate , sed sufficere obiectiuam . Quæro igitur cur ab Angelis neges huiusmodi futura cognosci ? Si dicas cum Vasquez & Suarez , non esse illis obiectum proportionatum , apertissimè petis principium , cum , vt monui , sint determinatæ & finitæ veritatis obiectiuæ , quæ proinde Angelorum caput non superent . Vides ergo nos diuinæ scientiæ & SS. Patrum vindices , quam tu , tuique , ne quid aliud dicam , malè defenditis aduersus impiorum impetus .

Nec poteras apertiùs , & impensius nobis fauere , & gloriosissimum titulum veritatis fidei , & SS. Patrum consensqs

consensus defensorum ; quàm dum septimam propositionem improperas , quod creationem instrumenti consortium admittère negemus. Nihil hac propositione verius & solidius , quàm duplici hoc principio nititur : instrumenta non agere , nisi ut mota à principe agente , & creationem cum è nihilo rem & effectum educat , esse quoad terminum substantialem , absolutam ab omni motu : Ergo nullum creatio motum , ac subinde nullum admittit instrumentum. Huic demonstrationi accedit autoritas Patrum , qui Arrianis loca scripturæ , quæ ex creatione , quam verbo Divino , & Spiritui sancto attribuunt , diuinitatem vtriusque probant , hoc tuo de creationis instrumento , putido principio labefactabant : Verbum & Spiritum sanctum dici creare ut instrumentum , non causam principem : sed illis Athanasius , Cyrillus & reliqui Patres effugium præcluserunt septimam illam propositionem , repugnare instrumentum creatum misceri creationi , adeo eximia est Deo. Velim , Petre , ut similia in nos conuicia colligas , quibus super sidera feres scholam nostram.

Non dispar est gloria ex octauâ propositione , vel tertio Paradoxo de impeccabilitate Angelorum primo instanti ; nam is est sensus SS. Patrum , & totius Ecclesiæ , quem S. Doctor rationibus validè confirmauit ex hoc principio : Cuiuslibet rei primam actionem singulari iure ascribendam Authori , à quo instituta est : & huic sententiæ præter Thomistas omnes subscribunt extraneorum plurimi , Bonauentura , Richardus , Alensis , Argentina , Hugo à S. Victore. Et ex tuis Granado , Arrubal : & adhuc à scholis explosam dices , & si superis placet , absurdam , quamvis necessariam ad defensionem communis Ecclesiæ doctrinæ ? Nonne consensu Patrum receptum est , Angelos omnes primo creationis instanti liberè Sanctificatos , & secundo instanti aliquot etiam illorum peccasse , reliquos *in veritate stersisse* , nullo veniali peccato , nec à bonis , aut malis admisso ? Rogo te , Petre , quid fieri potest , ut adeo certò asserat Ecclesiæ ex innumeris Angelis nullum illo instanti peccasse etiam venialiter , si liberum fuit illis utroque genere peccati delinquere ? Si id contingens sit , vnde scitum est illos omnes à peccato fuisse immunes ? Quæ de causâ illos

Deus omnes nullo excepto à peccato exemit? Vides, vt infinita absurda euadas contra doctrinam communem Ecclesiæ, recurrendum ad D. Thomæ principium. Fateſcant ergo tuæ calumniæ. Adjungam alia duo de primo peccato adulti, & de præcepto, quo vrgetur primo instanti, vt ad Deum se referat, cognatione argumenti cum superiori.

Sensus etiam Ecclesiæ est, adulatorum nullum decedere cum veniali solo adiuncto originali, quia nullum scripturæ locum assignat, vbi dare possit pœnam peccati venialis; non purgatorium, quia est locus animabus iustis purgandis; non infernum quo peccata actualia, & letalia castigantur. Hoc exemplo maximè torquentur tui. Quid ad hæc S. Thomas? Iudicauit hunc nodum se vindice dignum, & eâ magnitudine ingenij omnibus difficultatibus insuperabilibus pari, hanc sic euicit. Certum est Angelos primo suæ creationis instanti physico, & homines morali, vbi primum rationis compotes fuerint, tunc maximè vrgeri præcepto, Deum vt Dominum agnoscendi, ad illum se referendi, vel ad minùs statuendi sibi finem vltimum, & bonum honestum, ad quod, tanquam ad regulam, suas actiones exigant. Hoc docuere Philosophi, hoc cecinere Poetæ fabula sui Herculis Iunioris in Biuio positi, vt voluptatis, aut virtutis viam ineat. Hoc maximè commendat Seneca, & damnat eos, qui tunc viuere incipiunt, cum desinunt, id est, sub horam mortis vitam instituunt; aut, quod peius est, antè desinunt viuere, quàm inceperint vitam Christianam aut moralem instituere.

Ne cauſeris rigidius esse quod à nobis exigit Theologia. Audi Senecam Ep. 71. id officij omnibus, qui ratione viuunt, præſcribentem, iisque elegantissimis verbis, & exemplis persuadentem. *Scire debet quid peccat ille, qui sagittam vult mittere; errant consilia, quia non habent quò dirigantur, ignoranti quem portum petat, nullus suus ventus est; non disponet singula, nisi cui iam vita summa proposita est. Ideo peccamus, quia de parvis vita deliberamus omnes, de totâ nemo.* His malis curandis, & auertendis statuit Diuus Thomas primâ vitæ parte de summo bono, seu Deo cogitandum,

teoque dirigendum totius vite cursum.

Quæro à te, Petre, si hominem primo illi instanti morali eximas à præcepto amandi Deum &c, quo tempore vis instare? Dices cum multis tuorum, ad finem vitæ. Benè est; sed ne quid grauius dicam, illos & te, ad Senecam remitto. Certe minus indulgeret Ethnicis Seneca, quàm tu Christiano. Hinc ergo consequitur responsio ad casum, non posse contingere, veniale solum cum originali iungi in mortuo, quando quidem reus est mortalis, nisi illi præcepto satisfecerit. Hæc omnia, dices, sunt explosa, non apud omnes: vnde falsum est, à solis Thomistis tuas dictas propositiones defendi; nam ad minus illis subscribunt Nauarrus, & Curiel, qui loco plurimum esse possint, nulli Canonistarum huius sæculi, aut Theologorum secundi.

Redeo ad quartum, & quintum paradoxum, de loco Angelorum. Allero (præter innumeros, quos extra scholam D. Thomæ defensores habent hæc duæ propositiones; quales sunt Ægidius, Argentina, vterque Augustiniani Ordinis Generalis; Gotofridus, Henricus, Picus Mirandulanus ingeniorum Phœnix, & ex tuis Bualus, à quo etiam Vasquez non abhorret) adeo se ipsis tutas esse has propositiones, vt nihil censeam in Scriptura, & Traditione solidius, aut fundatius.

Non ne concedes de loco spirituum perinde ac de præsentia, & immensitate Dei esse statuendum? Puto te hoc omnino admissurum. Hoc ergo constituto, consule Scripturam, consule Patres. Nil reperies verius hoc inuictò scholæ Thomisticæ principio, Deum in se ab æterno, vt loquitur Tertullianus, *sibi fuisse mundum, locum, & omnia*; & præter hanc præsentiam in seipso æternam, tres habuisse temporarias, communem, qua omnia creat, & conseruat; duas singulares; vnã verbi, per missionem Incarnationis; alteram Spiritus sancti per infusionem gratiæ, & gloriæ. Nisi velis illudere Scripturæ, & pondus sententiarum eius figuris frangere; non potes negare, has duas Verbi, & Spiritus sancti toties decantatas missiones, nouam requirere præsentiam; subsistentiæ verbi; quã perficit & terminat humanitatem, & Diuinitatis, quã se dat animæ iustæ, & beatæ possidendam & fruendam sicut præsens est per

immensitatem, & implet cœlum ac terram, quatenus res omnes creat aut conseruat, vt Psalmista, & Apostolus hanc præsentiam communem ex illa operatione probant.

Quid ergo verius, quid diuinius hoc principio; Deum rebus præsentem non esse, nisi vt perficit? Et idèd cum sit triplex perficiendi genus, nempe, quo creat, quo terminat humanitatem, quo beat, hinc manifestè deducitur tres esse Dei præsentias omnium operatorias, quæ extra Deum posita sunt. Cùm enim omnia contineantur ordine naturæ, gratiæ, & vnionis hypostaticæ, videmus præsentiam communem ordinem naturæ, singularem Verbi vnionis hypostaticæ, tertiam Spiritus sancti gratiæ ordinem constituere: Ergo hoc principium D. Thomæ, Deus est præsens rebus vt perfectiùs, stat firmius vniuersi cardine.

Et inde deducimus, & confirmamus, quas tu, vt paradoxa reiicis, propositiones; Angelos more Dei esse in loco naturaliter, vt agunt, vel præternaturaliter, vt patiuntur & ligantur igne inferni. Et cum plures Angeli nequeant, vt causæ totales, nec velint, aut deceat; vt causas partiales eundem effectum producere, quid mali est, si plures negemus esse posse in eodem loco formaliter, licet in eodem materiali innumeros admittamus?

Videris octauo paradoxo secutus Vasquez, qui censet opinionem D. Thomæ, non aliam benedictionem panis & vini, à consecrationis verbis distinguentem derelictam esse in scholis; nam vt omittam momenta rationum, quibus fulcitur, & infirma argumenta, quibus ipse Vasquez impugnat, mirum est, ausum fuisse explosam dicere, cùm præter Thomistas, præter antiquos, Alexandrum, Marsilium, Durandum, Hugonem, & ex tuis Valentiam & Henriquez, expresse ita habeat Catechismus Pij V. à tribus è nostris Theologis scriptus. Sed ille tibi potiùs execrationi est, quàm venerationi: licet Summi Pontificis nomen præferat; ad minus æquè commendandus, ac Rituale Pauli V. cui asseris vim ex Cathedrâ definitionum. Sed ille tibi, vt dixi, stomachum, & bilem mouet duplici de causâ, quia prædeterminationi Physicæ fauet, & quia splendore

eloquentiæ tuos oculos caligantes fatigat, & tibi causam gloriandi & iactantiam aufert, de Theologiâ monachorum barbaricè sordidâ, à te ornatâ: non credent, qui Carthechisum legerint, cui ex vestrà officinâ in Theologicis nihil prodiit illi opusculo par grauitate sententiarum, aut verborum delectu, & tot editionibus celeberr.

Nonum apud te paradoxum, quo asserimus humanitatem Christi existentiam increatâ existere; & decimum, quo distinguimus in creatis substantiis essentiam ab existentia, quæ à te enumerantur inter minus solidas, & improbabiles propositiones à scholis explosas, à Philosophis & SS. PP. hausit D. Thom. & confirmauit ex iis quæ de Deo fidei & rationis lumine nobis innotescunt. Vnde certissimè assero, si ab hac sententiâ recedas, vix mysteria fidei explicari posse. Nullus enim locus (vt cætera omittam) esse poterit maternitati sacratissimæ Virginis, aut vnioni substantiali humanitatis cum verbo, si ipsam asseras existere per se existentiam substantialem completâ ante assumptionem ad verbum, cum iam terminauerit, aut potius exhauserit totam vim generatiuam Deiparæ: quæ proinde mater humanitatis per se existentis diceretur; nullâ vero ratione Dei, nisi sensu, quo Nestorius non negasset. Quid enim humanitatem sic per se existentem putant aduenire perfectionis, aut vnionis substantialis, vt vnâ cum verbo personam conficiat?

His difficultatibus aliisque grauioribus fatetur Cardinalis de Lugo disp. 12. num. 26. hæcenus in illâ disceptatione de constitutiuo suppositi creati nullum Authorem conquiescere, aut inuenisse aliquid, quod satisfaceret. Ita planè sentio, nisi distinctionem existentie ab essentia admittas, quam S. Thomas desumpsit tum ab Auienna, & eius discipulis inter Arabes celeberrimis, vt illis hac ratione ad Christianismum, & Incarnationis fidem viam pararet; tum ex SS. Patribus, qui serè omnes existentiam soli Deo essentialem, creaturis vero omnibus contingentem & accidentalem asserunt. Hæc vero sententiâ constitutâ, Trinitatis & Incarnationis mysteria explicari, & defendi possunt: in quibus nil mirum, si Theologorum reliqui sibi nec aliis satisfaciunt.

cum à viâ securiori , quam D. Thomas strauit & calca-
uit , longè aberrauerint.

PARAGRAPHVS TERTIVS.

*Octodecim Propositiones Peripatetica , vindicate
in Fidei obsequium , à Petri objectionibus.*

EX quadraginta quatuor propositionibus scholæ no-
stræ , quas asserit Petrus ab aliis explosas , supersunt
octodecim easque omnes S. Doctor ex Peripateticis
principiis deduxit , vt breuissimè demonstrabo. Vnicus
autem , & certè præcipuus D. Thomæ scopus , quem
semper præ oculis habet , quò omnes conclusiones ad-
uocat , is est ; nempe vt subiiciat rationem & Philo-
sophiam fidei. Vnde quidam grauissimus Præsul , &
eloquentissimus Ecclesiastes Thomam vocabat Aristote-
lem baptisatum. At ego veriùs dixerim Aristotelem
Ethnicum Christianum fecisse hac regulâ , nempe gra-
tiam perficere naturam , non destruere , & vtriusque
progressum ferè iisdem legibus metiendum esse.

Ex hoc principio deducit conclusiones infinitas maxi-
mè 1. 14. 11. 19. & vltimam primi ordinis. Vndecimam
quidem , quâ asserit habitum Charitatis non intendi per
actus æquales , aut remissos , sed per intensiores : quia
augmentum illud metiendum est iuxta leges qualitatum
naturalium , vel habituum moralium : quod certum est
non augeri , nisi perfectioribus actibus. Si dicas hoc sin-
gulare esse virtutibus infusis , vt mereantur augmentum ,
etiam actibus remissis , hoc non negat D. Thomas : sed
vnde probas , debere dari eodem instanti , cum præ-
mium tempore sit sæpius merito posterius ? Satis er-
go est , si illud augmentum detur ante ingressum gloriæ ,
cum cum Deus præterita merita remunerat.

Eadem regulâ nititur duodecima propositio , quæ
asserit vltimam dispositionem ad gratiam Sanctifican-
tem effectiue esse ab habitu Charitatis , & huic Sententiæ
præter Thomistas ferè omnes subscribit Vasquez cum
suis discipulis : Probatur ex principio constituto. Nihil
vetat gratiæ , & naturæ ordinem iisdem legibus dirigi ,
& vtroque dari mutuam causarum dependentiam in

diuerso genere. Cum ergo id contingat generationi naturali, vt dispositio vltima ad formam sit ab ipsamet formâ effectiue cui materiam parat; Quidni seruabimus eundem in regeneratione supernaturali ordinem, vt contritio, vel dilectio sit à Charitate habituali, tanquam à principio effectiuo, & ad illam inducendam in animam viam parat? Sic reciproca est causalitas in diuerso ordine generationem inter & corruptionem; inter ventum impellentem, & aperientem fenestram; & fenestram, quæ cedit vento ingredienti. Nihil ergo mirum, hoc principium, quo nititur mutua dependentia causarum in diuerso genere acriter impugnari à Recentioribus, cum de Lugo disp. 9. de Pœnit. hac de re fateatur, ea semel admissâ mutuâ causalitate, Thomistas in tuto esse ab illis argumentis, quibus libertatem læsam à prædeterminatione conantur euincere.

Præter illud Physicum nostræ propositionis quintæ fundamentum, aliud Theologicum paris momenti adiungo, quod nostra sententia facillimè expediat nodum insolubilem Aduersarijs. Certum est (& hoc Bellarminus etiam demonstrat) primum actum contritionis gratiâ informatum mereri quidem primum gradum gloriæ, qui illi respondet, minimè verò primum gradum gratiæ. Cuius rei intricatæ expedita & obuia ratio est, gloriam cadere sub meritum illius dilectionis, quia est terminus extrinsecus, quem respicit, secus vero gratiam habitualement quia est illius actionis principium quod sub meritum non cadit, iuxta commune Theologorum effatum.

Ad eandem regulam exigimus decimamtertiam propositionem, nempe peccatum veniale esse posse in appetitu sensitiuo; & vltimam illius, videlicet numero vigesimam sextam, quæ virtutes morales acquisitas, aut infusas castitatis fortitudinis, ponit in appetitu concupiscibili, & irascibili, iuxta receptam in nostris scholis opinionem; de quâ videri possunt Salmanticenses 1. 2. tract. 12. d. 3. quam etiam plures extraneorum sequuntur, & vtrique ex Peripateticis principiis assertis sic à D. Thomâ probatur.

Nemo nescit appetitum sensituum hominis hoc differre ab appetitu brutorum, & à membris, & sensibus

externis, quod has partes omnis rationis & libertatis expertes despotice regat animus, appetitum vero politice, id est, quasi imperio rationis obsequentem. Corpus vero obistere nequit, nisi adsit obstaculum, aut infirmitas, sed ad eius nutum regitur, neque agit, sed agitur: secus vero appetitus, qui in homine potest esse rationis sequax, & contumax; potest obedire, & reluctari: Ergo virtute illi opus est, ut subsit rationi, à quâ aberrare potest. Et cum aliunde ea sit lex vniuersi; quodd, (ut habet Dionysius) *infini supremum attingat supremi infimum*, & ratio in homine sit infimus gradus supremæ naturæ intelligentis; appetitus vero sit inferioris naturæ sensitivæ veluti apex, & suprema perfectio; quid mali est, aut potius nonne oportet, ut hæ partes mutuò sibi suas dotes communicent? Et si ex illâ directione partis superioris participet appetitus ordinem rationis, & aliquid libertatis, ergo capax esse potest actus studiosi, vel mali, & ad minus peccati venialis, ut vera sit lex à Dionysio euulgata, *supremum infimi attingit infimum supremi*. Et his breuiter ac strictim dictis duæ propositiones, quas ut improbables traducit Petrus, solidè hoc fundamento subsistunt.

Cui adde aliud ex Ethicâ non minus firmum & immotum, habitum virtutis, aut vitij in eâ facultate collocandum, in quâ boni, aut mali ratio absoluat. Et cum hoc discriminis intersit bonum inter & verum, quodd istius cognoscendi initium, seu dispositio sit à sensibus cognoscitiuis (seu externi sint, seu interni) illud verò sola mens assequatur, quæ proinde capax sit habituum, & virtutum, quibus veritas attingitur: Contrâ verò boni honesti, quod in moderandis affectibus timoris, aut voluptatis ex regulis temperantiæ & fortitudinis à voluntate sit exordium, actibus verò appetitus sensitivi perficiatur; aliàs si absoluta ratio huius boni honesti esset penès solam voluntatem, nihil prohiberet quin Angeli castitatis virtutem, Demones luxuriæ vitium sibi compararent; cum illi rebus castis, isti turpibus delectentur.

Ex quibus omnibus planè consequitur in appetitu sensitivo residere virtutes, quæ voluptatem carnis, aut timorem mortis moderentur; quandoquidem illius fa-

cultatis actibus absoluitur, & consummatur temperantia, & fortitudinis ratio, prout virtutibus moralibus accensentur, quarum solus homo capax aut compos est, ut medium tenet Angelos inter & bruta, id est, ut habet congenitum appetitum sensitivum, quem politicè regat, & ita sit audiens, & obnoxius rationi, ut etiam contumax esse possit. Verissimè ergo, & peripateticè has virtutes morales collocat Sanctus Doctor in appetitu sensitivo, non in voluntate.

Ex iisdem Principiis Peripateticis deducit S. Thomas plures propositiones, maximè quintam primi Ordinis, non posse sub vnâ specie Angelicâ dari plura indiuidua; & secundi Ordinis quintam, duo accidentia eiusdem rationis non inesse simul eidem subiecto; & sextam plures albedines non posse dari naturaliter abstractas; & septimam intensionem qualitatum non fieri per additionem graduum, sed per radicationem eiusdem qualitatis; & vndecimam principium indiuiduationis esse materiam; & vltimam, habitum scientiæ esse simplicem qualitatem, & tamen intendi.

Hæ omnes propositiones pendent ab vnico principio de indiuiduatione, ita comperto in scholâ Peripateticâ, ut fateatur Fonseca, si in hac re D. Thomas errauerit, communem illi esse cum Philosopho lapsum. Si potentia, habitus, & operationes, suam specificam rationem ab obiecto exterius posito sumunt, iuxta axioma receptissimum ab omnibus Theologis, & Philosophis, (quod paucissimi, & præ aliis Ripalda ausus est impugnare, sed Cardinalis de Lugo dicit hoc à se mutuatum) quid mirum, differentiam indiuidualem, quæ intra eandem speciem solo numero res distinguit, quæ est ens materiale, & quasi per accidens & secundariò intentum, desumi, vel à materiâ, vel à subiecto, vel à materiâ signatâ quantitate, cum oporteat cuiusque rei rationem ab eo repeti, cui per se primò conuenit? At nemo negat diuisionis in plura eiusdem rationis, radicem esse materiam, & quantitatem, igitur iuxta principia verè Peripatetica compertæ sunt omnes numeratæ assertiones, quæ præter D. Thomæ discipulos, omnes ferè habent defensores veros Peripateticos, maxime Auerroem; huius enim vi axiomatis malè compulsus est in illum errorem, non

dari nisi vnâ animam rationalem omnium hominum ; adeo constans erat apud ipsum iuxta mentem Philosophi , multitudinem numericam non esse nisi à subiecto & materiâ ; & ne à Philosopho discederet , in tam grande absurdum deductus & prolapsus fuit.

Sed notandum diligenter est , aliud iudicium esse de Animâ rationali , ac de completâ forma spiritali subsistente ; illa potest multiplicari ; secus ista , quæ vt multiplicetur , debet dicere ordinem ad materiam , actu vel potentiâ ; & cum vtroque modo à materiâ non abstrahat anima , sed Angelus , hinc manifestum est Animas rationales solo numero posse multiplicari , non Angelos , sicuti præter Thomistas docent plures extranei , maximè Grano. Neque hîc locum habet distinctio potentiæ ordinariæ , & extraordinariæ , neque enim admittitur in causis formalibus , v. g. non potest Deus cum albedine vt quatuor immutatâ , facere album vt decem. At si natura Angeli formaliter eadem ratione constituatur , quâ specifica , & indiuidua , sicuti de potentiâ ordinariâ non potest habere plura indiuidua distincta numero ; ita nec de potentiâ extraordinariâ.

Et ex hoc fundamento facile resoluitur propositio quartadecima , quâ dicimus implicare vnum corpus esse circumscriptiuè in pluribus locis , cui præter antiquiores extra scholam D. Thomæ subscribit Vasquez : & ratio implicationis facillima ex dictis est , causæ formalis effectus multiplicari non potest ipsâ causâ inuariatâ , etiam de potentiâ extraordinariâ , quæ hîc , vt dixi , non habet locum , at affectus formalis quantitatis ad minds secundarius est constituere corpus circumscriptiuè in loco ; ergo illâ inuariatâ , vt supponimus , non potest idem corpus in pluribus locis constitui. Duo autem aut plura corpora eodem loco contineri nihil vetat ; ad hoc enim satis est secundum quantitatis effectum tolli , aut impediri , quod longè minds repugnat , quàm inuariatâ formâ multiplicari : quod tamen omninè necessarium est , vt idem corpus in pluribus collocetur spatiis.

Obieceras etiam aliam propositionem à nobis ex D. Thoma , vt ais , assertam , scilicet , *Corpus Christi viuum esse planè diuersum à mortuo* ; sed hoc etiam nobis & D. Thomponis : Num 3. p. q. 50. a. 5. oppositum planè docet ;

dicitenim, *Corpus Christi uiuum & mortuum esse idem numero simpliciter, id est, absolute, & nullo addito; quia scilicet, inquit S. Doctor, est supposito idem, non autem, simpliciter, hoc est omnino totaliter: Nam amisit in morte aliquid ad essentiam uiui pertinens, scilicet uitam.* Ibid acutissime subdit D. Thom. *Si diceretur, quod Corpus Christi mortuum totaliter idem remaneret, sequeretur non esse corruptum, corruptione, dico, mortu; quod est hæresis Gaianitarum.* Caueat ergo Petrus ne dum D. Thomæ calumniam molitur in illam hæresim dilabatur.

Propositiones, quæ supersunt examinandæ, deduxit S. Thomas ex doctrinâ receptâ Platonis, & Aristotelis de materiâ primâ, quam puram potentiam, & prope modum nihil appellant, & opponunt Deo, ut entium infimum supremo. Ex his infert D. Thomas propositionem primam, secundam, tertiam, octauam, decimam, decimam-septimam secundi ordinis. Fateor has D. Thomæ & Aristotelis propositiones, longissimè abesse à Democriti, & Epicuri, & aliorum Philosophorum placitis, qui generationes substantiales, animi immortalitatem, diuinitatem, & prouidentiam negabant ex opposito principio, quod materia prima esset ens completum, actuale, capax tantum formarum accidentalium. Inde Galenus inferebat animam hominis non esse formam substantialem, sed harmoniam.

Vnde videat Petrus, videant reliqui osiores Doctrinæ Thomisticæ, & harum maximè propositionum, materiam non habere propriam existentiam; implicare separari ab omni formâ, recipere immediatè accidentia; dari resolutionem usque ad materiam primam; videant, inquam, & obseruent dum ista explodunt ut paradoxa, causam agere Democriti, Epicuri, Religionis & Prouidentiae hostium instaurare opiniones. At contra D. Thomas hoc vnum inspexit, ut Philosophiam aduocaret in obsequium fidei, & illius sequax esset, non in Deum rebellis. Ideo has de materiâ opiniones secutus est; nam si eius actualitatem augeas; si velis accidentia immediatè recipere, occludis viam ad generationem substantialem, ac subinde ad animæ rationalis cum corpore unionem substantialem. Hinc ergo patet, Petrum, dum vult tenebras offundere nostræ scholæ, maximam illi

lucem attulisse. Vnde conscius bellum S. Thomæ , & eius discipulis in commune indictum pessimè sibi successisse , vt hoc dedecus debeat , inire vult cum quibuscum nostrorum singulare certamen , ratus se facilius seorsim singulos , quàm omnes iunctim victurum.

ARTICVLVS SECVNDVS.

*Dominicanorum , & Discipulorum D. Thomæ
vindicta , aduersus alteram quarta
Diatriba partem.*

Nescio , an Petrus in Sanctum Doctorem id mediteretur malum, quod sibi euenturum diuino consilio, & Iudæorum manibus , Christus prædixerat : *percutiam Pastorem , & dispergentur oves gregis.* Non vno loco D. Thomam sibi percussisse visus est obiectis quadraginta quatuor dogmatibus , vt putat , improbabilibus , & paradoxis , & totidem credit se illum vulneribus confecisse , & pastore ita deiecto & afflicto , totum gregem omnesque discipulos dispersum iri. Non dubito , quin Angelicus præceptor , dum te videt , Theophile , ita in se suosque sæuientem , inclamet verbis Christi : *Theophile , Theophile , quid me persequeris ? Durum tibi est contra stromulum calcitrare.* Nec minùs Christi charitatem , quàm vocem imitatus addet ; si te liuor & odium in me impellit , illud , vt libuerit , exple , *sed sine Discipulos meos abire.*

Verum hanc humanitatem à te frustra requirat : neque enim ita tui compos es , aut rationis audiens ; vt possis , etiam si maximè velles , vlli Thomistarum parcere , si vel minima subsit carpendi occasio , aut à conuitio abstinere cuiuscquam , quamlibet infontis & sancti , qui Dominicanam vestem ferat , Exemplo sit D. Catharina Senensis , quam grauissimæ hæresis damnas , nullâ , vel minimo verbo , datâ occasione adeo atrocis & sacrilegi iudicii , nisi quòd fuerit Dominicanæ Familiæ ornamentum.

PARAGRAPHVS PRIMVS.

Defensio D. Catharina Senensis, Capreoli, & Ioannis à Neapoli, ubi aliqua de Durando, Catharino, Campanella, & Caietano.

Qui hostium fines armati ingrediuntur, & vastant, aut Ciuitates vi expugnant, longè humaniùs, quàm tu in nos, Petre, agunt. Neque enim nullo discrimine sæuiunt in omnia: sed si quis pietatis, aut humanitatis sensus sit, abstinent à direptione, & incendio templorum, à puerorum, senum, & mulierum cæde; parcant etiam miliribus, qui se dedunt, & arma abiiciunt. Hanc humanitatem in te desideramus Theophile: omnes Dominicanæ Familiæ, nullo sexus, aut generis discrimine ad mortem deposcis, vel quod peiùs est, illis æternam infamiam importas.

Nonnulli communem causam, & Doctrinam familiæ nostræ deseruerunt, quales sunt Durandus, Catharinus, Campanella. Ab ea etiam paululùm deflexit Caietanus, ubi assumptus ad purpuram, se contulit ad Scripturæ sacræ interpretationem. Quibusdam minùs licuit res Familiæ nostræ attingere, quàm senibus, pueris, & virginibus militare. Ac proinde Virgines Deo sacræ, & maximè omnium illustrissima ac sanctissima Catharina Senensis, videbantur extra teli iactum, ac sæuitiæ tuæ vim ac impetum positæ. Sed hostiliùs nobiscum agis, quàm vsquam hostium vlli. Neque Virginibus, nèque Diuis, aut rebus sacris parcis. Innocentissimam Catharinam Ecclesiæ Catholicæ columen accusas grauissimæ, de visione beatâ, hæreseos, oratione decimâ septimâ die 12. Augusti anno 1377. Romæ habitâ, quam refert visum est ex editione Aldi Manutii anno 1550. vt inde Lector agnoscat non minus iniquam Catharinæ, quàm olim Susannæ accusationem. Sic igitur more, & exemplo Christi inter orandum, Patrem æternum compellat, & alloquitur.

O ingrati animi hominem! O diuinatatem omni altitudine sublimiorem! O incomprehensam charitatem! Tu nos

Pater aterne, doces, hominem, dum se introspicit, te in seipso nosse & complecti, quia ad tui & totius Trinitatis imaginem formatus, unus substantia est triplici facultate instructus. Pollet memoriâ, ex tua potentia similitudine, ne unquam tui, & tuorum beneficiorum obliuiscatur. Rationis etiam compos, & Filij tui unigeniti sapientia particeps est, ut te agnoscat, & te amandi causa voluntatem Spiritus sancti liberalitate, ad eius bonitatis imitationem habet. Homines igitur his tuis donis ornatos, non modo ad tui similitudinem creasti, sed voluisti etiam sui in te similitudinem, & ideam haberent: atque ita non solum tu in homine, sed homo in te existit. Sed hanc mutuam cognationem mei tecum, sero, neque hactenus noui; atque hac est summa cecitas hominum, qui in te peccant? Nam si caperent, quid sis, te in seipsis, aut se in tuâ diuinitate existere, non possent te super omnia non amare, & non odisse peccatum. Verum hac ignorantia, non nisi à tua gratia abscessu & carentia est; hac vero ab interiecta amoris proprii, te inter & nos, nube prouenit. Tanta vero est hominum inter se natura similitudo & necessitudo: ut si ab illis exulet mutua dilectio, sint quasi à propria naturâ extorres. Hæc D. Catharina. Deinde pro singulis, qui sibi cordi, aut commendati erant, rogauit Deum, Diuinæ suæ naturæ participes faceret, mutuâ charitate, quâ ad Deum, qui charitas est, propius accedimus. Quod ad se attinet, subiunxit, se non aliam à Deo gratiam ambire, quàm grauissima & longissima quæque mala forti & læto animo eius causâ per totam vitam, tandem martyrio consummandam, patiendi.

Quæ tibi, Theophile, hæreseos sunt comperta, aut suspecta verba, ex hac sanctissimæ Virginis oratione? Quo loco lateat venenum, indica, excute; quia oculos nostros, imò omnem coniecturam, & suspicionem effugiunt. Nec solum nobis videntur ab omni errore remota; sed etiam ab ardentissimâ charitate profecta. His tamen verbis inesse contendis hæresim de visione beatâ, passiuè tantum calitum mentibus receptâ nullo in illam potentia agentis influxu, sed patientis officio. Atque illam hæresim, quasi apud Thomistas hæreditariâ traditione acceptam hausisse vis D. Catharinam à Patribus

nostris, quos à confessionibus habuit, quorum se curæ & arbitrio permiserat. Atque ut fucum facias incautis, Ioannem à Neapoli è Theologis nostris addis in eo fuisse errore: & Capreolum etiam perperam de visione beatâ sensisse in 4 dist. 49.

Deum hominesque testari possum, nullam, per majorem, aut cæcitatem, aut improbitatem fuisse constatam hac, quam moliris in Dominicanos, calumniam, ut non mirum sit, Augustissimi, & præ omnibus Catholici Senatus Tholosani Decreto, tuum libellum manu carnificis flammis additum, quod commuerat, hoc solum nomine sacrilegij, etiamsi alia crimina defuissent, quod Virgini Catharinæ, & toti Familiæ Dominicanæ imposueris errorem, de recepta passivæ tantum visione beatâ mentibus Cælitum; à quo nulli hominum magis, quam nostri Theologi abhorrent.

Verum quidem Scoto, & Nominalibus non displicere vitales operationes (qualis sine dubio est visio beatifica) etiamsi passivæ sint receptæ in potentiâ, nec activè ab illa profluant, censerì vitaliter prodire. At Thomistæ omnes id pernegant, & vno consensu asserunt, non magis intellectum aut voluntatem agere si volitio aut intellectio per miraculum immitteretur ab illis minime elicitæ, quàm saxum aut stipitem, si illis eadem actio vitalis inhaereret. Hæc omnium Thomistarum vna vox, & concors ac perpetua est sententia contra Scotum, & Nominales, de actu vitali uniuersim, & de visione beata speciatim contra Hugonem à S. Victore, & Ioannem à Ripa antiquum Theologum nescio cuius familiæ, quia ea tacita Capreolus latissimè refert & refellit argumenta, quibus contendit humanitatem Christi, perinde scientia increata potuisse videre diuinam essentiam, & reipsâ intellexisse omnia, ac verbi personalitate subsistebat.

Et hinc puto deceptum Valentiam, Ioanni à Ripa vero huius opinionis Authori suffecisse Ioannem à Neapoli, nullâ fraude, sed casu, aut negligentia aliquâ: neque enim Valentiam accuso, sed damno Theophilum; quod cum alia sit Actoris in reum, alia Theologi disputantis ratio; huius bonam fidem facile excusam: At si hæreseos nominatim quem accuses, nã oportet accuratissi-

mè inquirere an re vera lapsus sit. Sed frustra hanc æquitatem & diligentiam à Theophilo speres, qui avidissimè calumniandi causam quærir, & ut de famelico alias diximus, cui nullus cibis quamlibet ingratus displiceret; ita Theophilo calumniæ quamlibet atroces, & sacrilegæ videntur in deliciis esse.

Eadem fide refert Capreolum, & reum peragit citato loco 4. sent. dist. 49. a. 4. respons. ad 1. Scoti, & ad 3. Aureoli, circa secundam conclusionem, ubi nihil habet nisi subtilissimam & efficacissimam doctrinam ex D. Thoma desumptam; quâ confirmat elogium ab ipso Petro relatum, esse Capreolum animam D. Thomæ; solâ responsione ad 3. Aureoli, hæc verba habet: *Dicitur quod visio beatifica in quantum beatifica, est à solo Deo, & non ab intellectu agente, vel possibili, sed nihil prohibet, quin sit ab intellectu possibili effectivè.* Huius verò distinctionis de actu visionis secundum substantiam, & secundum formam, quam fingit Petrus, ne verbum quidem apud Capreolum, saltem locis ab illo citatis: aliunde verba relata Capreoli habent facilem & sanam explicationem, quod visio beata sit sub ratione beatitudinis à Deo, ut obiecto vnito, per modum speciei impressæ, & expressæ, & ut principio infundente lumen gloriæ. Ita Capreolus est ab omni errore immunis ut Dominicanorum hostis insensibilis, nihil potuerit inuenire in eius scriptis amplissimis, quod pateret calumniæ: & ne intactum prætermitteret, affinxit illi, quod nunquam somniauit. Benè est, mi Petre, dum vis accusare Dominicanos, ab omni errore absolutus, & demonstras esse super omnem laudem, quandoquidem nihil occurrere potuit, quod morderes, quod reprehenderes, nisi de tuo addidisset.

Hæc paululum immutato ordine, primum de D. Catharina, ex cognatione rei, Capreolo, & Ioanne à Neapoli diximus; quod apertior, & grauior calumnia animam perculerit, & ad defensionem innocentissimæ Virginis abripuerit, quasi à Dracone deuorandæ, licet illam aggrediatur Aduersarius quadam specie miserrantis. *Dolendum est, inquit, sanctam Virginem Catharinam Senensem, ab aliquo malè solido Cyriaco, hausisse eam reprobam doctrinam, ut patet ex eius Oratione 17. Dum hæc*

hæc verba legi, eo maligniora visa sunt, quo brevius & obliquius Divam petunt. *Pessimum genus inimicorum, laudantes*, ait Tacitus, addo ego, *dolentes & in speciem commiserantes*. Visum est etiam è re nostra fore, has Dominicanorum vindicias ordiri ab eâ injuriâ D. Catharinæ illata, ut inde prudens Lector agnoscat, quo animo futurus sit Theophilus in Theologos scriptores, quos maximè laceffit, cum nec sexus, nec sanctitatis ullam rationem habeat.

Perinde nobiscum Theophilus agit, ac Imperator victoriis insolens, qui subactam nationem deleturus, nulli statuit parcere; & ad se, etiam dum bellum ardet, transfugis veniam deprecantibus indicit moriendi necessitatem. Ita sævit in omnes Dominicanos Theophilus, & in eos, maxime qui omnino, aut aliquâ ratione à communi causâ defecerunt; quales sunt Durandus, Catharinus, Campanella, quibus Cenotaphium non statuimus, ut ipse dixit ritu Pythagoreorum, vii magistri communis desertoribus; sed nec illis etiam Apologiam debemus. Durandus habet suas in Academiis Cathedras quarum Candidati, aut possessores illum acriter defendunt. Quod ad Catharinum attinet, non debebat à Petro omnino contemni, quandoquidem Immaculatæ Conceptioni splendorem contulit, depulsis etiam debiti tenebris.

Campanellam mirè vexat Petrus. Plures illius lapsus non distemur, sed cum è doctissimis huius sæculi sit habitus, & fortè fama fuerit supra merita, non existimo tamen omni laude carere, quia major fuit impetu ingenij, quod in conversationibus eminebat, & in libris obscurum est ac pene extinctum; ut doctissimorum virorum iudicia rapuisse magis visus sit quam meruisse. Et certè loco miraculi plurimis fuit carcer per octodecim annos ab ipso insonte magna-constantia toleratus; & quod toto illo tempore sine vllò librorum subsidio, cartha etiam destitutus, tor scripserit, & omnes artes per se didicerit, quod ex inimicorum manibus euaserit, & appellatione ad Sedem Apostolicam ad libertatem sibi viam aperuerit.

Hæc obiter de Campanella, non ut illum omnino defendam, sed à contemptu vindicem, à vituperio in gra-

tiam grauissimorum virorum, ac etiam Summorum Principum, qui magni ipsum fecerunt. Certum est Campanellam plus valuisse impetu, quam iudicio, & disceptatione extemporaneâ, quam scripto, & nullum fortè illi ingenio, aut omnium scientiarum complexione parem: & si alterius Ordinis à nostro, qui vni D. Thomæ addictus est, togam induisset, fortè, vt quoddam scientiarum lumen fuisset habitus; quia nihil est, potissimum è scientiis Astrologiæ, medicinæ, & aliis, quod suo Marte non attigerit. Vnde Cardinalis Pallauicinus in suo libro inscripto *Vindicationes Societatis Iesu*, c. 27. ait: *Thomas Campanella Dominicanus vir qui omnia legerat, omnia meminerat, prauis ingenij, sed indomabilis.* Hunc ergo virum quem Cardinalis Pallauicinus ad eò commendat, Theophilus dicere audet ignorantissimum.

De Caietano aliàs dictum est, nullum illo fuisse ab omni errore remotiorem, quamdiu Diuo Thomæ adhæsit; nullum ad lapsus magis præcipitem, cum ducem deseruit, & sibi fidit: quamuis sex libris contra illum scriptis, plures Catharinus calumnias inseruerit, quam Caietani errores. In Scripturis commentandis habet plurima à se inuenta, quæ placent maximè his, qui non sua tantum admirantur; ex illo Ecclesiastæ maximè Hispani plurimas cogitationes subtilissimas decerpunt, quibus suas conciones veluti gemmis ornant. At maximè Cardinalem Caietanum commendat numquam satis commendatus Cardinalis Pallauicinus in citato libro *Vindicationum* dicto cap. 27. vbi sic ait: Caietanus ille exacti sæculi primum decus in Liceo, & quasi vnus omnium dignus qui Diuinam illam tanquam humanæ Sapientiæ summam Commentariis ornatissimis cumlaret. Pallauicino duos è Societate adde Bellarminum & Possuinum, ille quidem de Scriptoribus Ecclesiasticis ad annum 1500. his duobus verbis Thomas de Vio Patriâ Caietanus vir fuit summi ingenij, nec minoris pietatis: summam laudum complexus est, quas parvis animi candoris ex eadem Societate Possuinus quo nullus dissimilior fuit Theophilo, sine inuidia latè prosequitur, & Summum Pontificatum illi omnium votis conferendum asserit, nisi mors tanto oneri subduxisset.

Possẽm plura addere encomia Caietani ex Posseuino, Bellarmino, aliisque, qui mirè illum laudant, ab ingenio, à summa eruditione, à scriptis, à maximis in Ecclesiam meritis, quæ Leonem X. impulerunt; ut anno trigesimo ætatis assumptum ad sui Ordinis Magisterium, aliquot post annis ad purpuram eueheret; ad difficillimas, & iuxta honorificentissimas legationes admoueret; & in ipsa expugnatione ac direptione Romana, cum vix cuiquam suis malis & periculis implicito liceret de alienis meminisse; non potuit tamen Clemens VII. tantâ ruinâ oppressus Cajetanum obliuisci, & in ea calamitate sollicitè inquisiuit, quid illi accidisset. Num, inquit, maximum hoc Ecclesiæ lumen occidit? Et tamen hunc virum omnibus præter te, & Catharinum, venerandum insectaris crudelius ipsis Lutheranis, è quorum manibus redemptus est magnò pretiò, & totius Ecclesiæ votis ereptus immatura morte; quæ ut restatur Posseuinus ad Pontificatum erat euectura, si vno die superstes fuisset Clementi VII.

PARAGRAPHVS SECVNDVS.

Excusatur opinio Ferrariensis de Transsubstantiatione collata cum opinione de Lugo.

MOnui initio huius libri, plura mihi permissurum; Ad Præceptoris Angelici, eiusque discipulorum Doctrinæ, quam ad fidei, pietatis, morumque defensionem. Nam cum longè alia sit disserendi, & opinandi salua fide, alia probe, aut secus viuendi ratio; cum viriis & erroribus certa & grauis; opinionibus autem probabilibus modica aut nulla creetur infamia, vel damnatio debeat; cum nobis vitia, & hæreses obiecit Petrus; contentus calumniam refellere, nolui similia, quæ poteram forte vera reponere, quia occulta sunt, quia scandala pariunt & infamiam: opiniones vero quas ut improbabiles, & Paradoxa D. Thomæ, eiusque discipulis obiecit; nihil dubitabo excusare, & defendere collatione Authqrum ex Societate, qui similia & fortè absurdiora docent; vel etiam erronea. Id experiemur isto Paragrapho.

Ferrariensi obicis docuisse, quando ex speciebus sacris;

mentalibus putrefactis generantur vermes, manere quantitatem specierum, cum solâ substantiali formâ vermis adueniente; nullam autem ibi materiam reperiri, atque adeo existimare vermes illos differre specie à ceteris vermibus; quod putat se habere ex D. Thoma 4. cont. gent. c. 66. & ex 3. p. q. 77. a. 5. & in 4. dist. 12. q. 1. a. 2. Sed esto sit ita interpretatus D. Thomam Ferrariensis contra sensum Capreoli, Cajetani, & aliorum Thomistarum quid inde? An non potuit interpretes D. Thomam aliquid fortè minus verum asserere.

Si vellem representare, quæ ex tuis doctissimi, & recentiores de conuersione Eucharistiæ docent, audires absurdiora; quale est illud Cardinalis de Lugo, qui ad conuersionem triplex vinculum exigit corporis Christi cum speciebus, primum per proprium vbi, secundum per virtutem actiuam, & quasi creatiuam, qua corpus Christi species è nihilo retrahit, & sine subiecto conseruat; sed hæc duo vincula debiliora censet, quam vt possint speciebus corpus alligare, ideo istis addit virtutem trahendi corpus quocumque ferantur, vt funiculus triplex difficile rumpatur. His ita constitutis conuersionem sic explicat, vt nihil repugnet iuxta illius principia quamlibet creaturam in Deum, vel è contra Deum in creaturam conuerti: quia conuersionem idem omnino esse putat, quod vnum loco alterius succedere, vt illius officio fungatur. Ita Angelus qui mouet cælum in Deum conuertatur necesse est, si eo amoto Deus inqueat orbem caelestem: Non puto hanc de conuersione sententiam saniores aut probabiliorem esse illa quam Ferrariensi improperas.

Quamuis Ferrariensis 4. contra gent. c. 66. ingeniose discutat de quantitate, vt vicem & locum habet materia, dum putrescunt species sacramentales, & illi attribuendum dicat quidquid materiae veræ, si adesset, conueniret; atque ita in illam refert tanquam in principium passiuum educationem, & sustentationem nouæ formæ, vt euitet quod intercederet miraculum, si noua materia crearetur: ea ratione qua certum est dispositiones quæ antecedunt generationem vermium recipi in quantitate, formam autem genitam induci in subiectum prius dispositum: Authoribus vero qui censent putrefactis spe-

ciebus sacramentalibus, creari à Deo materiam, ex qua instantanee educatur forma vermis, asserendum omnino est, priuationem formæ vermis non præcessisse in materia, & sic non videtur ex ista sententia posse vitari quin illa productio vermis sit vera creatio: nam si esset generatio, debuerat priuatio præcedere aliquo tempore, vel saltem instanti temporis. Has difficultates soluere debuisset Raynaudus, vt merito sententiam Ferrariensis suggillaret.

Addere possumus errores Thomæ Bonartes Nordtani Angli è societate in suo libro impresso Colonia anno 1659. inscripto. *Concordia scientia cum fide, &c.* Quo sacrosancta Fides Christianæ mysteria euertit ac tollit, præcipuè mysterium Incarnationis, ac transubstantiationem in Eucharistia. Christum purum hominem facit: negat enim in Christo vnionem hypostaticam ad verbum; & naturam humanam Christi subsistere in verbo, docet nihil aliud esse, quam omnia opera Christi indiuisibiliter à Deo & homine, vt ab vno principio prodire. Hinc, quia operationes sunt suppositorum, in Christo cum sit vnum Principium agendi ex Deo & homine constitutum vnum tantum esse suppositum dici conuenit diuinum potius, quam humanum: quia ad agendum primas Deus habet, homo comparatur vt instrumentum perfectissimè Deo dirigenti subditum.

Hæc est Bonartis de mysterio Incarnationis doctrina. Fecit eius verba lib. 4. pag. 225. *Propose tibi Christum eo modo agentem, vt quidquid agat humanitas, id simul agat operâ coniuncta diuinitas, vt ab utraque proximè, & simul actio procedat, &c.* & post multa. Itaque cum efficientia humana Diuina composita velut absorpta, & obruta videatur; haud obscura est ratio, qua Patribus persuasit, vt Diuinam tantum hypostasim Christo tribuerent, & naturam humanam personalitate propriâ spoliatam dicerent; illi quippe principio tamquam hypostasi actio ex usu sermonis communis ascribitur, in quo & dignitatis, & efficacitatis amplius cernitur; vnde subsistentiam illam quam vocant positiuam, Antiqui, & Patribus, & Philosophis ignotam, fideique improbatam, &c.

Et pag. 219. sic ait. *Anima Christi tum in intellectu, tum voluntate, adiumentis talibus est ornata, qualia*

instrumento ad actiones Deo dignas, cum Deo simul edendas destinato congruant; habet etiam corpus sic agentis conueniens, tum Deus actiones proximè cum sola Christi humanitate producat, quasque illa passiones recipit, ipse quoque ad receptionem agendo praparat, atque disponit. Hoc si cogitatione comprehensum teneas, & naturam unionis vera, & Physica propriè assumptam, non autem in humana, sed Diuina hypostasi subsistentem, quia Deo ut pote & digniori, & longe principalius agentis actio attribuitur, quamlibet vero, ut Diuinum maxime humanitatem etiam summè perfectum, atque instrumentum Diuinitatis maxime coniunctum intellige.

Secundo tollit sacrosanctum Eucharistiae mysterium, negat enim Corpus Christi, quod est in caelo, esse idem in Altari; sed aliud distinctum semper assumit pro distinctione hostiarum. Item negat Corpus Christi totum esse in tota hostia, & totum in qualibet parte ipsius, sed vel sub qualibet particula sensibili esse quoddam Christi Corpus, adeo ut vnaquæque particula suum habeat, ut ipse loquitur, *minimum animalculum*, vel diuisione factâ non esse Corpus Christi integrum sub qualibet parte. En Bonartii verba, pag. 243. *Hic igitur Christi Corpus quod in calicem est, illud ipsum propriissimè sumptum in Altari non sisti, sed panem propositum in tantumdem carnis, vinum item in sanguinem virtute Diuina, sed ea qua modo explicata est conuersione mutari, hacque anima Christi copulata, à verbo assumi hypostatice, &c. & pag. 253 ait, Pani, & vino transmutatus coniungitur Diuinitas, ex iisdem Christi Corpus, & sanguis efficitur, non autem corpus quod in calicem est eorundem loco subiicitur, &c.*

Quid ad ista Theophile? Nonne sunt haereses crassissimæ? An non euerunt ac funditus tollunt Catholicam fidem? Hæc non à Dominicano aliquo, sed ab vno ex tuis scripta, ac edita reperies in Thoma Bonarte, qui libro edito suum nomen apposuerit, non tamen scripsit se esse à Societate Iesu; ne forte ipsi daret pœnas suorum errorum; sed damnato à sacra Congregatione libro, Thomas ad urbem aduocatus fuit, & à iussu, ut audiui, punitus. Scio tamen aliquot ex eius

instituto, hæreses adeo crassas aliquo sensu tolerabili mollire conatos.

Quid simile contigit annis superioribus Venetiis, ubi quidam è Societate eiectus publice defendit hanc propositionem, *Aliquis Deus est possibilis*, quam etiam plures Theologi è Societate in gratiam eiecti, quem amore prosequiebantur, acerrimè tutati sunt. Hoc vnum veri Bonartes suo libro alias errorum referto admiscet *scientiam mediam Deo esse indecoram, hominibus horrendam*, &c. & hoc latissimè probat; quamuis erret quod neget Deum vlllo pacto cognoscere futura conditionata.

PARAGRAPHVS TERTIVS.

Defensio Cani, Dominici, & Petri à Soto.

Vix vlla Diatriba pareit Cano Theophilus, & cum nihil habeat quod obiiciat nouum aut graue, eadem reperit vsque ad nauseam: quale est illud de reprehensione Stephani: vel obiicit leuia, aut quæ plures ex Antiquis & recentibus Theologis doctissimi & grauissimè defendunt; qualia sunt hæc tria, primum de matrimonio nullo, si solis nutibus ineatur ab illis, quibus ad est facultas loquendi, vel si absit Parochus, quem contendit esse huius sacramenti Ministrum, & de Christo quem vult caruisse gaudio, quod ex visione beata consequitur, eo momento, quo maximè vrgebant passionis, & mortis dolores. Tria etiam obiicit Dominico à Soto: accusat temeritatis, quod ausus sit pœnis, quas animæ defunctorum luunt, certum tempus definire, nec patiatur extra decennium protendi. Secundo quod neget Episcopatum esse Ordinem & Sacramentum. Tertio, quod frequentiam ehoi ad diuina officia celebranda non dubitaret asserere partem essentialem Religionis esse. His duobus adiungit Petrum à Soto, & illi vitio vertit, quod Emanuelis Sa, aliorumque Societatis Theologorum in antecessum docuerit de Sacramento Pœnitentiæ inter absentes per Epistolam, aut internuncium, validè & ritè administrando sententiam.

Has omnes Theophili accusationes, quibus tres do-
Cc iij.

Gravissimos, & gravissimos Dominicanos petit, in vnum paragr. conieci; non solum quod cortanei, contreranei, eiusdem familiar, & Prouinciæ Castellanz, in Academia Salmanticensi professores Theologiæ primarij, summa & pari fuerint eruditione, sanctitate morum, & elegantia supra scholæ styium; sed quod etiam, ea quæ ex illis obiicit Theophilus sint communia pluribus Theologis omnium ordinum; nihil illorum ad fidem pertineat, saltem si obseruemus, quo illi tempore scripserint.

Quod ad Matrimonium spectat, cui vim sacramenti negat Cano, si solis nutibus celebretur; præter quod habet hæc opinio aliquod ex Concilio Florentino fundamentum, eo decreto, quo generatim statuit, sacramenta omnia rebus & verbis constare, & nulla esse, si altera illarum partium desit; certè in eam sententiam inclinant Scotus, & Durandus, pluresque alios Canonistas, & Theologos refert Sanchez: his adde duo lumina & ornamenta Academiæ Duacensis Franciscum Siluium, & Guillelmum Estium, qui in 4. dist. 26. paragr. 2. late confirmat sententiam Cani, & ab omni censura vindicat.

Nec difficilior est tertia obiectio ex lib. 12. de locis c. 14. vbi cum proposuisset argumentum, quo probatur summum dolorem ex Passione Christi non potuisse stare cum gaudio beatifico ex visione consecuto, varias adhibet solutiones, & tandem concludit sibi non displicere, quod nonnulli dicunt, Christum eo momento cohibuisse gaudium, quod ex Deo clarè viso in voluntatem erat deriuandum; sicut etiam gloriam corporis toto decursu vitæ mortalis detinuit, quæ ex gloria animæ necessariò erat nascitura, nisi eius progressum inhibuisset: & hanc responsionem, *sibi eo, dicit, plausibiliorem, quo maiores nobis igniculos excitat tum pænitentia, tum amoris, tum gratitudinis erga Dominum.* Hæc autem sententia sic à Cano ipso explicata non videtur absque aliquo fundamento prolata; nec verum est, quod contra subdit Raynaudus, *eodem iure fingi posse, Christum eo tempore caruisse visione beata;* nam cum visione beata non pugnat gaudium, quod à Christo Canus tollit, vt det locum summæ tristitiæ, quam fides docet tempore passionis fuisse passum.

Quem Theophilus miris exagitat conuitiis Canum, & vocat canem latrantem, Molossum efferatum, paulo honorificentius habet fide dignior, minusque ex irâ impotens è Patribus Societatis, Franciscus Garcia, in prolegomenis Euangellici Concionatoris, de Ecclesiæ Canariensis præsulibus *Verissime*, inquit, *possim affirmare unum Melchiorem Canum suspiciendâ Monachalis togâ autoritate, acumine ingenij in differendo, constantiâ atque felicitate argumentorum, multiplici nexu victorum robore, in ipsâ doctorum instituti Dominicani Academiâ, potuisse integrâ classis vicem prestare.*

Mordet etiam Dominicum Soto, sed non sunt admodum graua aut difficilia, quæ obiicit de pœnis animarum Purgatorij ad decennium protractis, & de Episcopatu à numero Sacramentorum & Ordinum excluso, & de choro inter præcipuas religiosi instituti partes accensito: Nam quod ad tempus attinet decennio præfixum luendis purgatorij pœnis, aut maculis eluendis, res incerta est, nec opportuna nisi coniecturis: quibus fortè nimis indulgit Soto, vt antè monuerat ex ordine nostro Antonius Senensis.

Grauior est altera quæstio de Episcopatu; An sit ordo & Sacramentum distinctum omnino à Sacerdotio. Sed non est defensio Soti, & solutio difficilior. Non negat Episcopatum esse Ordinem & Sacramentum, sed contendit, à Presbyteratu non esse omnino distinctum, nisi quadam extensione, aut accessione characteris: quasi Episcopatus sit summus gradus Sacerdotij, cui præter facultatem conficiendi corpus Christi naturale, accedat potestas in Corpus Christi mysticum, & ius conferendi duo sacramenta, Ordinis, & Confirmationis; quorum vno milites Christi, altero eius ministros instituunt. Sententiæ Soti sic explicatæ non deest patrociniû ab autoritate, neque ab argumentis: Nam præter antiquos Theologos D. Thomam, Richardum, Albertum, Bonauenturam, Scotum, & alios innumeros, accedunt etiam recentiorum plures. Vnde Azorius 2. paragr. instit. lib. 3. relatâ censurâ Hugonis, quod nullus nisi cæcus & inordinatus dubitet Episcopatum esse Ordinem distinctum, cum singularem à Sacerdotio ordinationem requirat, subdit hæc verba, *Certè miror*

*cur sic contra Theologos linguam laxauerit cæcus ergo ipsa
iudicio erit S. Thomas, cæcus S. Bonaventura cæcus Scotus,
Richardus, Albertus, qui sentiunt Episcopatum non esse
Ordinem.* His omnibus adde Regi raldum, Henriquez,
Comitolum, triadem è Societate Theologorum do-
ctissimorum aliosque plures, quos Diana latè refert
parte 12. tract. de consecratione Episcoporum resolu-
tione 10.

Nec minus argumentis, quam Theologorum suffragio
munita est hæc sententia. Mihi semper placuit illud ex
Paludano subtilissimum. Si velis Episcopatum à Sacer-
dotio distingui genere, aut specie characteris, nec esse
illius accessionem, vel pares sunt, vel superior Episco-
palis character, vel minor est Sacerdotali. Pares esse
repugnat ex illa lege, quod diuersæ rerum essentia,
minus possint esse æqualis perfectionis, quam diuersi
numeri pares, quorum tota ratio inæqualitate constat.
Nec superior esse potest character Episcopalis Sacerdo-
tali, cum potestas in corpus Christi naturale propria
Sacerdotio, præstet potestati in corpus mysticum, quam
Episcopatus addit. Inferiorem etiam dici minime con-
uenit; cum Episcopatus sit quasi apex Sacerdotij, &
Episcopus supremum Sacerdotij gradum occupet. Ex
his concludit Paludanus Episcopatum non esse diuer-
sum characterem à Sacerdotio; sed illius accessionem
aut extensionem conuenientissimè definiri.

Vltimò tandem Dominicum Soto reprehendit, quod
lib. 10. de Iustitia & Iure, q. 5. a. 3. ubi disputat ad finem,
an professi religiosi nondum sacris initiati ad recitan-
dum priuatim sacrum officium obligentur, quod in
choro à communitate totâ publicè celebratur: videtur
eo loci Soto censere, chorum esse de substantiâ religiosi
instituti; nec eam dicendam religionem, quæ choro
sit destituta. Non dubito quin Petrum pessimè habue-
rint hæc verba Soti: *Loquor de Religionibus antiquis:
nam si alius Religionis modus, citra huiusmodi obligatio-
nem admittatur; certè vix nomen Religionis meretur,
quippe quæ maximo splendore religionis careat* Hoc ver-
bum addit quod videtur te suggillare: sed cum dicat
chorum esse splendorem Religionis, non negat quin
Religiosi sint qui illo carent, quandoquidem ad splen-

dorem, non ad substantiam pertinere censer; maxime si frequentiam Chori, ut sui faciunt, aliis & pietatis, & charitatis in proximos exercitiis compensent; in quo ubique summe laudanda societas quæ instruendæ iuventuti, aliisque piis operibus diligentissime incumbit.

Hac in re post ordinationes Pontificias, hanc utrinque æquitatem seruandam censeo, quam de esu ciborum licitorum statuit Apostolus: qui frequentant Chorum Religiosi, non inde superbiant, & boni etiam consulant, si qui grauib; & necessariis occupati non frequentent; neque etiam isti contemnunt eos, qui Choro die ac nocte inserviunt, sed potius venerentur, nec sint in eodem sensu cum Valentia, qui ausus est scribere Chorum institutum, quasi in exercitium, & solatium eorum qui ad litteras, vel ad aliquid vtilius erant inepti: quod ita agrè tulit vnus è Patribus nostris, ut quamvis religiosissimus, & modestissimus ad marginem hanc censuram apposuerit, loquitur insipienter.

Non parit Petrus suo cognomini Petro à Soto Theologo doctissimo, & iuxta illustrissimo, qui præter eruditionem, & singularem pietatem, à Confessionibus fuit Carolo V. oblatum ab illo Archiepiscopatum Toletanum recusauerit, & Pontificis nomine interfuerit Concilio Tridentino, cui immortalis est gloriosissime. At que eius famam immortalem auxit, quod à Philippo II. & Regina Mariâ delectus Theologiæ Professor cum Ludouico à Soto Maiori, depulso Bucero, & Petro Martyre Academicam Cantabricensem in Angliâ celeberrimam, Doctrinæ Catholicæ ad tempus vindicarit: Brentium magni nominis Lutherani Scriptis aggressus sit; atque huic certamini immortuo, non putauit infra suam eruditionem, & dignitatem Cardinalis Osius succedere, eiusque partes, ac defensionem suscipere. Si hæc omnia te, Petre, non poterant cohibere à suggillando viro celeberrimo; debebas ad minus attendere intimam ipsi, & sanctè seruatam cum PP. Societatis arctissimam amicitiam; & ut meminime legisse apud Orlandinum aliquando à Societatis collegiis exceptus est cum magno scholarum applausu, cum Epigrammatibus, & litterariæ pompæ apparatu,

Sed quid tandem illi obiciis, quod tantam possit gloriam obscurare? Quod censuerit Sacramentum Pœnitentiæ urgente necessitate consummari posse per litteras; *Qua sententia*, inquis, *fuit olim inter Dominicanos valde recepta*. Fateor, illos excusant, aut in bonum sensum trahunt Alvarez, & alij; sed esto errauerint, citra contumaciam tamen, aut periculum hæreticis factum, quia scripserunt, & defuncti sunt multis annis ante Decretum Clementis VIII. hæc de re editum, quo prohibet, & damnat verbis expressis hanc opinionem; ut ad minus falsam, temerariam, & scandalosam; & præcipuè ne deinceps publicè, priuatique lectionibus, & concionibus quasi vnquam aliquo casu probabilis defendatur, imprimatur, & ad praxim reducat. Idem Catechismus Romanus docuerat, hoc sacramentum neque per nuncium, neque per litteras administrari posse. Theologi nostri omnes huic decreto semper paruerunt. Sed visus est Franciscus Suarez ab eius reuerentia recessisse cum 3. p. disp. 21. sect. 4. scripsit, post eius decreti euulgationem, corporalem præsentiam Pœnitentis, & confitentis cum Sacerdote absolvente non esse essentialem Pœnitentiæ Sacramento, & Decretum Clementis sensu copulatio intelligendum esse.

Verum à Sanctissimo Pontifice hac censura notatus est, ut refert Isambertus de pœnit. disp. 18 a. 7. Die 18. Augusti anni 1605. Sanctissimus decreuit ex tomo 4. P. Suarez Iesuita in 3. p. D. Thoma dist. 21. de Confessione sac. cui titulus est: *utrum de necessitate Confessionis sit, ut pœnitens Sacerdoti absenti immediatè, & per seipsum reuelet peccata sua, totam esse amouendam, nec aliam esse subrogandam*. Hæc de Confessione absenti facta, vel absolutione impetrata absenti. Nec memor recentis historiarum debebas, Petre, nobis obicere antiquas nostrorum opiniones. Sed de hac controuersia fusiùs alio loco.

PARAGRAPHVS QVARTVS.

Defensio Bannezj, Pontij Legionensis, & Carmelitarum discalceatorum.

HORVM trium iungimus apologiam, quia vt ex nostris responſionibus conſtabit, præter cauſam communem deſenſionis Angelicæ doctrinæ, maxima inter illos cognatio eſt ab officiis, aut à mutua charitate, ad eos omnes pati iniquiſſimam cenſuram. Iamdiu Banneſio, Theophile, bellum indixeras ſcripto in ipſum infami libello, nunc pugnam inſtauras, & illi ſex errores impingis;

Accuſas imprimis, quod negauerit reuiuſcentiam meritorum. *Valde commodè*, inquis, *ad iniſciendam lapſis deſperationem*, quaſi ad illam euitandam non ſatis ſit ſpes veniæ præteritorum criminum, eſſi merita mortificata non reditent. Secundò obiiſcis illum, meritum eſſentiale ſoli charitati aſſerere. Tertiò *ea de correptione fraterna*, poſt ſedis Apoſtolice conſtitutionem ſcripſiſſe, *qua ſpongia indigeant*. Quartò calumniatorem, aut aggreſſorem poſſe præueniri, & occidi ab illo, qui inde ſibi timet; atque ſic vociferationibus cælum implet; quod cum Amicus idem quod Bannez dixiſſet de iure occupandi aggreſſorem, atque in eadem eſſet cauſâ, iniquiſſimè vrgente P. Ioanne Baptiſta Marino damnatus eſt, Banneſio abſoluto. Quintò aſſeris ab illo poſitam libertatem in indifferentia iudicij; & prædeſinitiones æternas, & ineluctabiles, tanquam fide certas ſtatueri. Ex his duabus vltimis propoſitionibus litem mouiſti in ipſum ſcripto libro, cui titulus eſt Religio Beſtiarum, & quia contendis illum, & ſenſu, & verbis Caluino accinere, ac proinde eiufdem hæreſis cum illo reum damnandum, illi pro ſummis in Ordinem meritis vindicias debeo, & iam perſolui alio libro.

Non negat in totum reuiuſcentiam meritorum Banneſ, ſed aſſerit ad minus redire ad gaudium, & ad præmium accidentale, vel ad idem præmium nouis titulis debitum, & comparatum. Thomiſtis hæc reuiuſcentia

non satisfacit. Ideo tertium modum addunt, quem supra insinuauimus, propositione de augmento habitus Charitatis.

Secunda propositio, quæ vim merendi præmium essentiali soli Charitati, & eius imperio vindicat, multo propabilior est oppositâ Vasquez, qui vult actibus etiam naturalibus hominis iusti inesse meritum vitæ æternæ, non alio influxu Charitatis, quam merâ concomitantia. Multò conformius ad Patres, & ad Scripturam Bannes censet, hanc rationem merendi Charitati eximiam, & ab eius imperio deriuari & aduenire aliis actibus studiosis, seu moralibus, seu supernaturalibus. Sed longe probabilius est tertia sententia inter duas extremas media, quæ meritum præmij essentialis, statuit inesse actibus virtutum infusarum: dummodo virtualiter à Charitate pendeant, & eius imperio ad Deum, & ad vltimum finem dirigantur. Obscuris, & ambiguis verbis tertium errorem, spongia diluendum obliuiscis.

Puto te conscientiam remorderi, & reum te reputare illius pœnæ, quam minaris. Non potuit incurrere Bannes in Constitutionem Gregorij XIII. quæ vestræ Societatis institutum probauit, & maximè in partem illam de correctione fraterna prætermisâ, antequam prælatus adeatur. Vestræ leges statuunt posse & debere prius Prælatus admoneri, quam peccator corrigatur: controuersum est à multis num id liceret; & graues occurrebant rationes dubitandi. Sed hæc constitutio probata à Sanctissimo Pontifice non potest imposterum calumniæ patere; id vnum quærendum est, quæ ratione defendi possit; atque illud duplici viâ Docti aggressi sunt, quarum vna probatur Theologis nostris; altera, quam innuit Suarez, displicet Bannesio; quia apertè vergit in censuram Euangelici præcepti: Nihil periculi est si dixeris cum Caietano, quemlibet suæ famæ dominum, posse illius ius à se abdicare. ad minus, maioris boni communis causâ, qualis est humilitas, patientia, instituti incolumitas perpetua, quæ possint compensare iacturam famæ apud Prælatus, ac proinde ea semel abdicata, reus non habet causam ex postulandi, si se non monito conscius suæ culpæ eam Prælato reuellet, ut curet illius emendationem; & hinc commune

quod inde impendere potest periculum, auertat.

At Suarez visum est hoc statutum defendendum esse ex ipsa immutatione ordinis, qua melius & bono ipsius Rei priuato, & comuni consulatur, quam si ordo correctionis præscriptus seruaretur, quasi efficacius mederi possit Prælatus malo Rei, quam eius socius. Sed Bannesius iamdiu Suarem monuerat, hoc dici non posse citra censuram ordinis à Christo constituti, quasi humanæ Societati aut perniciosi, aut minus salutaris, qui proinde nec vi præcepti nec vi consilij obligaret. Quod verò Suarez reponit Bannesio futuram efficaciorẽ Prælati emendationem, id omnino falsum est, si prætermittatur Ordo Euangelij. inuito reo, & iure non abdicato famæ apud Prælatum, intuitu maioris boni, nam nisi vel monitio rei, vel abdicatio dominij ptopriæ famæ antecedit, habet iustissimam expostulandi causam, ius naturale videlicet, in se læsum, atque hac iniuriâ exacerbato animo nouissima sient pciora prioribus, & moribus omnino immedicabilis euadet.

Hæc Bannesij, de correctione fraternâ doctrina tuta est, nec ut vult Raynaudus, spongia indiget. At certum est quid grauius spongia, mereri dictum ab Alphonso Salmerone, qui tom. 4. de vitâ Christi tract. 11 part. 3. p. 473. hoc assertum scribit. *Postremo quod illud præceptum (correctionis) nedum sit inutile, sed etiam perniciosum ex multis possumus demonstrare &c.* Correctionem fraternam non semper esse impendendam, sed attendendas esse personas, circumstantias, certum est; at pleno ore & absolutè dicere, præceptum correctionis nedum esse inutile, sed etiam perniciosum est, quis ferat aut excuset?

Aliâ obiectione de Magistro Ordinis conquereris quasi iudicij iniqui, quod acceptionis personæ vocant, conuicto quod inquis Amicum in eadem cum Banne, causa positum, hoc absoluto & intacto, damnarit. Falsum est vtriusque vnâ fuisse sententiam, quia multo cautiùs de iure præueniendi calumniatorem locutus est Bannes; quare intempestiuè deprompsisti in hanc rem epigramma canis in crucem acti, quod allatrasset vni Calvinistæ, postquam impunè Sacerdotem momorderat. In hoc saltem malè Catholici personam sustinet

Amicus, & hæretici Bannes. Nisi velis Catholicum dogma esse, licere adulteræ, iniuriæ iniuriam addere, & virum occidere, si suspicetur illatum sibi dedecus, morte ipsius vindicaturum.

Tota hæc accusatio tribus nritur apertissimis mendaciis. Primò vis eandem de iure occupandi aggressorem esse Amici, & Bannesij Sententiam. Secundò Romæ tantum damnatum Amicum. Tertiò hanc doctrinam à Bannesio hausisse. Sed ut ab hoc ultimo falso Bannesij vindicias aggrediar, ipsemet Amicus Tomo 5. de Iustitia & Iure disput. 36. sect. 7. num. 118. te conuincit, dum ita scribit suâ sententiâ explicatâ. *Verum quia hæc apud alios scripta non legi, nolo ita esse dicta, ut communi sententiâ aduersentur.* Vides Theophile Amicum agnoscere se nouæ, & singularis opinionis authorem, nec ullâ ratione velle illius gloriam, aut inuidiam cum Banne, aut quocumque alio partiti. Deinde videris dissimulare hanc Amici opinionem de occupando aduersario, à quo quis sibi damnum timet, aut suspicatur inferendum, prius in Belgio à Louanienfibus, quam Romæ à sacrâ Congregatione fuisse damnatum, ne ut soles vociferari, omnes in tuas censuras proficisci à Secretario Indicis, & à malevolentia Dominicanorum.

Sed quod caput est totius controuersie, falsissimum est Bannem, & Amicum conuenire de iure aduersarium occupandi. Bannes enim statuit nullum prorsus dari locum ex sola suspitione quamlibet vehementi, sibi ab aduersario mortem, aut grauem noxam impendere, nisi certus sit iam ad hoc parata præsidia, ut venenum aut gladium, ad necem; ut accessum ad iudicem causâ falsi criminis imponendi; alias qui præuenit inuasorem, reum statuit esse homicidij, aut cuiuscumque damni iniuste illati. Amicus autem huiusmodi cautelas amouet, & viam latissimam aperit suspitionibus & calumniis. Adde, ex Banne, *potest* tantum, aggressor occupari; ex Amico *debet*. Quis ergo consensus esse potest, cum adeò immanè distent? ut Bannem inter & Amicum illud chaos dicas intercedere, quod diuitem epulonem à sinu Abrahæ semouebat.

Accusationes Bannesij claudis sextâ & vltimâ omniunt

nium apud te grauissimâ, quod ausus sit reclamare Molinæ, & vbi eius opus prodit contra prædefinitiones, quas plusquam æneas voluntatis creatæ deuinctiones vocas; refers à Banne pro pestilente habitum, & primum ad macellum delatum, sed non alio delationis fructu, quam quod ne apex quidem Molinæ violatus est. Addis secundo quotquot ad vexillum prædeterminationis conuolarunt, id fecisse duplici de causa; primo, vt Iesuitis stomachum facerent; deinde, quia cum non aliud possent perfugium habere rebus suis, ad Asylum prædeterminationum se receperunt, quasi ad remedium & præsidium miserorum. Tuas coniecturas duplici exemplo probas: Primò Pontij Legionensis, qui cum causâ cecidisset, & Facundez reuocationem decreti in librum suum ab Inquisitione Hispanica, agente Pontio, lati obtinisset, inuit fœdus cum prædeterminantibus Cyriacis, illudque typis euulgauit. Addis secundum Exemplum Carmelitarum Discalceatorum, quos Elianos, & Eliseanos vocas, & ais deiectos opinatione sua, quod essent primi Religiosorum &c. damnata ab Inquisitione Hispanica, Historia Prophetica, & illius damnatione Romæ confirmata, receperunt se ad Asylum prædeterminationis, odio Ioannis de Pineda Iesuitæ, qui prius Historiam Propheticam damnauerat, vt Censor particularis, à S. officio Hispanico electus.

Quod ad Libri Molinæ examen pertinet, supersedeo, sicut de disputatione Valentia, & de tota Congregationum de Auxiliis historia, in reuerentiam decreti illius, quod hac de re silentium vult seruari. Quoad reliqua, quæ narras de fœdere Pontij, & Carmelitarum cum Dominicanis, sunt eius generis, cuius iam monui lectorem, te vbique opiniones ita à veri specie alienas, ita absurdas solitum proferre, vt videantur esse insomnia dormientis potius, quam vigilantis iudicia hominis: & si quæ hætenus suppeditaſti, censuram hanc dubiam relinquerent, ista duo quæ affers, exempla, omni demonstratione mathematica euidentius certissimam faciunt.

Fateor D. Thomæ doctrinæ maximum splendorem contulisse, & conciliaſſe authoritatem, statutum illud, & quasi votum de S. Doctore vbique, sequendo quod Or-

do Carmelitarum inter Constitutiones, & suæ Religionis fundamenta posuit, & sanctè obseruat. Auxit etiam plurimum dignitatem Doctrinæ Angelicæ, Pontij Leonis, & Alphonsi Curielis Palinodia, seu eiurata scientia Media, quam iuniores secuti fuerant. Non credo ex Hispania sanctitatis & doctrinæ feracissima extitisse hoc nostro & superiori sæculo, quidquam ad Religionis Christianæ gloriam, & maiestatem illustrius, illa Deo dilecta Virgine Theresia, & ordine virorum, ac Virginitum ab illa instaurato. Non dubito etiam, quin illi duo Theologi à me nominati, Pontius, & Curiel fulgentissima Academiæ Salmanticensis sydera, sint, aut maiores, aut pares cuilibet Theologo nostri sæculi; neque dici, vel concipi potest, qua doloris acerbitate videas hos duos viros præstantissimos, totumque & vniuersum ordinem Carmelitarum, quo nullum sanctitate & eruditione seu utrâque Theologiâ mysticâ, & Scholasticâ, superiorem Ecclesia habet, ad nostras partes accessisse, & illas acerrimè defendere.

Nec minus agrè fers, illa duo Theologiæ, & Hispaniæ lumina, quos primò iuuentutis ardor abripuerat, ubi præ ætate, & maturitate desierunt affectus humani perstrepere, abdicatâ scientiâ mediâ, palinodiam cecinisse, & se D. Thomæ discipulos professos esse. Quid ad hæc Petrus? Hoc virorum sapientissimorum consilium temeritati, desperationi, desiderio vindictæ, odio veritatis ascribit. nullâ probatione, nullâ verisimilitudine, contra publicam fidem.

Notatur Guicciardinus ab vno scriptore nobilissimo (quem Gallum Senecam, aut Plutarchum voces, quia vtrumque imitatus est. ac pœnè æquauit) quod omnes ferè actiones, quas refert Pontificum, Regum, aliorumque illustrium virorum, licet rectas, bonas, sinistrè interpretatus sit, aut vitiose factas maxime Ludouici XII. & Cardinalis Ambasij, quorum primum avaritiæ vbique accusat, cum pro summa liberalitate, & humanitate Pater populi sit vocatus, à quo bellis oppressus, nunquam sibi permisit pro annuis vectigalibus exigere ultra quatuor milliones librarum, quæ vix est modica pars tributorum, quæ hodie colliguntur: Alterum de Pontificatus ambitu semper fugillet, cum modestissimè

DEFENSIO BANNESII ET CARMELITARVM. 213
in summâ potentia, & gratiâ vixerit vno. Sacerdotio
contentus.

Sed Guicciardinus præ nostro Petro benignissimus
censor est; nam Petrus statuta Ordinis sanctissimi ascri-
bit iræ, vindictæ, aliisque pessimis affectibus, quibus ipse
torquetur. Non dicam Carmelitas Discalceatos in ver-
ba D. Thomæ iurasse antequam fortè natus esset Ioan-
nes de Pineda, certè ante eius de Historia Prophetica
iudicium; ac proinde absurdissimè dicis factum decre-
tum odio Pinedæ, & vt stomachus fieret Iesuitis, quasi
illorum stomachus, aut gustus regula sit, ad quam
oporteat omnem delectum facere. Prohibitio Annalium
Carmelitarum, quibus artibus procurata sit in Hispa-
nia, scimus. At qua fide dicis, eorundem Annalium
prohibitionem à Romana Inquisitione fuisse confirma-
tam, cum nullibi, & in nullo Romanæ Inquisitionis
Decreto hoc legatur? Scilicet velles omnes libros esse
prohibitos aut prohibendos, vt dolorem ex tuorum li-
brorum prohibitionem conceptum leuares.

Non addam, Palinodiæ Pontio causam æque ineptè
attribui, quod Facundez non oppressisset Scriptorem
Societatis, quasi tantæ esset ferociæ, & truculentia, vt
perinde durum illi esset quemquam ex suis manibus sal-
uum euadere, atque ipsum & alienis manibus confodi
& perire. Hoc solum notabo, Petrum reliquos seipso
metiri, ex suis affectibus de alienis iudicare. Et cum ipse
nihil intolerabilius sentiat, quam suos libros non pro-
bari; vel quos accusat, à pænis, quas illis imprecatur;
liberari; sensu hinc ex suo corruptissimo censer, Pon-
tium Legionensem in desperationem actum, quod Fa-
cundez eius accusationem euasisset; Carmelitas verd,
quod Pineda illorum Annales improbasset. Quid potuit
vnquam excogitari ineptius, & magis ad sensum Petri
consentaneum, aut à veritate alienum?

Esset hic locus opportunissimus, si per Apologiæ bre-
uitatem liceret; meo totiusque Ordinis nomine testandi
gratissimum animum in Reuerendos Patres Carmelitas
Excalceatos, de nobis optimè meritos, nec minus nô-
stri quam sui sollicitos. Sed præter quod dum Romæ
essem, cum in credibili gaudio vidi apud eorum Anna-
les Hispanâ linguâ scriptos & iam Italo, & Gallico Idiô-

esset rerum æstimator, apud quem præponderaret for-
licitas & gloria è Gotofredi victoriis consecuta, ingen-
tibus, & immortalibus beneficiis, quibus nos cumuauit,
humilis in speciem ex Palæstinæ captiuitate reditus
sancti Ludouici, adductis è Carmelo Anachoretis, vt te
statut Petrus Mathæus in vitâ S. Ludouici, ex quibus vt
cætera bona taceam vna prodiuit Theresia *Doctrina disci-
plina Dei, & electrix operum illius*, quam ex toto orbe
deuicto triumphis omnibus antepo-
nam.

PARAGRAPHVS VLTIMVS.

*Defensio sex Dominicanorum, quos Theophilus
extrema parte Diatribæ diuersorum
errorum accusat.*

HACTENVS quatuordecim Thomistas, & Do-
minicanos propugnaui-
mus, quos Theophilus lace-
ssit. Istis, sex alios adiungit crudelius habitos, quos om-
nes quasi deuictos ad sui Triumphum pompam, aut dam-
natos ad supplicium trahit, Ioannem Vincentium, Ni-
colaum Riccardium, Grauinam, Sixtum Senensem,
Ionnem Mariam Brasikellensem, Proscriptorum agmen
claudit gradu maior, sed grauiori iudicio, & supplicio
puniendus Magister Generalis Ordinis Marinus.

Istorum omnium, & superiorum culpa communis
est duplex, professio instituti Dominicani, & studium
Doctrinæ D. Thomæ, quæ apud Petrum sunt peccata
capitalia. Si velis singulorum crimina nosse, vocentur
ad examen. Ioannis Vincentij grande piaculum est na-
tura gratiæ sanctificantis è Scripturæ, & Sanctorum
Patrum quo delitescebat puteo, D. Thoma prælucente,
eruta, & in apertam lucem deducta. Non dissimile est
Riccardi scelus. Illi imputatur ad sacrilegium merita
Beatissimæ Virginis supra omnium Angelorum, & ho-
minum gratiam oratoris libertate promouisse, quod boni
consulit à Suate iuxta Theologicum rigorem prouectam
fuisse. Quid vero peccauit Grauina? Nempe quod
antiquos Ordines gemitu Columbæ à Bellarmino parum
decorè habitos, voce Turturis, aduersum factum non
mallo-
rum vindicari,

Sixti Senensis peccatum, cui eluendo non satis sit eius Biblicæhecæ flammi absumi, est humanitatis & commiserationis sensus in Origenem, quem suspicatur ab Hæreticis interpolatum. Sed omnium scelestissimi duo postremi, Ioannes Maria, & Ioannes Baptista Marinus; quod ille adhibitus loco Maluendæ, Bibliothecæ Patrum recensendæ, alicubi monuerit Lectorum, caueret à nonnullis locis: & hæc verba *cautè legendum* iuxta Theophilum sunt additamenta Leuiathan, id est artes diabolicæ: quasi decem ex & pluribus tomis Patrum aliqua suspecta habuisse, & cautè legenda notasse, sacrilegiū sit Dominicano, vbi P. Labbe è Societate multa periculosa & erronea subesse Lectorem monuit. Sed grauissimum omnium scelerum est Ioannis Mariæ, improbasse ex Emanuelis Sa aphorismis, quinquaginta circiter propositiones: & cumulus omnium sacrilegiorum, sunt Theophili libelli duo à Congregatione Iudicis Patre Marino Secretarium agente damnati. En, Christiane Lector, damnatorum à Theophilo sex Dominicanorum crimina, quæ paucis, eodem quo proposita sunt ordine depellam.

Ioanni Vincentio post Suarez, & Curielem improperas, tanquam dogma omnino improbabile, quod, vt inquis, inebriatus amore gratiæ sanctificantis, dixerit, esse qualitatem creatam, quæ Physicè participet essentiam diuinam, vt est plenitudo essendi, vt est ens per essentiam &c. Vnde nihil mirum nos facere consortes diuinæ naturæ, *vt Filij Dei vere nominemur, & simus*. Hac notione gratiæ (quam tu per summam imperitiam vocas hyperbolem male formatam à Thomistis) nihil solidius, aut diuinus. Atque ipsimet Suarez, & Curiel, vbi pluribus verborum æquiuocationibus, quam argumentis Vincentium impugnarunt, in illius sententiam relabuntur, & licet verbis diuersa, idem re ipsa statuunt. Hanc hallucinationem, si patiaris te curari, vna distinctione solidissima (quam totius Theologiæ medullam dixeris) eripiam.

Tribus perfectionis generibus constat, quidquid Dei essentiam constituit, & ad eius attributa pertinet. Primum genus perfectiones continet, quas voco communes Deo, & creaturis. Secundum proprias & incom-

communicabiles habet. Tertiij generis, propriæ quidem, nec minus naturales sunt soli Deo, quam proximè superiores; sed hoc differunt, quod possint communicari creaturæ, beneficio gratuito, & indebito. Primi generis perfectionum participatione constat ordo naturæ creatæ, in hoc positus, quod sicut Deus suo modo subsistit, viuit & intelligit, ita cuilibet creaturæ secundum suæ naturæ conditionem competat subsistere, viuere, & intelligere.

Diuinitas constat secundi & tertiij generis perfectionibus: illi enim ita competit naturaliter se videre, ac se comprehendere, non minus debitum est terminare diuinitatem subsistentia verbi, quam cum illa ab æterno necessario identificari: paris necessitatis est esse omnipotentem, & facere miracula, esse visione sui beatum, & impeccabilem, ac esse ens necessarium, & harum omnium perfectionum radix est diuinitas, vt est ens per essentiam, infinitum &c. Hoc discriminis tantum est has inter perfectiones soli Deo naturales, quod quibusdam communicari omnino, quibusdam vero minimè repugnet. Potest Deus se præbere videndum naturæ creatæ; non comprehendendum; cum tamen vtrumque sit illi æque naturale & proprium. Potest terminare naturam creatam subsistentia increata verbi, & vnire vtrumque; non tamen vnum, & idem facere.

Dum Ioannem Vincentium vanæ & luxuriantis hyperboles accusat Theophilus, quod gratiam vocet Diuinæ consortium, seu Societatem naturæ; atque hanc gratiæ œconomiam traducit, quasi ebrietatem animi, seu infatuationem excessum, non aduertit hæc vituperia in Apostolum recidere qui Ephesiorum primo his verbis omnes Ioannis Vincentij hyperboles vincit in laudem gloriæ, gratiæ suæ, in qua gratificauit nos, in dilecto filio suo.

His prænotatis, doctrina Thomistica, à Vincentio tradita, malè à Suarez, & à te intellecta, gratiam sanctificantem statuit verissimè esse participationem diuinæ naturæ, vt est plenitudo essendi, & vt est radix visionis beatæ, impeccabilitatis, & aliarum perfectionum supernaturalium, quæ sunt propriæ, & naturales soli Deo, quatenus est ens per essentiam, &c. Probo hanc conse-

quentiam: eodem modo participat gratia diuinam naturam, quo exigit proprietates debitas, & naturales soli enti per essentiam; atqui exigit actiones, & proprietates debitas soli Deo, qua Deus est. Hinc fit gratiam esse consortium diuinitatis Physicum, & non solum morale, ut vult Ripalda, & hoc fundamentum subternit duobus ingentibus tomis de Ente supernaturali, quo dico ens supernaturale funditus substulisse, dum molitur astringere. Sed de hoc fortè aliàs.

Hic te conuenio Theophile, an ista quæ de gratia ex diuinarum perfectionum consortio asseruimus, percepisti? An tuæ mentis aciem effugiunt? Quiduis horum dixeris, non potes te à iusta reprehensione exinere. Certè si capias, & subinde damnes; illo genere peccati præuaticaris, quod in Spiritum sanctum incurritur, ex veritatis notæ odio, & impugnatione. Si hæc captum tuum superent, cur blasphemias quæ ignoras? Cæterum id certissimè assero, quamuis Schola D. Thomæ, nullum aliud operæ pretium tulisset, præter explicatum tripartitum perfectionum diuinarum genus; & ex primi nempe communium perfectionum communicatione naturæ ordinis institutionem, ex secundi, nempe ex perfectionum naturalium consortio, gratiæ & entis supernaturalis notionem haberi docuisset, gloriari posset, se ad Philosophiam Christianam non poenitendum adiumentum, & maximam lucem contulisse. Quid si huic veritati à D. Thoma, & nostris Thomistis propalata propemodum infinitas, paris momenti & euidentiæ intra Theologiæ cancellos illustratas addideris?

Insensissimus es Pater Nicolao Riccardio, & multa damnas, quæ in litanis Beatæ Virginis apposuit, idem esse *Christe audi nos*, ac *Maria audi nos*. Non meministi illius, quod scripsit Aristoteles, morosi, importuni, & absurdi hominis esse eandem vbique euidentiæ argumentorum quærete; ita non minus iniustum est ut nunquam sinas conionatorem à rigore Theologico recedere, nec figuris indulgere: tum certè nimis sicco dicendi genere ageres; & dialecticam Rhetoricæ, & Eloquentiæ loco sufficeres. Addo etiam, si nos ad seueriores regulas velis cogere, non deesse ex Scriptura patrociniū. An non licet Deiparæ singulari priuilegio

ascribere, quod communi lege toti Ecclesiæ & Fidelium singulis, & secundum Ticonij regulam concedit Augustinus, ut quæ Christo competunt veluti propria, transferas in nos, sicut Christus ipse nostra mala sibi ipsi imputabat, dum clamabat, Saule, Saule quid me persequeris? Sacrilegij ergo genus erit Patri monstro Deiparam loco Dei, & Filij reponere; quasi remotior sit à Christo mater, quam ministri & discipuli. Quod de calculo meritum Virginis arguis; præterquam quod concionatorem agit, non Theologum, non longe absunt ab illa supputatione, quam Suarez adhibet, ut Deiparæ merita metiatur, & illa superiora faciat meritis Angelorum & hominum in vnum cumulum collectis.

Pater Riccardius, quem ipse appellatum dicis ab ingenij præstantiâ Monstrum, multa inter concionandum subtilia, & in speciem difficilia pronuntiabat, quæ bono, & Catholico sensu interpretabatur. Hinc applausum, & admirationem excitabat auditorum. Tu ab ipso encomiasticè, & oratoriè dicta vis exigi ad rigorem Theologiæ: quale est illud, quod refert, *Personam Deipara esse quasi Diuinam, & dimidâ sui parte increatam.* Lepidè id de Riccardio, dum viuebat, nonnulli dicebant, si quis ea, quæ ipse pronuntiabat, vsurparet, fore hæreticum; quia facile erat eius verba repetere, sed pauci sensum capiebant. Neque enim omnibus dabatur adire Corinthum, & assequi cogitationes viri profundissimi. Hæc de Riccardio breuius, quàm hominis nunquam satis laudati merita postularent.

Grauinam hic duobus atrocissimis peccatis toto genere pugnantibus grauat Theophilus, nempe *maledictiâ in Bellarminum, & putentissimâ* (ut alibi loquitur) *adulatione* in Congregationes Romanas, quarum omnium ne exceptâ quidem Abundantiæ Congregatione, quæ, ni fallor, annonæ curam habet, decretis parem cum Pontificiis ex Cathedra firmitatem astruat, & velit exhiberi reuerentiam. Sed dum hæc duo Grauinæ obii-
cis Theophile, tanquam aperta crimina, non occurrit sanè, quo tuum genere reponam, aut quo appellem nomine; quia omnem fidem, omnem superat stuporem: leuius est præ rei atrocitate mendacij nomen. Nescio quam ingenitam habeas à veritate dissensionem,

ut cum mendacissimi quique eam suis dictis admisceant, quo fidem sibi astruant; tu prorsus à te ablegasti. Non dubito quin ita audacter falsa cumules falsis, quod crederes nos mutos semper fore; & perinde cum isto libello contra nos scripto, actum iri, sicut cum primo, quem inscripsisti, *Religio Bæstiarum*, ad quem post trigessimum à primâ editione annum, responsio desiderabatur.

Sed ut ad rem nostram redeamus; obseruet prudens Lector fraudes Theophili. Graulina eò loci, quo accusatur Romanis auribus per putentissimam adulationem blandiri, disputat de autoritate Cleri Romani, unde quindecim congregationes ad rerum sacrarum examen, & iudicium à Summis Pontificibus institutæ sunt. Et affirmat non tanquam de fide certum, sed rationi, & prudentiæ regulis consentaneum, nunquam euenturum, omnes è Collegio Cardinalium, aut è Clero Romano, ne vno quidem excepto in apertam hæresim communi quadam conspiratione pedibus manibusque iuros. Hæc est mens Graulinæ totâ illâ controuersâ, ut fusiùs alibi de Epistolari confessione demonstratum est. Quid ad ista Theophilus? Tres Graulinæ crassos errores imponit, qui nunquam ulli in mentem venire. Graulina omnibus collectim, è Clero Romano compositis, non singulis congregationibus, iis quæ sacra, non sæcularia agitant, immunitatem ab erroribus asserit, non ex fide indubitatam, sed ex prudentiæ regulis certam. Iudicet æquus Lector, quâ fide Theophilus scripserit, omnibus omnino congregationibus, nequidem Abundantiæ exceptâ, infallibilitatem perinde asseritam, ac Pontifici ex Cathedrâ pronuncianti.

Nec sincerius agit cum ex Graulina refert, *Robertum Bellarminum intolerabiliter errasse, cum scripsit, aliquas Religiones relaxatæ disciplina, esse vnum fontem la. bri- marum*. Res ita se habet: Bellarminus suo libro ascetico de gemitu columbæ visus est nonnullis, Ordines omnes Religiosorum deieciisse, & Societatem extulisse, plusquam viri sancti & prudentis, morum ingenita grauitas, & modestia, & ipsamet rei Christianæ ratio pateretur: Nam cum Religiones omnes, nullâ quidem exceptâ, multum quidem de antiquâ disciplinâ remissis-

se, & laxiori vitâ copiosam lachrimarum materiam piis omnibus ceu columbis præbere scripsisset, intempestiuè Societatis laudes adiunxit, quasi ad illam pertineret vox sponsi ad se compellantis. *Veni columba mea:* cui cum præ innocentia non suppeteret de proprijs malis causa gemendi, ingemisceret alienis.

Sic enim scripsit Bellarminus. *Quia ipsa Societas, ut membrum viuum, & verum gementis Ecclesia, non solum gemere non cessat, sed etiam columba velocitatem imitata, ab ipso suo exordio, ad extremas vsque mundi partes volare non dubitauit, & columba sacunditatem, diuino munere nata, breui sic excreuit in gentem magnam, ut Prouincias orbis terra penè omnes complexa esse videatur. Ac denique more columbino, iram sine felle in corde, & in lingua ferens, irascitur vitijs, & bellum cum erroribus gerit.* Hæc Bellarminus bono animo, ut nos credere par est de viro apud me non minùs sancto, quàm docto; sed ex seipso alios metitus, existimauit omnes sine felle, nec illos vnquam è societate, Theophilo, quam Bellarmino similiores. Vtinam illud aut iudicium, aut vaticinium posset omnium suffragio confirmari.

Quid ad istam intempestiuam Societatis laudationem post deiectos omnes Ordines? Non dixit Granina Bellarminù intolerabiliter errasse: sed credidit è re, non solum omnium Ordinum, sed totius Ecclesiæ fore, si gemitui columba responderet, voce Turturis, quâ post egregia Bellarmini encomia demonstraui, Religiosos Ordines, non ita temporis iniuria consensuisse, aut à pristina laude & disciplinâ recessisse, quin nouos quotidie flores, & fructus parerent, testatus se ad hanc responsionem compulsus, ne ex gemitu columba infirmi occasionem detrahendi sacris Ordinibus, aut heretici maiorem ansam debacchandi arriperent; maximè cum Protoparens ipsorum Lutherus in quodam articulo damnato pronunciauerit, prestare omnes saccos mendicitatis delere; neue etiam aliqui ex plangensibus socijs vana gloria tentatione pulsarentur ad efferendum se supra alios ordines. Hæc Graulina, quibus satis tutatur suam ad Bellarminum responsionem scriptionis consilio & fructu; quia plurimum referebat ad Ecclesiæ decus, vineas Ecclesiasticas diuturnitate temporis mini-

mè extabuisse, sed nouos quotidie fructus honoris, & honestatis referre.

Quandoquidem incidit mentio laudationum nimiarum, non puto fore extra rem nostram, & defensionis necessitatem, si alia duo eiusdem virij exempla producam, quo euanescat illa toties à Theophilo decantata accusatio, *Dominicanos D. Thomam attollere supra omne, quod dicitur Doctum, encomiis qua proficisci vix potuerint, nisi à satuo amore, quo suum Magistrum prosequuntur.* Non puto Theophile, te ausum vitio ducere, quas in D. Thomam congerimus laudes, si ipsum Francisco Suarez, vel nostra encomia contulisset cum ijs, quibus Rector Collegij Conimbricensis, communi omnium nomine, præfatione ad tertium tomum de Religione illum exornat, dum *magnum Suarium* vocat alterum *Alexandrum*, unum *Apollinem*, communem orbis magistrum, à quo *Philosophia*, & *Theologia* candidati omnes responsa in dubiis referant, *Delphicus* multo oraculis certiora

SorDESCUNT penè quæcumque à nostris hominibus dicta sunt ad commendationem Diui Thomæ, præ his quæ in gratiam Suarij retulimus. Quid enim nedum de ipso, sed ne quidem de Augustino, aut Paulo excogitari potest magnificentius eo titulo, *communis nedum gentium, sed orbis magistri*, quo Suarez donatur cum tantâ asseueratione, vt addat idem Encomiaſtes, *si idem Author paucos adhuc romos docto calamo exprimere potuisset, habituros Theologos, vnde de quouis argumento nullius aliunde emendicato subsidio, cumulatè docerentur.* Et iudicat illi, qui copiam librorum Suarez haberet, cæterorum authorum vix esse aperiendos, aut attingendos. Nescio, an vllus nostrum ita cumulatâ eruditione Theologi existimauerit abundare Diuum Thomam; vt nihil opus sit alijs Authoribus, & ipsemet D. Thomas, qui ad comparandas breui scientias omnes, id præsidium & adiumentum consulebat, vt vni libro nos addiceremus, non puto Authorem vnquam futurum, vt semotis alijs solus legeretur.

Quid de Bæza dicam? Ille 3.p. concio. lib. 4. c. 14. eam omnibus Societatis Authoribus concedit præstantiam, facilitatem, celeritatem in conscribendis, & eundem

pandis libris ab afflatu Spiritus sancti, vt vix scriptores illos à Canonicis secernas : adeo vult diuino Spiritu vbertatem dictorum, rerumque omnium ministrante plenos. Verum quidem est huius nimix laudationis inuidiam duplici quodam temperamento conatum eleuare, aut in totum tollere; nempe eiusdem gratix Spiritus sancti astantis scriptoribus, vt olim Esdræ, dum omnes Scripturæ libros iam ferè perditos instaurauit, deriuatione in aliorum Ordinum Authores, Benedictinos, Carmelitas, &c. peruenisse; deinde se illa dixisse, quia scriptorum suorum sapientiam tribuerit diuinæ gratiæ, quod certè est humilitatis, non superbiæ. Verum si legitima esset hæc defensio; quid prohiberet, quin perinde Beata Virginis impeccabilitatem, ac scriptorum Canonicorum ab omni errore immunitatem, vel in scribendo manum Spiritu sancto dirigente eadem cautelâ, aut monitione adhibitâ dicas, has dotes non ab humanâ industriâ, sed à diuinâ gratiâ existere, easque non singulares, & eximias nobis, sed aliis etiam communes. Non puto iura Sanctorum his legibus vindicata, abesse ab errore, aut ab hæresis periculo. Id tantum istis exemplis vellem à Theophilo obtinere, ne *sacrum*, in D. Thomam, *amorem*, & *insulas laudes* millies obtrudat, cum iaceant infra ea, quæ ex Baëza retulimus communia Societatis scriptoribus encomia.

Sixtum Senensem triplicis erroris accusas, primò quod Origenem variorum Conciliorum anathemate contritum adoret, & causetur, qui illi ascribuntur errores ab hæreticis deprauatoribus infartos, ipso Origene innoxio; deinde negare integrum librum Esther esse Canonicum, post Concilij Tridentini definitionem contrariam, tertio Eusebium Casariensem Arrianorum signiferum habere pro Sancto. Verum vt ab hac vltimâ parte initium sumam defensionis, Theophili palmare commentum est, Sixto Eusebium Casariensem pro sancto habitum. Eiusdem fidei est, eundem Eusebium inter cœlites ascriptum in nostrum Martyrologium. Conscientia falsi prohibuit Authorem me locum vel è Sixto, vel è nostro Martyrologio citaret vllum, quo fidem rei faceret, neque enim poterat vllam nisi Græcam, & Punicam. Quod ad librum Esther pertinet,

dissentimus à Sixto; excusari tamen potest, vel quod forte scripserit ante Concilij Tridentini definitionem, vel censuerit in partem Libri cadere, non in totum.

Defensionem Origenis non imputares, aut vitio verteres Sixto Senensi, si duo attendisses, primum Origenem multos è Societate apertius ab errore vindicasse, quam Senensem, & cæteris omissis, qui in gratiam Origenis scripserunt, extat in Decretis Romanæ Inquisitionis prohibitus 22. Maij 1555. liber inscriptus, *Origenes defensui, &c. Authore Petro Halloix Leodicensi Societatis Iesu Theologo.* Deinde Sixtus Senensis vix audet rem attingere, & omnino indecisam relinquit, ut cunque res sit, id est siue Origenes errauerit, siue inserti sint eius operibus fraude hæreticorum errores. Hoc enim satis sibi indicat incertum; quamvis maximè veller Origenem fuisse, & credi etiam, si saluâ reuerentiâ Conciliorum liceret, omninò Catholicum fuisse.

Duo supersunt è totâ Diatribâ, quos maximè laceras, Ioannes Maria, & Ioannes Baptista Marinus; primus quidem Magister sacri Palatij Apostolici Religiosissimus & Doctissimus, Brasickellensis nomen sortitus à patriâ, vnde prodierunt plurima Religionis Dominicanæ ornamenta, maximè duo Generales ejusdem nominis, Augustinus Recuperatus, & Galaminus. Huius ultimæ recentem memoriam Roma & Italia seruat. Noster Ioannes à Clemente VIII. cui nota erant, eius merita, magister sacri Palatij creatus est; inde à Paulo V. ad Episcopatum Polignauensem assumptus est: atque Pastoris munere diligentissimè per aliquot annos impleto cum summâ pietatis famâ defunctus est. Tu pios eius manes, tum hic, tum alibi sollicitas, nec eum si neres conuiescere, nisi in sinu Abrahamæ repositus tuas censura contemneret, & aut tui potiùs misereretur, quòd morti proximus bonis omnibus bellum intuleris. Sed quàm scitè virum grauissimum tractas: dicis ab illo quinquaginta quinque propositiones ex Emmanuele Sa, iniuste damnatas tanquam intolerabiles, in praxi non ferendas; sed verè tua censura non est ferenda: est enim plena audaciæ, & nescio, an resipiat aliquid impietatis.

Ut possis illudere decretis omnibus, quæ ex Congregatione indicis, vel ex alijs, quibus interfunt aliqui Do-

minicani; dicis semper esse priuata, & peruersa iudicia Dominicanorum, non Decreta Pontificum, aut Congregationum, quasi qui præsunt huiusmodi congregationibus, aut Summus Pontifex, qui illos delegit, ita sint stolidi, vt pariantur, se oculis obductis ad nutum Dominicanorum agi, & suo nomine muniri, quæcumque ob odium Dominicanorum mouentur. Poterasne Petre, apertius, aut atrocius grassari in summi Pontificis, & Cardinalium auctoritatem; & illos inscitæ, ac pene insaniz accusare, quòd ab vno, vt tu loqueris, Fraterculo per girum sinant se quasi muta animalia duci? Putas ne manifestius apud hæreticos traduci summum Pontificem, Eminensissimos Principes, quasi socordes, & officij sui ignaros, vt cum Congregationibus præsint: atque vbi statuerunt de propositionibus Sa, dixisti illa fuisse Ioannis Mariæ iudicia inscitæ, vel malignitatis, vel vtriusque referta, & opponis illis Hispanicæ, & Lusitanicæ Inquisitionis iudicia, quæ rescindant Romana? Non est noua hæc fraus, & temeritas. Dictum est totam Cantabricam nationem intercessisse censuræ Romanæ librorum Pozæ, eodem fortè prætextu, quòd odio Dominicanorum immeritò damnatus sit. Quid in Ecclesiâ, quid in fide tutum erit, cum in promptu habeant hoc responsum Hæretici? Ascribent priuatorum iudiciis quæcumque in se fulmina vibrabuntur, & dicent esse inimicorum propria, non iudicia publica Ecclesiæ.

Quæ ad finem Diatribæ compositas conuitorum plaustra in Patrem Ioannem Baptistam Marinum, quem vis debere ludibrium omnibus Doctis, quod in te damnarit Eucharistiam solis sumentibus prodesse ex opere operato, quem præ Latinitatis inopiâ addis *in aliena vitula araturum*, ad stabiliendum, quod ipse per se præstare non potest; quem in gratiam aliquarum petagolarum contendisse aliis communionem prodesse ex opere operato, iis defunctis, pro quorum subleuatione dictæ Petagolæ communicant.

Paucis respondeo digna te Authore hæc impropria; quorum Hæreticos puderet. Sed præter quod monui te huius controuersiz statum invertere, vt pateat his tuis calumniis: nec dubitatum vnquam de fructu communionis ex opere operato, an posset deriuari in defun-

Etos, sed tantum de fructu aut emolumento ex opere operantis, ut fusiùs singulari dissertatione demonstrabo Id vnum dicam, Te per summam peruicaciam, ne dicam impietatem, inutilem facere defunctis viuorum communionem, & concludis, *simpliciter negandum prodesse mortuis*, quia inquis, vacat pœnalitate, quæ est radix virtutis satisfactoriæ in aliquâ operatione. Quæro à te quam pœnalitatem exigas ad opus satisfactorium? Num dorsi laborem? Certè non poteras dubitare, nisi sis omnis Theologiæ expertus, quodcumque opus meritotum satisfactorium esse, ut egregiè Siluius q. 15. suppl. ad art. 1. semper enim habet coniunctam molestiam omne opus bonum homini assueto terrenis, à quibus ægrè potest assurgere ad cœlestia. Ideo sicut elemosinâ priuat se homo bono vtili, ita delectabili, ieiunio, & oratione, quæ licet habeat adiunctam suauitatem spiritus, infert tamen afflictionem carnis, ut egregiè docet S. Doctor, quem immeritò in tuam sententiam trahis. Quid enim illi esset animi & sensus, si audiret, quod tu, nescio quo spiritu abreptus, ausus est scribere, *coniu-gales simplex utiliores esse animabus purgatorijs, communione quamlibet piâ, & deuotâ*. Hæc tibi repono abstergendis sordibus, quas in Magistrum Generalem vltimis Diatribæ verbis coniecisti.

ARTICVLVS VLTIMVS.

Laudes, & Dotes Doctrinæ D. Thomæ.

VNUS Theophilo hac Diatribâ finis est, cui consequendo omnes neruos contendit, Doctrinam D. Tho. eiusque Discipulorum absurdam, insulsam, omni censurarum genere notandam probare: Nos verò, qui eius placitis, veluti Polipi saxi adhærescimus, serui, & pecuino Spiritu, veluti muta pecora in sentiendo ferri. Hoc operæ pretium ex responsione ad hanc Diatribam scriimus, calumnias, & conuitia esse, quæ scribit, aut obtendit Theophilus, & dum D. Thomæ doctrinam sectamur, parati pro eius defensione etiam emori variis argumentis tum ex superioribus repetitis, tum etiam nouis: nos magis cognitione veritatis, quam studio
emulationis

emulationis, aut imitationis duci; ne quid grauius contra Theophili reprehensiones dicam.

PARAGRAPHVS PRIMVS.

E superioribus concluditur immunitas Dominicanorum ab omni censurâ.

DEcurrit tecum Petre, S. Thomæ, & eius Discipulorum vniuersam penè Doctrinam, sed diuerso consilio, licet eodem ferè euentu; nam vt bene ille dixit pererrant idem pratum Leo, Lupus, & Ciconia: hæc vt infectetur, & deuoret Serpentes, illi vero prædæ, & cædi ouium intenti: sic tu scholæ nostræ, & ego decurrimus, & expendimus plura problemata; tu quidem vt absurda paradoxa, & digna probares, quæ damnarentur, vel dissimulari non possent citra iniustitiam; ego propiora admirationi, & omnium consensui quàm censuræ esse, demonstraui.

Quis nostrum apud æquissimos lectores, vel si res ad sapientissimos Congregationis Iudices renocetur, causam suam felicius, & validius peregit? An tu, qui accusas nostras sententias absurditatis? An ego, qui propugno? Certè si ad examen, si ad iudicium ambo veniamus, triplicis criminis reus pronunciaberis: & statuetur in te pœna, qualem plagiaris, Sanctorum Patrum mastix, & veræ Philosophiæ, ad fidei defensionem accommodata, ac penè necessariæ, vel rudis, vel lufor meretur. Grauius peccauit Pozza, & Thadaus, ille Hibernus in suâ Nitella, quòd sanctissimo Doctori falsas, & supposititias propositiones affinxerint: nec primus impune tulit, quia hæc vna fuit ex pluribus causis, quibus iustè damnatus est. Sed tu es illo inexcusabilior; quòd cum à falsarii, & calumniatoris crimine deterreti posses, non solum exemplo Pozzæ ob suam temeritatem decretis Romani confixi, sed etiam responsionibus clarissimis Grauinæ, Ioannis à S. Thomæ, & aliorum, qui has calumnias à scholâ nostrâ validissimè depulerant: tu ausus es illas repetere, vel potius transcribere, nullâ responsionum factâ mentione, & numerum etiam calumniarum auxi-

sti. Quare merito, quàm nobis moliebaris censuram, in caput tuum ascinisti.

Sed longè grauius peccasti secundo ordine propositionum, in quibus vel imperitiam, vel temeritatem, aut fortè vtrumque prodidisti. Vel enim sciebas, quas apud D. Thomam carpis, & contendis absurdas, & censurâ dignas, decem assertiones, esse à Sanctis Patribus desumptas; vel id ignorabas: si hoc vltimum fateare, te ipsum damnas, & illorum numero ascribis, de quibus Apostolus ait, *qua ignorant, blasphemant*; si verò primum agnoscas, omnibus Sanctis Patribus bellum indicis: quo quid magis temerarium, aut sacrilegum sit, non video. Vnde frustra tibi tertium crimen hoc secundo longè inferius obieccero, quòd sapientissimos Philosophos, & Peripateticos ignorantia, & absurditatis accusas; sed hoc tuam audaciam, & temeritatem grauat maximè, quòd Sanctus Doctor has Philosophorum opiniones ad mysteria fidei confirmanda contra Ethnicos, qui illa negant, aut reiciunt, selegerit; tu hunc delectum prudentissimum quasi ridiculum, & ineptum damnas.

Vide quàm longe absis à tuo consilio. Susceperas collectis quadraginta quatuor propositionibus, quasi totidem testibus probare, Dominicanos censurâ dignos. Verum non magis conuenientia hæc tua sunt, quàm quæ Iudæi in Christum instruxere testimonia: Imò aduersus te loquuntur, & pronunciant plagiarium, & in sapientissimos Philosophos, qui Religioni Christianæ sua obsequia subiiciunt, vel in Sanctos Patres, qui fidei mysteria propugnant; temerè sumpsisse censuram *virgam*, quâ ipse seuerissime castigandus sis Iustissimè igitur in caput tuum aduocasti pœnam, quam nobis parabas, non dissimilis illi qui patibulo pendit; quod Mardocheo erexerat.

Millies, & vsque ad nauseam hæc obiurgatio iteranda esset, si toties repeterem, quoties tu hanc culpam admisisti, vel in teipsum recidit, quod nobis meditabarism malum; vt omnibus sis imposterum exemplo; insontes non esse frustrâ lacesseandos: hoc enim tuo libello ad minus paratum est salutare documentum, audaciam, & temeritatem accusantium non minùs infelicem, quàm

reprobam esse; voluisti scholæ nostræ doctrinam hac Diatribâ, & toto libello, quem vocas Religionem Bestiarum, absurdam & ineptam arguere, ac penè impiam: quid ex hoc labore præmii retulisti? Nomen, & pœnam calumniatoris, cuius etiam scripta flammis decreto sapientissimi Senatus addicta, & absumpta sunt: ut sicut olim apud antiquos Patres victima mactabatur, ut in illam sacrificantis pœnam transferrent, quam suis sceleribus cômenerant: sic pessimus libellus iuit in ignes, ut ab eo supplicio Author ipse eximeretur. Nec tibi felicius aliæ accusationes successerunt; semper enim in caput tuum recidit, quod nobis frustrâ molitus es malum. Nam authores nostros nugarum, aut mendacii, aut liuoris in bonos incusas: ipse tot nugas, tot crassissima mendacia congeris, adeo apertè flagras inuidiâ in bonos, ut videaris omninò similis illis emori capitis, quibus omnia susdeque miscentur, & rebus obiectis affingunt, quæcumque, vis morbi moto in crebro ciet.

PARAGRAPHVS SECVNDVS.

Elogia D. Thomæ recentia è Cardinali Palanino, & Alexandri VII. Decreto.

AT quoniam D. Thomæ doctrinam obscurasse se putauit Theophilus, cui tamen, potius lucem attulit, placet ad abstergendam caliginem primùm referre, quæ in laudem Sancti Doctoris scribit Eminentissimus, ac semper laudandus Cardinalis Pallauicinus Epistolâ nuncupatoriâ sui libri 7. de virtute, & Sacramento Pœnitentiæ, quem antequam ad purpuram assumeretur P. Vincentio Preto sacre Romanæ, ac Generalis inquisitionis Commissario, cum quo vetus illi necessitudo fuit, inscripsit.

Sic igitur habet: *Hoc mihi dolendum accidit, commentationes meas rude quid, & impolitus esse pro ingenio tuo; sed, tamquam tabulas fabre pictas exornare studui illito auro, utique Ophirio, nempe ab illis venis eruto, unde tu quoque locupletatus, (Disi Thomæ codices loquer,) viri, quo non tam Ordo tuus, quàm Christi Ecclesia, ipsumque*

humani generis nomen merito gloriatur. Sentio equidem in me tanti Scriptoris pretium, una cum aetate, sed longe supra aetatis incrementa creuisse. Vix crederem nisi expertus, ab aliquibus in Theologica luce diu versatis, tanti Doctoris magnitudinem sibi inaspectam favori, ac fama quadamtenus assignari. Perinde his accidere mihi videtur, ac terricolis calum auspiciis, quibus quando sole inferioribus, tantò ipse minor apparet. Praclarè mecum egit divina bonitas, quòd me vocavit ad eam religiosam cohortem, qua iubetur Angelici Praeceptoris Theologiam sequi: eam namque sequerer, vel iniussus; imò vix non sequerer, vel prohibitus: certè perinde sequerer scriptoris auctoritatem nihil illectus, sed cuius non essem ignarus. Nimirum egregia scripta ceu vina, soli quanquam incerti sint, cum sapore pretium ferunt. Iam vero ha postremis huius anni disputationes, quas è suggestu distitavi, & quarum tibi summam dico, plus aliquantò, quàm superiores edita à me, tibi Aquinatem tuam redolebunt: quo tantopere nunc delector, ut vix alium è Scholasticis diu teram sine fastidio; non quòd in ceteris multa non inveniam, ignota mihi, & oppido pulchra; sed alia plura, & longè pulchriora, me inventurum fuisse intelligo, si D. Thom. tempus, illud impendissem. Quis autem piscatoris consilium probaret, qui omisso viuario, certissima, lectissimamque pradam pollicente, in fluvio potius quamquam piscosæ retia fortuna committeret? Id ex me saepe audiunt qui me audiunt: Quamvis tanta sit D. Th. & sectatorum frequentia, & laudatorum approbatio, utramque tamen adeo infra merita mihi videri, ut inde communem humanam perspicientia tenuitatem, vel aspernari cogar; vel misereri. Ipse vero, qui tibi longè pra me sanctissimi scriptoris, ut doctrinam, ita gratiam comparasti, id mihi ab eo impetra, ut non minor mihi sit eiusdem imitatio, ac admiratio. Haud quidem tanta mihi votorum superbia est, ut eò aspirem, quod summis summum, minoribus insperabile huiusmodi esset scribendo tradere, non quia, sed qualia ipse tradidit, quaque ni ocyus à calo terris creptus, tradidisses. Egregiè collocatam à me operam interpretabor, si aliqua ex his, me allaborante, detegantur, qui ab ipso tradita, ab aliis, ceu stellula minutiores in calo tot frequenta

Hydribus inobseruata. Nimirum non stellas modo, sed gemmas procreare conditionis est nostratem supergredientis. Abditos earumdem thesauros reperire, ac Reipublica bono prodere, & præclarum inuentionis titulum, & præmium habet.

Hæc de sanctissimo Doctore Aquinate aiebat sapientissimus Cardinalis Pallaucinus, tunc quidem ætate iunior, sed iudicii maturitate, ac sapientiâ canus, quem imitari debuisset Raynaudus, ætate canus, iudicio minor.

Superioribus encomiis maius adiungo Alexandri VII. Breue ad Doctores Louanienses, in quo laudes D. Thomæ à Summo Pontifice datas Theophilus, malo suo inspiciet. Alexandri, cum præclara in tuendâ, & ornandâ domi, tum fores propagandâ & amplificandâ Catholicâ Religione studia constant, tum etiam in euertendis hæresibus, excindendis erroribus, statuendis antiquis Pontificum Conciliorum, Patrumque sententiis, retinendâque traditione officia patent: quorum prætermittis nullum, quod eo intelligat pertinere: in speculo Pastoralis constitutus, vigilat, ne quis fur per aditus occultos, & furtiuos in ouile irrepât: ne quis nouas opiniones intrudat; ne quis, aut dicendi fucos, aut argumentandi speciosâ fallaciâ, animos capiat, & illaqueet. Ostium Pastoris apertum, & parens omnibus exhibet, ut ad Christum regiâ viâ conscendant. Voce Christi oues alloquitur, veritatem, & vitam palam proponit: Nouitates, quas *profanas* dixit Lyrinensis, alienas optat à doctrinâ Christianâ, quæ est sapientia *diuina*, *æterna*, & *ex antiquis*: perinde ac æternitas antiquitati adhæreat, & quæ antiqui docuerunt patres, ea noua esse disciplina non possit, quod æterna, & immutabilis sit doctrina.

Itaque cum vellet fauere studiis Doctorum Louanensium, qui nouas Iansenii opiniones ab Innocentio X. iuste damnatas detestabantur, & veram, *Apostolicam*, uti Prosper appellat, Augustini doctrinam, & illius indiuidui Discipuli Doctoris Angelici omnino sequi volebant, decreuit hoc iustum sanctumque propositum confirmare, & inflammatos accendere. Sciebat nimirum, Summos Pontifices decessores suos illustria amborum sapientiæ, & placitis, vno verbo traditæ doctrinæ

testimonia reddidisse. Reколеbat animo Innocentium I. Bonifacium I. Celestinum I. Gelasium I. Hormisdam, Ioannem II. Ioannem IV. Nicolaum I. Leonem IX. Gregorium VII. Urbanum II. Martinum V. Clementem VIII. magnis Augustinum præconiis laudum exulisse, nec non Innocentij V. Ioannis XXII. Urbani V. Pij V. Clementis VIII. Pauli V. constitutionum meminerat, in quibus S. Thomæ Doctrina recta, & sancta haberi iubetur. Hac igitur luce plenus, Spiritu sancto afflante, tot, & tantorum ante se Pontificum exemplo, hoc quod exhibemus Breue ad vniuersitatem illam Louaniensem scripsit.

BREVE APOSTOLICVM,
ad Doctores Louanienſes de iuramento
præſtando.

*Ad obſeruantiam Constitutionum Apoſolicarum,
in materiâ de auxiliis ſecundum Doctrinam
inconcuffam, & tutiſſima Dogmata
Eccleſiæ Doctorem.*

Augustini, & Thomæ Aquinatis.

ALEXANDER PAPA SEPTIMVS,
Dilectis filiis ſalutem: & Apoſolic. benedictionem.

LITTERAS vestras die 20. Martii datas accepimus, & in eo sanè, quod quinque propositiones illas, tam in constitutione felicitis recordationis Innocentij X. Prædecessoris nostri, quàm in alia nostrâ postea damnatas tantopere detestemini, ut neminem admittere ad gradus Academicos velitis, nisi prius religiosam obseruantiam prædictarum constitutionum promittat, & iuret; obediendam, & zelum vestrum vnicè commendamus, atque adeo speramus, vos nedum id egregiè, persanctèque impleturos; verum etiam omnibus aliis in hanc sanctam Sedem obseruantia, & obedientia documentis effecturos: ut omni rerum prædictarum ex hominum

animis euulsâ, & penitus abolitâ memoriâ, pristinum decus existimationi, & laudi antiquæ vestræ restitatur. Ad hanc igitur salutaris obsequii gloriam verè, constanterque promerendam; quamuis, vti credimus, eximie currentes vos, dilecti filij, etiam atque etiam quantum possumus, hortamur in Domino. De reliquo non dubitamus, quin nos pro singularis scientiæ, pietatisque studio sanam, & incorruptam, qualem tot Apostolicæ Sedis declarationes, & Sanctorum Patrum traditiones requirunt, doctrinam semper amplexuri, & aduersus Orthodoxæ Religionis hostes defensuri sitis; nec non Præclarissimorum Ecclesiæ Catholicæ Doctorem Augustini, & Thomæ Aquinatis inconcussa, tutissimaque dogmata sequi semper, vt assertitis, ac impensè reuereri velitis; quorum profectò Sanctissimorum virorum penes Catholicos vniuersos ingentia, & omnia tandem supergressa nomina, noui præconii commendatione planè non egent. Porro bonorum omnium largitorem Deum oramus, vt vobis dilecti filij, cum pacis Diuinæ tandem clementiâ restitutæ prosperitate celestis gratiæ munera tueri, & augere quotidie pro misericordiâ suâ velit: ad quod feliciter consequendum Apostolicam benedictionem vobis permanenter impertimur. Datum Romæ apud sanctam Mariam Maiorem sub annulo piscatoris, Die septimâ Augusti M. D C. LX.

Quid ad ista Theophile? Audisti oraculum Alexandri VII. in laudem doctrinæ D. Thomæ; registi illud, *Augustini, & Thomæ Aquinatis inconcussa, tutissimaque Dogmata.* Quid ad hoc Pontificium, oraculum dicit Petrus de Alua Theophilo similis? Negat vlla à præteritis Pontificibus encomia D. Thomæ tributa: hoc certè negare non poterit, sed nec antiqua debuit.

Bessarionem Cardinalem ferunt licentiùs dicere solitum, sanctitatem recentem hominum, quos ipse nouerat, facere ambiguum apud se eorum qui superioribus sæculis vixerant: nobis contrâ, certissima faciunt, quæ circumferuntur ab aliquot sæculis de Doctrina D. Thomæ, Christi, Summorum Pontificum, Episcoporum, Academicarum, quæ modo retulimus superstitum hominum, & Summi Pontificis nunc sedentis encomia & decreta. Sed ne solis testimoniis videamur contendere,

argumentis qualibet demonstratione mathematica euentioribus probandum suscipio Doctrinam D. Thomæ, cuius fatuo amore nos capi, cui pecuino spiritu nos adherere dicit Petrus, esse supra omnem laudem & admirationem. Et si in hac veritate confirmandâ defecero, non recusabo eadem lege poenas dare, quâ Coclæus cum Lutheranis de controuersis fidei disputaturus, nisi rem propositam consecisset, non detrectabat capite luere. Hac conditione libentissimè cum Theophilo, & Petro de Alua, de meritis doctrinæ D. Thomæ, supra laudes quas illi inuident, & nimias vocant, positis sequenti paragraph. pugnabo.

PARAGRAPHVS TERTIVS.

Varia dotes Doctrina Diui Thomæ.

Promiseram initio dissertationis, me tribus generibus argumentorum probaturum, solidam esse S. Præceptoris doctrinam; primò refutatione eorum, quæ contra Petrus obiecit: secundo obseruationibus à me factis; tertio collatione S. Præceptoris, & recentiorum doctrinæ. Primum iam impleui his postremis dissertationibus, nec solum obiecta dissolui, sed multa etiam attingi, quæ ad secundum, & tertium genus argumentorum pertinent, ad quæ prima demonstratio viam parauit. Non est dubium quin Petrus ex libris D. Thomæ & eius scholæ elegerit, quæ sibi videbantur debiliora, & magis opportuna calumniæ, quæ validius impugnari, aut difficilius à nobis defendi possent; sed hanc dissertationem, verbis Apostoli, concludere licet, quod *insirmum est Thomæ, fortius est illis, omnibus* scriptoribus, qui illum laceſſunt: *quod stultum est* (tuo iudicio) Thomæ, *sapientius est omnibus his*, quæ à te, tuisque scripto extant.

Nolim ad nauseam repetere, vel à me sparsim scripta, vel ab aliis plenissimè dicta, maximè à Xisto Senensi, qui in D. Thoma ad plenam absolutamque rotius, tam diuinæ, quàm humanæ eruditionis gloriam, solum desiderabat, eloquentiam, & linguarum vsum, qui etiam

Augustino defuit, (qui parùm græcè sciebat, & hebræicè nihil,) in D. Th. quatuor inter se implacabiliter pugnantia indissolubili pacis fœdere coniuncta miratur; videlicet copiam, breuitatem, facilitatem, & securitatem. De securitate, eiusque causis pleraque obseruata sunt à nobis dissertatione primâ, & quartâ, multis experimentis probatâ, scilicet illum à plerisque Theologorum differre, quòd traditionem ducem, & pedissequam rationem habuerit, quam nec audire, nec rebus sacris est dignatus adhibere, nisi priùs Ecclesiæ, & Patrum consensu, quid sequendum, quid probandum illi comperitum esset. De breuitate obscuritatis vbique comite, sed apud ipsum lucidissimâ, nihil attinet dicere, cum de commentariis, quæ instituta sunt ad dilucidandos Auctores frequentissimè audiuntur querimonix, Thomam per se clarum à commentatoribus fieri obscuriorem.

Duo tantum superioribus velim addi, quæ mihi videntur singularissima, & haud scio, an fuerint ab vllò obseruata, nempe plenitudinem, & efficaciam doctrinæ Angelicæ. Ab hac postremâ dote me expediam, breui, fusiùs primam prosecuturus.

PRIMA LAUS DOCTRINÆ D. THOMÆ.

Efficax est ad veritatem Fidei, & vitæ Moralis comprobandas.

NEC Sanctus Doctor solùm methodo, & differendi ratione, vt iam monui; sed maximè scopo, & fine à pluribus longissimè distat; quòd istis vnicum, aut certè præcipuum sit studium aliena validè refellere, sua, vt cumque vel nullâ ratione probare. Nulli dubium esse potest, cui non sint ignotæ huius temporis Scholarum controuersix, vnum Ocham mortalium ingeniosissimum prædicari; At nemo nescit huic scriptori, & eius affectis, quos Nominales vocant, hoc esse constitutum; de Deo nihil probari posse ratione naturali, nequidem eius existentiam: quid subinde de reliquis attributis, de immensitate, de infinitate, de scientia? &c. Hæc omnia, vt rationi incerta, vt probari impossibilia,

in medio, & ambigua relinquunt: ad in vnum intenti; ut si quid à D. Thoma solidum, subtile, reconditum afferatur, quo probet Deum existere, præsentem inesse rebus, infinitum, omniscium, & inuisibilem cuilibet intellectui creato possibili; si quid in medium proferat, quod soli Deo creationem asserat, quo gratiæ essentiam aperiat, quo immortalitatem animæ confirmet, vel vltimum finem constituat: in id insurgunt, & totis viribus impugnatum eunt.

Hinc est, ut quod de Vasquez nonnullus ex suis, plurimis conueniat: ut benè aliea refutent, malè sua probent. Hinc illa communis, & omnibus paginis obrusâ probatio negatiua, maximè à nuperis Scriptoribus, nulla apparet repugnantia, quin detur substantia corporea intellectualis, quæ naturaliter videat Deum, & vniamur hypostaticè verbo; hinc noua singulis diebus inuenta, aut potius monstra prodeunt, hoc vnico semine concepta, & enixa, *nihil repugnat*: atque his insomniis applauditur, & fauor, quo excipiuntur, audaciores facit ad nouas opiniones cudendas, quibus maximè capi sciunt ingenia, quibus nescio quo morbo corruptis, ita desipit panis ex frumento, ut ad glandes redierint.

Senecæ dictum est, *sapienti semper sua placent*, quod addit, non ausim subiungere. Metaphysica Suarez excepta est summo applausu tanquam opus absolutum, & summo labore, ac pari subtilitate elaboratum. Verum obstupui, vbi Arriagæ, & Ouiedî editâ Philosophiâ, vidi Suarez fordescere præ illis recentioribus, ut iam non manibus tereretur, sed blattis, & tincis permitteretur rodendus. Quæ tamen horum recentiorum ad illum collatio? Sed ô tempora! ô mores! nunc vnicum genus argumenti in vsu est, *non repugnat, ergo datur*. Verum exactius inquisui, quodnam fidei Mysterium nouâ luce illustrarint hi noui Scriptores? Quodnam vitæ Christianæ, aut humanæ fundamentum solidis rationibus à se inuentis confirmarint? Sed ab illis hæc frustra speres, quia vnica probatio est illis loco omnium: *non apparet repugnantia eorum qua neges, nec ratio eorum qua asseras; sed idem in illos retorqueo argumentum*. Vnde videntur more fulminis omnia euertere, astruere autem, aut confirmare omninò nihil. Et

I. DOS, CONVENIENTIA CVM REBVS FIDEI. 443
hæc, si superis placet, solida vocat Petrus, præ quibus
Summa Theologiæ D. Thomæ, & Summa contra gen-
tes infantiam respiciant.

Sed diuersum insedit animo S. Doctoris consilium,
& studium. Aliena aut nunquam attingit, aut validè,
ac modestè refellit: sed totus in eo est, vt mysteria fi-
dei illustret. Et quandoquidem verâ necessariò probari
ratione nequeant, euidenter credibilia demonstrat, at-
tributa Dei, principia vitæ humanæ, & Christianæ, no-
uis, & solidissimis argumentis confirmat. Vellem, ali-
quis laborem, & consilium susciperet, seligendi in his
omnibus, quæ ad mores, & ad fidem necessaria sunt,
quidquid D. Thomas, quidquid alij scripserunt: hac
collatione constaret omnium Theologorum lucubra-
tiones, his duobus contineri, vt quæ à S. Doctore in-
uenta sunt, virgeant, & illustrent argumenta, vel refel-
lant, & nulla, aut debilissima reponant. Et ne per plu-
ra discurram, duo tantum exempla proponam, quæ
sint omnium instar futura.

Nemo nescit, nisi Theologiæ omnino rudis, quanti
referat duplex illa quæstio: Prima, quam per summam
inaduerentiam (nequid aliud dicam) Pontius Scotista
nominis quæstionem facit, an Deus res possibles co-
gnoscat in essentia sua, vt in causâ, & in medio cogni-
to: secunda, an intellectus creatus, & possibilis natura-
li & innata virtute possit videre Deum. Superiori quæ-
stioni appendet ordo diuinæ providentiæ, & quidquid
de cognitione creaturæ, de prædestinatione, de scien-
tiâ mediâ, de concordia diuinæ prescientiæ cum liber-
tate, tanto animorum ardore disputatur: nihil euiden-
tius & certius apud SS. Patres, maximè Dionisi, & Au-
gust. nihil lumine naturali compertius, quàm creaturas
omnes possibles distinctissimè secundum omnes gra-
dus virtute Dei contineri, in eâque cognosci vt in cau-
sâ; nihil magis extra omnem controuersiam positum
hac veritate, conclusiones in principiis, effectus in cau-
sis cognosci, quia in illis continentur, & eodem gradu
cognitionem progredi, quo complexionem.

Hac veritate nota syllogismorum & demonstratio-
num, ac subinde omnium scientiarum certitudo, &
euidencia constat. Hoc tamen omni certitudine certius

principium placuit Vasquez, Lessio, Becano labefactare, ut eius ruinis scientiam mediam inædificent. Negant assertum unquam à Dionisio & Augustino creaturas in omnipotentia distinctè cognosci: negant id lumine naturali cognosci posse, obstupentibus Suarez & aliis, quod aded apertis Sanctorum verbis, & demonstrationibus reluctantur. Duo peccant gravissimè hi Doctores, compertissimum primò negant, & Deo auferunt rerum cognoscendarum modum, ut adstruant falsum, commentitium, impossibile, inintelligibilem, nempe ut solà infinitate luminis nullo obiecti cum intellectu concursu omnia cognoscat; destructo illo principio receptissimo ab obiecto & potentia gigni notitiam, quod in solà notitia humanâ admittit Vasquez, in Angelicâ, & Divinâ negat, cum tanto suarum opinionum, & rerum fidei dispendio, ut in disputationibus de cognitione Angelicâ continuò labore vitio petitionis principij, & sibi ocludat viam ad qualemcumque generationis verbi explicationem. Verum tanti fuit conuellere doctrinæ Thomisticæ, & astruere scientiæ mediæ fundamenta.

At Suarezio cum major sit erga Sanctos Patres reuerentia, & minor euidentissima quæque negandi licentia, asserit incussum illud esse principium de cognitione creaturarum in essentia ut in causâ. Sed ne omninò viam ocludat ad scientiam mediam, dat Deo secundum cognitionis genus, quâ per essentiam ut speciem, seu medium incognitum videt creaturas in seipsis: vult Suarez Deum imitari diligentiam tyronum in Scholis, qui ut approbent magistris suam industriam, pensum Latinitatis duplici genere phrasæ reddunt: Aliena planè à Dei maiestate cogitatio, ut eius essentia sit creaturarum species, idest, illarum in ordine intelligibili vicaria, semen, & instrumentum. Quo quid indignius? Hæc tamen deuoranda sunt, ne scientiæ mediæ via præcludatur.

Sed putant Ripalda, Ouiedo, & alij plures Complutenses, se illi tutiorem, & patientiorem viam aperturos, si tertiâ impressione factâ in illud inexpugnabile præsidium, de cognitione creaturarum in omnipotentia, ut in causâ, constituent omnipotentis Dei nouum ob-

fectum, non absolutum, vt communis hactenus ferebat opinio, sed conditionatum; hoc sensu chymera potest produci ab omnipotentia, nisi repugnet. Atque his nouis inuentis, & chymeris putant se præsidium hoc euerfuros, & scientiæ mediæ vexillum in arce prouidentia sublaturos: sed re verâ his chymericis machinis fundamentum D. Thomæ nequit labefactari. Et hoc audio, pro suâ summâ ingenuitate, & subtilitate Patrem Esparza agnouisse. Vnde apud illum stat firmissimum fundamentum creaturas à Deo non cognosci nisi in essentiâ, vt in causâ, quam vero hoc fundamento posito viam sibi muniat ad scientiam mediam, non est huius instituti, nec huius apologiæ indagare: hoc solo exemplo manifestatum omnibus volo, quidquid illi principio astringitur, immotum esse, & contemnere ventos.

Nec minùs est aperta demonstratio efficacissimæ doctrinæ aliud exemplum, quod subiecti de Dei inuisibilitate viribus naturalibus, cuiuslibet intellectui possibili: huic enim veritati appender totus ordo entis supernaturalis creati, & tota gratiæ œconomia: quisquis ergo rationem, quâ Diuus Thomas probat hanc repugnantiam confirmat, gratiæ pariter ordinem constituit; si impugnet, planè evertit: quia nihil affert, quo ruinam hanc resarciat. Vnde id vniuersim assero, plura à doctissimis recentioribus, vel etiam antiquis subtiliter inuenta, quibus aliena refellant, vel dubia, & incerta faciant principia fidei, & morum, repulsis illis, quibus à S. Doctore confirmantur, & quæ à seipsis afferunt noua, vt modestissimè, & verissimè loquar, paris subtilitatis esse possunt: sed nunquam fore paris efficaciz, & vtilitatis. Immortalitatem animæ creationem Deo propriam, visionem Dei naturæ viribus impossibilem, gratiam naturæ diuinæ consortium esse, & alia, quibus tota religionis vis constat, nullus præter D. Thomam, probat; reliqui id vnum moliuntur, vt vim rationum eius, aut eruant, aut labefactent.

Aliud addo eiusdem certitudinis, & momenti, in his controuersis, quibus Scholæ feruent de scientiâ Dei, de cognitione creaturarum, & de reliquis, quæ inde sequuntur, quæcumque præsidia petuntur ab argumentis

à priori, stant pro Diui Thomæ sententiâ, pro aduersariis suppetunt aliqua à posteriori, ab inconuenienti; à priori nulla habere constantissimè assero. Hinc etiam sit attributa Dei omnia ita ieiunè tractari, ita debilibus argumentis probari ab his, quibus magis Ocham placet, quàm Diuus Thomas, vt potius rerum dubium quàm fidem faciant.

PARAGRAPHVS QVARTVS

Dua relique dotes doctrina D. Thomæ.

DE Angelicâ doctrinâ ad omnes Ecclesiæ vsus copiosissimâ, multis alio loco disseruimus, quæ validdè refellunt inculpationem Petri, qui nos fatuo amore immodicis laudibus inhonorare D. Thom. eiusque doctrinam, vult non habere quicquam singulare, aut solidum, & ab illa institutos rudes & ineptissimos ad negotia, & sua stoliditate exacerbasse populos, à fide alienasse, ausus est imprudentissimè scribere. Quem mihi dabis Petre, vel tuorum, vel alienorum quorumcunque, qui has dotes assecutus sit, quas in vno Thomæ auctas, & exaggeratas habes? Multi libri, & Scriptores alunt ingenia ad disputationes Metaphysicas; sed quid inde reportas, ad formandos mores, aut conciones locupletandas, ad conuincendos hæreticos? Audiui ex vno celeberrimo concionatore Franciscano, plus sibi adiumenti ad conciones conferre vnâ quæstionem D. Thomæ, quàm tomos integros reliquorum Theologorum. Sed ne pluribus te fatigem, erudite Lector, Summam D. Thomæ meritò dixeris supremum subtilitatis Scholasticæ apicem, instructissimum aduersus Ecclesiæ hostes armamentarium, concionatorum promptuarium, perpetuum Scripturæ commentarium, quæstionum, quæ ad mores pertinent, exactissimam, & tutissimam Analysim decretoriam.

Post hæc Petre, insanus habebis, si neges, hanc doctrinam solidam, & ea instructos voces homines vepribus Scholasticis assuetos, vti scribebas pag. 47. Hanc grauissimam calumniam refutaui breuius, quàm rei a.

tricitas ferebat: ideo superioribus pauca addam. Pythagoræ Scholam, non tam summa grauitas, vt sapientia magistri quàm discipulorum veneratio incredibilis, & par in regendis populis prudentia commendauit. Ex illa enim prodierunt Heroës militiæ, & pacis artibus clarissimi, Legum latores, Principes, aut Regum Consiliarij incorruptissimi. Schola D. Thomæ Pythagoricæ superior, quamuis rumpat inuidia Petrus, fuit verè Heroum feracissima: hæc Innocentios, Benedictos, & Pios dedit Sedi Romanæ Pontifices, nullis decessorum sapientiâ, sanctitate, & rerum gestarum magnitudine inferiores: hæc Io. Dominicos, Turrecrematas, Caietanos, Legatos Pontificum, Regum Consiliarios: hæc Bartholomæos è Martyribus, hæc Anthoninos antiquis Pastoribus pares instituit: hæc Ioannes à Monte-nigro aliosque in Conciliis Occumenicis aduersus Græcos, & hæreticos athletas inuictos armauit.

Neque hæc frustra, aut temerè dicta credas; id enim apud nos innumeris exemplis domesticis compertissimum est: quo peritiores, id est, quò addictiores sunt Patres nostri doctrinæ Angelicæ, eò sanctiores moribus, eò in tractandis negotiis, & ad regimen sapientiâ eminare. Et ne per totum Ordinem, aut superiora sæcula decurram, Castellana Prouincia plurima hoc sæculo, eaque illustrissima exempla dedit.

Quis Ioanni à S. Thoma par subtilitate, studio, & eruditione in commentando, aut defendendo sanctissimo Præceptore? Quis eius mentem acutiùs, aut profundius introspicit? Quis apertiùs eruit? Quis validius propugnat? At quem vidit vnquam aula Regia sinceriores Consiliarium, à confessionibus incorruptiorem ministrum, aut in rebus gerendis solertiorem? In quo nil desiderare possis præter longiorem, tot bonorum vsuram, quam mors immatura interceptit, nec passa est nos diu frui virtutibus, quas semper posteritas mirabitur.

Non conuenit amicitia, & moribus coniunctissimos diuellere. Petrus Tapia, & Ioannes à S. Thoma, collegæ Compluti, & inde Matritum, quò ad consilia Regia vocabantur itineris pedestris socij, & eiusdem integri-

ratis in ferendâ sententiâ, parem laudem diuerso ministerio assecuti sunt. Atque vt Ioannes Confessarij Regij officio incorruptissime, ita Petrus Pastoralis functus est: & nostro sæculo monstrauit non deesse, neque Ambrosios, & Thomas Cantuarienses in iuribus Ecclesiæ defendendis, neque Nicolaos, & Martinos parcimoniâ, charitate in pauperes, & omni genere sanctitatis, vt inde agnoscas è Scholâ D. Thomæ prodire non minùs sanctos quàm doctos, & ad omne ministerium Ecclesiæ instructissimos.

Sed qua ratione seiungam ab hoc pari Thomist. illustrium, Reuerendissimum Dominicum à Rosario, eiusdem Prouinciæ Castellanzæ alumnum, natione Hybernum, cuius dum hæc scribimus mortis nuntium atrocissimum nos oppressit. Ingratissimi animi me reputarem, nisi virum immortalis memoriâ dignissimum, & de me optimè meritum, duobus à me nominatis adiungerem, quibus amicitia arctissime iunctus eiusdem Prouinciæ decus, nec pietate, nec sapientiâ, & integritate illis inferior, & fortè etiam pertinaci dignitatum repulsâ, & contemptu, in negotiis gerendis solertiâ, in animis Regum, & Procerum conciliandis gratiâ, & rerum gestarum magnitudine illos superauit. Ex Hybernâ nobili familiâ natus, in Castellana Prouinciâ ad Ordinem receptus, inde eam hausit pietatem, & sapientiam, quas Louanium, quas Matritum, quas Gallia, & quas tota ferè Europa mirata est. Nomine Regis Catholici, apud Regem Angliæ Patrem, & apud Carolum Filium, & huius Romæ apud Innocentium X. gessit negotia grauissima, pari sapientiâ, & foelicitate, sed apertius titulo Archiepiscopi Goensis, quem abdicauit, apud Regem Christianissimum Legatus Lusitaniz, toti aulæ fuit amori, & venerationi: atque hoc elogium retulit, nullum vnquam felicius pietatem cum prudentiâ, modestiam, & humilitatem Religiosam cum Legati grauitate, & sapientiâ coniunxisse.

Quid referam tres Episcopatus recusatos? Quid dicam vim illam animorum conciliatricem, quâ Regum, & Procerum amorem, & iudicia, non solum merebatur, sed etiam rapiebat? Nescio an vlli vnquam hominum contigerint, hæc quæ in illo licuit mirari. Summa
gratia

gratia ubique valuit, præsertim apud Lusitanos extraneus sine vllâ inuidiâ, & liberrimè reprehendentem; Principes, & Reges summè dilexerunt; sed huius foelicitatis admirationem minuit integritatis, & virtutis magnitudo. Nihil sanè mirum fuisse omnibus venerationi, & amorì, cum ex summâ gratiâ apud Reges nullum priuatum commodum, sed de omnibus bene merendâ occasiones captaret.

Hoc vnum cæteris prætermisissis, dicam; nemo nescit; quâ cupiditate flagrent reliquarum dignitatum contemptores, vt Regum animos occupent, & sint illis à Confessionibus, & à consiliis. Hoc ipsum Dominicus à Rosario contempsit; & cum Confessarij, & Consiliarij Principis munus diligentissimè obiret in Lusitania, & Rex Angliæ humanissimis Epist. illum aduocaret in coniugis Confessarium, & Consiliarium, nunquam horum officiorum titulos, & nomina admisit. Nihil ergo mirum, si eius gratiam, vel reprehensiones Principum liberas, nunquam odium aut liuor secuta sunt, cum nihil sui causâ ageret, sed Dei gloriæ, publici boni studio, quo vnice flagrabat.

Hinc non solum Petri calumnias refellimus, sed etiam nonnullorum opinionem, quibus videtur Religio Dominicana quasi effæta consenescere. Certè non potest sterilitatis accusari, quæ ex solâ Prouinciâ Castellæ, hoc nostro tempore, præter Cardinalem Pimentellum, quem Roma mirata est, præter Herreram, Arauium, Godoi, aliosque pietate & eruditione celeberrimos, hos tres tulerit à me nominatos, qui Apologiæ validissimæ vim habeant aduersus vtriusque Petri calumnias.

Mathematicorum morem secuti sumus; qui demonstrationes, vbi sub conspectum mentis arte syllogisticâ subiecerunt, sensibus etiam quodammodo visendas præbent, exaratis in puluere lineamentis, & figuris rerum, quas repræsentant, & probandas suscipiunt. Ita etiam doctrinæ præceptoris nostri, in cuius verba iuramus, dotes variis exemplis confirmauimus, vt inde solemnem apud Philosophos Dialecticæ distinctionem nobis vsurpare liceat Theologiam D. Thomæ non solum in exercitationem ingeniorum, sed etiam in remedium animi; nec minùs ad omnem vsu, ad obeunda quæcumque sacri ministerij officia, quàm ad inda-

gandam veritatem, habilem & necessariam esse.

Quæ cum ita sint, viderit Theophilus, num in illud recidat, quod huiusmodi doctrinæ studiosis objicit, spiritus pecuni conuitium. Certè si Pium quantum in administrandâ sanctè & sapienter Republicâ Christianâ; si Bartholomæum à Martyribus zelo, sollicitudine, prudentiâ, & sanctitate dignâ Episcopo; si Caietanum, Capreolum, Conradum eruditione, & disputandi subtilitate; si Canum, Sotum, Authores Catechismi Romani in rebus Theologicis tractandis; si Diuum Vincetium, Granatensem, Sauanarolam eloquentiâ Christianâ, denique si innumeros alios in Ecclesiâ celeberrimos, qui suas quibus præstabant, doctores suo Magistro Diuo Thomæ acceptas referebant credat Theophilus se æquare aut superare, per me licet Diui Thomæ discipulos pecuino spiritu agi, vbique prædicet, & persuadeat omnibus: sin illud sibi arrogare nequeat citra temeritatem & insaniam; rogo desinat Sancto Doctori addictos pecoribus, & brutis animantibus accensere.

SECTIO SECVNDA.

Summa expostulationum Carterij.

DVm hæc scribimus, peruenit ad manus nostras expostulatio Ludouici Carterij de P. Mariales, posterior longè immunitatibus Petri à Valle clausâ. Legi libellum integrum; & mihi visus est Author longè humaniùs scribere, in speciem saltem, & à conuitiis abstinerere: quod etiam exigebant partes, quas suscepit implendas. Neque enim accusatorem agit, sed tantum expostulat, & grauissimè conqueritur, Marialem suâ Bibliothecâ, Societatem, & præcipuos illius Authores atrocibus conuitiis læsisse, atque ut querimoniarum vires augeat, asciscit illi plures è nostris, & omnes, si posset in consilij, & iniuriæ illatæ socios; à quibus ait, primò pacem frustra turbatam; secundò doctrinam Societatis immeritò confixam, & maximè scientiam me-

diar: Tertio Acta Congregationis temerè iactata : Quarto Iesuitas corruptores , & contemptores SS. Patrum perperam dictos , & nominatim quinque, Belarminum , Valentiam , Vasquez , Fasolum , Pozam , cum totâ Societate, multis iniuriis à nostris affectos maximè scripto Francisci Roales edito , & aliis libris confixis. Quintò conqueritur de editione, quâ elusa sunt decreta S. Officij , & quâ violatus est honor S. Doctoris. Postrema expositulatio est de Sibylla , quod scripserit in Iansenistas , ut obliquè Molinam peteret. Hæc Summa est libri , quem concludit se veritatis , & amoris studio scripsisse , post longum & pertinax Patrum Societ. silentium ; licet vndeque lacefferentur.

ARTICVLVS PRIMVS.

Responsio ad Prolegomena.

Necessarium duxi ad illa breuius , & fortè etiam validius , quàm proponantur capita respondere ; & adiungere accusationibus Petri : licet enim stylo , & ut arbitror etiam animo dissimiles sint horum librorum Authores ; non tamen ita argumento distant , quin eandem responsione vtrique satisfieri possit ; nam quæcumque hæc expositulatione continentur , sunt communia ferè cum Petro , quibus iam responsum est ; & si quid singulare occurrat , isto examine discutiam : singularia enim pauca sunt , nisi vel titulus , vel occasio scriptioris.

PARAGRAPHVS PRIMVS.

Examen Epistola ad Lectorem.

Epistola ad Lectorem beneuolum de P. Mariali conqueritur tanquam iniurio in Societatem , *quam res conuictis arguit* , inquit Carterius ; *qua vix ullus perulcus hæreticus effutire possit*. Marialem omnino non excuso , quamuis ut iam monui , collatum Petro à Valle-clausa , ipse Ludouicus absoluturus sit. Sed non est

illi visa satis atrox iniuria, si à priuato homine proficisceretur, ideo, vt expostulatio vires acquirat eundo, vult operis vnus Authores esse plures, & *nomen eius legio*, nec solo consilio, sed etiam manibus plurimorum esse exaratum, & illius editioni, ac promulgationi, sedulam operam nauatam. Vt omitram nobis deesse summam illam, quæ in Societate viget, cautelam nihil edendi, quod non fuerit Romam delatum, & ab his, quos vocant Reuifores, accuratè discussum, vt taceam ipsius operis editionem preposteram, nulla nostri Ordinis approbatione munitam esse: Quod de opera à multis nostrorum hominum impensa editioni dicit Carterius; eodem planè artificio excogitatum est, quo libro titulus præfixus est à Theologia, & I. V. D. scriptus Gergonia Vocontiorum, typis Petri Calpin. Epistola non dissentit à titulo, vtrumque merum artificium est; vt priuati vnus culpa in omnes Dominicanos redundet.

Mirum est, quòd cum Ludouicus testetur sibi Petri libellum in Dominicanos non fuisse ignotum, ad finem Epistolæ adiungat, quod si conuictorum, quibus Mariales Iesuitas proscindit, atrocitatem seriò reputet, apud se Lector, se non dubitare, quin huius expostulationis lenitatem, atque adeo consilium suum magnopere sit laudaturus; quod vna necessitas, cum aliud remedium non suppeteret, hæc pauca, penè inuitò extorserit. Pertinebat sanè ad summam illam Ludouici lenitatem, aut æquitatem seposito partium studio, Marialem conferre cum Petro, & diligenter inspicere, quis horum scriptorum in eos, quos impetunt, esset iniustior, aut petulantior. Mariales obiter tantum lacessit aduersarios, nec sua laude fraudat, quos videt eà dignos: at Petrus furiis actus, conuictorum plaustra congerit, nec quidquam aliud habet: nulli parcit. Et cum aded dispar sit vtriusque scriptio, & plura atque atrociora vnâ Diatribâ congerat Petrus, quam Mariales quatuor tomis, vt præ illo penè mutus sit; certè nisi cum nimius sui amor excæcasset, iudicasset Ludouicus tacendi omninò, aut Dominicanis satisfaciendi impositam necessitatem potius, quàm de illis expostulandi.

Vndè cum videam adeo enormi iniuriarum *vtin-*

que illatarum discrimine, expostulationem parari, non compensationem; solas sibi illatas iniurias vrgere, superos, hominesque testari, impositam sibi summam necessitatem expostulandi, & satisfaciendi nullam: Cœpi apud me reputare verissimum esse, quod scribit Seneca; *non fere ictum illæsa felicitas*: quia non credit sibi æquo iure viuendum cum aliis; sed omnia sibi in illos, in se nihil aliis licere. Nisi in ea sententia fuisset Ludouicus, certè collatio Petri cum Mariali calumnium emanuextorssisset, & deposito expostulandi consilio, quod ipse frequenter solet aliis suadere, vel omninò tacere statuisset, vel satisfactione condignâ, excessum reparare iniuriarum quas passi sumus, præ illis, quas sibi à Mariali illatas conqueritur. Sed multò æquiora aliis consulit, quàm sibi assumat: & qui quotidie satisfactorias pœnas imponit, ab illis abstinet, sicut medici à remediis, quibus alios vexant.

Sed adeo vel ipsa cogitatione ab omni satisfactione præstandâ, quam aliis iniungit, abest Ludouicus; ut licet non posset ignorare Marialis doctrinam, morèque suorum & institutum, ne centesimâ quidem parte conuictorum perstrinxisse, quibus Petrus nos omnes conspurcauit; non sibi tamen satisfactum iri putabat, nisi propter aliquot liberiores voces in opere Marialis sparsas, Tomi omnes in totum damnarentur. Quæ certè non mihi videtur pœna iustior illa, quam exigebat Aman, ut tota gens Iudæorum periret ob negatam sibi ab vno Mardocheo salutationem. Et ideo distulerunt in ipsum scribere, ut hæc in speciem moderatione, Censuram absolutam in totum opus validius vrgerent, & tandem euincerent.

PARAGRAPHVS SECVNDVS.

*Quibus artibus tentata sit Censura in totum
Mariales.*

VIdemus nonnullos ita esse comparatos, ut magis tunc timendi sint, cum silent: quia indignatio diu compressa, & quasi collecta, datâ primum occasione,

sultem intentantis suspensio ictu : *castigare te , nisi sentirem me irâ commotum* : nec minùs commendandus , aut imitandus est mos inter iudices receptus , ut is à iudicio , vel arceatur , vel sponte secedat , si minima suspicio sit , illum aliquid gratiæ , vel odio ex amicitia , aut iniuriæ sensu daturum. Deinde ipsimet hostes in medio ardore pugnæ , non sibi omnia permittunt , & ad suam laudem referre putant , si aduersarij virtutem agnoscant , & aliquando etiam admirètur. Has omnes leges iure gentium , aut naturæ sancitas , vel ignorauit omnino , vel neglexit Ludouicus , hoc certe liberiori , aut iniquiori in Mariales iudicio , quo nihil in eius opere dicit se *deprehendere , nisi barbariem , & insciam , & proposita quaque , &c.* At ego contra , & qui minùs odio indulgebit , mecum assentiet , plura ibi bona esse recondita , quæ faciliè alibi non reperiatur , & licet stylo Tullium non referat , aut Canum æquet , certe attollit se aliquando supra simplicem , & rudem Scholæ modum loquendi. Sed ne videar Lectori aliquid gratiæ , sicut Ludouicus plurimum odio , dare , de diligentia & eruditione Authoris , tum iudicium esto Lector erudite , qui longiùs abes ab odio & gratia , sicut & ab illorum causis.

PARAGRAPHVS. TERTIVS.

Leuiiores querimonia Carterij depelluntur.

Sed grauissimè conqueritur Ludouicus ad finem capituli primi , & toto tertio , & alibi frequenter , pacem Dominicanos inter & Iesuitas seruata à suis religiosè , fuisse frustra turbata à Mariales , nomine quasi omnium nostrum : *quamvis enim* , inquit , *multiplicem ipsius expositulandi occasionem præberent Dominicani* , maxime in librorum editione , vectione , & confixione : idque per summam iniuriam : sustinebant tamen , & studio pacis tacitè concoquebant , ne vel aliquid excideret , quod *Christianam , & Religiosam pacem perturbaret*. Multa subinde ad finem illius primi capituli adiungit sibi commoda comparata ex Iansenij damnatione.

& subducta nobis. Si Mariales prodiiſſet ante Petrum, difficilius fortè agnoſceretur, an nos ipsis expoſtulandi occaſionem dederimus, an ipſi nobis præbuerint.

Sed hanc dubitationem omninò ſuſtulit liber Petri, qui videtur primus clafficum ceciniffe: & quamvis ex adeò virulento, & intolerabili libro non fuiſſet facta hæc ad noſtræ cauſæ æquitatem maxima acceſſio; non facilè conceſſerim Ludouico, quæ ipſe obtendit, & nulla ratione probat, (ſicut eſt eius mos per totum librum perpetuus, vt meritò vocari poſſit, aſſertiones Ludouici, & nullæ probationes, quia fortè per alias occupationes animabus vtiliores non licebat inquirere;) non admife-
rim, inquam, hæc mala, quæ ait ſuis illata à Patribus noſtris in editione librorum, nec commoda ad ſuam cauſam ex Ianſenij condemnatione parata.

Primum caput reſpici querimoniam Petri toties de ſuis libris iteratam, & à me validè reſutatam, cui reſponſa ſæpè à me facta, ſibi Ludouicus data reputet. Mirum eſt certè, quod addit ſecundò, datas occaſiones ex Ianſenii cenſura in nos agendi, quòd in eadem damnatione nos putat fuiſſe prætermiſſas ſtudio pacis, quam nos primi turbatum iuimus? Scio cum à vobis, & à Pariſienſibus damnatio Ianſenij vrgeretur, rogatos Thomiſtas, ne illi intercederent: imò datam fidem, ſe nihil contra nos moliri aut cogitare, & Societatem ad concordiam initam. Scio etiam à Confefſario Regis Chriſtianiffimi Patre Annato dictum, doctrinam Thomiſtarum in tuto eſſe damnato Ianſenio. At quis veſtrum, præter iſtum à me nominatum, hanc cautelam & moderationem adhibuit? Quis concordiam initam ſeruauit? Quid ſcripta veſtrorum authorum, in collegiis diſputationes, Quid concionatores in pulpitis aliud inclamant, quàm bellum in Thomiſtas; nec poſſe damnato Ianſenio eandem damnationem euadere? Atque inter hos tumultûs, qui cōtinuò perſtrepunt per totum orbem Chriſtianum, neque vñquam conquieſcunt: Sanctè iurat Ludouicus, pacem à ſuis religioſiſſimè obſeruatam: Serio ne an per ironiam ſcribit, dum perpetuum bellum vbique terrarum ſine vllis induciis pacem vocat? Et ſi vel vnus noſtrum velit his vociferationibus publicis,

& priuatis intercedere, Ludouico belli buccinator, & pacis publicæ perturbator est.

Præter hæc, quintus annus excurrebat ab editione, & publicatione infamis libelli, *de immunitate Cyriacorum à censura*, qui primùm è Lugdunensi prælo & Collegio emissus, ac partim Authore amicos donante, partim chariùs per submissos vendente, vbique terrarum maxima alacritate spargebatur: nec tamen illius nos prohibitionem curauimus: nam quinto post eius editionem ac promulgationem anno damnatus est à sacra Congregatione, nobis eius damnationem, nil omninò curantibus, sed tantùm eminentissimis ipsis ludicibus, qui etiam in eo libello traducebantur, vrgentibus.

Certè Dominicani, qui libelli *de immunitate Cyriacorum* prohibitionem curarunt, non potuerunt malitiosè operum Marialis prohibitionem impedire, aut differre: nec sacre Congregationis Indicis Secretarius in causa fuit, vt asserit Carterius, cur Marialis censura differretur. Sed dilationis causa fuit, quia cum Marialis opus sit in quatuor tomos distributum, necessarium fuit, censoribus tempus congruum assignare, quo totum opus diligenter discuterent, & sacre Congregationi referrent, quæ præterea tres censores adhibet de librorum prohibitionem differentes antequam configantur. Ad hæc autem omnia longo opus est tempore, nec potuit illico Mariales damnari, ex Carterij voto. Vellet in suorum Authorum libris discutiendis longissimum expendi tempus, nec eos vmquam prohiberi; Dominicanorum vero libros, vellet nec etiam discussos illico damnari, & configi.

Non addam nihil omissum, vt in nos, & in D. Thomam aliquid ex Cathedra statueretur. Sed quibus principiis, & quibus regulis? An his ad quas concilia, & Summi Pontifices semper suas definitiones exegere, nempe ad scripturam communi Patrum sensu ad litteram explicatam, vel ad Traditionem Diuinam ab institutione Ecclesiæ, à Christo exceptam, & apud suos seruata? His certè regulis iudicari flagitamus, & etiam nos damnari æquissimo animo patiemur. Sed quis nesciat totis viribus adiutum Authorem illum, qui ausus est distinguere triplicem Traditionem; & Ecclesiasticam,

ut distinguitur à diuinâ esse fundamentum credendorum fide Catholicâ, ac proinde diuinâ: & à locis mystico sensu à litterali alieno explicatis, posse erui distinctiones fide diuinâ certas? Et hoc Ludouici iudicio est pacem sanctè seruare, & etiam Ecclesiæ honori, ac Summorum Pontificum infallibilitati consulere. Hæc à me inuito dicta sunt, ut amoueam accusationem pacis à nobis turbatæ, quam à suis sanctè obseruaram esse iurat.

ARTICVLVS SECVNDVS.

*Solutio trium Argumentorum quæ Carterius
indissolubilia putat.*

NEc solùm nos malæ fidei, sed etiam summæ imprudentiæ accusat, quòd bellum instauremus nobis infelicitè successurum: *Nam stant, inquit, tria argumenta, à libertate extinctâ, à gratiâ sufficienti exclusâ per determinationem Physicam, & ab imputatione peccati Deo faciendâ, si ad omni entitatem pramoveat*: horum vero trium, argumentorum, more triumphantis, magis quam pugnantis, inquit, frustra hætenus solutio quæsitæ est, omnia distinctionum effugia de sensu composito, & diuiso, de infallibili & necessario præclusa sunt, & abstinentum vobis, inquit, fuerat à conuitiis, quæ vobis sola suppetunt in hac materiâ. Putat denique nos voluisse incautos opprimere, quibus hoc argumenti genus interdictum est: addit alia eiusdem ponderis.

Sed ut ab hoc vltimo incipiam; Vnum velim Ludouicum: an adeo desipuerint Thomistæ, ut crederent se aduersarios incautos obruturos, quod huiusmodi descriptionis argumentum interdictum sit? Vel insani sunt Thomistæ, qui id sibi persuadeant, cum legant, cum audiant, & ab antiquis, & à mediis, & à nuperis scriptoribus hæc tria argumenta vsque ad nauseam repeti, illis libros integros impleri. Adeone erunt stolidi Thomistæ, ut putent se incautos posse opprimere eos qui semper stent in armis? Aut quâ ratione dicit interdictum illis ad genus argumenti? Ergo omnes facit suos scriptores

res rebelles , & contumaces , cum nullus sit , qui huiusmodi præceptum obseruet.

Dum hos duos Authores conféro , quibus cum mea priuata (vt sic loquar) infelicitas , boni communis ratio iussit contendere , videntur mihi multis conuenire , & distare pluribus : hoc verique commune , quod magnâ fiduciâ plurima proferant , & nihil probent , ex more fortè , quo à scholis imbuti sunt , vt credant se semper cum pueris agere , & fidem dictorum etiam si non probent , præcipere. Hoc vero differunt , quod Ludouicus multa iactet ad suorum gloriam , Petrus verò infinita congerat , & falsa ad aliorum infamiam. Quidquid tandem sit , non plus virium , & sanguinis inest Ludouico , quàm Petro : argumento sint , quæ scribit ad finem capitis tertii , *nos aliquid aura apud plebeculam scholasticam captare velle ; nec nobis superesse , in his controuersis præter conuitia.*

Hæc verba sunt , & vox , præterea nihil. Vt verò re ipsâ repellam eâdem , quâ de libertate , methodo , tria mihi , de scientia media distinguenda censeo , originem , vnde vel repeti , vel refelli potest : ipsius essentiam ; & tandem proprietates , aut consecutiones. Circa quodlibet horum capitum Thomistæ , præter conuitia , quæ Aduersario relinquunt vtenda , habent insuperabilia argumenta. Insinuauit quæ ex primo capite desumuntur. Si Deus cognoscat creaturas possibles in suâ essentiâ , vt in causâ , & in medio cognito , subinde cognoscet futura conditionata , vel absoluta in eadem essentiâ , quæ est eius obiectum adæquatum , non nudè sumptâ , sed determinatâ per decretum : Si hæc Principia , vt sunt solidissima , stent , vnde scientiæ mediæ origo ? Quæ fundamenta , quibus inniti possit ? Nulla planè nisi commentitia. Quod satis demonstrant conatus recentiorum omnium supra à me relati , quibus hoc immobile principium euersum volunt : certè non ita allaborarent in stabiliendâ scientiâ , & labefactandis nostris Principiis , si nihil haberemus præter conuitia , vt dicit Ludouicus per summam cæcitatem , aut inscitiam ; hoc secundum malim credere , quia doctrinam hanc scholæ , quâ fortè magis tinctus , quàm imbutus fuerat , omnino deleuerunt , quibus detinetur , occupationes quotidianæ ,

Argumenta secundi generis ab essentiâ ipsius scientiæ mediæ petita attingam refutatione eius cap. 4. & 13. tui libelli.

Quod ad tertiam partem attinet de consecutionibus ex scientiâ mediâ ; verum est , quod antea monui ; vos nullas habere rationes à priori , quibus proberis ; à posteriori fateor , vos habere illa tria , quibus triumpho toto illo cap. 3. & nihil nos habere dicis præter conuitia quibus respondeamus. Sed paucis , meo more , & quantum Apologiæ breuitas patitur , demonstro , nos habere arma solidissima , & inuicta , quæ opponamus , & omittis illis , quæ alias de libertate diximus & de collatâ cum Calvinistis , & Iansenistis nostrâ doctrinâ , quibus plan euanescit tuum primum argumentum contra prædeterminationem ab extinctâ libertate ; duo noua , & singularia addo , quæ nihil habent conuitii , sed solidissimæ doctrinæ , eaque repeto à duobus Societatis scriptoribus non minus ingenio , quàm dignitate eminentissimis , scilicet à De Lugo , & à Bellarmino.

Primus , tomo de pœnitentiâ , cum quærit , dispensat an actus contritionis sit effectiuè à charitate habituali , fatetur si semel admittamus mutuam dependentiam dispositionis , & formæ , in diuerso genere causarum præmotionem Thomistarum tutam esse ab omnibus argumentis , quæ petuntur à libertate extinctâ : Id verum principium mutæ causalitatis , solidum , Peripatetice cum ex Philosophiâ & Theologiâ admittendum , præter innumera , quæ id probant , attingo obiter id , quod à angustias , & ad agoniam redegit De Lugo , nempe gratiam Christi meritis comparatam Beatæ Virginis , aliis Maioribus , à quibus procreatus est : ergo ab illo pendebat secundum causæ Physicæ generantis , & receptæ ab illo pendebant iuxta genus causæ moralis meritoris : quid ad hæc De Lugo tractatu de Incarnationis disputatione 12. de gratiâ antiquorum Patrum ?

Responderet Christi corpus agoniam horti ita malè habere , & vexatum , ut cum nec incolumitas illi constaret nec mors arceri posset , auxilio , vi generationis maternæ , & antecessorum debito , aduocandum fuisse validius quo seruata humanitas , ubi ab influxu B. Virginis , Maiorum exempta est , & mortem passura , illis

toti humano generi salutem comparauit. Nonne verè illud principium mutux dependentiæ causarum, Thomisticæ Doctrinæ propugnaculum ad angustias, redegit hunc Theologum, coactum effugere vim argumenti eâ subtilitate, quæ verè sicut de illo dicebat vir è Societate grauissimus, desinit in aristam? Nec solùm futilis, & absurda est, sed non videtur etiam aliquâ specie impietatis carere, quòd Christum Redemptorem suæ Matris, Maiorum, & subinde totius generis humani constituat, cum desit esse filius Virginis, seu quod perinde est, nihil seruauit illorum, quæ ex generatione Matris, & ex filiatione receperat. Vides Ludouice, nos præter conuitia habere, quæ reponamus.

Sed miraberis me Bellarminum aduocare ad subsidium Thomistarum, cum illorum præmotionem deferat posterioribus editionibus; (nam priori aliud docuisse audiui, & ex præcepto Societatis vel ipsum, vel eius librum correptum) quidquid tandem horum sit verius, (quod mihi incertum est,) non potest Ludouicus dubitare, in rebus Theologicis, & Philosophicis versatus, quam vrget de gratiâ efficaci, & præmotione cum libertate discordia difficultatem, locum habere de Imperio, seu quod perinde est, de iudicio intellectus practico, à quo non possit voluntas in sensu composito dissentire. Huius iudicii vltimi necessitatem ad omnes voluntatis actus admittit Bellarminus Controuersia de libero arbitrio, ergo illud cum libertate componit iudicium quod non minùs necessariò seu infallibiliter infert actum voluntatis, quàm prædeterminatio; ergo non potest illam damnare, quasi extinctæ libertatis causam, cum iudicium illud ab hac noxâ absoluat. Post istud monitum puto editionem Bellarmini proximè futuram, emendandam esse, ne hanc responsionem suppediret Thomistis, quæ clypei loco illis esse possit.

Ad secundum etiam argumentum, præter conuitia habemus quæ respondeamus ex D. Augustino, à quo præsidium validius, quàm à De Lugo, aut Bellarmino repetimus. Non potest negare nisi proteruus, aut ignarus controuersiarum Augustinum inter & Pelagium, quin tandem hic hæresiarcha post multas tergiuersationes à lege externâ, libero arbitrio, quibus gratiam Christi

sultem intentantis suspensio ictu : *castigarem te, nisi sentirem me irā commotum* : nec minùs commendandus, aut imitandus est mos inter iudices receptus, ut is à iudicio, vel arceatur, vel sponte secedat, si minima suspicio sit, illum aliquid gratiæ, vel odio ex amicitia, aut iniuriæ sensu daturum. Deinde ipsimet hostes in medio ardore pugnæ, non sibi omnia permittunt, & ad suam laudem referre putant, si aduersarij virtutem agnoscant, & aliquando etiam admirètur. Has omnes leges iure gentium, aut naturæ sancitas, vel ignorauit omnino, vel neglexit Ludouicus, hoc certe liberiori, aut iniquiori in Mariales iudicio, quo nihil in eius opere dicit se *deprehendere, nisi barbariem, & inscitiam, & prorita quaque, &c.* At ego contra, & qui minùs odio indulgebit, mecum assentiet, plura ibi bona esse recondita, quæ faciliè alibi non reperias, & licet stylo Tullium non referat, aut Canum æquet, certerò attollit se aliquando supra simplicem, & rudem Scholæ modum loquendi. Sed ne videar Lectori aliquid gratiæ, sicut Ludouicus plurimùm odio, dare, de diligentia & eruditione Authoris, tum iudicium esto Lector erudite, qui longiùs abes ab odio & gratia, sicut & ab illorum causis.

PARAGRAPHVS TERTIVS.

Leuiores querimonia Carterij depelluntur.

Sed grauissimè conqueritur Ludouicus ad finem capituli primi, & toto tertio, & alibi frequenter, pacem Dominicanos inter & Iesuitas seruata à suis religiosè, fuisse frustrà turbata à Mariales, nomine quasi omnium nostrum : *quamvis enim, inquit, multiplicem ipsis exposculandi occasionem praberent Dominicani, maximè in librorum editione, ventione, & confixione : idque per summam iniuriam : sustinebant tamen, & studio pacis tacitè concoquebant, ne vel aliquid excideret, quod Christianam, & Religiosam pacem perturbaret.* Multa subinde ad finem illius primi capituli adiungit sibi commoda comparata ex Iansenij damnatione,

& subducta nobis. Si Mariales prodiiſſet ante Petrum; difficilius fortè agnoſceretur, an nos ipsis expoſtulandi occaſionem dederimus, an ipsi nobis præbuerint.

Sed hanc dubitationem omninò ſuſtulit liber Petri, qui videtur primus clauſicum cecinisse: & quamuis ex addeò virulento, & intolerabili libro non fuiſſet facta hæc ad noſtræ cauſæ æquitatem maxima acceſſio; non facile conceſſerim Ludouico, quæ ipſe obtendit, & nulla ratione probat, (ſicut eſt eius mos per totum librum perpetuus, vt meritò vocari poſſit, aſſertiones Ludouici, & nulla probationes, quia fortè per alias occupationes animabus vtiliores non licebat inquirere;) non admiſerim, inquam, hæc mala, quæ ait ſuis illata à Patribus noſtris in editione librorum, nec commoda ad ſuam cauſam ex Ianſenij condemnatione parata.

Primum caput reſipit querimoniam Petri toties de ſuis libris iteratam, & à me validè reſutatam, cui reſponſa ſæpè à me facta, ſibi Ludouicus data reputet. Mirum eſt certè, quod addit ſecundò, datas occaſiones ex Ianſenij cenſura in nos agendi, quodd in eadem damnatione nos putat fuiſſe prætermiſſas ſtudio pacis, quam nos primi turbatum iuimus? Scio cum à vobis, & à Pariſienſibus damnatio Ianſenij vrgeretur, rogatos Thomiſtas, ne illi intercederent: imò datam fidem, ſe nihil contra nos moliri aut cogitare, & Societatem ad concordiam initam. Scio etiam à Confeſſario Regis Chriſtianiffimi Patre Annato dictum, doctrinam Thomiſtarum in tuto eſſe damnato Ianſenio. At quis veſtrum, præter iſtum à me nominatum, hanc cautelam & moderationem adhibuit? Quis concordiam initam ſeruauit? Quid ſcripta veſtrorum authorum, in collegiis diſputationes, Quid concionatores in pulpitis aliud inclamant, quàm bellum in Thomiſtas; nec poſſe damnato Ianſenio eandem damnationem euadere? Atque inter hos tumultûs, qui cōtinuò perſtrepunt per totum orbem Chriſtianum, neque vñquam conquieſcunt: Sanctè iurat Ludouicus, pacem à ſuis religioſiſſimè obſeruata: Seridè ne an per ironiam ſcribit, dum perpetuum bellum vbique terrarum ſine vllis induciis pacem vocat? Et ſi vel vnus noſtrum velit his vociferationibus publicis,

& priuatis intercedere , Ludouico belli buccinator , & pacis publicæ perturbator est.

Præter hæc , quintus annus excurrebat ab editione , & publicatione infamis libelli, *de immunitate Cyriacorum à censurâ* , qui primùm è Lugdunensi prælo & Collegio emissus , ac partim Authore amicos donante , partim chariis per submissos vendente, vbique terrarum maxima alacritate spargebatur : nec tamen illius nos prohibitionem curauimus : nam quinto post eius editionem ac promulgationem anno damnatus est à sacra Congregatione , nobis eius damnationem , nil omninò curantibus , sed tantùm eminentissimis ipsis ludicibus, qui etiam in eo libello traducebantur, vrgentibus.

Certè Dominicani , qui libelli *de immunitate Cyriacorum* prohibitionem curarunt , non potuerunt malitiosè operum Marialis prohibitionem impedire , aut differre : nec sacre Congregationis Indicis Secretarius in causa fuit , vt asserit Carterius , cur Marialis censura differretur. Sed dilationis causa fuit , quia cum Marialis opus sit in quatuor tomos distributum , necessarium fuit , censoribus tempus congruum assignare, quo totum opus diligenter discuterent, & sacre Congregationi referrent, quæ præterea tres censores adhibet de librorum prohibitionem differentes antequam configantur. Ad hæc autem omnia longo opus est tempore , nec potuit illico Mariales damnari , ex Carterij voto. Vellet in suorum Authorum libris discutiendis longissimum expendi tempus, nec eos vmquam prohiberi ; Dominicanorum vero libros , vellet nec etiam discussos illico damnari , & configi.

Non addam nihil omissum , vt in nos , & in D. Thomam aliquid ex Cathedra statueretur. Sed quibus principiis , & quibus regulis ? An his ad quas concilia , & Summi Pontifices semper suas definitiones exegere , nempe ad scripturam communi Patrum sensu ad litteram explicatam , vel ad Traditionem Diuinam ab institutione Ecclesiæ , à Christo exceptam , & apud suos seruata ? His certè regulis iudicari flagitamus , & etiam nos damnari æquissimo animo patiemur. Sed quis nesciat totis viribus adiutum Authorem illum , qui ausus est distinguere triplicem Traditionem , & Ecclesiasticam ,

ut distinguitur à diuinâ esse fundamentum credendorum tunc Catholicâ, ac proinde diuinâ: & à locis mystico sensu à litterali alieno explicatis, posse erui distinctiones fide diuinâ certas? Et hoc Ludouici iudicio est pacem sanctè seruare, & etiam Ecclesiæ honori, ac Summorum Pontificum infallibilitati consulere. Hac à me inuidicta sunt, ut amoueam accusationem pacis à nobis turbatâ, quam à suis sanctè obseruatam esse iurat.

ARTICVLVS SECVNDVS.

Solutio trium Argumentorum quæ Carterius indissolubilia putat.

NEc solum nos malæ fidei, sed etiam summæ imprudentiæ accusat, quodd bellum instauremus nobis infelicitè successurum: *Nam stant*, inquit, *tria argumenta, à libertate extinctâ, à gratiâ sufficienti exclusâ per determinationem Physicam, & ab imputatione peccati Deo faciendâ, si ad omni entitatem pramoveat*: horum vero trium, argumentorum, more triumphantis, magis quam pugnantis, inquit, frustra hætenus solutio quaesita est, omnia distinctionum effugia de sensu composito, & diuiso, de infallibili & necessario præclusa sunt, & abstinendum vobis, inquit, fuerat à conuitiis, quæ vobis sola suppetunt in hac materiâ. Putat denique nos voluisse incautos opprimere, quibus hoc argumenti genus interdictum est: addit alia eiusdem ponderis.

Sed ut ab hoc vltimo incipiam; Vnum velim Ludouicum: an adeo desipuerint Thomistæ, ut crederent se aduersarios incautos obruturos, quod huiusmodi descriptionis argumentum interdictum sit? Vel insani sunt Thomistæ, qui id sibi persuadeant, cum legant, cum audiant, & ab antiquis, & à mediis, & à nuperis scriptoribus hæc tria argumenta vsque ad nauseam repeti, illis libros integros impleri. Adeone erunt stolidi Thomistæ, ut putent se incautos posse opprimere eos qui semper stent in armis? Aut quâ ratione dicit interdictum illis ad genus argumenti? Ergo omnes facit suos scripto-

res rebelles , & contumaces , cum nullus sit , qui huiusmodi præceptum obseruet.

Dum hos duos Authores conféro , quibus cum mea priuata (vt sic loquar) infelicitas , boni communis ratio iussit contendere ; videntur mihi multis conuenire , & distare pluribus : hoc virique commune , quod magnâ fiduciâ plurima proferant , & nihil probent , ex more fortè , quo à scholis imbuti sunt , vt credant se semper cum pueris agere , & fidem dictorum etiam si non probent , præcipere. Hoc vero differunt , quod Ludouicus multa iactet ad suorum gloriam , Petrus verò infinita congerat , & falsa ad aliorum infamiam. Quidquid tandem sit , non plus virium , & sanguinis inest Ludouico , quàm Petro : argumento sunt , quæ scribit ad finem capitis tertii , *nos aliquid aura apud plebeculam scholasticam captare velle ; nec nobis superesse , in his controuersis præter conuitia.*

Hæc verba sunt , & vox , præterea nihil. Vt verò re ipsâ repellam eâdem , quâ de libertate , methodo , tria mihi , de scientia media distinguenda censeo ; originem , vnde vel repeti , vel refelli potest : ipsius essentiam ; & tandem proprietates , aut consecutiones. Circa quodlibet horum capitum Thomistæ , præter conuitia , quæ Aduersario relinquunt vtenda , habent insuperabilia argumenta. Insinuauit quæ ex primo capite desumuntur. Si Deus cognoscat creaturas possibles in suâ essentiâ , vt in causâ , & in medio cognito , subinde cognoscer futura conditionata , vel absoluta in eadem essentiâ , quæ est eius obiectum adæquatum , non nudè sumptâ , sed determinatâ per decretum : Si hæc Principia , vt sunt solidissima , stent , vnde scientiæ mediæ origo ? Quæ fundamenta , quibus inniti possit ? Nulla planè nisi commentitia. Quod satis demonstrant conatus recentiorum omnium suprà à me relati , quibus hoc immobile principium euersum volunt : certè non ita allaborarent in stabiliendâ scientiâ , & labefactandis nostris Principiis , si nihil haberemus præter conuitia , vt dicit Ludouicus per summam cæcitatem , aut incitiam ; hoc secundum malim credere , quia doctrinam hanc scholæ , quâ fortè magis tinctus , quàm imbutus fuerat , omnino deleuerunt , quibus detinetur , occupationes quotidiana,

Argumenta secundi generis ab essentiâ ipsius scientiæ mediæ petita attingam refutatione eius cap. 4. & 13. tui libelli.

Quod ad tertiam partem attinet de consecutionibus ex scientiâ mediâ ; verum est , quod antea monui , vos nullas habere rationes à priori , quibus probetis ; à posteriori fateor , vos habere illa tria , quibus triumphas toto illo cap. 3. & nihil nos habere dicis præter conuitia , quibus respondeamus. Sed paucis , meo more , & quantum Apologiæ breuitas patitur , demonstro , nos habere arma solidissima , & inuicta , quæ opponamus , & omiffis illis , quæ alias de libertate diximus & de collatâ cum Calvinistis , & Iansenistis nostrâ doctrinâ , quibus planè euanesceat tuum primum argumentum contra prædeterminationem ab extinctâ libertate ; duo noua , & singularia addo , quæ nihil habent conuitii , sed solidissimæ doctrinæ , eaque repeto à duobus Societatis scriptoribus non minus ingenio , quàm dignitate eminentissimis , scilicet à De Lugo , & à Bellarmino.

Primus , tomo de poenitentia , cum quærit , disp. 8. an actus contritionis sit effectiue à charitate habituali , fateatur si semel admittamus mutuam dependentiam dispositionis , & formæ , in diuerso genere causarum , præmotionem Thomistarum tutam esse ab omnibus argumentis , quæ petuntur à libertate extinctâ : Id verò principium mutæ causalitatis , solidum , Peripateticum ex Philosophiâ & Theologiâ admittendum , præter innumera , quæ id probant , attingo obiter id , quod ad angustias , & ad agoniam redegit De Lugo , nempe gratiam Christi meritis comparatam Beatæ Virgini , & aliis Maioribus , à quibus procreatus est : ergo ab illis pendebat secundum causæ Physicæ generantis , & reciproce ab illo pendebant iuxta genus causæ moralis meritorix : quid ad hæc De Lugo tractatu de Incarnatione disputatione 12. de gratiâ antiquorum Patrum ?

Respondet Christi corpus agoniam horti ita malè habitum , & vexatum , ut cum nec incolumitas illi constare , nec mors arceri posset , auxilio , vi generationis maternæ , & antecessorum debito , aduocandum fuisse validius quo seruata humanitas , ubi ab influxu B. Virginis , & Maiorum exempta est , & mortem passura , illis &

toti humano generi salutem comparauit. Nonne verè illud principium mutuz dependentiæ caularum, Thomisticæ Doctrinæ propugnaculum ad angustias, redegit hunc Theologum, coactum effugere vim argumenti eâ subtilitate, quæ verè sicut de illo dicebat vir è Societate grauissimus, desinit in aristam? Nec solùm futilis, & absurda est, sed non videtur etiam aliquâ specie impietatis carere, quodd Christum Redemptorem suæ Matris, Maiorum, & subinde totius generis humani constituat, cum desit esse filius Virginis, seu quod perinde est, nihil seruauit illorum, quæ ex generatione Matris, & ex filiatione receperat. Vides Ludouice, nos præter conuitia habere, quæ reponamus.

Sed miraberis me Bellarminum aduocare ad subsidium Thomistarum, cum illorum præmotionem deserat posterioribus editionibus; (nam priori aliud docuisse audiui, & ex præcepto Societatis vel ipsum, vel eius librum correptum) quidquid tandem horum sit verius, (quod mihi incertum est,) non potest Ludouicus dubitare, in rebus Theologicis, & Philosophicis versatus, quam vrget de gratiâ efficaci, & præmotione cum libertate discordia difficultatem, locum habere de Imperio, seu quod perinde est, de iudicio intellectus practico, à quo non possit voluntas in sensu composito dissentire. Huius iudicii vltimi necessitatem ad omnes voluntatis actus admittit Bellarminus Controuersia de libero arbitrio; ergo illud cum libertate componit iudicium quod non minùs necessariò seu infallibiliter infert actum voluntatis, quàm prædeterminatio; ergo non potest illam damnare, quasi extinctæ libertatis causam, cum iudicium illud ab hac noxâ absoluat. Post istud monitum puto editionem Bellarmini proximè futuram, emendandam esse, ne hanc responsionem suppeditet Thomistis, quæ clypei loco illis esse possit.

Ad secundum etiam argumentum, præter conuitia habemus quæ respondeamus ex D. Augustino, à quo præsidium validius, quàm à De Lugo, aut Bellarmino repetimus. Non potest negare nisi proteruus, aut ignarus controuersiarum Augustinum inter & Pelagium, quin tandem hic hæresiarcha post multas tergiuersationes à lege externâ, libero arbitrio, quibus gratiam Christi

principio sui erroris contineri censebat, confugerit ad gratiam moralem interioris cogitationis, atque ab hoc præsidio pulsus agnouerit gratiam interiorem supernaturalem, quæ daret non solum facilius, sed simpliciter posse; nec ea contentum Augustinum, ab illo exegisse tandem, & argumentis etiam euicisse, necessariam esse gratiam ad posse, & ad velle. Et hic fuit finis disputationum Augustini cum Pelagio, & victoriarum, quas Ecclesia illo fortissimo Duce retulit ex callidissimis, & subtilissimis hæreticis: ergo præter illam gratiam, quæ dat posse, quam admittebat Pelagius, necessaria est gratia, quæ det velle; eamque contra Pelagium docuit Augustinus.

Quid tandem ad tertium argumentum præter conuitia reponemus? Responsionem à te ipso petitam, non magis concursus præuius si aliunde libertatem tollat, ut primi argumenti solutione monstratum est, asciscit Deo peccati notam, quam concursus simultaneus ad eiusdem peccati entitatem: Atqui tu, tuique hunc concursum conceditis, nullam creare Deo suspicionem, ne sit author peccati, cuius est vindex; Ergo vos causam nostram agitis, vel vnius concursus ab altero discrimen nobis demonstrate.

ARTICVLVS TERTIVS.

Alia accusationes depelluntur.

QUæ initio cap. 4. Ludouicus verba usurpat, ab illo iustius mihi vindico: *Parum abest quin oculis meis fidem omnem desrectem*, cum lego Mariali imputari verba Tomi primi controuers. Prolegom. Tom. 4. & in aliis duobus passim, verba, quibus sententia Societatis opposita damnatur tanquam blasphema in Philosophiâ &c. Bene est, quod nobis quatuor Tom. assignet, ut quæ semipagina sui libelli continentur verba inquiramus, quasi originem Nili, vel folia Sybillæ vento dispersa. Certe nimium parcat labori suo Ludouicus, & durior est exactor alieni laboris, illis, quos Pharaon Hebræis imposuerat præfectos operis diurni; cum iubet nobis semipa-

ginam sui libelli inquirere per quatuor tom. Haud scio an plurium dierum impendio possemus consequi, quæ præcipit, aut ferre onera intolerabilia, quæ, si noluit digito mouere, debebat saltem indicare nobis. Nimirum fudit sibi, si speret Lectores, aut parituros vt longam illam indaginem suscipiant, vel credituros dictis illius, qui abdicatâ omni curâ inquirendi subinde ingerit nobis accusationem Calvinismi. Pelagianismi verò duplici nomine à se refellit: primò quòd frequens sit in ore Calvinistarum, & Iansenistarum, Iesuitas Pelagianos esse; quasi semper falsi sint hæretici, & nihil veri possit illis excidere. Secundò quòd illorum sententia contraria sit Calvinistica, quasi duo contraria simul falsa esse nequeant?

Obiectio Calvinismi, & Iansenismi validissime occupata est aliis locis, vt nihil opus sit addere præter hæc tria. Miror te adeo iniuriarum confictarum memorem & obliuiosum esse verorum beneficiorum: non potes negare, vos Patris Nicolai Dominicani, aliorumque Thomistarum operâ primam victoriam reulisse apud Sorbonam ex Iansenio, quam reliquæ consecutæ sunt. Huius beneficij à Thomistis recepti, altum apud vos silentium, & nescio quas à Nolano, aut Reginaldo commentitias iniurias continuo recolitis: forte etiam vlturi, nisi primum mors foelicitissima, alterum secessus ab omni contentione subduxisset. Quod autem congressus cum Iansenianis refert & obiicit Ludouicus, nescit etiam habitos fuisse cum Domino Halier, & Aduersariis Iansenistarum? Quia nullos à nostro congressu exclusimus. Patris Candidi suffragium censorium sugillat in gratiam illarum propositionum, cum nemo hactenus negarit aliquo sensu Catholico admitti posse, sicut hæretico absolutè damnatæ sunt.

Quod ex Cardinali Perronio narrat, dixisse Paulo V. Calvinistas omnes Gallix subscripuros sententiæ Thomistarum: vel hoc numquam à doctissimo Cardinali dictum est; vel illum latuit discrimen inter Thomistas, & Calvinistas, à me demonstratum: vel denique, ille assensus admissus à Calvinistis, eorum quæ ab ipsis negantur, & à Thomistis asseruntur, felicissimè Ecclesiæ successisset aduocatis ad fidem Catholicam hæreticis: sed nescio an

iudicij temerarij sim arguendus , si suspicer , te malle illos extra Ecclesiam hæreticos , quàm conuersos intra Ecclesiam Thomistis accedere. Adeo tuæ causæ priuaræ vbique faues , vt communi anteponas , vel cerè æques : quia forè indiuiduam esse tibi persuades. Sed licet probabilem non negemus vestrâ opinionem , nullus catholicè dicere potest catholicâ fide tenendam , nisi velit Augustinum , & Thomam è numero Catholicorum excludere. Quem cum Calvinistis iactât consensum nostrum , repulimus alias , etiam sibi necessaria responsione.

Quæ dicit ad finem cap. 3. per ironiam , vt pro summâ , quâ Romæ pollemus , autoritate , satagamus litem nostram dirimi , & hoc gratissimum fore Iesuitis. Hæc verba sunt; Recusauimus ne vñquam rem definiri? Retrocessimus ne à disputatione? Rôgauimus ne Pontifices , vt Congregationes finirent , vel à definitione superfederent? Addis trium hominum genus esse quibus sub fine capitis 4. dicis inuisam Societatis doctrinam , nempe hæreticos , inuidos , & ignaros : bene est quod tibi canas ; sed non omnes hanc trimembrem diuisionem adæquatam esse admittent. Interim permittimus , te beatitudine , quam tibi more antiquorum Philosophorum beneficio rationis confecisti , largissimè frui.

PARAGRAPHVS PRIMVS.

Censura Historia Penne à Dominicani recepta.

QVi libris Euangelicis authoritatem illam , quæ credibilitatis euentia vocatur conciliant , hoc maximè argumentum vrgent ; Scriptores sacros narrasse comperta suo tempore , & communi famâ vulgarissima , qualia sunt Christi prædicantis miracula , aut illo patiente solis defectus , qui toti orbi innotuit : Vel ergo facta referunt , vel omnino conficta ; si istud vltimum dicas , ergo nullus illis fidem habuit : cum rerum gestarum quas scribunt , ferè omnes in Iudæâ testes adessent , qui poterant dictis illorum intercedere , & omnem fidem abrogare : si primum admittas , ergo Euan-

gelium

gelium tot præiudiciis munitum est euidenter credibile; Congregationes de auxiliis habitæ sunt in theatro totius vniuersi celeberrimo, totâ Europâ spectante.

Rerum ibi gestarum memoriam non à Francisco Penna, cuius historiam prohibendam curastis, & prohibitam volo, sed præterea omnium Doctorum traditione excepimus; velle autem quæcumque hac communi famâ constant, in dubium reuocare, perinde est, ac Rauennatensem Gallorum, vel Peloponensem Christianorum de Turcis victorias confictas dicere, etiam si historiæ omnes, quæ vtramque referunt, perirent, aut prohiberentur. Nulla vnquam lex Principum iussit, nec passa est hanc fidem communem, traditionem, etiam sine scripto receptam, deleri, aut damnari, alias tyrannis esset, non legitima potestas, quæ ius in memoriam, aut fidem publicam sibi vindicaret.

At inquires, duplici decreto transfixa est historia Pennæ: non ignoro: quid inde? Ergo in posterum de his rebus præceptum est altum silentium? Hoc perinde est, ac si quis violati confessionis sigilli re accusaret, si de re à pœnitente tibi auditâ, sed aliunde rumore vulgî nota loquereris. Quæ de rebus in Congregatione gestis narrantur à Penna; ab illo non recepi, nec didici: sed ab eodem canali, vel oraculo, à quo hausit Ludouicus, quæ superiori cap. de Cardinali Perronio retulit. Illud ergo compertissimum est totius Europæ opinione, & fama, vtrumque Pontificem Clementem, & Paulum, & Consultores omnes, si vnum excipias, fuisse in D. Thomæ (quam D. Augustini censebant,) sententiam propensissimos, ac proinde minùs Molinæ beneuolos, quî ab vtroque se recessisse fatebatur: reliqua, quæ inde consequuntur, apud se repute, Lector.

Vnum non omitam, quod ex ore Archiepiscopi celeberrimi mementi me excepisse, scilicet dum hæ disputationes Romæ feruerent, sapientissimum Curielem rogasse Summum Pontificem, à definitione abstineret, quod concordia gratiæ efficacis & libertatis fide constaret, & vtrique schola saluam vellet contra hæreticos. An verò concordia fieret beneficio scientiæ mediæ, aut potentissimâ, & occultissimâ virtute gratiæ, ad quæstionem metaphysicâ pertinere non ad Ecclesiæ definitiones,

Vtinam consilium celeberrimi Theologi vti Summis Pontificibus, ex euentu iudico placuisse, ita etiam utriusque contententium parti probaretur, & in illo conquiescerent: quod ad me attinet, ita mihi semper placuit, vt numquam passus sim ab illo me abripi, quod instar portus elegeri. Et si quando videar fortè ardentius in Aduersarios agere; hoc à me factum velim, sciante omnino, ne libertatem, quam illis indulgeo in his conuersionibus, mihi patiar eripi ab his, qui nolunt æquo iure viuere, & sua sensa putant esse fidei decreta: hoc meum consilium, & assilum sequetur sine dubio, quisquis verè sapiet.

Dum breuitati sic studeo, vt nolim rem vllam alitius momenti prætermittere, capita decurro cognatione materiæ potiùs, quàm ordine iuncta, vt si fieri possit, vnâ responsione plura diluam.

PARAGRAPHVS SECVNDVS.

Duplex querimonia depellitur.

Postquam duodecimum caput legi, ita mihi visus est Mariales extra chorum saltasse, & relatione Ludouici ita grauitèr peccasse, impropèratâ primò auaritiâ, & opulentiâ Societatis, secundò sugillatâ eius scriptorum eloquii venustate, tanquam pedanticâ, & doctrinâ quasi Pandoricâ, ex alienis confarcinatâ, denique constitutionibus laceffitâ quasi remoto sigillo confessionis velint Superiori consentientium inclinationes posse manifestari, ne in delectu missionum errant. Ita, inquam, hæc iudicabam enormia, vt penè Marialis defendendi cogitationem abiicerem, & illius damnationi subscriberem; nolui tamen sinauditum damnare, consului loca citata: & vidi eius culpam, si quæ sit, in maius fuisse auctam. Quæ arbitrabar spontè dixisse, inuitus scripsit, vel à te ipso deprompsit, vel ex aliis retulit, vel denique non exerte pronunciauit, sed hypotheticè tantùm protulit: Basiam defensorem habet.

Iste Author similis omnino scriptori anni sæcularis & quo supra, sibi, suisque mirè canit, & Narcissum agit

quod vix citra aliorum vituperium, aut modestiæ noxam fieri potest. Societatem attollit supra omne, quod humanum est, & vult illi datum Christi nomen, quod est pusillis incommunicabile: quia ipsi sunt, plusquam homines, & angeli, & illis accommodat illud. *isaïæ; Oculi videbunt Ierusalem; quasi dixisset, ait Baesa, Videbunt oculi Societatem Iesu Civitatem opulentam.* Non putavit Mariales intempestivum illud modestiæ humanæ, vel Christianæ exemplum a tot Principibus usurpatum, ut dum suppetunt occasiones alta de se cogitandi, subiciatur aliquod monitum, quo utiliter deiciantur, sicut Rex ille qui volebat ab uno ex suis domesticis sibi singulis diebus repeti; *memineris te hominem esse.* Sic enim principes, & magnates salubriter erudiuntur, ne inani gloriæ studeant, nec vulgi aurâ se abripi patiantur, cum videant suam felicitatem fragilem, & caducam. Dum ergo Baesa sic opulentiam Societatis prædicat, ut videantur præ illâ reliqui paupertate sordescere, ne fortè nimium sibi blandiretur, suggessit verbum Mariales: non esse, quod loquatur de illâ opulentia, quam multorum lachrymæ, qui ad pauperiem redacti sunt, satis euulgant.

Sic etiam scriptores Societatis non vult tantum præcipuos esse Ecclesiæ athletas, sed penè solos, qui scripto, aut verbo hæreticos debellarint, & nullum in arenam descendere, ad fidem propugnandam, nisi Bellarmini armis instructum, quasi Echius Lutheri, & omnium eius discipulorum domitor, quasi Coclaeus, qui capite volebat luere, nisi victor ex disputatione contra Lutheranos rediret: quasi Rossensis, non minùs victoriis contra Lutheranos, quam martyrio illustris; quasi tot heroës, qui ex Academiâ Louaniensi prodire, Driedo, Taper, Somnius, Lindanus: vel ex Parisiensi nihil Louaniensi inferiori, quasi Cardinales Hosius, Perrenius, non minùs ingenio, & eruditione, quàm dignitate Bellarmino pares, quasi confessus tot Episcoporum, tot Theologorum in Concilio Tridentino, & omnium denique Ordinum Scriptores, inter Franciscanos Andreas Vega: inter Cappucinos Boverius: inter Dominicanos, Graulina, & Coëffeteus, inermes, ignavi, aut pugna tantum spectatores fuerint.

Vnde vt hanc verè militarem iactantiam Mariales paulùm deiiciat, opponit duo: quæcumque Patres illi habent, aut certè præcipua, desumpta esse ex sanctis Patribus. Neque enim ipsemet Bellarminus (quem Marcus Antonius de Dominis immeritò Pontificiorum Compilatorem, vocat, cum Author sit illustrissimus, non solum collectis diligenter Catholicorum argumentis, sed plurimis à se inuentis, & addito controuersis ordine mirabili) negabit, cum sit modestissimus, perinde ac doctissimus, se in controuersis de Ecclesiâ, de Conciliis, à Turecremata, à Caietano, à Cano; de Eucharistiâ à Sanctesio, & vbiq; à D. Thomâ oppidò fuisse adiutum: sola gloriatio Baesæ extorsit à Mariali, quæ aliàs ipsemet damnaret.

PARAGRAPHVS TERTIVS.

Depulsa calumnia grauior de sigillo confessionis.

NEc minùs validam, & apertam habet à Poza defensionem aduersus tertiam Ludouici; expostulationem: quasi Societatem accusauerit violari sigilli confessionis. Poza in D. Thomam maximè petulans dixit eius dogma ab Ecclesiâ damnatum, quo vult Religiosum constitui solo voto solemnì; at contrà, inquit, stat Gregorij XIII. Constitutio, quæ sancit simplici voto Patres Societatis verè esse Religiosos.

Facilis, & obuia responsio ad argumentum quæ ipsum Pozam latere non poterat, nisi maluisset parare calumniam, quàm veritatem aperire: Diuum Thomam locutum ex vsu suo sæculo ab Ecclesiâ recepto; quæ solo voto solemnì initiatos Religiosorum numero accensebat, non negatâ Pontifici potestate, solo voto simplici Religiosos iure positiuo constituendi. Mariales hac responsione minimè contentus profundiorẽ, & validiorẽ adhibet ab absurdo; non magis, inquit, constit. Gregorij dampnat hoc D. Thomæ dogma, quàm ordinem correctionis fraternæ, quo Christus statuit priùs monendum reum, quàm Ecclesiam, quem tamen ordinem immutari volunt institutiones Societa-

DEPELLITVR CALVM. DE CORRVPTEL. SS. PAT. 469
tis ab eodem Gregorio confirmata, & ab omnibus So-
cietatis professis, aut professoribus exigunt abdicatio-
nem propriæ famæ, quam si semel admittas, vti legitima
est, perinde poteris audita in confessione citra sigilli
noxam, aperire prælato, sicuti illa, quæ tibi extra con-
fessionem innotuere, ad prælatum referre, reo non mo-
nito; vtriusque eadem ratio esse potest, nempe sponta-
nea abdicatio honoris, quæ dat ius vtriusque secreti
aperiendi.

Quid ergo mali admisit Mariales, quod vt retunde-
ret calumniam Pozæ, certissimam de correctione fra-
terna, & incertam de sigillo confessionis doctrinam sub-
iecerit. Sed per summam inscitiam, aut malitiam, Lu-
dovicus putat apud Marialem, illam sigilli confessionis
relaxationem habere locum in confessionibus Regum, &
sæcularium, quas Patres Societatis excipiunt. Mera est
calumnia; numquàm hoc Mariales somniavit: quia
sciebat sola abdicazione propriæ famæ posse prætermitti
ordinem Euangelicum correptionis, aut aperiri notæ
ex confessione. Hanc vero abdicationem famæ à suis exi-
gunt, non ab extraneis.

ARTICVLVS QVARTVS.

*Vindicantur Cano, & Bannes à calumniâ lesa
Patrum reuerentia.*

R Edeo ad cap. 6. quo toto vult Ludovicus contem-
dere nobiscum de reuerentia erga Sanctos Patres,
vel eorum scripta; & cum remittit nos ad Petrum à valle
clausa, videtur probare, quæcumque in nos conuitia,
scriptor ille congeffit & potissimum corruptelam, aut
contemptum SS. PP. quæ confirmat nouis testimoniis
à Cano, & Bannesio petitis. Certè non poterat apertius
aut impensius fauere gloriæ Dominicanorum, quàm
cùm nos prouocat ad illud certamen reuerentiæ in SS.
PP. quina eos plus coluerint aut plura sibi in eorum scri-
pta permiserint. Vt prober nos defuisse officio in SS. PP.
citat sex ex Cano testimonia, totidem ex Bannes: Duo
à Cano sunt omnino extra propositum, quale est illud.

quod refert ex secundi libri cap. 4. intelligo D. Augustinum longa oratione contendere, non permissionis tantum, aut patientiæ diuinæ esse peccata, sed etiam potentia.

PARAGRAPHVS PRIMVS.

Vindicata sex loca ex Cano.

Nescio quo fine hæc verba Cani de Augustino relata sint, cum fusè probet contra Iulianum, quæ illis continentur: nec magis ad propositum est alter ex lib. 7. cap. 13. cum liber quatuor tantum capitibus contineatur: *Nemo quantumvis eruditus, & sanctus, non alicubi caecus, labitur, hallucinatur.*

Quid etiam mali, aut falsi habet hæc propositio? *Non quilibet Sanctorum infallibilitatem habet Conciliorum generalium.* Et ad hoc pertinent alia duo loca, quorum primum ex cap. 15. lib. 12. desumpsit: ibi Canus agit de immortalitate animæ: & cum Augustinus dixisset probari his verbis Christi Matth. 21. *Non est Deus mortuorum, sed viventium;* & ex aliis locis veteris Testamenti subiungit Canus illa loca, quæ videntur Augustino ex lege Moysis esse cæteris euidentiora, non sibi videri probabilia.

Quid etiam sacrilegij habet hæc propositio? Constat cum Augustino conclusioni, sed non videtur illi argumentum Augustini convincere, ergo ex Ludouico impius est Canus in Augustinum: at ego infero, ergo Ludouicus in Canum gratis maledicus est. Idem monstrat quarrus locus ex libro 4. cap. 1. vbi Canus agit de Patribus Ecclesiæ, à quibus hæreticos non excludit omnino, sicuti Cyprianum, qui rebaptisandos volebat. Augustinus, cum Cypriani esset studiosissimus, totis viribus nitebatur, Cyprianum etiam inuitum trahere ad sensum Catholicorum. Cano visa sunt verba Cypriani apertiora, quam ut benignam Augustini interpretationem reciperent: Quid inde Ludouicus potest inferre, nisi sinceram libertatem Cani?

Duobus locis, qui ex numero senario supersunt, quos

primos posuit Ludouicus, & ego vltimos ad examen seruaui, ita mala fide agis; vt non putem vmquam Notarium publicis falsatis tabellis, iniustius poenam meruisse. Parum abest, quin ipsum Petro æquem: & profectò vterque, ita omnem sinceritatem eiurauit, vt nesciam, quo loco sim vtrumque repositurus; planè neuter est dignus, cui credatur ad societatem humanam, quandoquidem omnem veracitatem neglexerunt. Contra Ludouicum duos testes aduoco: Canus lib. 7. cap. 3; hanc statuit secundam conclusionem, *Vnius, aut duorum Sanctorum auctoritas, etiam in his, qua ad litteras sacras pertinent, probabile quidem argumentum subministrare potest, firmum vero non potest.* Ita despicere, & pro nihilo habere pro certo erit omnino imprudens. En iudicium viri Sapientissimi; hanc conclusionem (inquit Canus) *demonstrat ratio illa manifesta, cui nulla prorsus via occurrere potest. Quod cum Sanctorum quisque, his dumtaxat exceptis, qui libros Canonicos ediderunt, spiritu fuerit humano locutus, & aliquando, vel in eo errauerit, quod ad fidem spectare, postea demonstratum est, aperte constat ex huiusmodi auctoritate exploratam fidem fieri non posse.*

Quæto à te Lector erudite: potest ne quid certius esse conclusione Cani, aut efficacius eius probatione? Quid horum tibi displicet, aut negas Ludouice? Quare ergo voluisti creare Cano inuidiam, confecta suis verbis hac propositione, quæ nulla fere extant apud Canum? Sic enim inducis loquentem, *errare in rebus fidei, qua non erant eo tempore definita. accidit Cypriano, Hieronymo, Augustino: vt omittam, verissimam esse hanc propositionem, quare illam confecisti tuis verbis, & affinxisti Cano tanquam propriam, nisi vt demonstrares, te hominem nullius fidei esse, aut tantæ auctoritatis, vt putea tibi licere, in aliena opera, quod in tua. Eadem corruptela, vel maiori audaciâ fingis hanc propositionem ex lib. 12. cap. 17. Augustinus in illam magis opinionem inclinat, qua docet animas à parentibus generari, quod solent tanquam erroneum condemnare. Nihil horum lego in Cano, sed istud, initio cap. docet sapius Augustinus, non esse fidei questionem, an anima rationales ex traductis sint, an potius ex nihilo in singulis creentur singula; at si*

anima hominis ex traduce vi seminis propagetur, sine dubio esset ut generabilis, ita corruptibilis.

Quid damnas in hac assertionione Cani? Non ne vera? Nonne catholica est? Cur ergo inuertis eius verba? Appono, dices fortè, æquivalentia. Bene est, expressa Authorum verba, non erant satis opportuna calumniis, oportuit noua arte illos laceßere, nempe æquivalentia verborum: hæc est nupera ars, ignota superioribus sæculis, quam nostrum peperit, & qua putasti utendum in nostros Authores, quia eorum verbis expressis nullam poteras importare calumniam, quam pura quæ probata est Dominicanorum in Sanctos Patres reuerentia, quandoquidem illius læsæ non potuisti vel minimam nobis suspicionem consistere, nisi tua verba apposuissem.

PARAGRAPHVS SECVNDVS.

Vindicatus Bannes, & detorta in Aduersarium accusatio.

EAdem sinceritate, seu maiori audacia, ne dicam malitia, agis cum Bannes. Primò putas blasphemasse; quod dixerit 1. par. q. 1. art. 8. plurimos Sanctorum fuisse magis Platonicos, quàm Peripatericos, & aliquos illorum aliquando errasse in his etiam quæ pertinent ad fidem. Et quid? Vis ne infallibiles fuisse? Visne Cypriani anabaptismum defendere? Vel negas aliquot illorum fuisse Millenarios?

Nescio vnde hauseris secundam propositionem, quam ex Bannes citas quæst. 23. art. 5. circa secundam, & quartam conclusionem. Vix possum, vel vnum verbum reperire, nisi istud, *hac sententia Augustini non modicam habet difficultatem*, ubi autem sunt, quæ adiungis, debebas annotare, ne nos torqueres indagine verborum, ex quibus fortè seiunctis confecisti propositionem, quam vocabis æquivalentem sensui Bannesi: illo autem dubio affert quinque modos explicandi D. Augustinum, & cum paulo differat a sententia D. Thomæ, isti magis adhæret.

Non es sincerior citatione 3. loci ex q. 62. art. 1. ubi inducis dicentem, sententiam Augustini, quæ primo instanti donat Angelos beatitudine supernaturali, non carere temeritate: hanc censuram non lego, sed contrâ, Augustini mentem explicat, & trahit ad sententiam communem. Vbiq; tui similis es, vix potes tria verba referre, quin corrumpas. Argumento sit quartus locus q. 64. art. 3. ubi inducit Augustinum disputandi gratiâ sententiam proponentem, cui contrariam aliis locis apertè docet, vnde respondet, argumentum, quo priorem Sententiam muniverat, nihil concludere contra certiorẽ mentem Augustini respondetur enim ex eodem Augustino. Sed tu tacuisti has circumstantias, quæ Bannesium eximant ab omni censurâ, nec tria verba potuisti fideliter referre; nam Bannes sic habet, *nec argumentum illud Augustini aliquid valet.* Tu sic magis inuidiosè refers, *argumentum Augustini nihil valet,* & taces ipsum Augustinum sic censere, quandoquidem illud soluit.

Finis superioribus respondet, neque enim progressu emendas te, sed sis deterior. Non lego q. 64. art. 4. dubio 4. sententiam Augustini temeritatis notari, sed cum reuerentiâ explicari: *respondi, inquit, dupliciter Damones reservari in iudicium ex D. Augustino & D. Petro, non ad iudicium essentiale, sed accidentale, & ut ex publicâ sententiâ patefcat eorum culpa.* Vides Ludouice, tuam accusationem, nostram esse laudem; quia nihil potuisti ex tot Authoribus colligere, quod vel minimum, vel in speciem alienum esset à reuerentiâ SS. PP. nisi tu corrumperes, nisi verba, & sensum mutares.

At si vellemus tibi par reponere, non vnã, vel alteram ex tuis scriptoribus anxie, & infelicer, vt tu fecisti, propositionem quærerem; occurrerent infinitæ: præter illas 22. contra D. August. in Hispaniâ damnatas, & alias, supra relatas è Vasquez, Adamo, Sirmundo, & aliis, vel ex vno vestrorum Authorum, quæ respiciant contemptum SS. PP. in gratiam opinionis de Conceptione. Tædet eadem repetere, responsum habes, hoc vnum certissime assero, ex omnibus nostris scriptoribus non posse colligi tot loca, quot retuli à te falsata.

ARTICVLVS QVINTVS.

Responsio ad reliquas expostulationes Carterij.

EX his, quæ diximus supra, expostulationibus pro-
 quinque ex tuis, & de scripto Roales satisfaciam
 examine sequenti: istam concludam responsione ad ex-
 postulationem pro scientiâ mediâ contra Alexandrum
 Sybille, & de editione Marialis.

PARAGRAPHVS PRIMVS.

*Controuersia cum Recentioribus de scientiâ
 mediâ Synopsis.*

AD explicationem scientiæ mediæ tria diximus ob-
 seruanda, originem, essentiam, consecutiones.
 Primam, & postremam partem iam expediuimus;
 nunc me accingo secundæ, & scientiam mediam sibi ipsi
 ruinam parare breuissimè, & efficacissimè demonstro.
 Non est dubium huius scientiæ, quam diuinæ providen-
 tiæ cardinem, & exploratricem vultis, vsum, & totam
 vim in eo sitam esse: vt cognitionem absolutorum an-
 tecedat pro illo signo, quo cognitio increata amorem,
 aut generatio verbi antecedit processionem Spiritus
 sancti; ita vt præsciat Deus consensum hominis in his,
 loci, temporis circumstantiis, à gratiâ præuenti, &
 absolute illum videat, vbi decreuerit in his circumstan-
 tiis hominem esse collocandum.

Molina qui se primum huius scientiæ Authorem iactat,
 prudenter, & accommodatissimè ad suum consilium
 hanc scientiæ mediæ, vt sic loquat, primogenituram,
 his principiis firmat: vult futura conditionata cognosci,
 non in se, quia nihil sunt, nec in comprehensione causæ
 primæ, & secundarum: sed in harum supercomprehen-
 sione, cuius vi videri existentia ea, quæ nihil sunt, &
 determinata, quæ suspensa manent: idque privilegio
 seu iure supercomprehensionis: quod cum in propriam
 voluntatem non habeat, quia se comprehendit adz-
 quare, non excedit; ideo nescit ante decretum, quid
 volitura sit, & subinde conditionatè videri tantum illa sit.

terra : quia scit quid factura sit causa secunda ; sed latet illam , quid sit decretura voluntas : & ideo futurum illud cedit sub scientiam conditionatam , vi supercomprehensionis causæ secundæ , non sub absolutam.

Sed opinio Molinæ sic explicata minimè ab eius assensibus probatur ; imò visa est commentitia , & posset sub hoc titulo depingi , *commentum , aut figmentum*. Quis enim nisi cæcus , sibi persuadeat , in causis indeterminatis videri determinata , & Deum obiecta non nosse , nisi mutet , vel se ipsum imperfectius nosse , quam creata. Ideo visum est solidiora querere , & iacere huius scientiæ fundamēta ; nec opus fuit in his inquirendis minori labore , quàm in nouo orbe aperiendo. Non incommodam ad hoc iudicauerunt , contradictoriarum propositionum legem , quam statuit Aristoteles de re præteritâ , aut præsentî , nempe alteram illarum esse determinatè veram , alteram determinatè falsam. Sed ab hac lege eximit Philosophus propositiones futurorum , quod neque in se , neque in causis determinatæ sint , ideo docet ad singulas partes non fieri descensum determinatum , sed confusum sub disiunctione , sicut cum dico , alter oculus est necessarius ad videndum : si subiungas : ergo dexter determinate , vel sinister , falsum est ; sed alterutro tantum opus est.

Quamuis apertissimum esset discrimen , propositiones inter de futuro hinc , & inde de præterito , aut præsentî , vt planè cæcus sit , qui non videat , aut proterius qui id neget ; tamen tantæ molis fuit , aut tantæ necessitatis , stabilire scientiam mediam omnium futuram eardinem , & fulcimentum ; vt ne ab vllius scientiæ ruinâ abstereretur , oportuerit illius iacere fundamenta ab elementis Logicæ conuulsis : & ab Aristotelis non solum sententiâ recedere , sed etiam illi impingere ignorantiam rerum , quas præ reliquis partibus Philosophiæ adeo subtiliter , & profundè tractauit ; vt Logica Aristotelis humani ingenij apex , & vltimus conatus meritò appellari possit.

Huc te aduoco Ludouice , cum risum , dicis , te continere non posse. Vbi audisti argumentum hoc insolubile , soluendum restare ? Puto sanè risum hunc illius generis esse , quo Saluianus sui sæculi Ieremias correptos dicebat Christianos in mediâ rerum desperatione ; nec tibi alius est ab hac difficultate exitus. Aristoteles non ignorauit rationem harum triplicis generis propositionum ,

vidit latissimum discrimen propositionum de futuro contingenti, à propositionibus de præsentī, aut præterito: has in se vel in causis determinatas, secus illas, ac proinde non pati leges contradictoriarum, nisi sub descensu confuso, ut exemplo oculi demonstratum est ad oculum, quo vno non solum colliduntur quæcumque habetis argumenta; sed etiam omnia effugia præcluduntur: ita ut siue responsionibus, siue argumentis agatis, vnica vobis supersit petitio principij, quare res futura sit, & verum sit esse futuram, respondētis quia futura est. Hoc de præsentī, & de præterito capto facillimum est; at de futuro omnem etiam effugit imaginationem illæsam.

A possibili argumentum capio ad futurum: sicut illud antequam sit in se quicquam, vel cum purè nihil est, non cognoscitur, nisi vi causarum, in quibus continetur; ita cum futurum in se nondum sit, contra sensum communem dicitur in seipso cognosci determinatè, causis etiam suspensis. Deinde cum æterna sit illius futuri cognitio, oportet illius transitus à possibili ad futurum causam dari æternam: Quæ vero alia esse potest nisi decretum? Dices ipsummet transitum tempore futurum: at quâ ratione cognoscēs? non vi causæ sed vi sui. Vides ergo te semper petere principium; te vrgeri rationibus Philosophi, differentia futuri, quod à præterito, & præsentī cum recedat & propius sit possibili, nisi lumen naturale eiurare velimus; fatendum est scientiam mediam sola petitione principij niri, & hoc est nihilum illud, vnde extracta est moles ingens, quæ colossum Babylonicum æquat, similior illi debilitate argillæ, quæ nititur, quàm reliquarum partium amplitudine.

Ad id aliud fortè validius superiori: admitto propositiones de futuro contingenti, æquo iure cum aliis frui, & iisdem omnino legibus metiendas; ita ut quo momento, etiam naturæ, aut rationis, contradictorias propositiones de futuro concipis, alteram illarum oporteat esse veram, alteram falsam, & verumque cognosci à lumine infinito, & increato: hoc est vnicū vestræ scientiæ mediæ fundamentum, quo assero non astrui, sed funditus euerri, aut quod perinde est, illius vsum prorsus tolli, ad diuinæ providentiæ ordinem stabiliendum: nam si quæ sit eius utilitas, vel efficacia, tota est in eius, ut sic loquar, primogenitura, ut antecedit absolutorū conditionem, sicut

generatio verbi, vel intellectio, amorem increatum, & personalem: & vt sit exploratrix consensus futuri sub conditione, quo cognito illasâ libertate, cognitio, & decretum de absolutis consequatur: at si ex lege contradictoriarum habeat determinatam veritatem, cur idem ius negabitur contradictoriis absolutis?

Istæ sunt ante omne decretum perinde conceptibus Dei, aut nostris obuiæ; aut, vt sic loquar, formabiles, sicuti conditionatæ; imò, cum sint simplices, & hæ compositis præeant, propositiones absolutæ occurrerent intellectui diuino, eodem rationis, & naturæ instanti, quo conditionatæ: Ergo istæ nullâ ratione antecedunt: Ergo nullus erit vsus, nec subinde subordinatio, cum nulla sit etiam rationis prioritas; ac proinde ante decretum, ante generationem verbi, & si velis etiam ante hypotheticarum propositionum formationem, determinationem, aut notitiam, stabit absolutarum propositionum certa veritas, & notitia quâ verbum procedit, vt aliquando vnus è nostris vrgebat in Thesibus publicis, & nihil responderi potuit. Antecederet etiam compositarum, & conditionatarum propositionum cognitionem. Ad quid ergo scientia media, nisi vt sit aduentus medici post mortem, & ad nihilum valeat ultra, nisi vt mittatur foras? Huius argumenti, quod sæpius Thomistæ, & maximè Gonzales vrgerent, non dicam solutionem, sed nec commemorationem factam ab Aduersariis hætenus legi, vel audiui.

Atque vt erudito Lectori breuem, & accuratam tabellam eorum subijciam omnium, quæ sparsim, prout Aduersariorum obiectiones exigebant, à me dicta sunt de nostris controuersiis, in quibus nihil nobis reliqui facit Ludouicus præter conuitia, vel auram popularæ apud ignaros, inuidos, & hæreticos: progressus nostrarum disputationum genuinam imaginem habes ex elemento aëris in tres diuiso regiones, quarum suprema spheræ ignis iungitur, media est, quâ creantur nubes, fulgura, & tonitrua, & in infima viuimus, & respiramus: hunc triplicem statum habent nostræ controuersiz, supremus est disputatio de cognitione possibilium in essentia, vt in causâ; medius est scientia conditionatæ, vel natura vel vsus; omnium infimus, sunt consecutiones, quæ potissimum tribus arguen-

tis continentur, quibus Ludouicus triumphat.

Viderit ipse, quid emolumenti referat ex primo, & secundo statu: tertio, & infimo, fateor illum aliquantulum respirare: sic tamen se ad hanc scriptionem comparauit, ut videatur potius ad triumphum, ad victoriam, vel ad prædam accessisse, quàm ad iustam pugnam: unde licet nostra responsio non habeat tot capita, quot eius liber, fortè plus habet sensus, & succi.

Carpit cap. 16. & sequenti editionem libri, & putat se conuicisse Authorem duplicis culpæ, mendacij, & violati decreti, quo prohibetur, ne quid de auxiliis edatur: Atque ut ab istis, tanquam leuioribus me breuissimè expediam: Quæro quid totâ suâ Bibliothecâ, agat noster Author? Defendit S. Doctorem: à quibus? A recentioribus impugnationibus Fasoli, Ripaldæ, &c. quæ in illorum libris extant: de quibus agunt? De his, quas à Mariali tractatas ægrè fert Ludouicus, & subinde reum peragit violati decreti Pontificij.

Mira sanè æquitas! Damnat eum, qui se & Magistrum tutatur: absoluit eos, qui huius defensionis necessitatem imposuere. Iura aggressores grauant, & fauent his qui se defendunt: At Ludouicus, si superis placeat, vult ius nouum cudere, ut liceat grassari in infantes, D. Thomam lacerare: sed reos, & sacrilegos pronunciat, si qui Magistrum vindicent à manibus grassatorum. At quâ ratione, inquis, Mariales dicit, opus suum cussim anno 1638. & meminit libri damnati, Authore Patre Rabardeo anno 1643? Respondeo opus vniuersum Marialis non fuisse scriptum, & editum anno 1638, sed illa pars, vbi meminit Rabardei scripta fuit post 1643. Impressor, qui priorem tomum non vulgarat, apponere voluit eundem annum 1638.

PARAGRAPHVS SECVNDVS.

Defensio Sybilla.

SED grauitèr expostulat de P. Alexandro Sybilla, quòd specie impugnandi Iansenium scribat contra Petauium & Ricardum, præsumptionis accuset Molinam, liberiùs agat in Petauium, Scholam Societatis vocet Petauianam, plus æquo attollat D. Thomam, & mul-

ut habeat Ianseniana, quale est, Primò auxilium efficax pertinere ad actum secundum; Secundò Pelagianum esse, negare gratiam per se, intrinsicè ac praciisè efficacem; Tertio gratiam efficacem communem Thomistis cum Caluino differre consecutione, quia Calvinus vult tolli potentiam proximam dissentiendi; & alia id genus habet multa, quæ tangit potius, quàm vrgeat: in primis non video aliam huius expostulationis causam, quàm delicatissimum illæ felicitatis sensum, quæ non possit ferre, vel minimum istum, & nolit æquo cum aliis iure viuere.

Molina inuentam à se concordiam dixit ignotam fuisse Augustino cum maximo Ecclesiæ damno, & si Sybilla hunc præsumptionis redarguat illos hallucinari dicat, reus erit sacrilegij. Si Scholam recentem Petavianam vocet, à vero non recedit; quia ille est præcipuus scriptorum in Iansenium, de quâ re agitur, & fauet gloriæ Gallorum, quæ augenda, non obscuranda esset Ludouico: cum aliunde pauciores præ aliis nationibus ex Societate, Gallia scriptores habeat, non fuit illi inuidenda, quam eruditione adiuncta eloquentiæ Sirmundus, & Petavius Galliæ compararunt; quæ possit compensare defectum, à me notatum. Quod verò D. Thomæ asserat consensum SS. Patrum præ aliis, superius à nobis demonstratum est. Responsum est etiam plenissimè illi coquenienciæ, quam falsò asserit Thomistis interesse cum Calvinistis, aut Iansenistis, & nihil affert, quod à nobis constituta labefactet.

Nec si caperet veram interpretationem sensus compositi, & diuisi, vllam putaret esse repugnantiam gratiæ cum potentiâ ad oppositum, licet sit cum actu opposito. Nec verum est, quamcumque suppositionem antecedentem esse causam necessitatis; imò, vt optimè dicit, & probat Sybilla, est potius effectrix libertatis. Nec etiam contra hoc vrget, quod annotat nono loco, gratiam efficacem cõtrariam libertati esse, quia connaturali agendi modo voluntatis conformatur, non solum in ratione voluntarij, quale admittit Framundus in amore beatifico; sed modo agendi liberè, cum indifferenti iudicij, & voluntate obiecto superiore, ac proinde cum potentiâ dissentendi; hanc verò gratiam efficacem propugnatam ab Augustino contra vltimum Pelagij præ-

dum, alibi demonstrauimus, ac proinde hanc gratiam Augustinianam esse: an verò sit de fide, expectamus Summi Pontificis decretum. Hoc certissimè scimus, Thomistas non casuros stante Augustino, & Augustinum nunquam casurum. Sunt enim Augustini, & Thomæ Dogmata inconcussa. Vt Alexander VII. Pont. Max. pronuntiauit Breui ad Vniuers. Louaniensem relato.

Non omittam, quod secundo & tertio loco carpit Ludouicus ex Sybilla, nempe iudicium practicum pertinere, sicut gratiam efficacem, ad actum secundum; & posito illo, non adesse iudicium proximum de bonitate suspensionis actus. Vt hæc duo breuissimè refellam, & superiora confirmem: peto à Ludouico, num propositis ab intellectu multis, aut bonis, aut mediis, quorum nullum voluntati necessitatem imponat, sed sint indifferenter prosequenda; voluntas se determinet ad alterum illorum tanquam sibi conuenientius, vt suam libertatem ostendat, sine vllò iudicio, vel actu intellectus distincto à priori, vel admittit nouum iudicium ex applicatione voluntatis, quo intellectus vel imperat actum electionis, vel iudicat hic & nunc conuenientius illud medium eligendum? Si primum asserat, manifestè contradicit omnium sapientum, & Sanctorum Patrum sensui, & ipsimet lumini naturali: voluntas enim non potest se determinare, nisi habeat hunc sensum, hic & nunc conuenientius est illud appetere: at cum cæca sit, non potest à se ipsa habere illum actum, quod summi iudicij est: Ergo habet ab intellectu, & illum dicimus priorem & posteriorem esse in diuerso genere causæ: ac proinde inferre actum voluntatis infallibiliter in sensu composito, non diuiso, & cum nihil sit euidentius necessitate illius iudicij ultimi practici, necessario componendum est, cum libertate, vt etiam ex Beilarmino supra notauimus: Si autem Ludouicus velit scire, an nobis aliquid supersit vltra conuitia, legat de hac re Aluarez in suo opere de auxiliis, Io. à S. Thoma p. 2. de Voluntario disp. 6. art. 2. & Salmanticenses disp. 2. & occurrent Athletæ, cum quibus luctari, imò & à quibus vinci non erit inglorium.

Finis libri secundi.

LIBER



LIBER TERTIVS.

DEFENSIO THEOLOGICÆ

Moralis Dominicanorum.



STIVS libri Argumentum est origo huius belli infœlicissimi, quod ipsi victori sit perpetuo lugendum. Nunquam in Dominicanos, & subinde in Summos Pontifices calumum distrinxisset Theophilus, neque nobis grauis imposita fuisset necessitas, nedum innocentiam nostram, sed etiam supremam Pontificum authoritatem propugnandi aduersus calumnias illius Auctoris, nisi de communione pro mortuis, de Martyrio per pestem, de Epistolari Confessione scripsisset, digna quæ Romæ damnarentur: cuius æquissimam, & mitissimam Censuram cum ferre non potuerit, exarsit in iudices, eorumque administratos; neque Summis Pontificibus pepercit. Ideo pars hæc accuratius est tractanda, ne videar deesse officio, succumbere oneri, & causæ dignissimæ præuaricari, ne ipse sibi applaudat, & ex iniustâ damnatione suorum librorum, credat sibi æquam, ac necessariam datam, tot conuitia scribendi, & importandi nobis occasionem.

SECTIO PRIMA.

*Refellitur Liber Theophili, qui inscribitur error
popularis de communione pro mortuis, à
Congregatione Indicis damnatus.*

ARTICVLVS PRIMVS.

Occasio huius Libri, & nostra Apologia.

CVM hâc quartâ Diatribâ omnes Dominicanos laceraueris, & plures eorum sigillatim, tum maximè mihi videris, duos illorum deligere, quos acerbius, & furiosius exagites; scilicet Dominicum Bannes, quem facis Calvinismi reum, in quem iamdiù scripsisti tuam Religionem Bestiarum, antequam ederes etiam alium libellum à te inscriptum *De concordia, & affinitate doctrinae Dominici Bannes, & Caluini, circa Prædeterminationem Physicam, Authore Petro Paulo à bellis*, quem Petrum Paulum finxisti esse Apostatam Dominicanum: nec minùs crudeliter sæuis in P. Generalem ob damnatum Opusculum *de communione pro mortuis*. Mihi visum est è re fore Ordinis nostri, si vtriusque causam susceperem, & breuè, ac validè, hos duos libros à te scriptos refellerem.

Non mirum est, Theophile, si ad finem Diatribæ quartæ insultes P. Generali; si tibi applaudas, si triumphes, si ad omnes vniuersitates orbis Christiani appelles, & ab illis iam damnatum, quem accusas, & te absolutum iactes. Ita est, Petre, si te referente, si inaudita parte pronuntiauerint iudices: nam tu ita causam inuertisti in totum, vt aliam subijcias iudicandam, quàm quæ Romæ agitata fuit. Numquam venit in mentem iudicibus, quos traducis, in controuersiam reuocare, an communio facta à Laïco, pro sit defunctis ex opere operato; non ignorabant communionem esse partem, aut potiùs vsum, & applicationem Eucharistiæ, vt Sacramentum est; & hoc differre à seipsâ, vt est sacrificium.

quòd soli fumentis proſit ex opere operato, cum ſacrificium interdum nihil ſacrificanti proſit, noceat etiam; & iis ſit vtile, & efficax, pro quibus offertur. Sed Romæ comperta erat tuæ ſcriptionis cauſa, quam tutatus es, & diſſimulas.

ſciat ergo vniuerſus orbis Chriſtianus, quem tu falſò imbuis, & commoues, te nullo pietatis, nullo proſiciendi ſtudio, ſed ſolâ æmulatione, quâ ſoles tranſuerſus agi, diſtrinxiffe calamum in Patres S. Andream à Valle, quòd non poſſes ferre frequentiam illorum Eccleſiæ, & ſolitudinem tuæ. Ad S. Andream ſingulis hebdomadæ ſecundis feriis confluit quidquid ex primâ nobilitate virorum, aut mulierum Romæ, habet pietas Chriſtiana. Ibi dies ſeriales videntur verſi in ſolemniffimos totius anni; eò conueniunt Cardinales Principes, dum tuæ Eccleſiæ eo ſtatu ſunt, vt ibi lamentationes Hieremiæ videantur recantandæ; *Via Sion lugens, eò quod non eſt qui veniat ad ſolemnitatem.* Quid tu interim, dum hæc videres? Tabescebas præ liuore, & ſicuti infecta non aliud genus habent armorum præter ſtimulum; ita tu calamum, & atramentum paraſti in illud pietatis exercitium, quo ſciebas populum à tuâ Eccleſiâ reuocatum S. Andream frequentare.

En veriſſima cauſa tui libri, cui reſpondeat oportet vt effectus ſuo principio: non agis Theologum, ſed Sophiſtam. Non aſſers rationes, ſed argutias, ſed ineptias, & interdum impietates: non vis errorem popularem tollere, ſed populum à Patribus Theatinis ad tuos euocare. Cum illa fuerit tui libri occaſio, ſcilicet liuor & inuidia, cum multa & ſerè omnia occurrant ab illo effectū nata, quid mirum, fuiſſe prohibitum, cum reſpiat genium liuoris? Quare fruſtra obtendis pag. 323. te hæc ſcribere nouitatis euellendæ cauſa; cum nullus, qui ſciat, quid ſit Sacramentum, quid ſit opus operatum, poſſit comminiſci, quam fingis, & oppugnās opinionem,

ARTICVLVS SECVNDVS.

Tria subsidia, quæ adueniunt mortuis, ex communicatione vinorum.

CONCEDIMVS tibi, quod operosè probas, hominum otiosissime, Eucharistiam vt sacramentum esse cibum, & medicinam, & lumen tantum conferre gratiam, vel remittere peccata quæcumque ex opere operato. De pœnâ temporariâ concedimus etiam, Eucharistiam non esse per se institutam ad illius leuamen, aut indulgentiam; sed non est dubium, quin ratione communi Sacramenti, quâ gratiam confert, & auget, & habet adiunctos motus omnium virtutum, & illos ciet, aliquid pœnæ debitæ tollat: nec puto te negaturum, illam remissionem pœnæ, vbi nostri iuris fuerit, posse aliis communicari. Id enim habet ex communi ratione bonorum, quæ fideles sibi mutuo dant, qualis est, illa remissio pœnarum, vndecumque comparatur: neque enim, vt in alios transferri possit, verum est, quod dicis numero 10. *Vt vis satisfactiua possit transferri, debere esse germen operum nostrorum liberorum, & proprietatem illis ex naturâ rei adnascentem, de quâ tanquam domini possimus disporre; cuiusmodi, inquis, non est vis remittendi reatum pœnæ temporaria ex opere operato.*

Si tua probatio efficeret, quod proposuisti; excluderet inter fideles commercium indulgentiarum, nec posset quis, quam semel lucratus est, vlli viuorum, aut mortuorum communicare; quia indulgentiæ dantur nobis, quasi ex opere operato. Certè non metimur illas valore operum nostrorum. Dices, eas fieri nostri iuris, ac proinde nos posse aliis impetiri. Quidni idem dicas de remissione pœnæ ex opere operato, per quodlibet sacramentum collectâ? Nonne perinde nostri iuris est, ac indulgentia? Si hanc negare nequeas communicabilem aliis; certè non poteris, nisi protervè agas, dissentiri, quin eadem sit ratio remissionis pœnæ per sacramentum, & per indulgentiam. Aliàs, cedo discrimen.

Habemus ergo ex hoc capite, prodesse posse communionem aliis, præter communicantem. Atque hæc mu-

tuatio , vt sic loquar , indulgentiæ per sacramentum obtentæ , fieri poterit alteri multò certius , si in antecessum offeras Deo pro aliis , antequam ad sanctam Synaxim accedas , & tuis vsibus applicetur. Dices , eâdem ratione posse communicari alteri gratiam ex sacramento recipiendum ; sed quis nesciat latum inter gratiam & remissionem pœnæ , discrimen esse , quòd illam nequeat vllus hominum suis meritis comparatam , alteri communicare : neque enim vllus patitur gratiam à se amoueri cum tanto detrimento , vt fiat minùs sanctus , minùs gratus Deo , minùs etiam in Deum affectus & propensus ? Ideò si ab vllò Sanctorum , etiam à Deiparâ viatrice exegisses , aliquam , comparatæ meritis de condigno gratiæ , portionem , respondisset , sicut sapientes Virgines stultis à se oleum petentibus , *ne forte non sufficiat nobis , & vobis , ite potius ad vendentes , & emite vobis*.

Solus Christus infinitè sanctus ipsa diuinitate , quâ delibuta est eius humanitas , potest gratiam sibi condignè debitam aliis impertiri ; quia inde nullum detrimentum patitur , nihil minuitur , nec Dei amor in ipsum , nec reciprocos amor ipsius in Deum. Hoc nulli creaturarum , etiam Deiparæ contingere potest. Verum , cum pœnæ remissio extrinseca sit , nec sanctiorem faciat , aut Deo gratiorem , quilibet nostrum potest istius cum laude prodigus esse , sicut honestissimè gratiæ avarus. Sed ne huc totam Theologiam transferam , stet immobile hoc decretum , pœnæ temporariæ remissionem , siue labori nostro debitam , siue per indulgentiam concessam , siue haustam ex sacramentis , posse aliis donari. Habemus ergò , Theophile , te etiam inuito & reluctante , posse hoc nomine communionem alteri proficuum esse non institutione sacramenti , sed ratione communi remissionis pœnæ , vndecumque proueniat.

Addo etiam , Eucharistiam vt remedium , aut cibum sumptam , sin immediatè , & proximè , saltem remorè , depulsâ infirmitate , & reparatis viribus efficacius ad aliorum bonum & solamen operari ; sicut cibus , quo milites reficiuntur ante prælium , plurimum confert ad victoriam , & subinde ad patriæ , aut principis salutem , & gloriam. Nil ergo proficis , Petre , tuis argutiis , quin fructuosa aliis esse possit communio , multis modis , si

excludas sanctificationem per gratiam, aut peccatorum remissionem, plurima aliis adiumenta conferre, ut patet exemplo militis ante prælium refecti, cui Dux victoriam debet. Non dedignabor, abiecto quodammodo argumento, id confirmare. ex more in conuiujs præbibendi alijs; quam verborum formulam, sic vnus ex heroibus huius sæculi interpretabatur; hoc edulium, aut poculum sumam in meam salutem, & tuum obsequium: ita planè in hoc sacro conuiuio Eucharistiæ remedium & cibum sumimus, vt sanati, & roborati meminerimus, nos ita nostram salutem, & perfectionem debere curare, vt alienæ nos totos impendamus.

Huic secundo emolumento, quod excommunicatione alijs potest cedere, tertium adiungam ex principijs comuni Theologorum sensu receptis, altius reperi- tum. Non est dubium, sacrificij incruenti altaris infinitam esse vim, seu impetrandi, seu satisfaciendi pro pœnis, quibus obnoxij sumus; & hoc argumento est, quod omnes, qui missæ ad sunt, qui sacrificium suis manibus, vel sacerdotis, & omnes adstantes, aliquem etiam ex opere operato fructum percipiant pro suo modulo, & captu, seu ratione feruoris quo, intersunt sacrosancto, & adorando mysterio; ita vt multitudo adstantium nihil minuat cuiusque portionem: aliàs captandæ essent missæ, quibus pauciores interessent, vt eo maiorem fructum quisque perciperet, quod esset minor audientium numerus: sed hoc à communi sensu fidelium abhorret, qui ed vberiorem credunt se capere fructum quod plures sacrificio intersint. Vnde fit inexhaustam vim eius esse, quâ in vnumquemque maior fructus deriuatur, quod attentior animus, quod ardentior fuerit religio & pietas. Atqui illi numquam scilicet excrecunt affectus, & feruescunt, quàm cum sub finem paramus nos ad sacram Synaxim, & ad portionem sacrificij consequendam: ergo etiam hoc nomine, cum latior tibi continger indulgentia, & pœnarum remissio, quam possis mortuis communicare. Non est igitur error popularis, sed Catholica & Theologica assertio; communionem laicorum fructuosam esse posse alijs non immediatè, sed remotè; non ad culpæ, sed ad pœnæ reatum auferendum.

Hi sunt tres quasi canales, & aquæductus, communio-
nis, qui per cæcos meatus deducunt aquas Siloe in loca
subterranea, vt mortuorum æstus refrigerent. His tribus
quasi canalibus adiungi possunt totidem, quos Theo-
philus num. 26. refert ex illorum sententia, qui hanc
communione pro mortuis induxerunt, quorum odio
potius quàm studio veritatis, conatur hos aquæductus
obturare, aut demoliri. Promisi me hoc examine duo
aperturum; scilicet scriptionis causam, quod iam im-
pleui; secundo errores quos continet, quos rationum
vi potius, quàm arrogatâ mihi iudicis autoritate euer-
sum eo. In primis, nihil in exordio libelli, aut parte
primâ vsque ad 21. num. nec in postremo à num. 43.
vsque ad calcem; occurrit quod in controuersiam deduci
possit; totum virus in medio positum est, vbi ratio-
nibus futilissimis, & aliquando etiam impiis, conatur
auferre Catholicis tria auxiliorum genera ex Euchari-
stiâ, quibus prodesse possint aliis, & maxime mor-
tuis.

Primo ergo laudanda, & commendanda communio
est pro mortuis, quod oratio tempore communionis
fusa, sit admodum feruens, ac proinde valdè satisfacto-
ria; qui fructus transferri potest in defunctos. Eo perti-
net secundum subsidium, quod iam demonstraui-
mus à communione hauriri; cum illo remedio curati, aut
recreati cibo, fortius ad aliorum salutem adlaboremus;
nec inde aberrat cogitatio Ioannis Sanchez, relata à
Theophilo, nempe animas purgatorij habere aliquod
solatium, ex frequenti fidelium huius perceptione sa-
cramenti, quod sperent feruentiores & fortiores fore
ad opem sibi ferendam.

Addunt secundo huius pij exercitij authores, prodesse
communione mortuis, ob adiunctas communioni
Pontificum liberalitate indulgentias, applicandas mor-
tuis per modum suffragij & solutionis: neque enim ve-
rissimile est Iconibus Sanctorum, Rosariis, & aliis id
genus indulgentias adiunctas ad solutionem defuncto-
rum, & negari vel sacrificio Missæ, vel communioni,
quæ expressam habent, huius & plurium mysteriorum
fidei imaginem. Hoc auxilij genus respondet primo &
nostro.

Tertiò denique addunt, communionem mortuæ fructuosam, ut est opus nostrum, non præcisè ut est sumptio Eucharistiæ, & per os in stomachum trajectio, quod etiam peccatoribus, & brutis potest aduenire: sed ut est complexio omnium virtutum, quibus ornatur anima, ut dignum fiat habitaculum, huius sanctissimi Sacramenti, quocum apud nos *inhabitas plenitudo diuinitatis corporaliter*.

Potestne salua pietate, aut fide negari, Christum receptum cordibus nostris, lucem esse mundi, & quamdiu præsto, & præsens est, multò plura ac diuiniora, animabus bona conferre, quàm lux solis sensibilis soleat huic mundo aspectabili? Quis potest nisi sacrilegus dubitare, cum suæ Christus nobis præsentia copiam facit, nos omnium charismatum vbertate beare? Et cum ea sit ingentium bonorum ratio, ut diffuant, & in alios redundent; putasne harum benedictionum expectes futuras animas, quæ tum ipsomet Sacramento, quod Symbolum est vñionis, tum Fidei, & Charitatis vinculo nobiscum arctissimè iunguntur? Communio quasi vasa capacissima omnium gratiarum genere implet, quæ his à me explicatis canalibus sine detrimento plenitudinis in alios redundant.

ARTICVLVS TERTIVS.

Defenduntur tria hæc præsidia contra Sophismata Theophili.

Quid affers, Theophile, quod huiusmodi communionis redundantiam recludat? Quam futilis, ne dicam impia est tua prima argumentatio? *Oratio*, inquis, *fusa in communionem, non est communio: ergo etiamsi prodest oratio, communicatio nil prodest*. Nisi velis verbis ludere; certè reipsà insanis. Orationis feruor à communionem nascitur, quia Christus iterum venit ad nos ignem mittere, & summè optat ut accendatur; ergo si à communionem est orationis efficacia & feruor; ab ipsa sine dubio totus est fructus, qui nascitur ex orationis feruore. Nonne vides, hanc esse causam, illam esse;

ctum? Ac proinde distingui oportere, & orationem maximè fructiferam esse, quia igne communionis accenditur.

At; inquis, *alia sacramenta non suscipiuntur in salutem fidelium; quis enim hoc sine matrimonium contraxit, aut baptisatus est? Ergo nec communio eâ de causâ frequentanda est.* Quæ consecutio? Quid censes Sacramentorum præstantissimum nihil habere singulare? Ad hoc animarum purgatorij solatium, opus est Sacramentum frequentari, & esse copiosissimæ, & vberissimæ virtutis; Reliqua si pœnitentiam excipias, quæ est dispositio ad Eucharistiam, semel tantum vel forte bis, aut tertio per totam vitam suscipiuntur; frequentia est solius Pœnitentiæ, & Eucharistiæ, quæ vnam communionem consummant, vt dicit Paulus, probet *seipsum homo* per Sacramentum pœnitentiæ, & purgatus de *illo pane* edat ad Sacram communionis mensam. Quid mirum ergo si hæc duo Sacramenta quotidiana, suscipienti, & aliis prodesse possint?

Hæc duo, quæ ex te retuli, licet futilissima, excusari possunt; sed quæ subiungis num. 22 non solum falsa sunt, sed impia. Ioannes Sanches, iudicio Dianæ subtilissimus & acutissimus; meo verò laxissimæ, & periculossimæ doctrinæ, qui peccatoribus omnia indulget; (nescio, quâ ratione verba, quæ ex illo retulisti, & quæ aliquid pietatis respiciunt, illi exciderint;) censer animas lætari ex perceptione Sacramenti, ratas nos eò fieri promptiores & fortiores ad opem sibi conferendam. Sed tu adeo longe es à pietatis sensu, vt hanc piam cogitationem totis viribus, sed semper futilibus argumentis extinctum eas: nullum, inquis, gaudij sensum admittit doloris magnitudo in animabus purgatorij. Vnde hoc habes. Quibusdam maior erat passionis Christi cruciatus igne purgatorio; & tamen Canum quasi hæreticum traducis, quod eo tempore quo maximè vrgebat dolor, gaudium beatificum subduxerit ab anima Christi. Deinde, vt hoc qualicumque solatio fraudes animas, ignaras facis sacrificiorum, & communionum, quæ illarum causa sunt; quasi abessent Angeli, qui illis ita significarent, vel expertes corporis essent nobis stupidiore, qui vno quadrante pos;

sumus ad calculos certo reuocare, quot sacrificia, quot communioniones fiant singulis diebus per omnes orbis Christiani partes.

Quæ hæcenus retulisti, quamuis voluntaria, & nulla, verisimili ratione dicta, utcumque tolerari possunt. Sed quâ ratione patiemur te apertissimè Paulo contradicentem, cum negas Eucharistiam vt Sacramentum, Christi passionis imaginem præferre, aut refricare memoriam? Cum ipse de communione, idest de vsu Sacramenti expressissimè dicat: *Quotiescumque manducabitis hunc panem, mortem Domini annuntiabit.*

Futilius agis, & grauius peccat, cum refellis secundum ex communione à mortuis fructum colligendum, ratione indulgentiarum, quas diximus multo iustius communioni adiungendas, quàm iconibus sacris, aut granis piacularibus. Poterasne ineptius argumentari, quàm cum repetis, quod in primum genus auxilij effutisti? *Communicare*, inquis, *non est lucrari indulgentias*: ita profecto est; distincta sunt, quia vnum sit causæ alterius: sed adeone cæcus es, vt non videas hac argumentandi licentiâ omnes indulgentias euertere? Sicut indulgentiæ conferuntur largientibus pecunias ad fabricam sancti Petri, visitantibus Ecclesias præcipuas vrbs; ita communicantibus animarum purgatorij causa. Sicut ergo is, qui confert ex suis bonis aliquid ad fabricam Ecclesiæ, sit indulgentiæ compos; ita is, qui communicat. Poterasne apertius demonstrare, te omnino gratis has communioni annexas indulgentias impugnare, cum probes applicatas Rosariis, & Iconibus? Quid? Postponendumne censes imaginem Christi suo exemplari plenissimam, istis Diuorum Imagunculis?

At, inquis, hæc mortuorum gratiâ collatæ indulgentiæ differunt ab his quæ, impertiuntur viuis, quod illæ dentur per modum suffragij, & solutionis; istæ per modum iudicij, & absolutionis; atque ex hoc primo discrimine secundum deducis, scilicet viuos indulgentias lucrari non posse, nisi sint in gratiâ constituti, mortuo vero indulgentiæ possunt à peccatoribus, si iniunctum opus impleant, & animabus purgatorij imperti

Esto non sit omnino improbabile discrimen quod astruis, tamen multo probabilius, aut certius est, nullam nobis, vel animabus Purgatorii lucrari posse indulgentiam, si finis extra statum gratiæ, ut censet Bellarminus, quia indulgentiæ primario viuis conceduntur & secundario mortuis: unde debent prius illas viui facere sui inris, ut mortuis impertiri possint. Et licet hoc in vniuersum reuocare possis in dubium; tamen certissimum est, cum id genus operis iniungitur, quod citra peccatum mortale fieri nequit, nisi à iusto, qualis est, de qua agimus communio; nunquam à Summi Pontificis huiusmodi operibus, saltem communioni, etiam in mortuorum gratiam adiunctam esse indulgentiam, quin velint, & statuant non valituram, si à peccatore fiant; alias ipsimet sua consilia euerterent; quæ ed spectant, ut his indulgentiis, veluti quibusdam adminiculis, & calcariibus, fideles promoueant ad illa pietatis exercitia, ad frequentiam communionis sanctam, non sacrilegam: Quidquid tandem sit, quem duorum sequemur, an te, an Bellarminum? Iste semper tuta sectatur; tu verò per prærupta incedis, & verè dux cœcorum, in foueam præcipites das, quotquot te sequuntur.

Quæcumque dixisti contra duo superiora subsidia mortuorum ex communione condonari possunt: sed quæ contra tertium opiculandi modum obijcis, non longè absunt ab impietate hæreticorum. In primis purum Sophistam agis, aut potius Sacramentarium, dum communionem vis esse species ore receptas, & in stomachum demissas, quorum nil deesse potest bruto Eucharistiam deuoranti. Inde verò quidnam inferis? Nempe nullum, aut certè modicum existere posse fructum, & in mortuos deriuari ex communionis, siue impetratoriæ, siue satisfactoriæ virtute: at nos sæculi sentimus: nam communione fructifera pro mortuis totum id continetur, quod Paulus monet adhibendum; scilicet ut probemus nos, an rei simus alicuius peccati lethalis, ut etiam venialium affectum abijciamus, ut thalamum floridum Sponso venturo paremus, pietatis, & pœnitentiæ lacrimis rigemus, ornemus omni genere virtutum, ut mixtâ Centurionis reuerentiâ cum alacritate Zachari, venientem excipiamus, amplexemur

arctissimè, illo fruamur, exclamemus cum sponsa : *quis det te fratrem meum Sugentem ubera*, &c. Hæc omnia, pluraque alia communionis nomine significamus. Ad illas à me descriptas certus sum inuitare Patres Sancti Andree, & prouocare indulgentiis Summos Pontifices. Censes ne, tum fore satisfactorias, ac subinde animabus purgatorij proficuas?

Audebis ne dicere, quod scribere non erubuisti? *Consensus connubiales magis profuturos; Eucharistiam nihil habere peculiare ultra matrimonium*, & te mirari aduersarios non inuitare fideles ad illud pro mortuis inendum? Et adhuc quæris causam libri tui prohibiti, adhuc conquereris ab indice damnatum? Quid poterat Calvinus dicere grauius, & atrocius in contemptum communionis Romæ receptæ, confirmatæ indulgentiis Pontificiis, quam tu ausus es appellare errorem popularem, & illi ad leuamen animarum purgatorij æquare, vel anteponeere amplexus maritales? Nescio certè an hæreticorum ulli ista scripsissent.

Sed vnde, mi Petre, de communione ita abiectè sentis, & nobis contraria? Iam definiuimus esse animæ Christianæ cum Deo germanissimam societatem, & cum Christo eiusdem naturæ, ac subinde Sponso, connubium foelicissimè initum, ac breui consummandum; at Petrus nihil putat esse aliud, quàm species deuoratas. Vndenam communionis hanc ideam hausit? Fortè ab usu suo: singulis vt credo, diebus more sanctissimi sui instituti Sacrum facit per plures annos animo in Dominicanos iniustissimè implacabili, rancore inueterato, iniuriarum memore, vindictæ renacissimo, & vt paucis dicam, ita comparato in pios & bonos; vt vix per odium in Turcas, & hæreticos excusare possis. Quid ergò homini sic constituto communio esse potuit, nisi quod asserit, species deuoratas? Et vtinam, ne in æternam illius damnationem, quam si Euangelij regulas consulamus, nescio an possit euitare tantâ probos lacerandi licentia, tanto eoque errore, vt putet in iis se nil peccare, sed sacrificium se præstare Deo. Aut peccatum nihil est, vt dicunt athei, aut quæ ex te retuli, quotidianas communionones, & mensam tibi in laqueum vertunt, & scandalum.

Fortè idem in me regeres, sed clypeum habeo impet-
rabilem, quo huiusmodi tela repellam. Dicam cum
Paulo, *insipiens factus sum*, & tui in speciem similis, *sed*
me coegisti, & inevitabilem imposuisti necessitatem in-
culpatae tutelæ, cui si defuissem, non imputasses mode-
stia, & humilitati, sed imperitiæ, ignavia, & ut dicis,
latinitalis inopia. Deinde sumus dissimillimi, tu falsissi-
ma fingis, ego ex multis veris quæ possem reponere,
graviora taceo, & leuiores dico; denique tu in caput Or-
dinis, in omnia membra, in totum Institutum furis,
& debaccharis: ego tuum institutum, ut sanctum colo,
tuos omnes veneror, comprimo quæcumque possint in
illorum dedecus resilire, vnus mihi scopus est, tuis
calumniis omnem veri speciem, tibi omnem fidem
abrogare de aliis detrahenti.

Concludo, hanc tuam scriptionem habere quid simile
omnium, quibus superiori sæculo agitata fuit Italia,
motuum origini, & occasione, quam Guicciardinus
Author accuratus, ita enarrat. Tres totius Italiae familiae
potentissimæ Aragonia Neapoli, Sfortia Mediolani,
Medicea Florentiæ, foedus inierant arctissimum, & reli-
quis Principibus formidabile. Alexandro VI. in sedem
Apostolicam assumpto, omnes nouo Pontifici certatim
congratulationibant; visum est Ludouico Sfortiæ ad
commendandum foedus cum Aragonio, & Mediceo,
vnum nomine trium ad Pontificem legatum mittere: id
ægrè tulerunt Petrus Medices, & Episcopus, qui Flo-
rentinorum nomine, orationem congratulatoriam, de
quâ mirè sibi blandiebatur, parauerat, & ne Petro ap-
paratus legationis periret, ne Episcopi indicta esset ora-
tio, foedus maluerunt cum Sfortia, & Aragonio labe-
factare, vnde turbata est Italiae tranquillitas.

Ineptior & magis cæcus est Petri in suos libros, quàm
illius Episcopi in suam orationem fatuus amor; ut nihil
pensi habeat illius causâ omnia turbare: scripserat erro-
rem illum popularem in gustum operis, cui titulum de-
dit *heteroclyta spiritualia & anomala pietatis*. Displicuit
plurimum sapientibus illud specimen futuri operis: non
latebat congregationem Authoris prurigo quâ laborat,
non solum scribendi, sed omnia suggillandi, & suo
corruptissimo iudicio subiiciendi: Nullum fore finem

errorum popularium videbant, si impunè vtilissimū exercitium liceret annumerare erroribus popularibus: nihil in religione tutum fore à licentiā huius ingenii; & eò tandem venturum, vt cultum imaginum, suffragia pro mortuis tanquam errores populares traduceret: hæc pluraque alia rationum momenta, sapientissimos iudices congregationis indicis impulerunt, vt hunc popularem errorem edi prohiberent. Quid tum Author libelli? Multò acerbius tulit hoc suum opus improbari, quàm ille supra nominatus Episcopus, orationem paratam suppressi; & vterque maluerunt, Ecclesiam, aut Rempublicam turbari, quàm se præsumptā gloriolā fraudari.

Verum ne te dimittam, erudite Lector, ieiunum, aut quod peius est, gustu exacerbato tot amargulentiis quas libellus ille nobis ministravit, hunc suaviorem apponam ab argumento de quo hætenus non alienum: sicut triplex Conceptionis Diuinæ, aut Filii Dei genus, mente, aut corpore, aut vtroque iunctim Theologi distinguunt, & si has conceptionis partes conseras, præstat mente, quam corpore concepisse, & omnes superat conceptio, & maternitas Deiparæ, quæ corpore excepit & genuit quem ante mente conceperat: ita de communione statue: Iungi possumus Christo mente & ore seorsim, aut vtroque simul: scio præstare puro affectu charitatis, oratione mentali, & reliquis, quæ refert Petrus, exercitiis, quàm ore, quàm speciebus, vti possunt bruta & peccatores; sed si vtrumque iungas, & sacramentali communioni addas spiritualem, tum accedes ad Deiparæ maternitatem. Hanc communionem instituerunt PP. S. Andreæ, hanc docent, hanc consulunt, hanc tandem, concludo à Petro impugnatam, libello iustissimè prohibito.

S E C T I O S E C V N D A.

Compendium & iudicium controuersia inter Theophilum Raynaudum , & Thomam Hurtado, quo demonstratur illa omnia peccasse Theophilum qua nobis toto libro falso imponit.

A Pologiam pro sacra Congregatione Indicis adornabam, eamque promoueram; cum ad manus meas peruenire libri duo , vnus Leodegarii Quintini , seu Theophili Raynaudi titulo , *Theologia antiqua de veri Martyris adquatè sumpti notione contra Thomam Hurtadum* : alter isto Authore, *Duplex antidotus, contra duplicem libellum Raynaudi de Communione pro mortuis, & de Martyrio per pestem*. Vix licuit inter scribendum, aut opus fuit hos libros attingere : nam examen libri de Communione pro mortuis absolueram, antequàm Thomas Hurtadus mihi ab amico missus fuisset. Hi duo Authores contentione maximâ, & maiori conuitiorum acerbitate disputant de Martyrio per pestem, vnde prima origo scandalorum, & de Communione pro mortuis : placuit vtrumque legere, interiectâ nostrâ scriptiptione, & inspicere an semotis conuitiis, quæ omnino dimidiam operis partem implent, aliquid haberent, quod ad rem nostram faceret, & à me fuisset omissum.

Vidi vitamque controuersiam fusè & accuratè, & cum magnâ eruditione à Thoma Hurtado fuisse pertractatam, & plura ex antiquitate singularia & recondita collecta, quæ demonstrant, vtrumque Theophili librum iustissimè à sacrâ congregatione fuisse notatum, & prohibitum, & Authorem inique conquestum fuisse de censurâ illi inflictâ : nec non suffragia priuatorum Doctorum, & Academiarum captaisse, & dolo obtenta, si verè obtinuit, frustra ostentare, & pessimo consilio opponere sacræ Congregationi, quasi velit Academias Catholicas ad bellum contra Romanam Ecclesiam sollicitare & accendere.

Visum mihi est, me facturum rem non solum Apologiz nostræ commodam, sed etiam toti Ecclesiæ vtilem, & Lectoribus acceptam, vt cum vtriusque libri copia desit, vel non liceat adeo longas disputationes legere, si quid verum, aut scitu dignum habeant, paucis complecti: atque huius laboris, si quæ laus sit, quæ certè modica est, & nullam quæro, erit diligentia in redigendis certa methodo duobus libris ad breuissimum compendium, sine dispendio eorum, quæ ad rem faciunt.

ARTICVLVS PRIMVS.

*Iudicium & Compendium controuersie de
communione pro mortuis.*

DE Communione pro mortuis, si pariter mutas expostulationes aut conuitia submoueas, pauca sunt in bene longo libro, quæ plenè nostro examine de errore populari non attigerimus: placuit tamen obseruare iudicium Dei in Theophilum, cuius exemplum altè clamat, *Discite iustitiam moniti & non temnere sacra.* Ipse insones Dominicanos accusauit, primò hæresis, secundò contumeliarum, ac pene blasphemiarum in Diuos, & in Sedem Apostolicam, terribè ignorantiarum, seu falsarum & absurdissimarum opinionum, quartò nugarum, mendaciorum, liuoris, maledicentiarum in viros probos: sed altissimo Dei iudicio, vtroque suo opere de communione pro mortuis, & de martyrio per pestem prolapsus est in ipsamet crimina quæ falsò Dominicanis obiecerat, & in illa multò grauius impegit vtriusque libri defensione, non tam contra Thomæ Hurtadi scriptiõnem, quàm contra Congregationis censuram: vt inde discant omnes, paris esse periculi criminari & calumniari insones, & Sedis Apostolicæ iudiciis intercedere. Vtriusque criminis dat pœnas Theophilus, & exemplo ipse erit omnibus, ne similia audeant, nisi velint in se aduocare iudicij diuini seueritatem.

De meo nihil apponam nisi breuitatem, & methodum, vt demonstrẽ Raynaudum fuisse conuictum ab Hurtado in Antidoto contra errorem popularem, & illius

illius Apologia omnium criminum, quæ falsò Dominicanis impropertavit. Primò eius libellus docet, vel certè respicit hæresim Aetianam, Lutheranam, & Petrobrusianam, vt demonstrat Thomas sui libri Paragrapho tertio & decimo; neque ab illâ norâ se potest vindicare, nisi abyssus abyssum trahat, & vt hæresim effugiat, incurrat in Eucharistiâ, & bonorum operum contemptum planè sacrilegum. Hæresis Aetij, Lutheri, & Petrobrusianorum, quæ non in eo solum posita est, quod neget sacrificium Ecclesiæ prodesse animabus quæ in Purgatorio torquentur, sed etiam quod non admittat opus vllum bonum viuorum vtile, & proficuum esse defunctis; & cum eximium pietatis Christianæ opus sit, vel communio, vel oratio impetratoria, nescio, quâ ratione deprecari à se poterit eorum hæreticorum consortium, & contagium, cum asserat communionem vel orationem impetratoriam, leue, vel nullum esse subsidium animarum Purgatorii: & hoc locis citatis validissimè vrget Thomas maximè argumentis Petri Cluniacensis contra Petrobrusianos, quos egregio libro oppugnavit.

Nec vllâ cauillatione potest primam illam hæresim accusationem deuitare Theophilus, nisi se det præcipitem, vt facit, in secundum crimen contumeliarum, vel sacrilegiorum contra Eucharistiâ & eximia opera pietatis, vel contra Sanctorum reuerentiam: hoc triplici reatu illum grauat Hurtadus variis locis suis operis. In primis Paragrapho decimo nono, hoc in illum argumentum intorquet. Negari non potest quin communio spiritualis sit opus pietatis perfectum, cum Concilium Tridentinum Sectione decimâ tertiâ, capite octauo illam impense commendet, & dicat tunc fieri, cum nimirum voto propositum illum Cœlestem panem edentes fide viuâ quæ per dilectionem operatur, fructum eius, & utilitatem sentiunt: hanc verò communionem spiritualem addit, ex Thaulero fieri posse centies per diem, à iusto non sine immenso fructu, modo adsit pia deuotio. Negabit-ne Theophilus huius spiritualis communionis fructus participes esse posse viuorum beneficio defunctorum animas? Potestne etiam negare, quin communio spiritualis Sacramentali iuncta multò

perfectior, multoque efficacior sit sola spirituali? Quod si ex ista seorsum sumptâ possit in defunctos maximum solamen deriuari; nescio, an citra impietatem scripserit: *communione spirituale, & sacramentale leuatur nullum esse animarum solacium.*

Idem etiam viget Paragrapho decimo, quia Theophilus defensione erroris popularis ed deuenerat, ut diceret, *persuasionem ad frequentiam communionis ex subsidio animabus purgatorij inde conferendo, esse indignam, sordem non ferendam, piam fraudem, escam falsi fructus, stropham prae-textu promouenda pietatis, rectoriam falsitatis*: Quid adhuc indigemus testibus ad Theophili damnationem? Quid ultra, exclamat Hurtadus, dicerent Petrobrusiani? Quid aliud Aëtius, vel Lutherus de piis operibus vinorum, animabus purgatorij applicandis, quam quod sibi permittit Theophilus de opere omnium praestantissimo? Cuius vult, vel exiguum, vel nullum esse fructum; imo esse escam falsi fructus; cum contra clament Sancti Patres maximam esse Eucharistiae vim ad purganda omnia peccata: cum instituta sit, non solum quâ sacrificium, sed etiam quâ Sacramentum, & quâ esus est panis sacri, vt *mortem Christi annunciemus*, cum etiam ex iisdem Sanctis Patribus fufe ab Hurtado relatis maximâ sit virtutis imperratoriae.

Sed ad hæc Raynaudus duplici responsione suam in Eucharistiam impietatem congeminat: ad hæc enim argumenta dicit primum, Eucharistiam, seu communionem vinorum, si quid prosit mortuis, multo minus, id esse leuamen, quam ex vilo alio Sacramento, vel ex ieiunio; quæ cum plus laboris habeant, quam vnus particulæ absorptio, erunt etiam satisfactoria magis, ac subinde plus inde vtilitatis redundabit in mortuos, cum illam labore per defatigationem metiri debeamus.

Et si nihil aliud mali, aliud absurdi docuisset Raynaudus, quam quod illa prima responsione continetur, grauiorem sine dubio censuram commerebatur, illâ, quâ notatus est: Quid enim potest dici, magis aut à vero, aut à reuerentiâ huius Sacramenti alienum? Et nisi ignorantia culpam minueret, à sacrilegio excusari non

posset. Ignorantiam aperit Hurtadus Paragrapho sexto, quod Raynaudus nesciuerit, hæc duo distinguenda: baptisari, communionem sumere, aut quodlibet aliud Sacramentum nomine alterius, vel illi vim satisfactoriam susceptionis Sacramenti applicare. Hæc duo adeo diuersa sunt, ut primum sit error Marcionistarum, qui induxerant hunc morem, ut interdum viui baptisarentur nomine, & loco illius, qui decesserat sine baptismo, & credebant hoc illi prodesse: hunc errorem damnat S. Thom. Lect. 6. in cap. 6. Ioannis: Sed licet nullus possit quasi procurator nomine alterius suscipere baptismum, aut Eucharistiam, aut contrahere matrimonium, nil tamen impedit, quin possit satisfactionem huiusmodi operationum, quibus se parat ad Sacramenta, aut illa suscipit, alij communicare; sicut, & reliquorum operum bonorum. Cur enim non eadem lege censeantur? Quasi deterioris sint conditionis, quod Sacramentis inserviant.

Ex quâ distinctione accuratè explicatâ ab Hurtado Paragrapho 6. omnino corrumpitur argumentum, quod Raynaudus reperit ab exemplo aliorum Sacramentorum: omnia enim prodesse possunt, sicuti communio secundo sensu, non primo accepta. Sed part. 4. eiusdem Paragraphi merito dicit indignum esse, quod proferat vir Catholicus, plus prodesse mortuis ieiunium, vel quodlibet aliud Sacramentum, quam communionem; quod illa plus poenæ habeant, quam ista: quasi tota vis satisfaciendi & proficiendi aliis haurienda sit à labore externo corporis, aut non potius à præstantia, & subinde à difficultate ipsius operis. Quodnam verò potest cum communione certare, hæc duplici dore, ad quam velut ad certam regulam exigere debemus omnem vim satisfactoriam, impetratoriam, aut quamcumque aliam, quæ bonis operibus inesse possit? Fateor si laborem & subinde satisfactionem, aut emolumentum communionis velimus metiri, ad mentem Raynaudi, qui non aliam cõmunioni subesse difficultatem putat, quam quæ communioni subesse gluttonis hostiola, seu sit consecrata, siue non sit; merito eius vim, & pretium ad animas purgatorio redimendas constitueremus, infra vel minimum opus bonum, Sed ut Hurtadus Paragraphi 9. par-

re 4. *hac ponderatio Theophili fallax omnino est, & librâ Catholicorum declinans, & panem Eucharisticum qui calore charitatis coquendus est, frigidum in furnum immittit.* Quid potest dici magis à communi sensu Patrum omnium, de Eucharistia alienum? D. Thomas quæst. 7. ad supplementum art. 9. ad tertium, dicit baptismum hoc differre ab Eucharistia, quod cum sit spiritualis regeneratio, non profit nisi genito ex opere operato, quamvis ex opere operantis prodesse possit, sicut cætera opera meritoria; sed cum Eucharistia signum sit Ecclesiasticæ vnionis, eius efficacia potest in alios magis sese effundere, quàm reliquorum Sacramentorum, Communio reliquis Sacramentis utilitate in alios præstabit: quod etiam idem Sanctus Doctor in 4. dist. 45. quæst. 2. artic. 3. confirmat ex hoc capite, quod suffragia viuorum prosint defunctis, vel ratione charitatis, quâ vniuntur inter se, vel ratione intentionis in defunctos directæ; & ideo Eucharistia præ omnibus aliis prodest mortuis, quia pertinet ad charitatem, & est Sacramentum Ecclesiasticæ vnitatis continens Christum, quo tota Ecclesia vnitur, & consolidatur.

Et si velimus etiam rem hanc secundum Raynaud? regulas metiri: difficultate rei, Communio reliqua pietatis opera, secundum Sanctos Patres, & utilitate in omnes superabit. Quid enim laboriosius, aut difficilius dignâ Dei susceptione, quæ omnes creaturæ naturæ vires longè vincit? Hinc illæ voces SS. Patrum, *Eucharistiam cibum grandium, & panem fortium esse*, aut Mysterium omnium maximè horrendum. Hinc apparatus omnium virtutum exigunt, humilitatem, fidem, confessionem Sacramentalem à conscio peccati mortalis, etiam contrito, non solum ad decentiam, sed etiam ad necessitatem Sacramenti. Viderit Raynaudus, quid commune habeat cum Sanctis Patribus, & cum huius Sacramenti dignâ, & laboriosissimâ susceptione illa vox profana, & digna omni seueritate censuræ, *quis labor est in gluttonione, tantilla hostia?*

Quamuis librum Hurtadi non vidissem, cum de hac controuersia scripsi, tamen cum ipso planè conueni, & tria fructuum genera dignè communicantibus cum ipso

SVM. CONTR. THEOPH. CVM HURTAD. DE COM. 301
 numeravi, quæ etiam possint ex opere operato communicari defunctis. Primum fructum satisfactorium cum ipso repeto ab oblatione Sacrificij Missæ, cui interest communicaturus. Hunc fructum explicat Paragrapho decimo sexto, & addit triplicem esse posse, primò si sacrificio intersis, secundò si des stipendium Sacerdoti, tertio si communices. Aliud genus fructus satisfactorij petitur ab ipsa communione, vt est Sacramenti susceptio, secundum communem legem Sacramentorum, quæ infusione, vel augmento gratiæ aliquid pœnæ temporalis remittunt. Tertius tandem fructus est ab iniunctis indulgentiis, quas Summus Pontifex largitur, vt piorum studium ad communionis frequentiam, & ad leuamen defunctorum accendat. Has autem omnes satisfactiones pœnales, communioni adiunctas, etiam ex opere operato posse animabus purgatorij ad arbitrium piorum communicari, probauimus suprâ cum de hâc re ageremus; nec quidquam obijcit Raynaudus, nisi vt dicit Hurtadus inania, & ventosa oblectamenta.

Ex quibus omnibus constat, falsam, ac pœnè impiam esse sententiam, Communionem parum, aut nihil posse prodesse mortuis, cum illi quatuor satisfactionum genera constare demonstrauerimus, quæ sint arbitrij fidelium, & possint illa impertiri animabus, vt fusè defendit Hurtadus toto ferè suo opere, sed potissimum Paragrapho nono decimo quinto, vsque ad finem libri.

Quid si satisfactoriæ virtuti impetratoriam adiungas, quam Eucharistia, & communio propè infinitam habet? Sed illam etiam Raynaudus eleuat duplici responso. Primò ait, orationem quâ impetratoria est, inutilem defunctis; secundò Communionem tenue subsidium esse animabus Purgatorij prout impetratoria est ratione actus nostri: sed hanc Raynaudi responsionem planè conuellit Hurtadus, tum paragraphi 10. par. 4. & sequenti Paragrapho 11. In primis non potest negari, quin ex consensu omnium SS. Patrum, vtrique Ecclesia triumphans & militans pro patiente oret: id enim habent preces solemnes pro defunctis, vt, *Beata Maria Virgine intercedente*: & omnes hâc clausulâ ab-

soluantur, Per Dominum nostrum Iesum Christum.

Vnde Petrus Cluniacensis suo libro contra Petrobrusianos, hæc quatuor probanda suscipit; bona viuorum viuis, mortuorum mortuis, viuorum mortuis, & mortuorum viuis prodesse. Frustra autem Beati, aut iusti precarentur pro defunctis, si verum sit quod asserit Raynaudus, orationem, prout impetratoriam, inutilem esse mortuis. Atque vno verbo, Ecclesiam damnat, & SS. Patres, qui has preces commendant, inutiles iuxta Raynaudum; & etiam si admittat proficuas, ad cumulum erroris, negat adiunari Communione. Sed imprimis poterat addiscere à Suarez, Orationem, vt impetratoriam, quatuor modis vtilem esse animabus purgatorij. Primò quia obtinet viuis auxilia, quibus velint, & possint animabus operi ferre: Secundò vt Beati Cœlites exposcant à Deo suas satisfactiones illis applicari: vel tertio, vt vnus Sanctus id ab illo impetret: vel quarto, vt intensiore pœna tempus purgatorij contrahatur, & acceleretur gloriæ consecutio.

Id vero minimè ferendum habet responsio vltima, quod asserat communionem, quâ impetratoriam, parum habere momenti, aut subsidij: nam cum duplex sit oratio impetratoria, vna expressa, altera interpretatiua, qualis erat sanguinis Abël clamantis ad pœnam, & qualem nonnulli Theologi censent, esse Christi in cœlo Patri vulnere cicatrices monstrantis: Quis potest negare, vtrâque vi impetratoria Eucharistiam, & communionem maximè præstare; cum corpus Christi adsit, qui vtroque genere, vel alterutro in cœlis pro nobis orat: & cum aliunde vis impetrandi sit à fiducia diuinæ bonitatis, & potentie quæ velit, & possit de nobis benè mereri; vbinam apertiora vtriusque attributi argumenta occurrunt quàm in Eucharistia?

Si Apostolus censuit primâ ad Corinth. decimo quinto, eos qui bono animo licet falso errore, mortuorum nomine baptisabantur, hæc ipsâ voluntate illorum causâ suscipiendi baptismum, illis profuisse; poteritne citra impietatem asserere inutilem fore Communionem, quâ Christus ipse suscipitur mortuorum causâ frequentatam in Ecclesiâ, & à Sanctis Patribus com-

SVM. CONTR. THEOPH. CVM HVRTAD. DE COM. 303
mendatam? Nam vt Hurtadus toto Paragrapho vnde-
cimo demonstrat, ritus est antiquus Ecclesiæ Catholi-
cæ communicandi ad singulas Missas, vt Laici partici-
pes essent sacrificij oblati, & eius susceptione mortuos
iuuarent.

ARTICVLVS SECVNDVS.

Theophilus iniurius in Sanctos.

EX his ergo omnibus conuincimus Raynaudum de-
plices contumeliæ in Eucharistiam, quod illi vim-
ferè omnem satisfactoriam, & impetratoriam auferat;
neque his duabus iniuriis contentus, totidem addit in
hoc Sacramentum, in diuos, & in opera pietatis;
nam in primis ipse, qui vnicam sanctæ Brigitiæ reuelationem in Conceptionis Immaculatæ gratiam toties
commendauit, & falso improperauit nobis quasi illam
elevatorum; cum Cardinalis Turrecremata præfationem in librum harum reuelationum quasi Apologiam
scripserit; modo tamen vt apertè demonstret, se non
veritatis causâ, sed ex merâ contentione disputare,
compertas de communione pro mortuis reuelationes
Beatæ Ioannæ à cruce sanctæ Gertrudi factas, & plures
alius à Ludouico Blofio pijssimo, & iuxta grauissimò
scriptore relatas, ridet Petrus impietate dignâ Erasmo,
aut Luciano: & adhuc de censurâ suorum librorum
conqueritur, cum ausus sit scribere illa, quorum etiam
hæreticos puderet. Et Antonius de Vvinghe illustrator
operum Blofij annotauerat ad marginem in cap. 6. de
Monili spirituali, vsum esse, & doctrinam Ecclesiæ Catholice,
animas à Purgatorio liberari pietate lumen-
tium Eucharistiam illarum causâ, vt probat exemplum
à Blofio, relatum.

Quid ad hæc Raynaudus? Vix ausim referre. *Forſan,*
inquit, *ille qui communicauit, laborabat anginâ. &*
ſic cum magno labore hoſtiam conſecratam, deglutijt,
vt in labore corporali ſatisfactionem pro illâ animâ re-
periret. Quæ addit, horret animus scribere, vt mirum
ſit poenam tantæ impietatis, non ſolum librum vnum,

aut alterum, sed etiam omnia opera; & ipsum nomen Authoris damnationem hætenus non subiisse. Hoc argumentum prosequitur Hurtadus toto Paragrapho 10. Post illud impietatis exemplum, penè superfluum est aliorum meminisse.

Quartum denique in communionem, & in reliqua pietatis opera iniuriam vrget Author, toto paragrapho 18. Ecclesia nihil non tentat, vt fideles ad pietatis exercitia sollicitos habeat, nec vllum omittit argumentum, quo illorum reuerentiam, & affectum in sanctissimum Sacramentum augere possit. Itaque rata non postremum esse studium iuuandi parentes, & amicos defunctos, illo affectu naturali prudentissimè vti-
tur, vt prouocet ad frequentationem Communionis, causâ mortuorum faciendâ, & illi etiam plures indulgentias adiungit.

Quid ad hæc Raynaudus? Illa in totum damnat: *Non eget, inquit, Christiana pietas his commentis, nec admittit huiusmodi tectoria sinceritas, & veritas; quasi non habeamus plus satis illiciorum ad frequentationem Eucharistia, adornatur pia frans, & obiectâ escâ falsi fructus, inuitantur fideles ad crebram sacra mensa aditionem.* Arbitrabar exhaustam omnem impietatem; sed videtur continuò crescere: certus sum, nihil Caluinum atrocius scripturum, contra prudentissimam Ecclesiæ, & Summorum Pontificum, rerum saceratum œconomiam, & dispensationem. Quid verius & solidius explicatâ à nobis doctrinâ de fructu ex communionem à mortuis percipiendo? Hanc tamen non rationibus, sed conuitiis refellit scriptor Catholicus, & religiosus, & commenta vocat, sordes, quibus Summos Pontifices, & Ecclesiam conspurcat. Mira est sanè Summi Pontificis patientia, qui ista ferat, nec vti-
scatur.

E quatuor capitibus à nobis propositis, quò totam disputationem Thomæ Hurtadi reuocauimus; absoluta sunt duo priora de hæresi, & de rerum Sacrarum contemptu.

ARTICVLVS TERTIVS

Paradoxa Theophili.

SEquitur tertium de opinionibus falsis & absurdis : sed Scum omnia quæ ex Raynaudo refutauimus , ad istud genus pertineant , addemus tantum duo absurda , & penè paradoxa , quibus imperitia demonstratur hominis , qui in omnes censoriam virgam assumpsit. Et illud in primis in Hurtado refellendum , & irridendum suscipit , quod orationem dixerit esse essentialiter submissionem ad Deum : & ad omnia Dictionaria prouocat , quibus hæc duo , inquit , toto cœlo differunt.

Sed Hurtadus illum arguit tanquam grammatices magis , quam Theologiæ peritum , & paragraphi 14. part. 10. a Dictionario grammatico prouocat ad Theologicum , & ex D. Thoma , & Caietano 2. 2. quæst. 83. art. 3. demonstrat , oratione hominem reuerentiam Deo exhibere , quatenus se illi subijcit , non præcisè ex humilitatis sensu , quatenus se nihil esse reputat , sed ex indigentia , vt agnoscit se à Deo omnium bonorum Authore pendere ; & ab illo suis malis remedia efflagitat ;

Verum error ille primus excusari potest præ altero , quo animas purgatorij videtur in infernum deicere : præ dolore intensissimo omnis solatiij , & gaudij expertes , ac ferè impatientes facit. Hunc verò errorem præ cæteris operosè , & efficacissimè repellit Hurtadus toto paragrapho 7. & variis argumentis exagitat. Primum sumit à statu animarum purgatorij , qui medius est inter Beatos omnis doloris , & damnatos omnis gaudij immunes , animæ verò Purgatorii vtriusque status extremi participes mixtum habent cum dolore gaudium , cuius tot & tantæ causæ suppetunt , vt verissimè dixerit S. Catharina Senensis , se à Deo audiuisse , neminem præter Sanctorum animas in paradiso solidiora , aut vberiora gaudia percipere animabus purgatorii. Cui reuelationi suffragantur celeberrimi Theologiæ Scholasticæ , & Mysticæ Scriptores , nec illis desunt huius gaudij causæ efficacissimæ : nam in primis fide certum est

illas hoc loco detineri, vt velut vinicomburio torqueantur donec expurgatæ fuerint, & ab huiusmodi pœnis viuorum suffragiis leuari. Ex his duobus ergo principiis, quasi necessaria consecutione nascitur gaudium, cum ceritò sciant, sibi viuos opem ferre, vt quam primùm ab huiusmodi tormentis liberentur.

Sed solidius gaudium ab ipso Deo, vel summè perfecto, & infinito, vel sibi bono percipiunt: hi enim sunt duo fontes, vnde nascitur ille, *fluvius qui civitatem beatorum latificat*, & Cœlicolas omnes *torrente voluptatis* inebriat: hæc enim est, cumulata illorum fœlicitas, quòd sciant quid in se sit Deus, & quid sibi per totam æternitatem sit futurus: vtroque bono delectantur animæ iustorum in purgatorio reipsâ, & plene primo, spe altero. Hinc à Thoma Hurtado profundè distincta pars superior & inferior intellectus, & voluntatis, & ineptè à Raynaudo refutatur hæc distinctio. Certum enim est à D. Augustino, & D. Thoma has facultates, quasi aërem in varias regiones diuidi, in superiorem, quæ æterna contempletur, & ab illis agendorum regulas excipiat, & in inferiorem, quæ temporalibus attendat: illa Deo subiciatur, & in se illapso fruatur; ista verò creatis dominetur, vel ab illis patiatur. Huius discriminis luculentum argumentum est Christus patiens, & beatus: atque ad illud exemplar, quod in Caluarie monte monstratum est, animæ Purgatorij suis pœnis gaudia admiscant; aut potius seiuncta diuersis partibus, quasi regionibus continent; & dum igne corporeo alligantur, & torquentur parte inferiori, fundus animæ Deum præsentem habet, eoque incipit frui, gustum futuræ beatitudinis iam spe perceptæ capit.

Non possum supersedere à tertio paradoxo Raynaudi quod eodem paragrafo par. 9. & ult. refellit Hurtadus: cum enim videret sibi imminere graue periculum, & insolubile argumentum pro subiectâ disputatione communionis, à sacramento, quod die Parasceues celebrat Ecclesia, & animabus purgatorij etiam applicat his verbis. *Quod ore sumpsimus Domine, purâ mente capiamus, & de munere temporalis fiat nobis remedium sempiternum.* Et eâ die non fiat consecratio panis & calicis, sed ex præsanctificatis fiat oblatio & communio pro animabus

SVM. CONTR. THEOPH. CVM HURTAD. DE COM. 507
purgatorij; inde manifeste conuincitur, Eucharistiam,
qua sacramentum, Ecclesiæ more, animabus defuncto-
rum applicari & proficuum esse.

Quid ad hæc Raynaudus? Cum nihil haberet, quod
responderet, quasi desperatione adactus, negat hanc
consumptionem specierum esse communionem; sed
quoddam sacrum similitudinarium, vt videre est in Misa
nauticâ, quam siccam vocant, Esto non fiat sacrificium:
quod si vltro concedam, vim argumenti auget; non
potest negare esse sacramenti susceptionem, quæ proficit
mortuis; & hic est nostræ disputationis finis, & fructus.

ARTICVLVS QVARTVS.

Mendacia, Calumnia, & Maledicentia in Hurtadum.

Hic Articulus est breuior futurus; quia si velimus sin-
gula prosequi, exscribendus esset liber integer; cum
nihil aliud sit quam mendaciorum, & conuictorū illuuius;
vt ipse titulus demonstrat. Vnum mendacium annota-
bo, quod sit instar omnium. Triplici ait, oppugnatione
appetitum suum de communione pro mortuis opuscu-
lum: Primâ à consortio cum hæresi Aetii, & Lutheri;
Secundâ variis argumentis à Thoma Hurtado, & de his
abunde actum est: tertiam, inquit, oppugnationem
adornauit Augustinus de Bellis, qui agnoscit, ipsum
euicisse quod obtendebat, errorem esse popularem com-
munionem pro mortuis, & falli plebem ex desiderio, suos
vitâ functos iuandi communicantes: sed non debuisset
hunc errorem curari, quia perinde est, siue per veritatem,
siue per falsitatem Deo seruiatur, dummodo seruiatur.
Hæc Theophilus.

Sed falsissimum est, Augustinum de Bellis concessisse;
vniquam Raynaudum probasse, quod proposuerat; sed
refutato efficaciter eius libello, secundam & conditiona-
tam responsionem adhibuit: esto populus ex ignorantia
inuincibili deceptus fuisset; non debuisset à frequentatio-
ne communionis semoueri, cum ignorantia inculpatum

faceret ; & si animabus Purgatorij nihil entolumentū conferret hæc Communio, ipsis Communicantibus vtilissimam esse, nec debuisse hoc fructu fraudari. Nihil verius, & prudentius hoc responso Augustini, sic à me explicato, nihil mendacius illo, quod Theophilus fingit.

Superfedeo à referendis falsiloquiis, conuictis in Hurtadum congestis. Id solum obseruabo Hurtadum scripsisse contra nouam opinionem Raynaudi, cum modestiâ & grauitate dignâ Theologo, laudasse tanquam virum valde eruditum & pium ; sed addidit se mirari, quod ita stomachatus fuerit, aduersum communionis promouendi vsum, qui pius & rationalis esset, tum ad excitandam compassionem animarum Purgatorij, & voluntatem eas iuuandi ; tum etiam non mediocrem deuotionem in venerabile Eucharistiæ sacramentum, nec sub specie pietatis, & religionis animabus carceri mancipatis auferendum. Addit, Raynaudum deditum fuisse Latinitati, quâ fateatur pollere, magis quam Lectori doctorum Sac. Theologiæ, quos male intellexit. Tertio Raynaudum arguit, quod dixerit audacter, non esse habendam fidem, reuelationibus Sanctæ Brigitiæ, Geltrudis, & similium sanctarum mulierum. Quarto mirum est quantum extenuet Raynaudus mortuorum subsidia, videtur enim, vt dicebat ille, mortuos flagellare. Quinto & vltimo Raynaudus finxit, quem feriret, quia nemo Catholicorum opus operatum somniauit.

Hæc summa est eorum quæ scripsit Hurtadus in defensionem communionis pro mortuis, confirmatæ decreto congregationis contra libellum Raynaudi. Iudicet æquus Lector, an excesserit metas modestiæ disputationis ; an habuerit Raynaudus causam expostulandi, & congregandi in Hurtadum plaustra conuictorum : sed Raynaudus adeo delicati sensus est, adeo præposteri iudicii, vt putet, graue crimen esse, si quid improbetur eorum, quæ asserit, & cum omnia sibi in alios permittat, nihil vult aliis in se licere. Itaque vbi primum audiuit Thomam, pro peste damnatum à congregatione martyrium improbasse ; antequam liber Thomæ ad manus eius peruenisset, hanc Lugduni die vndecimâ Decembris 1652, epistolam scripsit. *Quod attinet ad Tho-*

nam Hurtado, nondum vidi; sed nihil quidem ad me pertinet, ego non sum hospes in huiusmodi Bambilionibus contemnendis, iam sex multavi, Barresium, Camerarium, Chiefonium, Volanum, Launoyum, Goldolphum, & omnes aque duræ: nemo eorum ausus est reducere. At videro quid notes, apparabo illi moresum salisum, & piperatum, nisi agat de martyrio, circa quod oportet me dextre agere, & semper prastolari opportunum: quamquam nec circa hoc abibis prorsus impune, si soncam suam ibi repereris Criticus.

Ex hac Epistola nosse licet Authoris ingenium, & incredibilem vanitatem: ignavix aduersariorum imputat, & suorum librorum terrori, quod à gravitate, à modestiâ, & prudentiâ Christianâ profectum fuit: superfederunt à scribendo, ne cum homine insanire viderentur, & ne conuitiis, quo reuocare solet disputationes omnes, certarent, ne scandalo essent fidelibus, & Ecclesiam ridendam propinarent hæreticis, qui vnus est librorum huiusmodi fructus.

Videat etiam prudens Lector, an ea, quæ ex Hurtado retulimus, dederint Raynaudo iustam occasionem hæc scribendi ad Patrem Auerfa Generalem Hurtadi, *Breviculum aberrationum, falsiloquiorum, & petulcatum in opere Hurtadi deprehensarum*. Vbi nam sunt illa falsiloquia, illæ petulcitates? Doctrinam antiquam, Ecclesiæ decreta, & congregationis Romanæ, solidissimis rationibus & pari modestiâ, ac gravitate defendit Hurtadus; & hæc vocat Raynaudus falsiloquia, petulcitates, & putat sibi licere illi, per conuitium dare cognomina *Bucca ferrei, pilosi*, vt ostendat, non doctis dictis certare, sed maledictis, & certare tanta clamoritate, ac præfidentiâ, vt Ennianum *Tarantantara* fragore superet eius Baubatus.

Totus autem eius connisus, quoad hoc negotium, in illud incumbit, vt fabre factâ ex suo cerebro nouâ notione Martyrii, sanguine, vt ait violenter per tyrannum effuso rubricati, excludat à martyrum albo Sanctos Alexandrinos, quos veluti martires Ecclesia colit, quamvis non pro asserendâ fide fuerint mortui, sed pro charitate in pauperes. Videamus, an iustior sit Raynaudi contra

Hurtadum de martyrio per pestem, quam de communione pro mortuis expostulatio.

SECTIO TERTIA.

Compendium & iudicium Controuersie, de martyrio per pestem.

IDEM est Hurtadi in hac controuersia de martyrio per pestem ius, & rationum robur contra Raynaudum, quod superiori de communione pro mortuis; par etiam futurus est exitus, & Hurtadi certa victoria de Raynaudo iustissime damnato decretis sacre Congregationis indicis, Præfæcto Bernardino Cardin. Spada Episcopo Albanensi: & ita habet censura; *de martyrio per pestem ad martyrium improprium, & proprium vulgare comparato, Disquisitio Theologica Theophili Raynaudi: eiusdem error popularis discussus. Anno à Natiuitate Domini nostri Iesu Christi 1647. indictione decimâ quartâ die vero undecimo mensis Martij, &c.* Hoc decretum defendendum suscipit Thomas Hurtadus contra. libellos duos Theophili.

ARTICVLVS PRIMVS.

Status Controuersie proponitur ex Hurtado.

NE de vocibus, ut fieri solet, disputatio instituat, accuratissimè variis exemplis statum controuersie explicat Hurtadus. Sicut, inquit Antidoto primo ad finem paragr. 14. & Antidoto 1. paragr. 1. parte vndecimâ, Duplicem obedientiam distinguit S. Doctor 2. 2. q. 104. 2. 2. Vnam, quæ est specialis virtus, cuius obiectum formale est præceptum tacitum, vel expressum superioris; aliam, quæ est generalis, & respicit voluntatem superioris quocumque modo insinuatam; sic etiam distingui solent reliquæ virtutes gratitudinis, humilitatis: & ad id genus distinctionis omnino reuocanda est hæc de martyrio Disputatio. Vnde, ut illud apertius

obedientiæ exemplum virgeamus, & inde lux hauriatur, & nebulae omnes dispellantur, quas offundit Theophilus: sicut is, qui obseruat mandata Dei, ex motiuo virtutis temperantiæ, & charitatis, &c. ad quam subiecta materia pertinet, dicitur obedire Deo in actu, quasi exercito materialiter, quia voluntatem Dei implet, quamuis formalissime ex motiuo obedientiæ, vt est specialis virtus non pareat; & Religiosus, qui regulam implet, etiam nullo imposito præcepto, obedire dicitur, etsi non respiciat speciali virtute obedientiæ, præceptum aliquod formale, & expressum: idem plane de martyrio dicendum est.

Vnde eodem loci Hurtado argumentum ineluctabile elicit, quo simul controuersia statum explicat, propositam veritatem demonstrat, & confodit aduersarium, atque omnes eius technas dissoluit. Obedientia quæ resplendet in omni actu virtutis exercito, & inobedientia, ac ingratitude, quæ in exercitio omnis peccati mortalis elucet, si illa comparatur ad veram & specificam obedientiam, & ista ad veram, & specificam inobedientiam, & ingritudinem, est materialis, impropria, & analoga obedientia, ingratitude, inobedientia, nec ab illis rigore Theologico dicitur quis formaliter proprie & specificè inobediens & ingratus: nec ab illâ duplici notione obedientiæ abstrahitur vnus conceptus vniuocus, sed dumtaxat analogus: ergo idem omnino dicendum est de martyrio sanguinis, quod propriissime martyrium est ex sensu totius antiquitatis, & de martyrio per pestem, quod analogicè, & materialite tantum hoc nomen habere potest.

Illustrat hanc eandem controuersiam exemplo huius nominis *Apostolus* vel *apostata* & *hæreticus*. Certum est propriissime Apostolatus iura solis duodecim à Christo designatis competere per totum orbem missis, cum facultate Ecclesias vbique instituendi, & scribendi libros canonicos: hoc tamen Apostoli nomen, non æquo iure, sed vere & analogicè D. Xauerio attribuit Raynaudus: ita Duplex ex scripturâ hæresis, genus est, vitâ, & moribus negantium fidem, vel sensu, & verbis: hæc propriissime hæresis est, illa materialiter, & analogicè tantum.

Addit tandem variis locis nouam lucem huic controversiæ à nominum ethimologiâ , in quorum significatione , inquit Sanctus Doctör , aliud interdum est , id à quo nomen sumitur ; sicut inquit , lapis à læsione pedis translatus est : aliud vero est id , ad quod significandum institutum est , nempe ad certam speciem corporis significandam : ita inquit , nomen Martyrij sumptum est à morte appetitâ propter Christum ; sed ex vñ Ecclesiæ receptum est , vt significet mortem violentam illatam à Tyranno alicuius veritatis , aut virtutis supernaturalis , & Christianæ causâ , quæ dicitur baptismus sanguinis , & parem habet cum baptismo fluminis vim , vt ex opere operato remittat culpam omnem , & pœnam , ex attrito contritum faciat , nihil pœnarum relinquat , vt vere dici possit , *iniuriam facit martyri , qui orat pro martyre.*

Vnde afferri potest exemplum superioribus aptius , & quod magis ad rem faciat à duplici baptismo , vel sacramento , voto aut re suscepto : vtrique enim nomen commune est analogicè , non vniuocè , similis etiam quodammodo effectus ; cum hoc tamen discrimine , vt sacramentum baptismi , voto susceptum ex opere operantis iustificet , remittat peccatum , non tamen omnem auferat pœnam : iustificatio enim ex opere operato , omnis pœnæ remissio , effectus est baptismi reipsâ suscepti.

Quod omnes agnoscunt inter hæc duo genera baptismi discrimen , idem statuit congregatio Indicis , confirmat Thomas Hurtadus inter martyrium sanguinis , seu ex violentâ morte alicuius virtutis , aut veritatis supernaturalis causâ illatæ , & martyrium Patientiæ , Charitatis : & illud omne nouum ab antiquo distinctum , quod inuenit Theophilus , & quod pertinacissime defendit.

ARTICVLVS SECVNDVS.

*Duo errores damnati in libro Theophili: æqualitas
martyrij per pestem cum martyrio San-
guinis refellitur à nouitate opinionis.*

Verum vt rem confusissimam, & longissimam pau-
cis, & distinctè complectamur, ex documentis an-
tiquæ Ecclesiæ: Praxis Romana, & Catholica duo
damnat in Theophili martyrio Charitatis, & per pe-
stem: Primo quod paris faciat conditionis, naturæ, &
virtutis cum martyrio sanguinis, eadem det priuilegia,
quæ omnino quatuor continentur, nempe iustificatione
ex opere operato, remissione omnis culpæ, & poenæ,
tertio exemptione à precibus Ecclesiæ, quarto aureolâ
vltra auream victori donandâ. Præter hæc quatuor, quæ
antiquo, & suo nouo martyrio vult esse communia, se-
cundum Ecclesiâ damnat, quod non solum vtrumque
æquet martyrium, sed suum nouum antiquo velit potius
& præstantius esse.

Hos duos errores multis argumentis congregatio, &
eius Apologista validissime conuellant, quæ omnia lucis,
& breuitatis causâ ad duo reuoco: primum petitur à
nouitate opinionis suspectâ vbique in rebus fidei, & in
subiectâ materiâ manifestè damnandâ: aliud desumitur
à naturâ martyrij, & à conditionibus, ac proprietatibus,
quas legitimum martyrium requirit, & quæ manifeste
desiderantur in martyrio Theophili. Ad hæc duo argu-
menta reuoco quæcumque Hurtadus & Theophilus
scripsere semotis conuictis, quæ sunt infinita.

Quod ad nouitatem attinet, fatetur Raynaudus par. 3.
cap. 6. præfatos authores sui martyrij non meminisse; sed
eius dumtaxat, quod ex doctrinæ regulatæ, odio inferitur:
verum addit illud argumentandi genus, cum solâ au-
thoritate negatiuâ nitatur, futile esse. Sed contra hanc
responsionem Hurtadus paragr. 1. part. 2. efficacissime &
inuincibiliter arguit, in rebus, quæ ad dogmata, ad disci-
plinam Ecclesiasticam, ad rem sacramentariam perti-
nent, argumentum ab auctoritate negatiuâ neruofum.

& efficacissimum esse, quo vsi sunt semper SS. Patres contra omnes hæreticorum nouitates: atqui vt ex stãtu controuersie explicato constat, disceptatio ista de Martyrio maximi momenti est, pertinet ad rem sacramentariam vsu frequentissimam; in dubium vertitur, an plura sint baptisinata, an priuilegia quatuor martyrij sanguinis, seu mortis violentie communicanda sint morti ex charitate, ex patientiã, voluntarie magis suscepta, quam violenter illata: arque huius generis martyrij fatetur in Ecclesiã antiquã, vel altum esse silentium, vel non esse expressam mentionem: ergo hoc solo nomine reiicienda esset opinio Theophili. Sed addimus non solum tacitum, aut ignotum fuisse, quod Theophilus admittit, augmentum, vel auctarium; verum etiam expressissime reprobatur: ergo nullã ratione defendi potest.

Hurtadus toto fere paragr. 3. probat expressis verbis SS. Patrum, latissimum esse discrimen inter martirium compertum sanguinis, & reliqua patientie, charitatis, quibus nomen analogum sit commune, priuilegia, vero enumerata soli martyrio sanguinis asserunt: & licet has Patrum authoritates falsis possit interpretationibus corrumpere, omnia tamen eius suffugia præcludit testimonium Cypriani libro de mortalitate, vbi ex sensu communi Christianorum apertissimè aufert morti ex peste inferuentium cognatis, & amicis, Martyrij gloriam, quia fugiebant pestem, ne martyrio priuarentur. Hæc enim obiciebant Diuo Cypriano, *martyrio haud prius, dum morte præuenior.*

Quid ad hæc Cyprianus? Non respondet ex mente Theophili, mortem ex peste, in obsequium languentium oppetitam martyrium esse, quod æquet, aut superet illud, cuius denderio tenebatur: responso in promptu erat, & omnino necessaria, nisi falsa fuisset, & contra sensum omnium Christianorum. Vnde Cyprianus in aliã, à Theophili scholã eruditus, respondet conquerenti de palmã martyrij peste sibi ereptã, *Non est, inquit, in tua potestate, sed in Dei dignatione martyrium, non potes te dicere perdidisse, quod nescias an merearis accipere.* Hoc argumentum confirmat primum propugnaculum congregationis Indicis paragr. 4. par. 1. defensum

ab Hurtado contra ludibria Theophili : neque enim congregatio voluit illi suæ censuræ rationes occultas esse, & primam petit à nouitate dogmatis, quod multipliciter vrget; primò, si vltra mortem violentam pro Christo oppetitam detur martyrium à peste, dabitur quadruplex baptisma, nempe fluminis, flaminis, sanguinis, & pestis, seu mortis naturalis acceleratæ, vi alicuius malignæ qualitatæ ab aëre haustæ.

Theophilo retulerat Cardinalis, Spada magnam vim factam in hoc argumento à consultoribus, & iudicibus: ridet tamen illud, & per ludibrium data responsione, futuros plures baptismos, culcitrat, si quis illa suffocetur, aut veneni, si quis eo pereat: Concludit tandem, *non pudit has nugæ obijcere*. Stupenda planè Theophili audacia, quos reueretur, si iudices Romanos pro nugacibus habet, etiam cum solidissima obiciunt, & ipse meras nugas reponit? Neque enim martyrii diuersitas à quibuscumque causis pendet, sed ab iis quæ mortem violentam faciunt, vt à naturali distinguitur, etiam ex morbo festinata.

Ad idem genus nouitatis pertinet sextum congregationis propugnaculum. Si semel accenseamus numero Martyrum scos qui moriuntur inter ministrandum ægris, aut faciendo aliquid boni: Ergo in album martyrum referendus est sanctus Casimirus, & illi omnes, qui nolunt seruare vitam remedio quodam illicito, vt Chartusianus esu carniū, religiosus dispensatione regulæ, monitus à mago de cæde inferendâ, si velit fugere, ne videatur fidem habere magicis incantationibus, vel illis vti ad propellendum morbum: martyr futurus est reus accusatus Iudaismi, damnandus ad mortem, vt negatiuus, si nolit falso sibi imponere id crimen. At quis dicat omnes hos enumeratos casus habere vim martyrii, & quatuor priuilegia illi eximia? Certe hoc perinde est, ac si quis vellet omni liquorum generi ad ablutionem apto, dare vim baptismi fluminis, quod citra hæresim admitti nequit.

Eo etiam pertinet secundum Congregationis propugnaculum: si quis inquit, charitatis causâ accedat ad ciuitatem peste infectam, vt amico illo morbo laboranti opem ferat, & casu moriatur, vel lapsus equo, vel

confossus à latronibus, ille cum obeat mortem ex aliquâ virtute supernaturali, non esset fraudandus gloriâ martyrij; licet id neget Raynaudus, quia, inquit, casu mors illi accidit: sed immerito, & parum consequenter ad sua, & communia principia ex D. Thoma in 4. dist. 49. quæst. 5. art. 3. si quis moriatur ex vulnere fidei causâ illato; quod tamen mortale non fuit, nisi ex aliquâ negligentia, non caret aureolâ martyrij: sic etiam nec ille, qui perit, dum it adiutum amicos agros, si voluntas illos iuuandi, consequutâ morte satis sit ad martyrium. Ad idem argumentum à nouitate petittum pertinent quæcumque habet Hurtado par. 3. paragr. 1. ubi affert alia his similia exempla. Eo etiam spectant, quæ dicit paragr. 5. par. 1. ad defensionem sui argumenti, quod ex nouitate reuera efficacissimum est: & si quid pudoris, aut reuerentiæ in Ecclesiam Theophilo reliquum fuisset, debuerat ad illud obmutescere.

ARTICVLVS TERTIVS.

Secundus locus Argumentorum contra Martyrium per pestem.

SECUNDUM genus argumentorum petittum à proprietatibus vero martyrio annexis, varie vrgent, & conficiunt Congregatio, & Hurtado. Primo verus, & legitimus veritatis, & virtutis testis non debet sponte prodire ad vltroeam mortem, sed ad id cogendus aut vocandus est: illa proprietas vero martyri à Tyranno interfecto competit, & deest morienti peste, dum ex charitate inseruit proximo: ergo illud, non istud habet veram martyrii gloriam.

Prima propositio est communis doctrina Patrum à Christo hausta, qui prohibet, ne vltro ad certamen accedamus; tum vt nostræ infirmitati, tum etiam vt persecutorum bono consulamus, ne nos in periculum temerè, & illos ad æuitiam propellamus. Sed si defendendæ fidei, aut infirmorum animandorum instet necessitas, non debemus certamen detrectare: sicut enim primum temerarij, & præcipitis est animi, ita hoc

secundum esset timidi, & ignavi: nec vllus vnquam martyrū ab hoc medio, seu temperamento recessit. Si qui enim visi sunt sponte prodiisse, vel ad tyrannum accessisse, id fecere necessitate defendendæ fidei, vel debilitum confirmandorum, dum persecutio vergeret in graue damnum Ecclesiæ: & tum testes legitimi iure diuino, cogebantur fidei attestari. Hâc necessitate & vt sic loquat legitimatione carent, qui peste laborantes curant; quia nullo cogente vltro prodeunt, ad illud charitatis exercitium, & nullum ex diuino mandato testimonium iure editum reddunt sicut fidei martyres.

Eodem spectat ratio quarti propugnaculi. Ad verum martirium opus est tyranno, sicut ad pœnitentiam, & Christi vt Redemptoris aduentum, vero peccato, eius sanguine, aut nostris lachrimis eluendo; quia martirium est verum certamen ad spectabile, ad quod proinde non sufficit, vt vult Raynaudus, vel dæmon hostis inuisibilis, vel infirmitas corporea: sicut enim componit cum martyre morbum, aut Dæmonem, qui metaphorice tyranni sunt, ita etiam à veri martirij proprietate recedit.

Eoque longius, quo remōtior est à supremo actu Christianæ fortitudinis, quem cum SS. Patribus D. Thomas constituit in sustinendâ per se morte, vt virtuti maximum periculum creet, nullo ad eam auertendam quæsito, aut parato remedio. Certum enim est perfectioris fortitudinis esse tolerantiam mali, quam impetum, & aggressionem, eoque in sustinendo animum magis eminare, cum mortem præsentem videt, nec vllō remedio auertit: ita comparatus est martyr fidei, & miles, qui Ecclesiæ causâ arma suscipit, & in hostem irruit, vel eius sustinet impetum, ne Ecclesia indefensa sit. Si ergo contingat in prælio desiderari, vere martyr est, quia mortem non detrectauit, & si hosti restitit id Ecclesiæ potius, quam sui causâ fecit. Longe alia est ratio inferuentium ex peste laborantibus: illi enim parant remedia contra morbum, quasi contra inimicum inanimem, idque ex vi operis, & his præfidiis, atque aliis armati ad mortem impauidi accedunt.

Eodem spectat defensio secundi argumenti Hurtadi: paragr. 5. part. 2. vbi videtur Theophilus sui instituti

religiosi omnino oblitus. Nam diuos Alexandriæ immortuos obsequio peste laborantium, quos Ecclesia colit 28. Februarij, quasi martyres, adhibet sui furoris ministros, & inducit adeo atrociam conuitia in virum religiosissimum euomentes, ut illorum, ne dum Cœlites, sed hæreticos, ac poenè damnatos puderet. Id vero, quæ de causa? Quia decreta Ecclesiæ Romanæ, & antiquam Patrum doctrinam defendit contra profanas eius nouitates. Nec solum Ecclesiæ traditio genuinam Martyrij notionem à Tyranno interfectis vindicat; sed illis etiam asserit vera Peripateticorum schola: nam ut iam monuimus, & egregie docet S. Doctor, interprete Caietano 2. 2. q. 123. art. 5. vltimus fortitudinis conatus est, in perferendâ morte, aut eius periculo ab hoste, vel tyranno illato in odium fidei, & virtutis: at in naufragio, & periculo contagij nullus est, qui pugnet contra bonum fidei, & charitatis, aut qui ab illo arceat: ergo dum quis inseruit peste infectis, est potius impavidus, quam per se fortis.

Hæc est mens Philosophi 3. Ethicorum cap. 9. vbi non agnoscit præcipuum munus fortitudinis, circa quodcunque genus mortis, qualis impendet in mari ex tempestate, vel ex morbo; sed circa eam, quæ est pulcherrima; ut cum quis moritur in bello ad defensionem patriæ. Vbi D. Thomas lectione 14. dicit idem censendum esse de quolibet genere mortis, quam vir fortis sustinet ab aduersario virtutis causa, ut inde excludatur cauillus Theophili, qui putat, nos arctare fortitudinem ad sola belli pericula: damus enim illi locum in omni genere virtutis, cuius defendendæ causâ hostis minatur, & intentat mortem. Alia autem sunt, inquit Caietanus, ægritudinis, aut maris pericula, quæ non aduersantur directè bono virtutis, quando quidem communia sunt bonis, & improbis; ergo non est in his præcipua fortitudinis materia, sicut nec in peste: licet enim dicatur bellum diuinum, in vindictam peccatorum, & bonorum exercitium, non tamen prohibet quin iustus exercitio charitatis in infirmos vacet, imo ad hoc opportuna est: ergo non habet fortitudo hætenus, cum quo pugnet, & qui arceat à bono, in quo sita est huius virtutis ratio.

ARTICVLVS QVARTVS.

Secundus error ex præstantiâ Martyrij per pestem supra Martyrium sanguinis.

R Aynaudus errorem errore cumulat: non fuit illi satis æquare Martyrio fidei suum nouum ex peste Martyrium: adeo illius amore captus, ac penè dementatus est, ut non solum Rhetoricandi licentia, sed etiam rigore Theologico anteponat: quod propius absit à similitudine Christi, qui se sponte obtulit morti. Hic vera ergo necessitas incumbit defendendæ religionis. Deinde, inquit, habet aliquid hoc genus Martyrij, quod reliqua Sanctorum Martyria superet, quia nihil est admixtum malitiæ Tyrannorum, aut carnificum: vnde concludit huic Martyrio communem esse cum altero, & cum Sacramentis vim remittendi culpam omnem & pœnam ex opere operato.

Si prima Theophili assertio, qua suum nuperum Martyrium antiquo æquat, utcumque tolerari potuisset, certe hæc secunda, qua etiam anteponit, nullo modo ferenda est: Nescio, an plus vitii, & erroris insit conclusioni, vel argumentis, quibus illam probat, sicuti demonstrat Hurtadus parag. 1. part. 4. vsque ad finem. Nam prima probatio à similitudine cum Christo, vel à spontaneâ oblatione vix excusari potest ab errore: si quid enim virium habeat, conficiet cum hæreticis, opera quæ ex voto, vel præcepto sunt, minus accepta Deo esse, quam quæ spontaneè, nullius vori, aut præcepti vi. Deinde: potestne negari citra manifestam hæresim, Christo impositum moriendi præceptum? Peius aliquid etiam habet secunda probatio, quâ vult euincere præstantius esse Martyrium suum communi Martyrio, quod expers sit omnis hominum improbitatis.

Mirum est, quod Deus non aduocauerit Theophilum ad consilium, & Oeconomiam redemptionis humanæ; Author enim illi fuisset, ne quid ex sœuitiâ, & improbitate hominum, admisceretur, quo purior, & perfectior esset, uti suum Martyrium. Nec aduertit quod.

ex Philosopho retulimus, fortitudinem, & victoriam suas vires augere, & inclarescere ex Aduersariorum impetu & malitiâ: alia est enim fortitudo cum hoste, aut Tyranno, alia cum pestis periculo pugnantis, vt amicum iuuet. Hic enim non moritur, vt curet; sed curat etiam si adsit periculum proximum mortis: at fidei Martyr moritur, vt fidem confirmet. Hoc discrimen adeo apertum est, vt cæcum dicat Theophilum Hurtadus nisi id videat. Quis enim neget perfectius fortitudinis obiectum, aut exercitium esse, cum quis vitam contemnit, præsentem mortem oppetit, vt fidem defendat, & suo sanguine consignet; quàm illius, qui nullo oppugnante fidem, aut charitatem in proximum, illi peste laboranti auxilium confert, etiam cum contemptu mortis? Huius enim virtus, & fortitudo non respicit æquo vultu, & animo vitam, & mortem, vt charitatem exerceat; sed ne illi, & officio desit, periculum mortis non detrectat, quod multo inferius est Martyrum fidei fortitudine. Vnde immerito, nec sine nouo errore, dat Theophilus suo Martyrio vim iustificandi ex opere operato, nullo Authore, nullo fundamento, nec minori temeritate, quàm si quemlibet liquorem ad vsum baptismi admitteret.

Vrget etiam illum Hurtadus argumento efficacissimo, quod tacuit Raynaudus, quia nihil habebat, quod responderet: Nam si par sit vtriusque vis ad iustificandum, sicut cum mater grauida occiditur in odium fidei, infans vtero inclusus saluatur baptismo sanguinis materni: ergo mater quæ immoritur ministerio peste laborantium, filium, quem vtero gestat ex opere operato purgat à peccato originali: quod nullus vnquam Catholicorum dixit.

ARTICVLVS QVINTVS.

Frustra Doctorum & Academiæ dolo captata suffragia à Theophilo.

HÆc est summa Controuersie de Martyrio per pestem, quod damnauit Congregatio Cardinalium,

Sed Theophilus omnium vniuersitatum, & priuatorum Doctorum ex totâ Europâ suffragia captauit, & duodecim vniuersitatum, quinquaginta septem Scriptorum, & plurimum Doctorum gloriatur se habere, quibus decretum Romanum eleuet: Ad quæ plura Hurtadus. Et primo quidem suffragia Academiæ, aut Doctorum expendit accurate parag. 1. part. 7. & sequentibus; Responſionum ſumma eſt.

Primo fraude Theophili, & amicorum, hæc ſuffragia obrenta; vel enim data ſunt ante decretum Romanum, vel eſt illis arte occultatum, vnde ex Italiâ, vbi euulgatum primo fuit, nullam habet Academiæ, quæ faueat, & quinque Doctores oſtentat, ſed falſum illis imponit. Deinde: vt Hurtadus notat, Patres Societatis, qui Hiſpalenſem Academiæ ad huic ſententiæ eius Martyrij ſubſcribendum vrgebant, caute ſtatum Controuerſiæ occultabant. Et ſi propoſuiſſent, an baptiſmus peſtis par, aut ſuperior eſſet baptiſmo ſanguinis, & an haberet eandem vim iuſtificandi ex opere operato etiam filium, quem mater immortalis obſequio charitatis ferret vtero, omnes fuiſſent illius opinionem execrati. Quare verius puto non alio ſenſu reliquas Academiæ Martyrium Theophili probaſſe, quam quo Granatenſis admiſit, non de Martyrio propriæ, & ſtrictæ ſumpto, ſed tantum analogice eâdem diſtinctione, quâ Apoſtolatum, quâ obedientiam, gratitudinem, & alia genera virtutum, aut vitiorum Theologi ſolent diuidere: & ſi ab his Doctoribus aut Academiis rogaret Theophilus, confirmari quem dat D. Xauerio Apoſtoli titulum, nullus, puto, contuliſſet eo ſenſu, aut gradu, quo duodecim Apoſtoliſ competit: ita licet interpretari, vel excuſare ſenſum huiusmodi Doctorum, aut Academiæ, ne grauemus, vel ignorantia, vel aperta contumacia contra antiquam, & præſentem Eccleſiam.

Et quamuis Theophilus contendat, aliquot Doctores, vel Academiæ ſuo ſenſu Martyrium, atque eodem rigore, quo defendit confirmaſſe, nihil mirum eſſet: nam præter quod obſeruat Hurtadus, præcipuas orbis Chriſtiani Academiæ Pariſienſem, Louanienſem, Duacenſem, Salmantienſem, Complutenſem, Conimbricam

censem, noluisse, sine dubio rogaras subscribere, reli-
 quas vero inferioris notæ in illum errorem impegisse,
 cum etiam grauiorem incurrerint. Nonne Cypriano
 Authore tota fere Africa Anabaptismum hæreticorum
 voluit inducere? Nonne Concilium Basileense voluit
 quasi dogma fidei, suam aduersus summum Pontific. au-
 thoritatem statuere? Nonne hodie multi Theologi,
 sentiunt non solum in Ecclesiâ de fide definiti posse,
 quæ verbo Dei scripto, aut traditione implicite, aut
 virtualiter continentur (quæ est vera Catholicorum
 sententia;) sed etiam citra traditionem diuinam ex solâ
 Ecclesiastica, vel ex solo sensu mystico Scripturæ, ig-
 noto literali nouos articulos condi, quod plane est fun-
 damenta religionis conuellere, & Canones Conciliorum
 eodem loco constituere, quo libros Scripturæ Canoni-
 cos? Quid potest vero magis Anti-christianum dici illo
 errore, qui tamen plurimis forte obrepfit, quam pro
 suo Martyrio numeret Theophilus?

Nihil ergo iuuant suffragia tot Doctorum, & Aca-
 demiarum; nec enim loquuntur ad mentem Theophi-
 li; aut si illi in totum assentiant, infringuntur decreto
 Romano, quo Martyrium cum errore populari damna-
 tum est. Nec causari potest Theophilus, se inauditum,
 & indefensum, fuisse à Congregatione censurâ nota-
 rum: Nam res sub duobus, Pontificibus Urbano VIII.
 & Innocentio X. diligentissime discussa est: diu perora-
 uit Galliæ assistens pro Theophilo, Orator Regis Galliæ
 totis viribus damnationi intercessit, nec potuit impedi-
 re: adeo noxium & periculosum dogma visum est iu-
 dicibus æquissimis & doctissimis consultoribus.

At dicit Theophilus prohibitum quidem librum, non
 causâ Martyrij per pestem, vel falsæ, aut periculose do-
 ctrinæ; sed habitam rationem vulgi, cuius captum hæc
 sublimior doctrina superabat, & debilius oculos po-
 terat suo splendore perstringere; vel id factum in gra-
 tiam Nicolai Rodulphi Generalis Dominicanorum,
 qui hanc de Theophilo pœnam repetebat, ob scriptum
 contra suum Ordinem librum, cui titulus *Religio Be-*
stiarum.

Hæc responsa respiciunt hominem qui naufragio
 dum mergitur, non attendit, quid bibat: potestne

quidquam dici magis ab omni specie veri alienum, quam quot effudit Theophilus? Iam pluribus præiudiciis abiectâ omni veracitatis cura sibi fidem abrogavit: sed his ultimis commentitiis videtur præterita superare. Poterit ne persuadere, ea Censura intactum fuisse Martyrium de peste, vel illâ Iudices voluisse Patri Rodolpho gratificari? Nam is ipse refert, Cardin. Spada sibi aperuisse damnatum librum causâ illius noui Maryrij, nec-non rationes consultorum solidissimas, quas refellit quasi nugas. Nonne conqueritur, P. Vuaddinghum virum doctissimum, & religiosissimum sibi in hac controversia fuisse aduersatum? Præterea si quid dandum fuisset gratiæ potius, quam veritati, aut æquitati; certe Societatis autoritas adiuncta commendatione Legati Regis Galliæ apud Summos Pontifices, Patris Rodolphi gratiam vicisset, nec fulmen liber Theophili passus fuisset. Sed videtur adeo ingeniosus, vt faciat se foelicem ipso infortunio. Nihil periculi, inquit, suberat libro, nisi ex infirmitate vulgi: & se solatur exemplo Suarij, cuius sincerissima doctrina castigata est ad auerendum dedecus æternum Clementis octauj, qui imprudens illam confixerat, atque ista dicit se referre ex libro de immunitate Dominicanorum. Vnde constat iam à sexennio, & ultra fuisse elaboratum, & seruatum in scrinijs, sicut patricidij consilium à decennio meditaturn, cuius authorem numquam pœniteat.

Et hunc Theophilum, Ioannes Antonius Velasques, vocat *totius sapientia compendium*, referente Hurtado. Obstupui; fateor, ad illud elogium, & cum aliquid ex Velasques Commentarijs delibassem, quod magis placebat, quam quæ ex Baëza, Celada, & alijs legeram; dubitavi, an idem esset Author Commentariorum in Paulum, & Elogij in Theophilum, & inquisiui, an Ioannis Antonij nomen conueniret interpreti Apostoli: ubi autem comperi, ipsum esse laudatorem Theophili, parum absuit, quin omnino excideret ab opinione apud me de se conceptâ. Bone Deus, quam prodigus est Velasques Elogiorum! Si illi Theophilus est totius Theologiæ Compendium, quid reliqui sibi fecit? Quem titulum dabit Bellarmino, & Suares? Si ille sit Compendium, isti erunt totius sapientiæ Pelagus;

& adhuc improperabit Theophilus Dominicanis, ipsos attollere Diuum Thomam supra id omne, quod dicitur doctum: Cum laudes in Diuum Thomam à nobis congestæ iaceant infra Elogium, quo illum Velasques ornauit, aut potius se fœdauit. Sed quidquid sit, duo hætenus demonstraui, Theophilum iustissime à damnatum, & iniquissime Dominicanos falsis criminibus, quorum ipse reus est, grauasse.

Vltimis duobus libris vtramque nostræ Familiæ Theologiam propugnauimus, non quâ latè secundum totum suum ambitum pater, neque his omnibus placitis quæ laceßita sunt vniuersim à nostris æmulis, sed iis tantum locis quæ carpuntur ex postulationibus Carterij, & tribus Theophili libris insectationum in nos. Nonnullas etiam primo libro explicuimus & propugnauimus à Scholâ nostrâ opiniones, quæ ad alterutram Theologiam pertinebant; vt si hæc omnia iungas, non sperendam doctrinæ nostræ portionem explicatam habeas, & à calumniis aduersariorum vindicatam, quod vnum hoc nostro labore quærimus. Hunc enim propositum nobis scopum nouerint boni omnes, nempe vt nos vindicemus ab eo contemptu, quo si nos deiecerit Theophilus, non modo inutiles, sed planè scandalosi futuri simus toti Ecclesiæ: forte etiam dum conculcatum Ordinem inculpatâ, vt credimus, tutela virili erigimus, iis qui, ex deiectione nostri animi possent attollere occasionem suppeditare nostri consilij est, ne ultra sapiant quam oportet sapere. Id si assecuti fuerimus, non pœnitebit nos huius laboris suscepti.

ARTICVLVS VLTIMVS.

*Retrañantur de Patre Nidard temerè credita
& dicta.*

Is nostræ doctrinæ vindiciis statueram inferere, vt sub finem tertij tomi promiseram, responsionem ad librum Patris Nidard: Sed lætor datam mihi occasionem retractandi quæ temerè de illo scripseram, &

quam ex nimia credulitate religiosissimo viro intuli iniuriam sanè atrocem, quā possum, resarciendi.

Incideram in Authorem nescio quem: is fortè aliorum dictis, sicut ego ipse eius lectione deceptus, quam citato loco adnotaui, Pontificii de Conceptione decreti præposteram omninò interpretationem retulit ex libro huius Authoris, ut narrabat, Duaci edito, ascitam Conceptionis Immaculatæ *Laudabilitatem* ex Pontificiis sanctionibus, Catholicis indubitatam, contendebat ad certitudinem fidei proximam, per quatuor gradus suprà Moralem, suprà Physicarum dignitatum, & Metaphysicarum demonstrationum, imò suprà principiorum per se notorum, & indemonstrabilium euidentiā arcanum Immaculatæ Conceptionis prouenisse: vnde inferebat, quamuis vltimā Alexandri VII. Constitutione cautum sit, ne secus sentientes damnentur, aut vexentur assertiue ex fide certā, posse tamen illis notam erroris inuri, & pœnas problematicè infligi.

Visa primum mihi est hæc interpretatio quolibet paradoxo incredibilior. Nullam ab eo tempore quo mihi innotuit, prætermisi diligentiam in eo libro, quo hæc contineri dicebantur, conquirendo, nec contentus à Bibliopolis Parisiensibus, quibus in Belgio quotidianum est commercium, expetiuisse, illius Prouinciæ, & Duacenses Patres nostros litteris amicorum rogauī, ad nos mitterent librum, qui apud se typis datus ferebatur, sed nusquam comparuit aut repertus est: vnde mihi vehementissima suspicio suborta est aut verius certa sententia sedit, grauissimo Patri opus falsò ascriptum.

Et planè si ira habeat, ut alienā fide ipse nimium credulus & præceps euulgaui, indignum omnino est quòd à tanti viri maximis Hispaniæ & Ecclesiæ rebus dissentī parisque, officinā prodierit. Prorsus sophistam aut potius veteratorem respicit qui Apinis & Tricis Scholæ innutritus, nequitiam & crudelitatem præferat, & decreta Pontificia pessimis artibus corrumpat. Duram mihi Prouinciā & necessitatem imposueram disceptandi cum homine summæ authoritatis, ut mihi vsurpandum fuerit, quod à quodam Philosopho disputationem cum Augusto Cæsare detrectante dictum legi, periculosum

esse priuati certamen cum homine qui legionibus imperaret. Neque enim mihi minus iniqua aut infortunior uisa erat contentio cum viro, penes quem sit summa apud Regem potentissimum gratia & authoritas, qui plura regna, si opus sit, contra aggressorem possit in subsidium aduocare.

Utinque res sit, sensum meum paucis aperiam. Trium occurrit cogitatio; & horum vnus certa persuasio. Sentio itaque, aut librum frustra hactenus à me quaesitum non extare, aut si quis eo titulo & argumento prodierit, ut vendibilior fieret & grauius noceret, fraude Patri Nidard ascriptum, vel si is sit legitimus operis Author, eius mentem fuisse interpolatam & corruptam. Mei sensus rationem repeto primum à stylo, deinde ab instituto, & tandem ab immani falsitate paradoxi quod nullâ, quanta quanta sit authoritate muniri, nullâ etiam in speciem verâ ratione defendi aut fucari possit. Stylus quidem totus olet Authorem, qui nedum Scholæ argutiis sit à primâ ætate imbutus; sed penè ab ipsâ origine compactus, & ineptias, si quæ vnquam fuerunt, Scholæ, ad rabiem vsque depereat; quæ omnia abhorrent à vitâ anteaçtâ, & à summâ grauitate & sapientiâ Patris Nidard, quem à fide digno accepi, iam adultâ & prouectâ ætate Catholicum factum, ingressum Societatem, & diu militiam exercuisse, præfecti equitum munere defunctum, & Lutheranam hæresim ab infantiâ haustam eiurasse.

At quis nesciat militaris vitæ genus alienissimum esse à Scholæ subtilitatibus, quas vix hæretici degustent, tantum abest ut iis possint assuescere? Quid verò inclamat illa *laudabilitatis* vox barbara? Quid gradus certitudinis Moralis, Metaphysicæ, &c? Quid tandem distinctio iudicii assertiui & problematici, quod tamen immolatum & astruatum sit certitudini maiori, quàm vlla parere possit principiorum indemonstrabilium euidencia? Iurarem ista non potuisse proficisci à viro militia diu exercito, à Lutherano maximâ vitæ parte, id est ab osore Scholarum, cuius tamen nedum minutias calleat, sed ineptias etiam aucupetur, & fallacias insulsißimas capret, & insuperabilibus, dum alios videtur velle implicare, sese inuoluat nodis. Quid enim im-

plicarius & contradictorium magis, quam ab omnium certissimo supra prima principia assensu, non nisi problematicum proficisci iudicium, quod salua Constitutione Pontificiâ assertorium tantum iudicium vetante, damnentur qui Scoto non assentiuntur?

Sed præter hoc argumentum non leue à stylo Scholæ nugerrimæ, aliud suppetit longè grauius à sensu descriptionis & instituto: nam huius libelli, si ullus fuit, Authoris vna videtur mens esse, bonam fidem à societate humanâ & Ecclesiasticâ prorsus ablegare, illique dolos & fraudes sufficere, æquissimas principum, & Pontificum sanctissimas leges, pudendis, nedum ineptis & ridiculis, sed etiam nequissimis interpretationibus corrumpere; vt quisquis libelli, si extet, Author est, bellum indicere videatur probitati & humanitati, & perfidiam inuehere fucatam aliquâ subtilitatis & pietatis specie, vt sit detestabilior. Quis enim illos ferat, qui fœdera, pacta sincere inuenda, qui leges diuinas & Ecclesiasticas huiusmodi corruptelis sibi permittat inuerrere; vt si quid pollicitus sit, aut iuravit ex animo, in promptu, dissoluendo promisso & pacto habeat distinctionem, se problematice, non assertiuè locutum; quamuis subsit iuramento cognitio certior quolibet principio Physico, Metaphysico, aut per se noto? Quis sibi non magis ab hac distinctione timeat, quàm à peste aut quouis veneno præsentissimo?

Et ne quis rei per se innoxie credat, tot malorum me inuidiam importare, vt obliquè illius Authorem traducam, paucis demonstro nullo carere vitiorum genere. Omnia ab inscitia, ab improbitate, & vanitate mentis prodeunt, velut à triplici origine. Hinc toridem studia diuersa antiquorum, Thimonis Atheniensis cognomento osoris hominum, omnes vniuersim execrantis, quod multa per summam iniquitatem flagitiosissima perpetrent; Democriti risu & cachinnis res humanæ infectantis, quasi inanissimas & à vanitate profectas; & Heracliti vitam hominum perpetuo fletu prosequentis, quod inscitia miseranda cæci in omne errorum & flagitiorum genus nos præcipientes daremus. Certissimum est eam ex laudabilitate gradationem certitudinis, adiuncta distinctione, assertiuè ac problematicè dicti &

promissi, nullo horum malorum, quæ vindictæ, commiserationis, & contemptus vberissimam materiam, & æquissimam causam præbent, contagio carere. Id tantum dubitari potest, quæ illarum vincat, magis ne inepta & ridicula, an periculosior & nequior, vel magis miserranda sit.

Inscitiam demonstro à principio cui tota hæc machina astringitur, apertâ fallitate: non est dubium *laudabilitatem* (à quo vocabulo licet barbaro abstinere non possum cum sit totius rei cardo;) imparem omnino & ineptam esse adstruendæ tantæ certitudini; ut eam vincat quæ ex euentu principiorum per se notorum existit; cum ad summum infimi gradus, moralem scilicet, fulcire possit; ut multis euincere licet exemplis, quæ totâ hæc apologiâ aliisque partibus attigi.

Quis enim neget laudabile esse, quotquot Martyrologio recensentur, posse coli & inuocari, vel hostiam à sacerdote post consecrationem exhibitam populo, adorari; vel sacramentum absolutionis impertiri moribundo, qui aliquod poenitentiae signum ediderit, antequam illi vox & sensus exciderint; sicut puero moribundo, potest aqua roseaceâ, si elementaris desit, administrari baptismus? At quis nisi ignarus, & ineptus, & forte etiam nequam, ex eâ triplicis generis laudabilitate inferat, certius esse nedum physicâ & metaphysicâ demonstratione sed etiam quolibet principio per se noto, eos omnes, quorum nomina Martyrologio inseruntur, beatos esse cælo receptos; ritè consecratam quamcumque hostiam à sacerdote sacrificio Missæ astantium oculis subiectam, vel validum esse baptismi moribundo puero cum materiâ dubiâ, vel poenitentiae morituro adulto nullum peccatum confesso, sacramentum administratum?

Nam ut hoc ultimo exemplo, quia est apertius, cæteris prætermisissis utar; si ex illâ laudabilitate Pontificiis decretis inductâ, quæ iubent periculo mortis ingruente, dubium sacramentum conferre, certa euaderet supra metaphysicam assertionem, aut prima principia hæc administratio, impiè agerent, nec ab errore & sacrilegio excusari possent Theologi, & Summi Pontifices cum his occasionibus laudabiliter administratum sacramen-

tum

mentum iubent repeti, si moriturus periculum euadat, cuius causâ dubiæ materiæ collatum est.

Atque ut ruinosum illud fundamentum conuellam validius, explicata vi vocis: certum est ex Philosopho apud Diuum Thomam laudem ab honore differre, quod illa ab agendis, à mediis seu actionibus humanis, quæ ad finem recta tendant, consurgat: honor verò optimis quibusque debeat, & ex ipsa felicitate iam adempta existat. Hinc sanè omnium maxima, cum rebus dubiis tutiora, id est viciniora saluti, & à periculo peccati remotiora eliguntur. Hinc secunda Ethicæ nostræ parte distinximus duplicem veritatem: speculatiuam vnâ, quæ quid sit rei in se aperiat; alteram praxeos, quid facto opus sit, quid tutius, quid melius ad officium & salutem, præscribens, cui adherere summæ laudi ducatur, etiam si res in se inuidens, etiam si in se dubia & incerta sit. Ergo laudabilitas toto genere distat à rei ipsius veritate speculatiua, seu euidenti & certâ notitiâ.


Quare summâ fraude ex laudabilitate, id est, veritate practicâ, quæ quid agendum instet, docet, nec quid rei sit in se admodum curat, aut euidenter consequi potest, ac proinde à laudabilitate decretis Pontificiis asserta per varios certitudinis gradus ad summum euehere, quilibet res, quibus assuta fuerit. Ex Summorum Pontificum approbatione, crassa est inscitia; neque enim euidens rei in se curat iudicium, aut certitudinem, ut sic loquar, speculatiuam parit laudabilitas, sed operis & cultus honestatem, seu veritatem practicam, quæ in laudabilitatem recidat, quam mille exemplis constat saluam esse, quamuis res dubia sit, & forte etiam falsa, ut de Sacramento baptismi & poenitentiae paruulis & adultis morituris dictum est: laudabile imò & necessarium esse tum conferri, cum dubium esse non desinit, nec assurgere possit nedum supra principia indemonstrabilia; sed nec etiam ad gradum certitudinis moralis. Quis ergo non videat huius libelli Authorem non modò res politicas periculosè, sed summâ etiam imperitiâ res Theologicas, sus deque permiscentem, ut incredibile sit adeo ineptum à grauissimo viro, adeo imperitum à

sapientissimo Theologo opus prodijisse. Quis enim credat rem dignitatibus Physicis, ac Metaphysicis, & per se notis, atque indubitatis principiis certiolem, probabilem tantum esse, & problematicè iudicari; nisi fortè omnem cum Academicis & Pyronicis scientiam & evidentiam rerum de medio sublatam velis, & incertam parere persuasionem certissima quæque? Quis ista paradoxa capiat aut ferat, quæ tamen eo libello si usquam extet, velut totius disceptationis fundamenta ponantur?

Quare ut honori ac famæ consulam summi viri, malim quidvis aliud credere, quàm adeo enormiter falsa, pugnancia, absurda, & periculosa illi in mentem venisse; & si quid tale scriptum sit, illi ab aliquo male feriato homine suppositum, forte illius gratiæ & summi authoritatis minuendæ causâ. Certum mihi est ita de illo sentire esse laudatissimum, licet ex illa laudabilitate non ausim, nec assertivè, nec problematicè, iudicare, rem aliter quàm opinor, non posse se habere.

FINIS;





- 11 -

